


La Pathologie de Jean Fernel, ..
mise en françois par A.D.M. ..
Paris & Jean Guignard, 1655, in 80



DECLARATION DV TRADVCTEUR.

SI la connoissance des malades n'appartient qu'à ces Messieurs, qui s'estans par honneur reseruez pour le conseil, refusent le travail de l'operation, se contentans d'en discouvrir en un langage qui les rend plus admirables que necessaires, il ne seroit pas besoin de publier en nostre lãgue vulgaire les mysteres de l'Art, qu'ils couurent du mesme voile, qui sert communément à la veneration de ceux qui sont les plus sacrez. Mais puisque ces delicats Conseillers de la Nature se veulent bien descharger des operations manuelles, sur ceux que l'occupation des choses a diuertis de l'estude des mots, ils ne leur doiuent pas, ce me semble, enuier la cõmunication d'une theorie, de laquelle ils sont souuent obligez par occasion d'exercer la pratique, sans autre conseil que de leur teste. Le Cieux, les temps, les maladies, ne permettent



pas tousiours de chercher le conseil d'un costé,
& le secours de l'autre. Celuy qui trauiille au
remede n'est pas incapable de la connoissance
du mal : Il operera mieux s'il sçait pourquoy.
C'est le motif de cette Traduction, en laquel-
le si quelqu'un est interessé, qu'il me pardon-
ne : si i'ay mal-fait, qu'un autre fasse mieux,
ou qu'on me supporte : si un seulement en tire
quelque profit, à la bonne heure. L'Authheur est
assez connu, & la matiere assez importante.
Je ne m'excuse point touchant le style, & les
termes de la version ; si l'on m'entend, c'est
assez. Personne ne me doit blasmer d'auoir
fait ce que i'ay pû en un sujet que i'ay creu
deuoir estre utile, du moins à celuy pour qui
ie l'ay entrepris, il m'en sçaura gré s'il veut ;
cette reconnoissance n'est pas de mon faiët, non
plus que l'aprobation de cét ouurage par les es-
prits scueres des Critiques : la censure des-
quels ne m'esmounera qu'autant qu'elle sera
charitable.

L'An 1558. sur la fin du mois de Mars, & le 52.
Le fonzage, mourut à Paris Iean Fernel, natif
du Dioceſe d'Amiens, premier Medecin du Roy
Henry II. lequel fut inhumé à Sainct Iacques de
la Boucherie. Ce docte Perſonnage ayant em-
ployé avec grande louange pluſieurs années à
l'eſtude de la Philoſophie & des Mathematiques,
enfin ſe donna tout à la Medecine; Et l'ayant
fort heureuſement pratiquée, en traitta toutes les
parties par des eſcrits tout pleins d'une tres-pro-
fonde doctrine, & d'une admirable politeſſe. Si
bien qu'encore que la mort qui le preuint, l'ayt
empéché de les donner tous au public; comme
auſſi de mettre au iour les liures de ſes propres
Obſervations & experiences, tant ſouhaittez par
les plus habiles Medecins: neantmoins, ce que
nous en auons, luy a tant acquis de gloire dans
toute l'Europe, que la Faculté de Medecine de
Paris aura droit à iamais de ſe glorifier d'auoir ef-
leué vn ſi grand homme.

*C'eſt ainſi qu'en parle le grand Iacques Auguſte
de Thou, dans le vingt & vnieme de ſon hiſtoire.*



T A B L E
DES CHAPITRES
DE CE LIVRE,
Contenants les matieres qui y sont
traittées.

AV PREMIER LIVRE.

Où il est traitté des Maladies en general,
& de leurs causes.

Chap. I.  E que c'est que ma-
ladie. page 1.

Chap. II.  Qu'elle disposition est
contraire à la Na-
ture, & quelle ou-
tre l'ordre d'icelle. p. 5.

Chap. III. Que toute maladie est en la sub-
stance ou és parties du corps. p. 7.

Chap. IV. De la maladie par communicatiõ.
p. 11.

Chap. V. De l'estendue de la santé & de la

Table des Chapitres.

- maladie, & qu'entre les deux il se trouue
une constitution qui est neutre.* p. 13.
- Chap. VI. *Les premiers & suprêmes genres
des maladies.* p. 16.
- Chap. VII. *Les differences des maladies si-
milaires.* p. 17.
- Chap. VIII. *Les differences des maladies or-
ganiques.* p. 20.
- Chap. IX. *De la maladie Commune, qui est la
solution du continu.* p. 24.
- Chap. X. *Des maladies composees & meslees.*
p. 27.
- Chap. XI. *Des Causes des maladies; Leurs
genres & differences.* p. 34.
- Chap. XII. *Les genres des causes euidentes.*
p. 42.
- Chap. XIII. *De quelle façon l'air qui nous
environne altere nos corps, & excite les
causes interieures, & les maladies.* p. 44.
- Chap. XIV. *Par quelle raison & en combien
de sortes nos corps sont affectez du manger,
& du boire.* p. 49.
- Chap. XV. *Que les choses qui sortēt de nostre
corps, ou y sont retenues, deuiennent cau-
ses des maladies.* p. 58.
- Chap. XVI. *Que l'excez du mouuement ou du
repos est cause de maladie.* p. 62.
- Chap. XVII. *Que le sommeil & les veilles
sont souuent causes de maladies.* p. 65.

Table

- Chap. XVIII. *Que les passions de l'Ame causent des maladies.* p. 68.
- Chap. XIX. *Des causes evidentes qui ne sont pas necessaires.* p. 71.
- Chap. XX. *Causes interieures des maladies, combien il y en a : quelles sont ces causes ; & comment elles procedent des causes evidentes.* p. 71.
- Chap. XXI. *Quelle est la cause de chaque maladie.* p. 74.
- Chap. XXII. *Les causes des maladies implicites.* p. 83.
-

AV SECOND LIVRE.

Où il est traitté des Symptomes & signes.

- Chap. I. **C**E que c'est que Symptome en quoy il differe de la maladie, & de la cause. p. 86.
- Chap. II. *Les trois suprémes genres des Symptomes.* p. 90.
- Chap. III. *Differentes des Symptomes qui se retrouvent ; tant en l'affection simple, qu'és excrements.* p. 93.
- Chap IV. *Les causes des fonctions offensées.* p. 95.
- Chap. V. *Les causes interieures des Sympto-*

des Chapitres.

mes simples. p. 98

Chap. VI. *Que la douleur est un Symptome de l'atouchement : & qui sont les causes d'icelle.* p. 100

Chap. VII. *Des signes, & combien il y en a de sortes.* p. 103.

Chap. VIII. *Les genres suprémes des signes dommageables à la santé, qui donnent connoissance des maladies : & de leurs causes* p. 105.

Chap. IX. *Comment il faut par le moyen des signes aller à la recherche de l'endroit où est le mal.* p. 110.

Chap. X. *Le moyen de reconnoistre la maladie & la cause contenant d'icelle.* p. 116.

Chap. XI. *Les signes uniuersels de la cause antecedante ; & quelle humeur domine au corps.* p. 119.

Chap. XII. *Qui sont les signes qui tiennent rang des causes.* p. 127

Chap. XIII. *Les signes de Repletion.* p. 130.

Chap. XIV. *Des signes du bon sang, & de la vraie Plethore.* p. 133

Chap. XV. *Les signes de la Bile iaune surabondante.* p. 136.

Chap. XVI. *Les signes de la Melancholie prédominante.* p. 138.

Chap. XVII. *Les signes de la Pituite prédominante.* p. 140.

Table

Chap. XVIII. *Les signes de l'abondance des serofitez.* p. 142.

Chap. XIX. *Les signes des Vents.* p. 143.

AV TROISIEME LIVRE.

Où il est traitté des Pouls; puis des Veines.

Chap. I. **C**E que c'est que le Pouls, & combien il y en a de sortes. p. 145.

Chap. II. *Comment il faut observer & discerner le pouls.* p. 151.

Chap. III. *Les causes generales du Pouls.* p. 153.

Chap. IV. *Combien les Pouls naturels sont diuers : & par quelles causes ils sont alterez pendant la santé, & sans qu'on soit atteint d'aucune maladie.* p. 155.

Chap. V. *Qui sont les causes des Pouls, qui sont outre Nature.* p. 159.

Chap. VI. *De la connoissance des Maladies, par l'observation du Pouls.* p. 163.

Chap. VII. *L'observation des forces par le Pouls.* p. 166.

Des Vrines.

Chap. VIII. *Ce que c'est qu'Vrine, & comme elle demonstre les affections des hu-*

des Chapitres.

meurs, & des parties. p.172.

Chap. XI. Ce qu'il faut observer avant que
juger des urines. p.175.

Chap. X. Quelle urine est la meilleure, &
quel changement elle reçoit du sexe, du té-
perament, & de l'âge. p.178.

Chap. XI. Que signifie l'abondance & la
paucité d'urine. p.180.

Chap. XII. Que signifie l'odeur de l'urine.
p.183.

Chap. XIII. Que signifie chaque couleur des
urines. p.184.

Chap. XIV. Que signifie la substance de l'u-
rine dans les maladies. p.188.

Chap. XV. Que signifient l'urine claire &
trouble. p.189.

Chap. XVI. Des choses qui se trouvent mes-
lées parmi les urines. p.194.

Chap. XVII. De l'Hypostase, & des choses
contenuës dans l'urine. p.201.

Chap. XVIII. Exercitation du jugement des
urines. p.209.

AV QUATRIESME LIVRE.

Où il est traité des Fievres.

Chap. I. **C**E que c'est que Fievre, quelle
est son essence, & quels en

Table

- sont les signes.* p.217.
- Chap.II. *Les differences des Fievres.* p.220.
- Chap.III. *De la Fievre Ephemere.* p.224.
- Chap.IV. *De la Fievre Synoche.* p.227.
- Chap.V. *De la Synoche putride.* p.231.
- Chap.VI. *De quelle facõ les humeurs se pour-
rissent dans les grands vaisseaux, & qui
sont celles qui causent la Fievre continue.*
p.233.
- Chap.VII. *De la Fievre continue qu'on ap-
pelle Concluse, & de ses differences.* p.240.
- Chap.VIII. *De la Fievre Symptomatique.*
p.246.
- Chap.IX. *Que la cause contenant & pro-
chaine des Intermittentes n'est point en
l'habitude du corps.* p.250.
- Chap.X. *Quelle est la matiere des Inter-
mittentes; & en quel endroit du corps elle
reside.* p.255.
- Chap.XI. *Quelle est la cause des reuolutions;
& ce qui en change l'ordre & la forme.*
p.263.
- Chap.XII. *De la Fievre quotidienne.* p.266.
- Chap.XIII. *Des causes & des signes de la
Fievre tierce.* p.270.
- Chap. XIV. *Des causes & des signes de la
Quarte intermittente.* p.272.
- Chap.XV. *Des Fievres composees.* p.276.
- Chap.XVI. *Les degrez, causes & signes de*

des Chapitres.

la Fievre Heëtique. p.280.

Chap. XVII. *De la Fievre maligne & pestilente, qui est vne maladie de toute la substance.* p.285.

Chap. XVIII. *Du Charbon & du Bubon de la Peste.* p.289.

Chap. XIX. *Des Symptomes des Fieures.* p.293.

AV CINQVIESME LIVRE.

Où il est traitté des Maladies & Symptomes de chaque partie.

Chap. I. **D**E la douleur de Teste, & de ses causes. p.308.

Chap. II. *Les Symptomes de la faculté principale.* p.310.

Chap. III. *Les Symptomes du mouuement, & du mouuement.* p.320.

Chap. IV. *Les Symptomes des excrements du cerueau.* p.334.

Chap. V. *Les Maladies des yeux, leurs Symptomes & leurs causes.* p.338.

Chap. VI. *Les Maladies & Symptomes des Oreilles; leurs causes & signes.* p.348.

Chap. VII. *Les maladies & Symptomes des Narines; leurs causes & signes.* p.353.

Chap. VIII. Les defectuositez du visage & de la bouche; leurs causes. p. 356.

Chap. IX. Les maladies & symptomes de la Langue & du Gofier, avec leurs causes. p. 360.

Chap. X. Les maladies & symptomes des poulmons, leurs causes & signes. p. 365.

Chap. XI. Les maladies & symptomes du Thorax. p. 377.

Chap. XII. Les maux de cœur. p. 387.

AV SIXIESME LIVRE.

Où il est traitté des maladies des parties, qui sont sous le Diaphragme.

Chap. I. **L**es maux de l'Oesophage, & de l'orifice du ventricule; leurs causes & signes. p. 391.

Chap. II. Les maladies du ventricule, leurs causes & signes. p. 393.

Chap. III. Les Symptomes du Ventricule & leurs causes. p. 396.

Chap. IV. Les maladies du Foye, leurs causes & signes. p. 405.

Chap. V. Les maladies de la Vessie du fiel. p. 416.

Chap. VI. Les maladies de la Ratte, leurs

des Chapitres.

- causes & signes. p.418.
- Chap. VII. Les maladies du Mesentere & du Pancreas ; leurs causes & signes. p.423.
- Chap. VIII. Les symptomes du Foye & de la Ratte; leurs causes. p.426.
- Chap. IX. Les maladies des Intestins, leurs causes & signes. p.439.
- Chap. X. Les Symptomes des Intestins; leurs causes & signes. p.444.
- Chap. XI. Les maladies & symptomes du Fondement. p.458.
- Chap. XII. Les maladies des Reins ; leurs causes & signes. p.461.
- Chap. XIII. Les maladies de la Vessie; leurs causes, signes & symptomes. p.468.
- Chap. XIV. Les maladies de la bourse des Testicules, leurs causes & signes. p.483.
- Chap. XV. Les maux de la Matrice, leurs causes & signes. p.485.
- Chap. XVI. Les symptomes de la Matrice, leurs causes. p.491.
- Chap. xvii. Les causes de la sterilité; les signes de la grossesse, les symptomes, & leurs causes. p.503.
- Chap. xviii. Les differences des Gouttes, leurs causes & leurs signes. p.514.
- Chap. xix. De la Ladrerie. p.521.
- Chap. xx. De la Verole. p.525.

Table des Chapitres.

AV SEPTIESME LIVRE.

Où il est traité des maladies externes
du corps.

Chap. I. **L**es differences des tumeurs,
qui sont outre l'ordre de la
Nature. p. 533

Chap. II. Les tumeurs tubercules, & pustules,
qui viennent du sang. p. 535.

Chap. III. Les tumeurs, tubercules & pustules
qui viennent de la Pituite. p. 539.

Chap. IV. Les affections & eruptions bilieuses
qui paroissent au dehors. p. 547

Chap. V. Des Pustules. p. 552

Chap. VI. Des taches qui paroissent sur le
cuir. p. 555.

Chap. VII. De la Gangrene, & de l'absceſſe.
p. 558.

Chap. VIII. Des Playes. p. 562.

Chap. IX. Des Vlcères. p. 568.

Chap. X. Des os rompus, disloquez, ou gastez
en quelque autre façon. p. 573

Fin de la Table des Chapitres.



LA

PATHOLOGIE

OV

DISCOVRS DES

MALADIES.

LIVRE PREMIER.

Des Maladies & de leurs causes.

CHAPITRE I.

Ce que c'est que Maladie.



Es hommes n'eussent iamais appliqué leur esprit à la recherche ny à l'exercice d'aucun Art, qui peust servir à la guerison des maladies & à la conseruation de la santé, si la Nature eust sçeu maintenir elle mesme cette bonne disposition du corps qu'elle auoit premierement establee. Mais puisque c'est vn Arrest irreuocable que l'homme, aussi bien que le reste des choses qui viuent icy,

bas, subisse quelque iour la Mort, & soit cependant exposé aux diuerses attaques des iniures externes, qui l'environnent de tous costez, & l'agitent non moins qu'un foible vaisseau secoüé des vents & des flots au milieu d'une Mer dangereuse & pleine d'orages: Le principal deuoir d'un parfait Medecin, est de bien connoistre la disposition du corps, laquelle est si souuent & en tant de façons alterée, & n'ignorer aucune des Maladies qui la peuuent troubler. Nous auons desia, d'un stile assez estendu, demonstté en la *Physiologie*, qui est comme la base & le fondement de cet art, quelle est la Nature del'homme, quelles ses facultez, en combien & de quelles sortes chacune d'icelles exerce ses fonctions, & comment elles gouernent le corps, selon l'ordre & les reigles de la Nature, lors qu'il iouyt d'une pleine santé. Il est donc icy question de traiter plus succinctement de la mauuaise disposition du corps, ce qui concerne particulièrement la *Medecine*, & expliquer de quelles maladies & de quels symptomes il a coustume d'estre surpris, de quelles causes ces accidens procedent, & par quels signes on les reconnoist; car il semble qu'en la declaration de tout cela doiuue consister la pleine & entiere doctrine des choses qui sont contraires à la santé & outre la Nature, par l'action violente desquelles l'homme déchet de sa bonne disposition. Nous examinerons chacune d'icelles en particulier, & nous estendrons sur chaque point autant que le requiert l'exercitation & la pratique de la *Medecine*.

Et parce que les choses singulieres ne tombent point sous la science, nous commencerons à les enseigner par l'explication de leurs genres vni-

uersels, à ce' que le tout soit estably selon quelque ordre & avec raison. Or ces choses generales sont au nombre de trois, sçauoir est, Maladie, Cause & Symptome.

Quant à la Maladie, c'est vn certain effect produit au corps, par quelque chose qui en altere la disposition, contre l'ordre de la Nature. Les Grecs appellent cét effect *Diathese* ou disposition, & en Latin nous le nommons de ce mot *Affectus*, que toutesfois nous ne prenons pas icy en ceste subtile & precise signification dont Aristote s'est seruy, mais selon qu'il se peut en beaucoup de façons estendre à toute constitution du corps, soit qu'elle se retrouue en la substance, ou és qualitez & au temperament, ou en la conformation & figure, ou en la grandeur, ou au nombre. Or cét effect en quelque sorte qu'on le prenne, se forme d'ordinaire par vn mouuement & avec quelque mutation, & lors qu'une cause efficiente outre l'ordre de la Nature opere quelque changement, & fait de la violence au corps sur lequel elle exerce son action, elle produit effectiue-ment quelque chose, & ce sien mouuement s'appelle *Effectio*, que les Grecs nomment *energie*: le corps qui est l'obiet de ceste cause, souffre & reçoit ceste action, & ce sien mouuement est dit *affectio* & souffrance, qu'en Grec on exprime par le mot de *patheme* ou *passion*: Ainsi de ceste affection prouient enfin cét effect que les Latins appellent *affectus* & les Grecs *Diathese*, comme vestige ou trace de l'affection. La cause estant ostée, & l'effectio de cét agent, & l'affection du corps qui patissoit cessent tout auisi-tost; mais l'effect produit demeure quelquefois & reste manifestement separé de l'affection; comme on

void en vn vlcere fait au corps par vn fer tout rouge de feu, ou en vne playe receüe par quelque coup d'espée : d'autresfois il ne demeure pas, ains subsiste fort peu, & la cause estant separée, il s'efface, ou au mesme instant que l'affection cesse, ou incontinent apres; ainsi la fièvre putride, qui est vne chaleur outre nature, laquelle occupe toutes les parties du corps, s'en va tout aussi-tost, ou fort peu apres que l'humeur putride, qui la causoit, est euacuée. Il peut aussi finalement arriuer que l'affection estant legere & foible, ne produise aucun effet dont le corps soit affecté, comme quand on reçoit quelque petite pointure d'une espingle, qui ne fait que presser la peau sans la percer ny esgratigner, ou qu'estant près du feu sa trop grande chaleur incommode, ce que cessant, à peine peut on remarquer aucune trace de picqueure ny de brullore. Lors aussi qu'une vapeur acre & subtile, sortant d'un estomach remply d'impuretez, s'esleue à la teste & frappe les meninges & le cerueau, on sent bien de la douleur, & mesme souuent l'on tombe en delire & resuerie, en laquelle plusieurs fantasmes & chymeres troublent le sens & broüillent l'imagination : ces choses sont à la verité des affections de la teste, où pourtant il n'y a encor aucun effect contracté, non plus que dans le ventricule quand l'indisposition du foye l'empesche de bien digerer. La crainte, la tristesse, la cholere & les autres passions de l'ame, qu'avec beaucoup de raison l'on nomme *affections* de l'esprit, exercent & trauaillent l'homme, sans luy laisser en le quittant aucun effect dans le cœur, dont en suite il demeure affecté. Combien donc que les Grecs ne mettent point de difference entre ces

termes , *estre affecté & souffrir* , ils font neantmoins distinction de ces deux autres , *disposition & passion* ; comme encor établissent-ils de la diversité entre *souffrir & estre malade* ; celui seulement est dit malade qui est saisi de maladie , & auquel reste l'effect de l'affection ; mais on souffre & par l'affection ou passion , & par le mal qui en demeure : Car ces simples affections dont nous venons de parler , sont bien contre nature & travaillent le corps en plusieurs sortes , ce ne sont pas toutesfois des maladies , veu qu'elles ne sont pas du genre de ces effects qui resultent de l'affection , ains du nombre & categorie des Symptomes.

CHAPITRE II.

Quelle disposition est contraire à la Nature , & quelle outre l'ordre d'icelle.

OR toute constitution & disposition du corps est ou naturelle , ou non naturelle : & celle qui n'est pas naturelle est au delà de l'ordre naturel , ou contraire à la nature.

Celle-là est outre la nature & hors l'ordre d'icelle , laquelle outrepassse l'ordonnance de la même nature , sans luy faire pourtant aucune violence ; de cette sorte sont la mauuaise couleur de ceux qui ont la iaunisse , & le teint basané d'une peau toute haslée , & les rousseurs d'un visage moucheté de lentilles , & toute autre lege-

re defectuosité presque imperceptible à nos sens & à peine sensible à ceux mesmes qui en sont affectez. Ainsi disons nous d'un petit vlcere, qui ne fait ny douleur au corps, ny empeschement aux fonctions, est vne indisposition outre l'ordre naturel, non toutesfois contraire à la Nature, & qu'il ne merite pas le nom de maladie: car combien qu'il soit de mesme espece qu'un grand vlcere, à la qualité duquel il pourroit enfin paruenir par la continuation des causes efficientes (parce qu'estant similaire, l'accroissement ou la grandeur ne luy fait pas changer d'espece, comme à vne maison quel'on bastit;) d'autant neantmoins que la fonction n'en est pas notablement interessée, on ne le doit point estimer contraire à la nature.

La disposition contre l'ordre naturel est celle, qui non seulement outrepassé les limites de la Nature, mais encor l'offense & la violente, debilité ses forces & trouble manifestement ses fonctions, & ce quelquesfois immédiatement & par soy-mesme, quelquesfois par l'entremise d'un autre.

C'est pourquoy le Medecin, iugeant de tout selon l'importance des choses, prend sur tout garde à ce qui offense manifestement, & s'applique principalement à la cure de ce qui requiert son industrie & le secours de son Art. Ce qui donc contreuient à la nature n'est autre chose, que ce qui outrepassé l'ordre d'icelle par l'offense de son action, & n'importe qu'on die qu'il la trouble, ou qu'il l'empêche tout à fait: car comme quand l'action de la nature ou ne se fait point, ou se fait mal, par l'indisposition propre de quelque partie, nous disons avec verité que l'action est offensée; de mesme aussi lors que cet accident arrive par l'interiection de quelque chose estrangere,

comme quand la grauelle , la pierre , ou des phlegmes espais & endurcis bouschent le col de la vessie , & empeschent l'urine de sortir ; comme en ce point l'action reçoit de l'empeschement, ainsi peut-on dire qu'elle souffre de l'offense ; & quoy qu'aucune partie similaire ne soit blessée, l'organe toutesfois ne laisse pas d'en estre interessé. Mais lors que le mal vient seulement du dehors , l'action n'est ny empeschée , ny troublée ; car si le ventricule ne digere point , à cause que l'aliment est mauuais , il ne s'ensuit pas pour cela qu'il soit offensé : non plus que la concoction ne peut estre dite ou troublée, ou empeschée, ny que ce soit crudité , quand és deiections du ventre les pepins du raisin se retrouuent entiers , & tout de mesme qu'on les auoit auallez : l'aduoué qu'ils ne sont pas bien cuits , mais aussi ne sont-ils pas entierement cruds.

CHAPITRE III.

Que toute maladie est en la substance du corps , ou des parties d'iceluy.

TOut ce qui est en nous , est ou partie du corps, ou quelque chose contenue dans la partie. L'appelle partie ce qui est composé d'une substance solide & charnuë, & de cét esprit naturel, auquel reside la chaleur vitale, & qui sert à la faculté. Quant aux choses contenues dans le corps, ou és parties d'iceluy , ce sont les esprits diuagants & fluides, le sang, les humeurs & les excremens. Et mesme encor outre les parties &

les choses contenuës en icelles , il y a pareillement les fonctions qui en procedent.

C'est pourquoy , ayant dessein de m'attacher à la verité , sans m'amuser à pourfuiure les ombres des choses , ie desire qu'on retienne bien ces trois points, Parties , choses contenuës & fonctions. L'erreur & le vice qui fait décheoir chacune de ces choses de leur estat naturel , est vne indisposition & vne constitution outrepassante la nature , dont celuy qui se retrouveës choses contenuës , est la cause de la maladie ; celuy des parties est la maladie mesme , & celuy des fonctions est le symptome : car veu que la partie du corps est celle qui seule , premierement & de soy fait les fonctions , son integrité seulement & sa bonne constitution les parfait , & en cela consiste la santé ; mais estant infirme & vitiée , elle les gaste , trouble , & renuerse , & c'est ce qui seul est estimé maladie.

Sous le nom de Partie nous comprenons & la similaire , & l'organique ; dans l'organe sont comprises tant la partie principale , que les autres qui luy seruent : de sorte que non seulement la mauuaile disposition de l'humeur crystalline passe pour maladie , mais aussi celle qui se retrouve en toute autre partie del'œil , car le reste des parties qui composent cet organe , seruant au crystallin & luy aydant beaucoup à la fonction de voir , leur indispositiō troubleroit la visiō , laquelle n'appartiēt pas à la seule humeur crystalline , ains depend de l'œil entier. Partant la constitution de quelque partie que ce soit , contreuenant à la nature , est vne maladie , soit que cette partie affectée serue de principal instrument à la fonction , soit qu'elle ne face qu'aider à la principale. Mais

nous n'appellons pas maladie ce dont sont affectées les choses contenuës, comme les esprits, les humeurs & les excremens, bien que cela fust contre nature, veu que ce n'est point vn mal attaché à la substance de la partie, & que par consequent il n'incommode les fonctions, ny immédiatement, ny de foy, ains par l'entremise de la maladie seulement. Or cecy a besoin d'une plus grande explication.

L'ame & les facultez d'icelle, situées és esprits & en la chaleur naturelle, sont les premieres & principales causes efficientes des fonctions qui se font, & les parties en sont seulement les organes ou instrumens, sans lesquels elles ne feroient rien du tout. Et neantmoins nous ne laissons pas d'establiir ces mesmes parties pour causes principales & immediates des fonctions, tant parce que la substance de l'ame & de ses facultez nous est fort cachée, qu'à cause que l'aide des instrumens est nécessaire pour agir, ou que peut estre, selon l'opinion de plusieurs grands Philosophes, la substance de l'ame & de ses facultez estant immuable, elle ne puisse estre alterée par la violence d'aucune maladie, combien qu'elle soit souuent interpellée par le vice de l'instrument. Mais encor les parties ne sont elles pas simplement causes des fonctions, ains la constitution & disposition d'icelles; car la bonne constitution est cause que les fonctions se font bien, & la mauuaise empesche qu'elles ne se fassent comme il faut: l'une est santé, & l'autre est maladie.

Quant aux choses contenuës, veu que ce sont causes de maladies, leur bonne constitution donne la santé, & la mauuaise rend malade. Il ne faut donc point mettre au rang des maladies, ny la

pierre des reins, ou de la vessie, ny les flegmes caillez qui empeschent d'vriner, ny les vers des intestins, ny les cirons de la peau, encore que ces choses soient tout a fait contraires à la nature, mais ce sont seulement causes de maladies, & ce quand elles incommodent les parties du corps; car si elles estoient contenuës dans vn espace aussi grand qu'est celuy de l'intestin aueugle, sans que la partie en fust offensée, elles ne causeroient aucune maladie.

De plus, les humeurs qui pourrissent dans les veines, n'apportent aucune maladie, & n'offensent point l'action, que les parties effectiues ne soient auparauant atteintes & infectées de leur venin. De mesme la fièvre intermittente, l'épilepsie, l'hydrophobie, & plusieurs autres maladies, ont leurs causes oyseuses au dedans, pendant le repos & interualle du mal, & n'excitent aucune maladie, sinon lors qu'elles attaquent les parties.

Cecy me semble suffire pour faire entendre que nous auons en nous plusieurs choses contraires à la Nature, & mesme ce qui nous cause la mort, nous le portons quelquesfois couuert & assoupy, sans en receuoir aucune offense, & que pour cela nous deuenions malades: De mesme que souuent nous portons sur nous des glaiues & des poisons, sans en estre aucunement incommodéz. De là vient aussi que nous en voyons plusieurs, qui portans depuis long-temps cachée la cause de leur mort, meurent soudainement, sans auoir eu prealablement aucune maladie. Il faut donc seulement appeller maladie, ceste constitution contre nature, laquelle se retrouue & adhere en la substance de quelque partie du corps.

CHAPITRE IV.

De la maladie par communication.

PArtant la maladie qui se fait par communication, ne doit ny simplement ny absolument estre appellée maladie ; car il y a deux sortes d'indisposition ou constitution contre nature, dont l'une est propre à la partie affectée, & l'autre ne luy aduient que par sympathie & communication. L'indisposition propre à la partie, ou l'idio-pathie, est vn effect contre nature, produit en la partie, par quelque chose qui en altere immediatement la disposition : Mais l'indisposition par sympathie, est vn effect contre nature, communiqué à la partie par le vice d'une autre, ce qui se fait entrois façons.

L'une est quand la partie reçoit quelque chose qui luy est enuoyée d'ailleurs, outre l'ordonnance de la Nature. Ainsi les humeurs subtiles, ou les vapeurs corrompues qui montent du ventricule à la teste, troublent quelquesfois l'entendement, & quelquesfois excitent de la douleur par la distension ou erosion des meninges, d'autresfois elles representent aux yeux de vaines & feintes images, comme s'ils estoient trauaillez de quelques suffusions.

L'autre est quand l'escoulement & influence de la faculté trouue de l'empeschement qui la retient & en priue la partie, comme lors que l'espine du dos est affectée d'inflammation ou d'obstruction, il suruient vne resolution de cuisses, en

forte qu'elles perdent tout sentiment & mouvement : & les nerfs optiques estans bouchez , les yeux ne peuuent plus rien voir.

La troisieme sorte de maladie par communication se fait , quand la matiere necessaire pour agir , ne peut arriuer iusqu'au lieu où elle doit aller ; par exemple, s'il y a de l'obstruction és poulmons , ou que les muscles des costes soient relâchez , ou la poitrine estant percée , parce qu'en aspirant , il ne sort pas assez de vent du poulmon pour atteindre iusqu'au larynx, la voix, qui en est l'action , est ou supprimée , ou mesme perdue. Semblablement vne grande obstruction des veines qui sont vers le foye , empesche que le sang ne soit distribué par tout le corps , & fait que le corps deuient languissant à faute de nourriture, & en fin tombe en atrophie.

Or en quelque façon que ce soit , que la partie ou naturelle, ou animale reçoive de l'incommodité par communication, on dit bien qu'elle est affectée, & qu'elle souffre, puisque l'action d'icelle ou perit tout à fait , ou est du moins en quelque sorte empeschée , toutesfois elle n'est pourtant pas malade , & cette sienne affection n'est point vne maladie , n'estant pas immédiatement attachée à la partie mesme , c'est pourquoy on ne luy applique pas les remedes , & si on les y applique , ils ne luy seruent pas beaucoup. Partant quand la maladie est en quelque partie, l'action d'icelle est necessairement offensée ; & non pas au contraire , car il ne s'ensuit pas que l'action de la partie estant offensée , la partie soit aussi-tost semblablement malade. Mais enfin la partie qui a esté trauaillée par la communication d'une autre, contracte quelquesfois de la vn mal

qui luy deüient propre, & la sympathie se tourne en idiopathie. Or combien que ce mal soit deuenu propre, si n'est-il pas primitif, ains postérieur & de la seconde passion. Les Grecs nomment celui-là *Protopathie*, & cettuy-cy *Deuteropathie* ou *Hysteropathie*. Ainsi d'une maladie en vient vne autre, & souuent vn mesme mal est & maladie & cause de maladie. Cecy suffise pour faire entendre ce que c'est que maladie.

CHAPITRE V.

Que l'estenduë est grande tant de la santé que de la maladie, & qu'entre les deux il se retrouue vne constitution qui est neutre.

Combien que l'animal puisse naistre d'une si bonne constitution de corps, & viure avec tant de regime, qu'il paruienne en pleine & ferme santé iusqu'à l'extreme vieillesse; il est toutesfois necessaire que cette constitution recoiue plusieurs & diuers changemens par le cours des temps & de l'aage; Tous ceux mesme qui sont bien sains, n'ont pas vne pareille constitution, ny consequemment vne mesme santé. Aussi la santé de chacun des hommes, est elle souuent alterée par l'attaque violente de l'air, du manger, du boire, du dormir, des veilles, du mouuement, des bains, de la fascherie, de la douleur, & des autres causes, tellement qu'il est manifeste que la santé doiue estre contenue dans vne estenduë bien spacieuse.

Les mesmes raisons persuadent que la maladie n'est non plus serrée à l'estroit, & que la constitution de celuy qui commence d'estre malade, n'est pas alterée au point de celle d'un autre qui s'en va mourir, & qu'enfin toutes les maladies ne sont pas également grandes & fascheuses. Partant l'excellente & parfaicte symmetrie du corps ou de ses parties, à laquelle rien ne se peut adiouster, est la santé souveraine & supreme. La constitution qui s'esloigne vn peu de celle-cy, & qui pourtant ne nuist point aux actions, & n'est pas manifestement fascheuse à l'animal, ne laisse pas d'estre santé, mais imparfaite. Celle qui en suite peche iusqu'à estre euidentement incommode à l'homme, & à offenser notablement ses fonctions, est maladie, laquelle croissant peu à peu conduit finalement à l'extremité, qui est la mort.

Entre ces deux constitutions generales, il s'en retrouve vne moyenne qu'on ne peut bien determiner, n'estant ny santé, ny maladie, ains seulement vne constitution neutre; car elle ne participe ny de l'une, ny de l'autre, & fait que le corps n'est ny sain, ny malade, mais comme entre les deux. Il y en a qui s'amusent à remarquer les subtiles & diuerses acceptions de ce mot, qui, à dire vray, ne seruent pas beaucoup en la Medecine, & apres lesquelles plusieurs se sont embrouillez l'esprit de diuers Sophismes. Cette constitution neutre a son estendue, distinguée en trois ordres, sçauoir est, en neutre insensiblement sain, en neutre insensiblement malade, & en neutre iustement moyenne entre ces deux. Elles sont toutes faciles à discerner quand on deuient ou de sain malade, ou de malade sain: ce qui est iustement

au milieu de ces deux extremittez, differe beaucoup de l'une & de l'autre; ce qui est sain d'un costé, & de l'autre malade, n'est pas neutre, ie l'appellerois plustost malade. Aristote estimant que la santé consistast en l'integrité des actions, & la maladie en l'offense d'icelles quelle qu'elle fust, n'a point reconnu de milieu entre ces deux extremes, ains les a iugez priuatifs, de mesme que la veüe & l'aveuglement.

Bref toute constitution du corps, soit saine, neutre, ou malade, se diuise en trois ordres, de façon qu'en toute la vie humaine se retrouuent neuf sortes de constitutions. La santé tres-parfaite & la mort, en sont les extremes souuerainement contraires. Celuy qui ayant esté tres sain, dechet peu à peu, iusqu'à finalement mourir, il passe par toutes ces constitutions de la vie, lesquelles sont de cette sorte enchainées. Santé tres-parfaite, bonne santé, santé foible & petite: Constitution neutre tendante à santé, Absolument & tout à fait neutre, Neutre inclinante à maladie: Maladie simple & legere, Maladie griefue & mediocrement perilleuse, Maladie tres-grande & tres-dangereuse: La mort suit apres comme la boucle & le dernier anneau de la chaisne. La constitution qui se retrouve au milieu est indiuisible; toutes les autres s'estendent fort; toutesfois l'expert & sçauant Medecin en sçaura bien discerner les bornes & determiner l'estendue. Ces constitutions n'admettent point de diuision selon la diuersité des especes, mais different seulement en ordre & en degré.

CHAPITRE VI.

Les premiers & supremes genres des maladies.

D Autant que toute maladie est attachée à quelque partie du corps, il est conuenable d'en establir les premieres differences par la difference des parties. Or les parties sont de deux sortes, les vnes similaires, les autres organiques. La maladie qui trouble la bonne disposition & la naturelle constitution de la partie similaire, s'appelle similaire, celle qui gaste la symmetrie de l'organe, se nomme organique; & parce que les parties tant similaires, qu'organiques ont cela de commun, qu'elles subsistent par la continuité, assemblage & liaison des particules qui les composent, la dissolution d'icelles est vne maladie commune aux vnes & aux autres, & en incommodé esgalement les fonctions.

Il y a donc en tout trois premiers & supremes genres de maladie, la similaire, l'organique, & la commune, qu'on appelle ordinairement solution de continuité. Et cette distinction est fondée non en l'essence de la maladie, mais en la diuersité des parties.

CHAPITRE VII.

*Les differences des Maladies
similaires.*

Quant aux plus bas genres de ces trois premiers, & aux espèces qui leur sont vraiment subordonnées, on les tire de la variété des vices qui se retrouvent en la partie contre l'ordre de la Nature, ou des façons dont chaque partie vient à décheoir de son tres-bon & naturel estat. En la partie similaire trois choses sont considérables, la matiere, le temperament, & la forme, laquelle est la souveraine perfection du tout. La santé consiste en la naturelle cōstitution & symetrie de ces trois: par consequent l'immoderation & desordre de chacun d'iceux, qui sera reconnu contraire à la nature, doit estre estimé maladie;

La maladie de la matiere, est vne immoderation; celle du temperament, vne intemperie, & celle de la forme, vne corruption: & ces choses arriuent à la partie similaire, de laquelle consequemment on conte trois maladies, sçauoir est, l'immoderation de la matiere, l'intemperie, & la corruption de la forme, ou de toute la substance. Or que dans la partie similaire il y ait trois choses distinctes, que toute la substance soit separée de la matiere & du temperament; que chacune d'icelles ait ses propres defauts; que de là prouiennent trois differences de maladie similaire, iel'ay demonsté plus au long dans vn autre de mes ouvrages.

Maintenant quant aux intemperies, on en trouue au nombre de huit, quatre simples, chaude, froide, humide, seiche: & autant d'accouplees, scauoir, chaude & seiche, chaude & humide, froide & seiche, froide & humide, lesquelles deuient maladies lors qu'elles excedent & offensent manifestement les fonctions. Ces intemperies sont quelquesfois pures; d'autresfois elles procedent du vice des humeurs ou intemperées, ou corrompues. Pour la matiere immoderée, elle est molle ou dure, lasche ou retrecie, subtile, ou grossiere, rare ou dense & ramassée; & ces vices de la matiere sont des maladies. Mais par les mots de toute la substance, nous entendons & les esprits qui sont en nous, & la diuine chaleur d'iceux, & les facultez, & la forme mesme.

Or les maladies de toute la substance, sont celles qui premierement, & de soy attaquent la substance des parties. De ces maladies, les vnes sont euidentes, les autres cachées. Les euidentes sont celles qui par des causes manifestes ruinent la substance des parties & du corps: de cette sorte sont les vlcères malins, la phthisie, la pourriture du foye, de la ratte, & des autres parties, causée par l'intemperie des premieres qualitez: comme aussi la dissolution des esprits par les excessiues veilles, ieunes, trauaux, & douleurs violentes; & l'extinction de la chaleur naturelle par suffocation, ou par vn froid extreme & penetrant. Les maladies cachées sont celles qui attaquent toute la substance par des causes occultes: de ces maladies les vnes sont veneneuses, les autres contagieuses, & les autres pestilentes; ces dernieres prouiennent d'un air infecté par les influences des Astres: comme la fièvre pestilente, les charbons, & le bubon de

la peste; & celles-cy sont fort pernicieuses. Il y en a aussi d'autres moindres, comme la rougeole, & le pourpre, qui ne font que tacher la superficie de la peau, sans qu'il y ait rien d'esleué : & les petites veroles, qu'on dit estre des eruptions de pituite: mais toutes ces maladies sont assez ordinaires. Outre celles-cy, il en arriue quelquesfois d'autres qui ne sont pas communes, & qui procedent de causes nouvelles, & dont on n'auoit point encoroüy parler, comme vne certaine qu'Hippocrate appelle Paraplegie, des ardeurs bruslantes, des pesanteurs poussiues, fièvres sudorifiques, lesquelles de nostre temps ont couru & affligé beaucoup de Prouinces: les siecles passez en ont produit d'autres, dont on n'a plus de memoire, parce que les Anciens n'en ont rien laissé par escrit: ceux qui yiendront après nous en remarqueront d'autres au temps à venir, lors qu'il y aura quelques concours, melanges, & dispositions d'influences astrales, capables de les produire. Les maladies contagieuses arriuent d'ordinaire par le rencontre & l'attouchement de quelque venin externe, comme l'estourdissement que cause la torpede, ou l'opium & l'hydrophobie, & les piqueures des scorpions, les blessures que font les autres bestes veneneuses, ou les armes empoisonnées. De cette sorte sont aussi la verole, la lepre, & les autres qui peuuent prouenir du melange de celles-cy: les maladies veneneuses tirent leur origine d'un venin engendré au dedans, ou d'un poison de dehors. Du venin interieur viennent le mal caduc, la suffocation de la matrice, causée par la putrefaction de la semence, la syncope par quelque grumeau de sang corrompu, & vne certaine palpitation de cœur. Les maladies qui procedent du poison que

l'on a prins, tiennent de la nature de ce poison là, qui nous est nuisible par la contrariété de toute la substance : telles sont celles que causent l'aconit, l'if, le colchicum, la cantharide, le liéure marin, & beaucoup d'autres semblables.

Or toutes ces differences de maladie similaire, sont comprises sous vn genre, & ie m'estonne que les Anciens, au grand dommage de la Medecine, les ayent, ou passées sous silence, ou mal à propos rapportées à l'intemperie ou simple putrefaction. Ainsi donc auons nous comme dans vne table, marqué toutes les especes des maladies similaires, lesquelles néant moins cy après il sera besoin de mieux expliquer par le menu.

CHAPITRE VIII.

Les differences des Maladies Organiques.

L'Essence de chaque organe consiste en la figure & conformation propre à l'exercice des fonctions auxquelles il est destiné. Pour ce nous appellons organes ou instrumens, & l'os du crane, & celuy de l'espine du dos, bien qu'ils soient simples & similaires quant à leur composition ; & que toutesfois on n'attribuë point ce nom d'organe à la portion du muscle, laquelle retient quelque chose de chair, de veine, d'artere & de nerf, & est dissimilaire, d'autant que ceste partie manque en la perfection de la figure, demeurant rude, informe & incapable de seruir à aucune fonction. Chaque instrument doit encor auoir yne certaine grandeur,

au dela de laquelle tout ce qui passe est estimé vicieux. De plus, les organes ou instruments qu'on appelle dissimilaires, ont vn nombre certain & desfiny de parties similaires desquelles ils sont composez, & il est necessaire que ces parties conuiennent bien l'vne à l'autre, & soient entr'elles adiestées, disposées & vnies comme il faut.

L'organe donc qui est accommodé & fourny de tout ce qui est requis à l'execution des fonctions qui luy sont propres, possède vne conformation, vne grandeur, vn nombre de parties, & vn aiencement d'icelles, selon qu'il conuient aux iustes loix de la Nature. La symmetrie & constitution naturelle de ces choses, est la santé de l'organe; & le vicietrop immoderé de chacune d'icelles, est vne maladie organique. De laquelle par consequent il y a quatre differences, qui procedent du vice, l'vne de la conformation, l'autre de la grandeur, la troisieme du nombre, & la derniere de la situation; dont on peut faire encor des subdiuisions plus particulieres: car plusieurs choses estans requises à la conformation propre pour bien exercer les fonctions, comme la figure, le conduit, la cavité, la polisseure ou la rudeſſe, chaque alteration, changement & indisposition d'icelle, decheante de l'estat naturel, doit estre nommée maladie de l'organe.

Ceux-là sont affectez de maladie de la figure qui ont les iambes tortuës soit en dedans, soit en dehors, & ceux qui ont la teste trop ronde ou trop longue. La maladie des conduits par où les choses contenuës passent & sont distribuées, est vne trop grande dilatation, comme celle de la prunelle en l'œil, des veines és varices, & de l'artere en l'aneyrisme. En ce genre l'astriction & l'obstruction

font opposées à la dilatation. L'astriction se fait lors que les conduits deuiennent trop estroits par quelque cause externe qui les restreist, comme quand la seicheresse fait retirer la peau & enferme les pores, ou que le gosier & l'œsophage sont oppressez de squinancie. C'est obstruction quand les conduits sont bouschez ou rendus plus estroits qu'il ne faut, par quelque matiere qui tombe dedans & s'y attache, lequel vice n'arriue pas seulement à la peau, mais aussi se retrouue souuent es veines, es arteres, es intestins, & en tous les conduits. La concauité estant ordonnée pour receuoir & contenir, d'où elle a prins le nom de sein & de receptacle, les maladies sont la trop grande capacité, comme l'amplitude de l'estomach, de la poitrine, & de la bourse des testicules: & le restreissement immodéré, comme la depression de la poitrine, qui dispose à la phthisie, & quand l'estomach est tellement reserré à force de medicamens, qu'il n'est plus capable de receuoir les viandes en suffisante quantité. La repletion est aussi vne maladie de la concauité, comme celle des ventricules du cerueau en l'apoplexie, le surfaix en la matrice, le calcul en la vessie: non toutesfois qu'il faille dire avec Auicenne que le calcul mesme soit maladie, non plus qu'une fiesche enfoncée dans le corps, ou l'humeur grossiere qui bouche les veines, mais seulement cause de maladie: & la constitution du calcul, la repletion de la vessie, comme aussi l'obstruction sont la maladie de l'organe, laquelle empesche que la vessie ne recoiue & contienne assez d'vrine. La maladie de polisseure est quand le ventricule ou la matrice sont trop vnis, polis & lubriques, lesquels selon l'ordonnance de la Nature doiuent estre vn peu rudes & raboteux, pour retenir

avec plus de fermeté. La maladie de rudesse se rencontre en la trachée artère, quand on deuient enroué par quelque humeur acre qui enaspist & raclele gosier. Toutes les susdites maladies difformēt & gastent la bonne conformation de l'organe.

Quant à la maladie de la grandeur, elle se fait lors que quelque partie, ou deuient excessiuement grande, ou demeure plus petite qu'il ne faut; comme lors que la langue est si longue qu'elle ne peut tenir dans la bouche, ou qu'on a la teste trop grosse, ou bien comme en vn certain personnage que l'on voit, lequel a les cuisses plus longues que le reste du corps. Semblablement quand la langue est trop courte, la teste trop menüe, les doigts trop petits & les cuisses trop racourcies. Or ces deffectuositez & montruositez ou nous viennent de naissance, ou se contractent depuis par l'abondance ou disette de l'aliment. Quant à celles qui procedent de l'affluence des humeurs, elles ne se doiuent pas rapporter icy, mais aux tumeurs outre la Nature, que nous dirons cy-apres estre des maladies composées.

La maladie du nombre consiste tant en la superfluité, qu'au manquement, & ce nombre superflu est ou de chose naturelle, comme d'un sixiesme doigt, d'un troiesme testicule, que nous auons veu excéder en tous ceux d'une certaine famille; ou de chose tout a fait outre la Nature, comme les veruës & les cals. Pour le defaut, il est seulement de chose naturelle, laquelle ou manque dès la naissance, comme quand quelqu'un naist manchot, ou est par apres retranchée, comme l'amputation de la main, & ce ou du tout, ou en partie. Quand quelque partie est tout a fait ostée de l'organe, c'est seulement vne maladie du nombre, que l'on dit

estre au reste del'organe: car le doigt estant coupé, la maladie du nombre demeure dans la main. Mais la partie n'estant pas du tout retranchée, ains comme à demy coupée, c'est maladie tant du nombre, que de la grandeur, & ce mesme mal est compris sous l'un & l'autre de ces genres.

Finalement les maladies de la composition viennent & de la situation, & de la conuenance. Les maladies de la situation sont les os démis de leurs places, les dents crochuës ou qui se iettent en dehors, les descentes de l'epiploon & de l'intestin dans la bourse des testicules, les mains attachées aux espaulles, comme les a ceste femme sans bras que l'on promene en diuers lieux pour estre veuë. Celles de la conuenance sont quand la société & connexion mutuellë des parties est peruertie, comme en ceux qui sont lousches. En ce genre il se rencontre vn certain vice qui fait que les doigts, ou les paupieres, ou le fondement, ou le col de la matrice, ou les levres de la bouche se ioignent, ferment & vnissent, & ce ou de naissance, ou par vlcere. Quelques vns ont appellé cela continuité vicieuse, & l'ont rangé mal à propos sous le genre de maladie commune. Voila donc le nombre des differences qui se retrouuent és maladies organiques.

CHAPITRE IX.

De la maladie commune, qui est la solution du continu.

A Verrhoës soustient fort & ferme que la solution du continu appartient proprement à la

partie similaire, & que la partie organique ne se dissout, que quand les os, les nerfs, les fibres, les veines, & les arteres d'icelle sont ou coupez, ou rompus. Pareillement la diuulsion ou separation de la peau d'avec le nerf, du nerf d'avec la veine ou d'avec l'os, laquelle se fait ou avec la main, ou par quelque autre instrument, il ne l'appelle pas solution du continu, mais vice de composition & de conuenance, & dit que c'est vne maladie organique: parce qu'il estime que l'essence de l'organe consiste en la seule liaison des parties similaires. Mais il se trompe bien fort, veu que, comme nous auons quelquesfois demonstree, la vraye raison de l'organe est la conformation, à cause de laquelle nous donnons mesme ce nom d'organe ou d'instrument à la veine & à l'artere. Par cōsequēt puis-que la solution du continu gaste & corrompt la figure & conformation de la chose, c'est bien de soy & premierement vne maladie de l'organe, de laquelle il n'est pas moins affecté que la partie similaire.

On a donné plusieurs noms à la solution du continu selon les differentes parties. Car la solution de l'os en trauers s'appelle fracture, & celle qui se fait en long se nomme fente. Les solutions du cartilage n'ont point encore de nom. Les solutions du nerf sont la picqueure, l'incision en trauers, la fente en long, & la contusion. Les solutions de la veine & de l'artere sont l'ouuerture & dilatation de leurs bouches, l'incision en trauers, & la fente en long. Toute solution des membranes s'appelle ordinairement rupture. La solution legere de la peau, qui se fait seulement en l'epiderme, est dite escorcheure; mais celle qui penetre en la seconde peau, ou mesme iusques dans la chair, est ou playe, ou vlce-

re. De toutes les parties le seul cœur ne souffre point de solution, qu'aussi-tost l'animal ne perde la vie. Il y a plusieurs autres solutions des parties, tant similiaires qu'organiques, lesquelles n'ayans point encore de noms propres, nous les appellons du nom commun de tout le genre. Voila les genres plus communs & les differences auxquelles l'on doit rapporter toutes les maladies qui exercent & trauaillent le corps en quelque façon que ce soit.

Orie sçay que plusieurs ne sont pas bien d'accord touchant ceste couleur iaune ou rouge qui vient en la tunique cornée, laquelle fait que tout ce qui se presente deuant les yeux semble iaune ou rouge, & empesche que l'œil ne puisse bien voir. Comme aussi touchant le tintement ou bourdonnement des oreilles, lequel estant grand empesche l'ouye: touchant la mauuaise odeur des narines, par laquelle la faculté de l'odorat est troublée; & l'amertume de la langue, qui corrompt le iugement du gouft. Les vns rapportent ces vices à vn nouveau genre de maladie, qu'ils appellent maladie de seconde qualité: les autres à l'intempérie, veu que les secondes qualitez procedent des premieres. Mais les vns & les autres font paroistre en cela vne tres-grande ignorance des choses: dautant qu'il est manifeste que ces maux sont des symptomes & non pas des maladies: car si d'auenture ils offensent & gastent l'action, ils ne le font pas neantmoins immediatement & de soy, mais par l'entremise de quelque nouvelle maladie. Ainsi souuent vn symptome attire apres soy vne nouvelle maladie, & deuient la cause d'icelle: comme les douleurs yehementes, ou les veilles, qui empeschent la digestion de l'estomach, non pas de soy, mais parce qu'elles engendrent vne intempérie froide. Quant

aux maladies causées par sortilèges, enchantemens & autres Arts meschans & magiques, ou mesme enuoyées de Dieu, ils outrepassent les bornes de ce dessein, & quoy que la cause en soit du tout outre l'ordre de la Nature, d'autant neantmoins qu'elles se retrouuent en quelque partie, elles se peuuent rapporter chacune à son genre. C'est ainsi que nous examinons chaque maladie en particulier, à ce qu'apres auoir osté toute ambiguité, la chose paroisse plus claire, & qu'il ne reste aucun lieu de chicaner là dessus. Iusques icy nous auons suffisamment deduit les differences des maladies simples.

CHAPITRE X.

Des maladies composées & meslées.

LE corps est molesté & trauaillé quelquesfois d'une maladie seule, & quelquesfois de plusieurs. On appelle seule & simple maladie, celle qui n'est que dans vne partie du corps, soit qu'elle empesche & incommode vne ou plusieurs actions. Telle est l'interperie de l'estomach, laquelle renuerse, non quelque vne de ses actions naturelles, mais toutes ensemble. La fièvre n'est aussi qu'une seule maladie: car bien qu'elle occupe toutes les parties similaires du corps, d'autant neantmoins que par leur assemblage & liaison conuenables elles ne font qu'un corps, on peut dire semblablement qu'en ce cas elles n'ont qu'une maladie. Il ne s'ensuit pourtant pas que la fièvre soit premierement & de soy residente dans tout le corps, parce

qu'il est organique, & ceste maladie ne le concerne point tout entier, sinon par accident. Au reste l'inflammation du pied & l'inflammation de la main ne sont pas vne maladie seule, parce qu'encore qu'elles soient de mesme espece, elles ne sont pourtant pas iointes l'une à l'autre. Mais la diuersité paroist mieux en l'inflammation du foye, & en l'obstruction des reins ou de la ratte: dautant que ces maladies sont distinctes & separées tant par leurs genres, que par les parties qui en sont affectées.

Or la maladie qui est seule, se diuise en deux genres: car elle est ou simple, ou composée. Simple est celle qui se rapporte à vn seul & simple genre de maladie, soit similaire, soit organique: comme, vne intemperie chaude, ou vne simple obstruction des reins. De plus, la maladie simple est ou solitaire, ou accompagnée. Quand la cause efficiente est retirée, & qu'il ny a aucun grief symptome qui oblige le Medecin d'y prendre garde, c'est lors vne maladie solitaire, comme la simple intemperie. Mais celle-là est accompagnée, que la cause presente & contenante foment & entretient au dedans, comme l'obstruction: ou qui est suiuite de quelque symptome fascheux, comme la nephritique, ou qui fait vne cruelle douleur, ou qui cause quelque syncope. Ces differences ne concernent pas seulement les maladies simples, mais se peuuent aussi accommoder à tout genre de maladies tant composées, que meslées & distinctes.

On appelle maladie composée, celle qui se forme de l'assemblage de plusieurs autres, lesquelles se rencontrent dans vne mesme partie, & font par leur concurrence vne maladie seule, comme l'intemperie chaude & l'intemperie seiche du ventricule,

desquelles accouplées se fait vne intemperie composée. De mesme si quelque partie est affectée d'un vlcere, & d'une intemperie chaude tout ensemble, il en resulte vne maladie seule & composée. Quand le nez est escaché & rompu, il y a lors un vice de la figure, & vne obstruction des narines, dont se fait vne maladie composée: Ainsi que le retranchement de la moitié du doigt, ou de la moitié de langue, est vne maladie composée & du nombre & de la grandeur. Lors qu'une carnosité, comme le polype des narines, naist au dedans de quelque conduit, il se fait & vne obstruction & vne maladie du nombre, lesquelles ne sont qu'une maladie, mais composée, ou bien un seul mal qui tient de deux maladies. Les maladies manifestement composées sont le phlegmon, l'œdeme, le scirrhe, & les autres tumeurs outre nature: car en ces maux il y a de l'intemperie, & du vice de la figure, & souuent de la solution du continu. Toutes ces differences se rencontrent donc en la maladie qui est vne.

Au reste nous disons que ces maladies là sont plusieurs & en nombre, lesquelles occupent plusieurs & diuerses parties du corps. Et celles cy sont ou implicites, ou connexes, ou disiointes. Implicites, quand les parties où elles se retrouuent, conspirent à un commun usage: car en ce cas elles sont comme enuelopées & meslées les vnes parmy les autres, d'autant qu'elles incommodent vne même fonction, comme la pleuresie & l'asthme; de l'assemblage & concurrence desquelles maladies procuiennent certains symptomes communs, qu'à peine peut-on expliquer ou separer, tels que sont la toux & la respiration difficile.

Les maladies consequentes ou connexes sont celles, dont la precedente est cause de celle qui suit,

ce qui se fait en deux façons ; quelquesfois cela vient de la nature du mal , comme de la pleuresie s'enfuit la fièvre necessairement & immediatement, en sorte que ces deux sont comme enchainées & attachées l'une à l'autre : quelquesfois aussi cela procede de la condition des parties , par quelque communicatiō. Or cela peut arriuer en trois sortes. Premièrement de la commune societé des parties, qui fait que l'estomach estant indisposé , le cerueau en reçoit de l'incommodité par l'entremise des nerfs , & la matrice estant mal affectée , les mamelles s'en ressentent par la communication des veines. Secondement de la situation penchante & plus basse, d'où vient que les vices des reins se communiquoient à la vessie , & que les excremens de la teste tombent sur les poulmons, dans l'estomach, sur les nerfs & sur les jointures , & que de là procedent l'asthme , la toux , la paralysie , & la goutte. En troisieme lieu cela peut venir de la force des parties , dont la plus vigoureuse , plus forte & plus noble , depose les excremens sur la moins noble & plus imbecille : comme le foye mal disposé , qui se descharge sur l'estomach , dans les intestins , sur les aisselles & sur les aynes , & finalement sur tout le corps : par mesme raison l'inflammation d'iceluy est suiuite de la dyssenterie, du scirrhe & de l'hydropisie. Or ces maladies sont de telle sorte consequentes, que la premiere est cause de la suiuite, non par son essence, ny immediatement , ains par l'entremise des excremens & de la defluxion. C'est pourquoy nous les appellons maladies connexes ou enchainées, d'autant qu'on ne peut exterminer la derniere, si la precedente n'est ostée. Quant aux maladies qui se succedent par quelque commutation , & dont la premiere se change en celle qui la

fuiuoit, elles sont à la verité consequentes, mais rarement les appelle on connexes, parce qu'il n'arriue gueres que celle qui precede soit cause de la suiuite. De ceste sorte l'inflammation du poulmon suit la pleuresie, sans aucune connexion, & la phrenesie se change en lethargie, & la paralyfie pro- uient de la colique.

Les maladies disiointes & separées sont celles qui resident en des parties distantes & esloignées les vnes des autres, lesquelles n'ont ny fonction ny vsage qui leur soit commun, & dont l'une ne communique point son mal à l'autre; comme l'ulcere du pied & l'obstruction des reins, la langue couppee & le pied demis. Or par le nom de partie ie n'entends pas icy celle que nous auons autres- fois definie estroitement & à la rigueur, mais tout ce qui sert de siege au mal, & où il s'est comme confusement artaché.

Quand donc plusieurs maladies se rencontrent en vn mesme endroit, elles sont vne maladie composée, autrement non, & plusieurs maladies ne sont qu'une composition de maladies. Car quelquesfois vne maladie similaire se mesle avec vne autre similaire comme vne intemperie chaude avec vne autre qui est seiche, d'où resulte vne intemperie coniointe: quelquesfois vne similaire se rencontre avec vne commune, lors par exemple qu'un ulcere est accompagné de chaleur. Troisièsiement vne organique avec vne autre organique, comme en un doigt lequel étant deuenu plus grand qu'il ne faut, seroit quant & quant tortu. En quatriesme lieu quelque maladie commune avec vne organique, comme lors que la main se renuerse par vne blesseure receüe en icelle. Finalement vne similaire avec vne organique: de ceste façon un phlegmon.

c'est à dire vne tumeur dure & rouge , formé en l'estomach, ou en la main, n'est ce semble qu'une maladie, de mesme qu'il n'y a qu'un endroit affecté, mais elle est composée & d'intemperie, & du vice de la figure, & d'une occulte solution du continu. Quand quelque phlegmon est manifestement conioint à un ulcere, il s'y retrouve une plus evidente composition de trois diuers genres de maladies. La maladie qui est composée en l'une de ces dernieres façons, n'est pas située dans l'organe seul, ny dans la seule partie similaire, mais en toutes les deux ensemble : & pource-elle trouble & renuerse immédiatement & de soy l'action de l'une & de l'autre, quoy que diuersement. Mais combien qu'un mesme temps & l'erosion de la tunique cornée, & la sortie de l'vuee, & la distorsion de la prunelle, & une apparente suffusion, se rencontrent en l'œil, elles ne constituent pas neantmoins une maladie composée ; mais ce sont de vraies maladies implicites, parce qu'estans residentes en des parties diuerses, elles nuisent à la mesme fonction de veoir.

Le vice de chaque particule appartenante à la structure de l'organe, est estimé maladie de l'organe entier, de mesme que la pleuresie, le mal nephritique & la goutte sont maladies de tout le corps, bien qu'elles ne soient pas dans tout le corps, & qu'elles ne se trouuent pas attachées à une mesme partie. Ainsi l'erosion de la tunique cornée, & la distorsion de la prunelle, sont des maladies de l'œil, mais elles ne sont pas situées ny en tout l'œil ny en la mesme particule d'iceluy. Les parties où elles se retrouuent, composent bien un seul organe, toutesfois leurs maladies ne sont pas une maladie composée ; autrement nous serions contraints d'ad-

trouuer que la pleuresie, la douleur nephritique, & le desboitement du pied, sont vne maladie composée, qui concerne tout le corps.

Or combien que ces choses soient vrayes, neantmoins la maladie qui est, non premierement, ains par accident en la partie similaire, doit estre estimée maladie de l'organe. Car quand la main est trauaillée d'intemperie chaude, ou d'inflammation sans aucune tumeur, l'organe n'est point offensé, & n'a aucune maladie. D'où vient donc, & pourquoy est-ce que son action ne se fait plus? Parce que pour agir, l'organe a besoin du secours & de la bonne constitution des parties similaires, sans lesquelles il ne peut rien. Ces parties estans donc offensées, l'organe ne scauroit bien faire sa fonction: & lors la fonction de l'organe est troublée & renuersée, sans estre pourtant affecté immediatement & de soy: ce que pareillement nous auons cy dessus confirmé touchant la maladie par communication. Or quoy que cette maladie similaire offense en second lieu la fonction de l'organe, toutesfois la maladie organique ne peut au contraire en aucune façon nuire à la partie similaire, & la maladie similaire n'est pas cause de maladie, pour blesser en second lieu l'action de l'organe: car bien qu'il ny ait point de cause qui ne blesse l'action en second lieu, & par accident, il ne s'ensuit pas neantmoins qu'au contraire tout ce qui en second lieu blesse l'action, soit cause de maladie.

Des causes des Maladies.

CHAPITRE XI.

Les Genres & differences des Maladies.

TOut ainsi que les Philosophes qui sont adonnez à la contemplation de toutes choses, s'employent à la recherche & connoissance des causes avec une diligence particuliere, d'autant que l'on ne peut sçavoir ce dont on ignore l'origine : de meisme aussi l'observation des causes qui produisent les maladies, est principalement necessaire aux Medécins, lesquels rapportent tout à l'usage & commodité du corps ; car sans cette observation, ils ne sçauroient ny preuenir les maladies, ny les bien guerir. Et de fait, les causes sont tellement entrelassées, enchainnées, & attachées aux maladies qui en prouiennent, qu'elles ne cessent de les fomenter & entretenir en forte, qu'il n'est pas possible d'exterminer jamais aucune maladie tant que la cause en demeure. Ceux qui suivent, non la vraye, temeraire, & hazardeuse des Empiriques, mais la raisonnable façon de guerir, taillent en premier lieu de retrancher ces causes efficientes, & conseruantes, à ce qu'après cela le reste de la guerison soit plus facile. Partant on doit bien s'informer de toutes les causes qui sont principalement necessaires pour reconnoistre & pour guerir les maladies.

Or les Philosophes en establisent quatre gen-

res, qui sont, materielle, formelle, efficiente, & finale. La matiere qui sert de sujet à la maladie commēçante, c'est le corps humain, auquel, comme nous auons desia dit, reside la maladie, de mesme que l'effigie d'un homme ou d'un cheual en quelque masse de bronze. Car l'humeur peccante n'est pas (selon que plusieurs se sont fausement imaginez.) le sujet materiel de la maladie, quoy qu'on puisse dire que c'en est en quelque façon la matiere efficiente. La forme est l'essence de la maladie introduite & empreinte dans la matiere. La fin est la lēsion & la ruine des actions. L'efficiente, laquelle à vray dire, est la plus excellente cause, & la principale de toutes, est celle qui altere & change le corps, & qui le fait dechoir du bon estat auquel il estoit auparauant. C'est d'elle que nous nous proposons de rechercher & remarquer les differences & les forces.

Le corps humain est quelques fois incommodé de soy-mesme, & par des principes interieurs; quelquesfois il est interessé par l'injure des choses qui sont hors de luy : de là procedent les deux premiers & suprémes genres des causes efficientes, dont les vnes nous sont internes, & comme nées avec nous, lesquelles nous accompagnent dès le moment de la naissance: les autres sont accidentelles & estrangeres, qui nous attaquent par dehors après que nous sommes nez : les internes sont ou naturelles, ou nō naturelles & tant les vnes que les autres prennent leur origine, ou de la semence des parens, ou du sang de la mere.

Les naturelles nous alterent & changent peu à peu par le cours des temps & des aages, & nous menent insensiblement à la vieillesse & à la mort. De ce genre sont, & la contrariété des elemens

dont nostre corps est compolé, & la vertu aëtiue de nostre chaleur naturelle, par laquelle, bien que nous soyons sustentez & maintenus tant que nous viuons, nous ne laissons pourtant pas d'estre semblablement alterez & minez avec le temps, les vns plustost, les autres plus tard, selon que le cours de la vie d'un chacun a esté prescript & limité, qu'encor à peine pouuons nous accomplir suivant les loix de la nature.

Les causes qui sont en nous outre l'ordre naturel sont celles, lesquelles estans, prouenuës du vice de la semence, ou du sang maternel, produisent en nous finalement certaines maladies. Telle qu'est la semence des parens, & principalement celle du pere, telles deuiennent les parties similaires & spermaticques. La semence bien temperée cause vne bonne temperature en ces parties-là, celle qui est chaude & seiche, ou froide & humide, leur communique vne semblable temperature naturelle. Pareillement de quelque mal que le pere soit atteint quand il engendre, il le transfere à l'enfant par l'entremise de la semence : parce que la semence estant deriuée de tout le corps, ainsi que nous auons autrefois demonstré, elle contient en soy la vertu, tant de la maladie, que de la cause d'icelle. C'est pourquoy les vieillards, & les valedudinaires, font des enfans imbecilles; les graueleux, goutteux, epileptiques, laissent à leur race vne constitution vicieuse, par laquelle ils encourrent enfin semblables maladies, que pour ce sujet on appelle hereditaires, de façon que les enfans succedans aux peres, ne sont pas moins heritiers de leurs maladies, que de leurs biens, voire mesme le sang maternel lequel sert de premier aliment à l'enfant pendant qu'il est encor au ventre

de la mère, est aussi cause du temperament & de la constitution, & imprime pareillement ses vices au corps de l'enfant, mais non pas si fort comme fait la semence. Pource la vertu & nature de la complexion tient beaucoup de la constitution qu'a la mere estant enceinte; les viandes mesmes dont les femmes grosses vsent plus souuent, & plus volontiers en leur manger, sont par après agreables à leur fruiët, celles qui sont addonnées au vin, font des enfans qui aiment bien à en boire, & celles qui se medicamentent souuent pendant leur grossesse, laissent à leurs enfans vne inclination aux remedes. Le mesme se remarque des maladies, car si vne femme enceinte vient à estre surprise de fièvre quarte, vers le milieu de son terme, l'enfant dont elle accouchera sera en suite longtemps trauillé de semblable maladie: & si au neuuesme mois elle est attaquée de pleuresie, son enfant y sera pareillement subiect; comme aussi certaine femme ayant eu vn absces en l'oreille au huiëtisme mois de sa grossesse, l'enfant qu'elle fist eut toute sa vie les oreilles purulentes. Ce qui fait assez voir que l'enfant dás le ventre de la mere contracte des inclinations & dispositions à certaines maladies, non seulement en la premiere conformation par le vice de la semence, mais encor durant tout le temps qu'il demeure en la matrice, tant par le sang maternel, que par les autres humeurs, & par les alimens. Cés commencemens de nostre estre nous importent donc de beaucoup, & ceux ne sont pas peu fortunez qui ont vne bonne naissance. Partant ce seroit vn grand bien pour la race des hommes, s'il n'y auoit que ceux lesquels se portent bien & sont parfaitement sains, qui s'employassent à faire des enfans. Car si les Laboureurs

ſçauent choiſir le meilleur grain pour enſemencer leurs terres, ayans experimenté que d'une ſemence ſlaſque & gaſtée on ne peut eſperer qu'une chetive moisſon ; combien plus exactement cela ſe devroit-il pratiquer en la propagation de noſtre eſpece ?

Maintenant quant aux cauſes eſtrangeres & accidentelles, lors qu'elles nous aſſaillent par le dehors après la naiſſance, elles en excitent ſouvent d'autres au dedans de nous. Par conſequent de toutes ces cauſes là les vnes ſont externes, & les autres internes. Les internes ſont ſubdiuiſées en antecedentes & en contenantſes, ou prochaines. De façon qu'il y a en tout trois ſortes de cauſes eſtranges, qui nous ſont devenir malades, ſçavoir eſt, Externe ou evidente, Antecedente & Contenantſe. L'evidente eſt celle qui fait exterieurement de la violence au corps, ou aux choſes qu'il contient. La contenantſe eſt celle qui reſidente au corps adhere & eſt immediatement coniointe au mal. C'eſt pourquoy l'eſpée n'eſt pas la cauſe contenantſe de la playe qu'elle fait, d'autant qu'elle ne reſide pas dans le corps, bien qu'elle en ſoit fort proche & le touche de pres. La cauſe antecedente eſt celle laquelle eſtant dans le corps avant la contenantſe, produit & meut ceſte meſme contenantſe. De toutes ces cauſes, les evidentes ſont premieres & tres neceſſaires, & d'icelles prouiennent toutes les autres. Ce ſont elles que le vulgaire conſidere particulierement, & qui ſeules ont eſté remarquées des plus anciens Medecins, leſquels, comme dit Celiſe, retranchoient de leur Art tout ce qui eſtoit obſcur.

Au reſte la dependance & l'alliage des ſuſdites cauſes eſt tel, que la contenantſe vient de l'antecede-

dente, & l'antecedente de l'euidente: & parce qu'elles sont toutes liées par vne certaine suite & continuation, la premiere en ordre est l'euidente, de laquelle les autres procedent, la derniere est la contenant: toutes celles qui sont moyennes entre ces deux s'appellent antecedentes. Or il n'est pas necessaire que toutes ces trois causes se rencontrent en la production de chaque maladie, quelquesfois il n'en interuient que deux, & quelquesfois vne seule. Quand par l'excez du manger & du boire les veines se remplissent si fort, qu'elles viennent enfin à s'eslargir ou à rompre, en sorte que la pleuresie s'en ensuiue, la cause euidente de ceste maladie est l'immoderation des viandes; la rupture ou eslargissement des veines, & l'escoulement du sang, sont causes dites antecedentes toutes situées dans le corps: mais l'abondance du sang escoulé & pourrissant sous les membranes ou dās les muscles du costé, est la cause contenant, tant de la pleuresie que de la fièvre qui l'accompagne. Si la fièvre putride est excitée par l'usage des bains astringens, ces bains sont la cause euidente; l'astriiction de la peau & l'empeschement de la transpiration sont des causes antecedentes, & la pourriture qui s'en ensuit est la cause contenant & prochaine.

Or ie ne scaurois bien supporter l'ignorance de certains modernes, tellement stupides, que leur esprit, quelque effort qu'il face, ne peut discerner la cause contenant d'auec la maladie. Ces pauvres gens, sans prendre garde à la doctrine des anciens, appellent pleuresie le sang attaché au costé, & disēt que la fièvre est la pourriture des humeurs: comme si les humeurs estoient des parties du corps, & que les maladies y eussent leur siege. Mais pour dire vray il n'y a aucune fièvre ny en l'humeur, ny

és esprits, car elle reside toute au cœur & dans les parties du corps; neantmoins avec ceste difference, qu'en l'ephemere l'intemperie des parties depend de la ferueur des esprits: en la putride, de la pourriture des humeurs: & en l'hectique elle est premierement & de soy attachée à la substance des parties. En ces choses que ie viens d'alleguer, on peut remarquer vne certaine concurrence & liaison de tous les trois genres de causes. Mais lors que par vn vent du midy, la defluxion tombe sur les poulmons, en bousche les arteres & fait deuenir asthmaticque: ou quand par quelque trop grande agitation du corps, le calcul tombé des reins en la vessie, ferme le canal d'icelle, & excite des douleurs nephritiques, il ne s'y rencontre que deux causes, sçauoir est, l'euidente & la contenante: & quand on reçoit vne playe par quelque coup d'espee, il n'y a qu'une cause seule, qui est l'euidente. D'où l'on peut reconnoistre que la cause externe & euidente se retrouve necessairement en toute maladie, & que la bõne constitution tant du corps, que des causes interieures, ne sçauroit estre alterée ou gastée, ny dechoir iamais de son estat naturel, sinon par l'attaque violente des causes externes: & qu'en suite la cause contenante est plus necessaire que l'antecedente.

Or il reste maintenāt à establir d'autres differences de causes efficientes des maladies: dautant que chacune d'icelles opere tantost de soy, & tantost par accident. Elles operent de soy, lors que c'est par leurs propres forces & immediatement: elles operent par accident, quand elles en excitent d'autres qu'elles interposent pour agir. L'eau froide respandue sur le corps, le rafraischit immediatement & de soy, mais elle l'échauffe par accidēt, en ce que

fermant les pores de la peau, elle fait rentrer la chaleur naturelle, laquelle estant ainsi ramassée au dedans, reprend de nouvelles forces & retourne avec plus de vigueur en la superficie & aux extremittez du corps. Au contraire la scammonée, & la rheubarbe, de soy eschauffent le corps par dedans: mais elles le refroidissent par accident en euacuant la bile chaude & bouillante.

Aureste toute cause efficiente est, ou principale, ou aydante, ou celle sans laquelle rien ne se feroit. La principale & parfaicte fait par sa propre vertu, mesme estant seule, ce dont elle est cause. L'aydante ne fait rien toute seule, mais elle contribue son secours à la production de l'effect. Les Grecs l'appellent concause, c'est à dire, qui cause avec vne autre. La troisième n'opere rien du tout & ne confere aucune chose à l'effect, toutes fois rien ne se peut faire sans elle. Mais il faut esclaircir cecy par des exemples manifestes. Es purgations qui se font par artifice, la cause principale c'est la propriété purgatiue du medicament; la cause aydante, c'est la qualité chaude qu'ont tous les purgatifs, laquelle mesme fortifie & augmente leur vertu: de ce genre sont aussi toutes les choses qu'on melle parmy le medicament pour le rendre plus efficace, comme le gingembre, le nard, & plusieurs autres semblables drogues. La cause sans laquelle rien ne se feroit, est nostre chaleur naturelle, sans laquelle la vertu du medicament ne pourroit sortir son effect, ny sa puissance estre reduite en acte. Pareillement en la procreation des maladies, quand vne saison froide excite quelque defluxion sur les iointures, la cause principale & parfaite est la froidure de l'air & l'abondance des humeurs superflus: L'aydante est la subtilité des humeurs: la cause sans

laquelle rien ne se feroit, c'est la foiblesse des ibin-
tures & l'ouuerture des conduits par où passent les
humeurs qui decoulent. Entre les causes sans les-
quelles rien ne se feroit, on met ordinairement le
lieu, le temps & l'instrument. Toute cause conser-
ue & augmente son effect, pendant qu'elle luy est
preiente & qu'elle s'employe apres luy; mais quād
elle est ostée elle n'opere plus rien, & son effect per-
siste & demeure quelquesfois, d'autresfois il perist
tout a fait, ou aussi-tost, ou peu de temps apres.

CHAPITRE XII.

Les Genres des causes euidentes.

CEluy qui a de naissance vne bonne constitu-
tion du corps, viura long-temps en santé, s'il
ne vient à estre offensé par quelques choses exter-
nes. Mais s'il est attaqué par l'immoderation d'i-
celles, il ne pourra pas longuement demeurer en
ce bon estat, ains en decherra finalement, & tom-
bera en vn estat pire, que nous appellons maladie.
Celuy-là donc acheuera le cours naturel de la vie,
lequel ne sera point agité par les efforts violens des
choles nuisibles qui sont hors de luy. Mais qui est
ce qui en est exempt pendant toute sa vie? Qui est
celuy qui ne se laisse quelquesfois surprendre aux
flatteuses caresses de la volupté? ou qui s'estant
exactement contenu dans les iustes termes d'vne
temperance modérée, ne reçoie quelque reuers
de la fortune inconstante & volage? Il est certes
bien difficile d'euitier toutes les surprises de tant de
choses qui nous assaillent de tous costez. C'est
pourquoy il faut soigneusement remarquer, les

causes en vertu desquelles ou nous persiftons en nostre premiere fanté, ou nous tombons en maladie.

De ces causes les vnes font necessaires, que nous sommes necessairement contrains de supporter, & sans lesquelles nous ne scaurions viure : les autres ne sont pas necessaires, & nous les pouuons euitter. Entre les necessaires sont, l'air qui nous enuironne, le manger & le boire, le mouuement & le repos, le dormir & le veiller, les choses qui sortent de nostre corps, ou qui demeurent en iceluy, & les passions de l'ame. Les causes non necessaires sont vn coup d'espée, vn coup de pierre, le rencontre de quelque beste dangereuse, & tout ce qui est fortuit & casuel. Les attaques inopinées de celles-cy ne peuuent estre ny preueuës par art, ny prudemment euitées : Les autres le peuuent estre, & pourcel'art les considere & les obserue. Or de ces causes necessaires les vnes conseruent la fanté du corps, les autres la ruinent, les autres la restablissent. D'où vient que les causes efficients sont ou salutaires, ou contraires à la fanté, & des salutaires, les vnes maintiennent la' fanté presente ; les autres reparent celle qui estoit perduë. Celles-là maintiennent & conseruent la fanté, lesquelles sont moderées & ont du rapport avec le corps : comme au contraire la fanté est restituée par des causes opposées à la maladie, & autant esloignées de la mediocrité, mais d'une façon toute diuerse.

P'estime que de cecy l'on peut assez reconnoistre que la mesme cause conferée & rapportée à diuerses choses, est dite & propre & contraire à la fanté. Car les causes, sont du genre des relatifs. L'air temperé & les autres causes moderées, conseruent l'homme qui se porte bien, au mesme estat de sa

bonne constitution : mais si ces causes excèdent la moderation, elles l'offensent & font deuenir malade. Neantmoins le mal qui prouient d'un air excessiuelement chaud & estouffant, est corrigé, & la santé renduë par un air qui soit esgalement froid. Et c'est air qui est ainsi salutaire à l'un, peut estre en même temps contraire à la santé de quelqu'autre, & luy causer de la maladie. Ces trois sortes de causes efficientes se rapportent aussi à trois parties de la Medecine ; car les conseruatrices concernent la partie qui traite de la conseruation de la santé. Les salutaires regardent celle qui enseigne le moyen de guerir les maladies. Et les autres qui contreuient à la santé, appartiennent toutes seules à ceste presente partie ; c'est pourquoy il est à propos de deduire icy les vertus de chacune en particulier.

CHAPITRE XIII.

De quelle façon l'air qui nous enuironne altere nos corps, & excite les causes interieures & les maladies.

NOUS auons dit en la Physiologie que l'air qui est diffus autour de nous seruoit & de nourriture conuenable, & de rafraischissement à la chaleur naturelle & aux esprits des animaux qui ont du sang, comme aussi pour en recevoir les superfluitez fumeuses : & qu'à raison de ces trois offices il estoit le protecteur de leur vie & le conseruateur de ce chaud qui les anime. Nous a-

nous encor en ce mesme lieu remarqué que l'air qui nous enuironne conseruoit & maintenoit la chaleur de tout le corps par le poux des arteres, & celle du cœur par la respiration.

Pendant que nous viuons, nous sommes par necessité contraincts de respirer, & l'esprit ne peut estre retenu ny conserué sans l'ame, ny l'ame sans l'air & le souffle: l'air que nous respirons a d'autant plus de force & d'efficacité que celuy qui nous enuironne, qu'il entre plus abondamment, & avec dauantage de violence. En respirant l'air remplist premierement la bouche, les narines, le cerueau, le gosier, les poulmons, le cœur, & toutes les arteres; puis delà il est aussi-tost comme en vn moment épandu par toutes les parties transpirables du corps, & communique premierement aux esprits, puis aux humeurs, & finalement aux parties la substance & les qualitez dont il est doué, quelles qu'elles soient. Celuy qui est serein, subtil, pur, bien temperé, réueille nos esprits, attenuë le sang, réjouyt le cœur, éclairecit l'entendement, rarefie le corps, fortifie la chaleur naturelle, excite l'appetit, aide à la digestion, & procure la dissolution & éuacuation des excremens. Celuy qui est grossier, épais, chargé de nuées, plein de broüillars, & troublé du meslange de quelques choses estrangeres, assoupit les esprits, épaisist & corrompt le sang & les humeurs, rend le cœur flasque, l'entendement obscurcy, & le corps pesant, ferme les pores, affoiblist la chaleur naturelle, offense la digestion. & empêche la dissolution des excremens.

Quant à l'air qui est diffus autour de nous, il nous altere pareillement en penetrant iusqu'au fonds de chaque partie: & non seulement il nous

altere, mais encor les choses les plus solides & inaniniées, comme sont le bois, les pierres & les metaux, que nous remarquons souffrir du changement par la difference de l'air, ou sec, ou pluvieux, tant est grande la vertu de l'air qui se coule par tout. Aussi est-il beaucoup plus efficace que les autres causes évidentes & nécessaires, pour produire des maladies, & voit-on davantage de personnes tomber malades par le changement des temps & des saisons, ou en passant d'un lieu bien sain, pour demeurer dans un mauvais air, ou quand ils'esseue quelque bourrasque de pluie, de vent, ou de choses semblables, ou par quelque autre inclemence de l'air, que par le changement du viure. Parce qu'un air seul atteint plusieurs personnes tout à la fois, duquel il n'est pas si facile de d'éviter les incommoditez, que des autres causes nécessaires: en penetrant soudain à la partie tres-noble du cœur, au cerneau, & en tout le reste du corps, il entache tout de ses vices, & est presque seul auteur des maladies aiguës.

Or l'air cause les maladies, ou par l'immoderation & l'excès de ses qualitez, ou par le vice de sa substance, ou par quelque soudaine & nouvelle mutation qui luy arriue: l'intemperie de ses qualitez qui excedent, ou en chaleur, ou en froidure, ou en humidité, ou en seicheresse, soit qu'elle prouienne ou du climat, ou de la situation, ou de la saison, ou de la disposition du Ciel, elle change & altere les esprits, les humeurs & le corps même. Le climat & la region bien temperée, le lieu élevé, decouvert & bien éventé, la constitution naturelle du printemps, l'estat de l'air doux & tranquille, comme quand le zephire souffle, tout cela est fort salubre, & fait qu'on se porte bien, le corps

n'en estant aucunement troublé. Le pays trop chaud, le lieu exposé au Midy & au Soleil, l'Esté brullant, & les vents Meridionaux, enflamment les esprits, brulent le sang & les humeurs, augmentent & irritent la bile; d'où viennent plusieurs maladies aiguës; ils ouurent aussi les pores, rendent les corps lasches & extenués, ruinent leur substance, dissipent la force de la chaleur naturelle, & si ces causes persistent long-temps, elles abbrevent la vie, hastent la vieillesse & conduisent bien-tost à la mort. Le pays froid, le lieu tourné vers le Septentrion, l'huyér rude, & les vens de bize, assoupissent les esprits, espaisissent les humeurs, ce qui en effect reprime bien les maladies aiguës, mais en excite d'autres fort^{es} longues, avec quantité de defluxions. De plus, ces causes ferment les pores, condensent le corps, maintiennent la substance, en augmentent la chaleur naturelle, excitent l'appétit, aident la digestion, & prolongent grandement la vie. Le pays humide, le lieu qui regarde l'Occident, le temps moite & pluvieux, obscurcissent les esprits, chargent le corps de beaucoup d'humeurs superflus, qui rabbatent la chaleur naturelle, debilitent l'estomach & causent des cruditez; d'où proviennent des defluxions, des fièvres longues, des cachexies ou enfleures, & des vlcères pourris de tres-difficile cure. Et mesme les corps deviennent mollasses, lasches, foibles & inhabiles aux fonctions de la vie. Le pays sec, le lieu sablonneux à l'aspect del' Orient, la saison seiche, subtilient & esclaireissent les esprits, consomment les humeurs superflus, & empeschent que celles qui sont utiles ne se corrompent; les corps en deviennent solides & plus forts, & les jointures plus fermes: neantmoins parce que cela condense & rend les hu-

meurs seiches & endurcies, il s'en ensuit des obstructions : neantmoins c'est excès de seicheresse n'est pas si nuisible que les autres susdits. Voila donc en combien de sortes l'intemperie de l'air peut causer des maladies.

Quant à la substance de l'air elle a encor beaucoup plus de force pour engendrer des maladies, & combien qu'elle soit si simple & tellement uniforme que peut estre n'est elle subiecte à aucune corruption ; elle est toutesfois souuent entachée de beaucoup d'ordures & de choses estrangeres, elle deuient humide par l'abondance des vapeurs & des brouillars : elle s'infecte par l'expiration des terres, des eaux, des charongnes & autres vilenies & pourritures : Les semences de la peste causée par l'influence des astres, ou engendrée dans l'air mesme, la souillent & gastent. Ces choses donc entrent en nous & penetrent par tout nostre corps, avec l'air que nous respirons, & contaminent par leur contagion tant les esprits que les humeurs, chacun en sa façon, & produisent diuerses maladies, presque toutes occultes.

Au reste les soudaines & extraordinaires mutations des lieux, des saisons & des temps ont souuent causé des maladies, principalement quand de salubres elles sont deuenues mauuaises & contraires à la santé. Hippocrate & Aristote ont diligemment remarqué dans leurs escrits, quelles maladies prouiennent d'ordinaire par le changement des temps, par l'influence des astres plus insignes, par la reuolution des saisons & par la conuersion des vents, assignant pour cause de cela le danger qu'il y a de passer d'un contraire à l'autre, & de l'humide au chaud ou au froid. Mais les grands voyages & les changemens de pays fort esloignez,

sont bien encor plus dangereux, d'autant que chaque region a sa constitution particuliere à cause de la nature du terroir, & des eaux, de la situation, de l'aspect, & des vents, à quoy il n'est pas facile de se bien accoustumer. Le changement aussi que l'on fait d'un air clos & renfermé à un autre plus grand, plus libre & plus éuenté, quoy que tres-salubre, a plusieurs fois esté domma-geable aux imbecilles, & à ceux qui releuent de maladie: parce que cela agite le corps & les humeurs trop promptement, & avec de la vehemence. Finalement l'impetuosité des vents n'exercent pas moins les corps, que feroit quelque violente exercitation; sans conter les qualitez des terres & de l'air qu'ils retiennent & cōmuniquent. Quant à l'air qui n'est point agité des vents, & qui demeure tranquille, bien qu'il semble doux & agreable, si toutesfois il n'est un peu éuenté, il ne laisse pas de se corrompre ny plus ny moins que de l'eau croupissante: mais un bon vent, principalement de bize, purge & nettoye l'air des ordures qu'il peut auoir contractées.

CHAPITRE XIV.

*Par quelle raison, & en combien de
sortes nos corps sont affectez du
manger & du boire.*

Les choses que nous mangeons & beuons, Lmeritent le second rang en l'ordre des causes euidentes, & leur vertu n'est gueres esloignée

de celle de l'air. Il est bien vray que l'air attaque plus promptement grand nombre de personnes; mais la viande & le breuvage affectent le corps plus fortement & avec plus d'opiniaftreté, d'autant qu'ils luy fournissent vne matiere permanente & inherente. Les vices des viandes que nous prenons, & des breuvages que nous auallons, seruent de matiere pour engendrer les maladies, & de nourriture pour les entretenir, d'où aussi les maladies prouuiennent quelquesfois d'elles mesmes, sans effort d'aucune cause euidente. Voire mesme il ne peut arriuer de maladie ny de la part de l'air, ny des passions de l'ame, ny des autres causes éuidentes, que le corps & les humeurs n'y soient disposéz; & si cette disposition vient du manger & du boire, cela veritablement contribuëra beaucoup dauantage à la generation des maladies. De façon que pour dire en vn mot, presque toutes les maladies sont filles de la gourmandise, & la reconnoissent pour mere, bien qu'elles ne laissent pas d'auoir quelque autre pour pere.

Tout ce qui entre dans nostre corps, agit, & nous altere, ou par son temperament, ou par sa matiere. ou par toute sa substance. L'eau froide & la laiëtüë, rafraischissent le corps par leur temperament, & par leur qualité, l'eau actuellement & de fait, & la laiëtüë par puissance: le feu & le vin échauffent, cettuy-cy en puissance, & celuy-là par énergie. Ce qui par la subtilité de sa substance penetre & atténüe les humeurs, ce qui par la grossiereté de sa matiere, restreint & condense le corps, ce qui s'attache & adhère par sa viscosité: ou au contraire ce qui racle & deterge, tout cela agit par sa matiere. Finalement ces choses là agissent

en nous par toute leur substance, lesquelles par vn rapport & familiarité de toute leur substance nous nourrissent, ou qui nous estans entierement contraires & ennemies, ruinent & perdent nostre nature: nous appellons cela aliment, & cecy venin ou poyson. Nous auons ailleurs exactement déclaré ce que c'est que toute la substance, montrans que l'aliment n'est pas ce qui nous est familier par son temperament, ou par sa matiere, mais bien par l'affinité de toute sa substance, & que pour cette cause il se conuertist en nostre substance, & en augmente la quantité, à quoy le venin est directement opposé. Or ces choses nous alterent simplement, & d'une seule façon: mais il y en a plusieurs autres qui alterent en deux sortes, & quelques vnes en trois. Celles qui alterent en deux sortes, sont le vinaigre, sçauoir est, par son temperament, & par sa matiere; & la laiétuë, par son temperament, & par toute sa substance; & le pain sans leuain, par sa matiere, & par toute sa substance. Celles qui nous alterent en trois sortes sont, par exemple, le vin blanc lequel échauffe, extenuë, & nourrit.

Tout ce donc qui se conuertist en la substance de nostre corps par vne familiarité de toute sa substance, est aliment; & tout ce qui change en quelque façon que ce soit, la bonne & naturelle constitution de nostre corps, est médicament. Si quelque chose affecte & altere quant & quant le corps, pendant qu'elle se conuertist en iceluy, c'est lors vn aliment medecinal, lequel estant receu dans l'estomach, & excité par la vertu de nostre chaleur, fait paroistre les qualitez & les forces dont il est douë, mesmes les plus cachées & comme assoupies, & par icelles exerce l'estomach

dans lequel il demeure, & est dauantage retenu : combien que quelquesfois l'estomach le cuise & le dompte. Car tel est l'accord naturel de l'agent & du patient, que se recontrans dans vne matiere commune, ils s'exercent l'un l'autre, en sorte que tout ce qui agist souffre & patisse aussi quelque chose en agissant. Mais si ce qu'on a prins a tant de force que la chaleur de l'estomach ne le puisse surmonter, alors cela se va répandant par tout le corps, ou en substance, ou en vapeur, & frappe le cœur & le cerueau, & altere tout le reste du corps, ainsi qu'on remarque clairement au vin qui est tres-fort, en l'ail, en l'oignon, & en plusieurs autres choses. Cependant donc que cela s'écoule de l'estomach dans les intestins, dans les veines mesaraïques, & dans le foye, il imbibe de ses qualitez tout ce qu'il peut atteindre: car bien que la chaleur de l'estomach ait rabbatu quelque chose de sa pointe, si ne l'a elle pas pourtant tout a fait émouffée, ny ne l'a entierement dépouillé de toutes ses premieres facultez, ains il reste encor quelque peu de sa qualité premiere dans le sang, qui se répand par les veines, tant grandes que petites, & passe dans chaque partie du corps. Nonobstant donc que le sang ait perdu la forme de l'aliment duquel il est engendré, il en retient toutesfois en quelque façon les qualitez & les autres vertus, & les communique aux parties, à la nourriture desquelles il est employé.

C'est pourquoy ce qu'Aristote a dit, que l'aliment estant au commencement dissemblable, nous est enfin rendu semblable, ne se doit pas entendre de la semblance de toutes les qualitez, mais plutost de celle de la substance, & de la forme. Car la lactuë, quoy qu'elle ait souffert du changement

par la cuisson, ne laisse pas de raffraischir l'estomach & le corps, & d'engendrer vn sang qui participe du froid. l'estime aussi que ceste autre sentence celebre par la memoire & par les escrits de tous les anciens, que tout aliment tant chaud que froid, a la vertu d'eschauffer quand il est conuerty en sang, se doit ainsi prendre, c'est à sçauoir, que pource qu'il nourrist, il augmente la substance du sang & de la chaleur naturelle, & non pas sa qualité, ny le degré de sa chaleur. Et quiconque oseroit soustenir que la laiçtuë engendre vn sang aussi bien chaud comme fait le vin & l'ail, il destruiroit les natures & les forces des causes efficientes. La laiçtuë fait donc vn sang froid, & le vin fait vn sang chaud, & produit des humeurs conformes à sa Nature. Le pain qui n'a point esté leué, & la chasteigne engendrent vn suc grossier & visqueux, les iaunes d'œufs & les poulets rendent le sang subtil : Les meures, les pêches, & les autres fruits qui ne sont pas de garde font vn mauuais sang : & tous les alimens qui commencent desia à se gaster, n'engendrent que des humeurs putrides & du sang corrompu. D'où vient la ruine du corps, & le renuersement de toutes ses facultez. Car comme la chaux semée à la racine d'un arbre, luy fait aduancer son fruit, mais aux despens de l'arbre, qui en meurt : de mesme l'aliment trop chaud, & principalement le vin, resuscillant la chaleur, recrée les esprits & les facultez, mais il abbrege la vie ; d'autant qu'à mesure qu'il augmente la chaleur du corps, il en diminue la substance ; & pendant que de sa vapeur & de ses fumées il va fomentant les esprits & la chaleur de l'humeur radicale, il dissipe & consomme quant & quant la substance d'icelle, qui n'est autre que sa naturelle humidité : La vie en deuient à la verité

plus alaigre & plus vigoureuse , mais aussi plus courte. Ainsi chaque aliment a ses proprietézt vti-les , & ses incommoditez. Ce qui fait reconnoître que les choses que nous beuons & mangeons alterent non seulement les humeurs & les esprits qui nous maintiennent , mais encor toute la constitution de nostre corps & des parties qui le composent. De là procedent les intemperies , les obstructions , les cacochymies , les repletions , lesquels vices deuiennent causes antecedentes & contenanttes de maladies tres-fascheuses.

Or les viandes & les breuuages ne sont pas nuisibles par leur seule qualité, mais mesmes les meilleurs incommodent par leur quantité trop grande, soit qu'ils causent de la repletion dans les vaisseaux seulement , ou qu'ils affoiblissent aussi les forces. Car ceste quantité estant excessiue & au delà des forces de la nature , elle ne peut receuoir vne entiere digestion, ny estre conuertie en pur sang, mais demeure meslée de beaucoup de cruditez, lesquelles ne peuans estre surmontées par la nature trop debile, se corrompent & engendrent des maladies. Surquoy Hippocrate a bien dit , que la viande prise en plus grande abondance que la nature ne peut porter, deuient cause de maladie. Voire mesme l'excez des viandes qui remplist seulement les vaisseaux sans debiliter les forces, est encore fort dangereux, bien que le tout se conuertisse en tres bon suc & en sang : parce que cela diuertist la chaleur naturelle , & la retire des sens, & des fonctions de l'entendement & de l'ame, pour l'occuper à la digestion : de plus cela amasse quantité d'excremens & de ventositez , qui ne peuuent pas facilement sortir à cause que les vns arrestent les autres; assemble des humeurs de toutes sortes , fait des

obstructions, restreint les conduits & retient tout si serré, qu'à peine peut-il sortir quelque chose du corps, lequel étant ainsi rempli & chargé devient lasche & pesant, & enfin succombe, bien qu'autrement il fust fort & vigoureux; d'autant aussi qu'il est plein, ramassé & empesché par tout, sans rien auoir de transpirable, il ne peut estre aéré ny esuenté. Ce qui fait que la chaleur naturelle est oppressée & comme estouffée, ny plus ny moins que la flamme d'une lampe où il y a trop d'huyle, & qu'en suite il en résulte des maladies froides, nonobstant que les viandes fussent chaudes, ainsi que de l'excez du vin s'ensuiuent des cruditez, cachexies, paralyfies, apoplexies : Et quand ceste redondance a long-temps croupy dans le corps, elle acquiert enfin de la corruption & de la pourriture: mais celle qui va rousiours augmentant arriue finalement à tel point qu'elle fait creuer les vaisseaux, ou esteignant la chaleur naturelle, cause vne mort subite & inopinée. C'est pourquoy Hippocrate a eu fort bonne raison d'aduertir que cet estat estoit dangereux, & qu'il y falloit promptement remedier. C'est, à dire le vray, vne tres pernicieuse cloaque, qu'un ventre qui n'est iamais soul; car de là procede la pluspart des vices tant du corps que de l'esprit : & ce ne seroit pas mal à propos si on disoit que l'intemperance est la nourrice des Medecins.

Au reste les viandes & les breuuages qui sont propres à la nature & prins modérement, reparent & maintiennent la chaleur naturelle des esprits & la substance du corps, fortifient toutes les facultez & les fonctions d'icelles, aident à la digestion, à la distribution de l'aliment, à l'égalité des humeurs, & à l'eiection des excremens, & conseruent saines & entieres les forces du mouuement, du sentiment

& de l'esprit. La seule temperance est la modératrice d'une vie ioyeuse & salubre, & celuy ne sera oppressé d'aucune incommodité ny fâcherie, qui aura posé la temperance pour fondement de la vie.

Quant aux ieunes trop longs & à la trop petite quantité du viure, cela ne repare & ne restaure pas assez ce qui de nécessité se dissipe du corps, par la vertu tant de la chaleur naturelle, que de l'air qui nous environne : & pource il desseiche par accident; car à faute de suffisante nourriture, la chaleur naturelle consomme la propre substance du corps. Néanmoins le corps en est rendu plus transpirable, se deliure des obstructions, & se descharge mieux des vents, des matieres fecales, des vrines, & des autres excrements tant du cerueau que du reste des parties. Et si le corps est remply d'humeurs peccantes, cela digere & corrige celles qui sont cruës, dissipe & consomme celles qui sont trop subtiles & inutiles, detache & fait sortir celles qui sont grossieres, gluantes & collées. Enfin toutes les humeurs font monstre de leurs forces par l'abstinence; car en ceux qui sont bilieux la bile s'eschauffe, & deuiet comme furieuse, de sorte que ceste fureur cause la fièvre, rend la bouche amere, met en cholere & produist d'autres symptomes. L'humeur propre aux melancholiques cause de la peur & de la tristesse, des veilles, des espouuante mens, des aigreurs qui reuiennent en la bouche & choses semblables. Aux phlegmatiques les defluxions tombent de la teste sur les parties basses, & l'estomach estant remply de pituite, ils sont en suite trauaillez de desgouts, de vomissemens, de defaillances de cœur, & autres maux de mesme sorte. Parce que dans vne grande abstinence du manger & du boire, les humeurs peccantes se iet-

tent dans l'estomach, ou bien demeurans seules & pures dans leurs propres retraictes, elles s'esmeuent avec ferocité, comme estans priuées de la benignité de l'aliment ordinaire. C'est pourquoy ceux qui ont le corps impur supportent difficilement le ieune, & neantmoins lors qu'ils taschent de rabattre l'effort & ferocité des humeurs, en prenans souuent quelque nourriture, ils entretiennent non leur corps, mais le mal qui les consomme. Si toutesfois ces gens-là continuent d'estre sobres, les premieres impetuosités de leurs humeurs viendront bien-tost à s'appaiser. Au commencement de l'abstinence la bile s'eschauffe & s'esmeut, puis s'esteint & s'amortist dans la continuë, en sorte que le corps en deuiet plus froid; car cela consomme vne partie des mauuaises humeurs, prepare & digere au-cunement le reste, & le conduist dans les passages par où la nature le puisse euacuer. Par le moyen de l'abstinence les plus dangereuses maladies ont eu quelquesfois vne heureuse & admirable issue, que l'art n'eust iamais osé pretendre; & ce beaucoup plus doucement & benignement, que quand le corps est trauaillé par la qualité estrangere des medicamens.

Si quelqu'un obiecte que la chaleur naturelle consommant par l'abstinence les humeurs superflus & vicieus, dissipe aussi quelque peu de celles qui sont vtils & plus pures, & qu'ainsi elle affoiblisse les forces. Cela n'importe pas beaucoup, & ie pense qu'il n'y a point de mal de laisser quelques-fois dechoir vn peu les forces, afin que ce qui est mauuais s'en aille quant & quant, veu mesme que ceste perte de forces n'estant guerès grande, il est aisé de la reparer promptement; mais si elle estoit notable, il y faudroit bien prendre garde, car celle

qui en vient iusques à la defaillance est tousiours à craindre ; & i'estime que c'est pour cela que le viure subtil, leger & fort exquis a esté depuis vn long temps reprouué par Hippocrate, comme estant dangereux & aux sains & aux malades, quand principalement il diminue non seulement le sang & la chair, ains encor la propre substance des parties solides, & cause vne maigreur, de laquelle il est bien difficile de se r'auoir. Mais à peine les ieunes portent-ils iusques à ceste extremité. Au reste, dit Hippocrate, ny le soulement, ny la faim, ny quelque autre chose que ce soit n'est bonne, si elle excède la portée de la Nature.

CHAPITRE XV.

Que les choses qui sortent de nostre corps ou y sont retenues, deviennent causes de maladies.

LEs genres de causes que nous venons de descrire introduisent avec soy dans le corps des qualitez estrangeres, & des vices dans les humeurs : mais ceux que nous expliquerons en suite excitent du mal au dedans de nous, sans y rien apporter du dehors. C'est pourquoy pour en parler avec distinction, nous appellons celles-là causes externes, & cestes-cy causes proprement euidentes. Les superfluitez du corps estans contenues & residentes en iceluy, doiuent estre mises au rang des causes antecedentes : mais leur euacuation ou retention immoderée est cause euidente. Celles

qui sont retenuës au dedans causent des maladies, non pas simplement, mais parce qu'elles sont referrées dans le corps plus qu'il n'est besoin & contre l'ordre de la Nature. Quant aux excremens, qui selon les loix naturelles ont coustume d'estre mis hors & reiettez, s'ils sortent en la façon, en la qualité, en la quantité & au temps qu'il est conueenable, ils allegent le corps comme d'un fardeau, & le rendent plus dispos & plus propres à l'exercice de ses fonctions : mais s'ils ne sortent point, ils deviennent causes euidentes de maladies, lesquelles consequemment esmeuent les antecedentes & contenantes, d'où la maladie prend sa source.

Les euacuations necessaires à la vie par ordonnance de la Nature sont, les deiections du ventre, l'effusion de l'urine hors des reins & de la vessie, la sueur ou l'exhalaison de tout le corps, l'espanchement de la bile jaune hors de la bourse du fiel, & de la melancholie hors de la ratte dans les intestins. Les autres euacuations ne sont pas simplement necessaires, mais bien selon le temps, ou par quelque accoustumance, comme l'eruption des hemorrhoides, les fleurs menstruales, la morue du nez & du palais, la salive qui sort de la poitrine, le lait des mammelles, & la semence des vaisseaux spermaticques. Partant la suppression de ces choses, & mesme l'euacuation faite non telle, tant, & quand il faut, quoy que de vray ce soit un symptome, elle ne laisse pas d'estre cause euidente de maladie. D'autant que des choses qui de tout leur genre outrepassent l'ordre naturel, la redondance fascheuse & importune à la Nature, deuient matiere de maladie: car souuent elle oppresse ou rabbat la chaleur naturelle, & met toutes ses fonctions en danger. Quelquesfois cest amas se corrompt, & acquiert

de la pourriture & des qualitez estrangeres qui incommode la Nature & le corps. D'autresfois par cestetrop grande quantité elles bouschent les passages & les conduits du corps, & empeschent la distribution des alimens & la purgation des superfluités. Quand les intestins se nouent & entrelasent, ou descendent par la rupture ou relaxation de la membrane qui les enuoloppe, estans ainsi serrez & comme liez, les matieres fecales ne peuuent passer outre, ains s'amaissant tousiours en plus grande abondance, elles chargent & incommode tellement les parties, qu'on est enfin contraint de les rendre par la gorge. Quesi outre cela elles viennent à se pourrir, leur puanteur & mauuaise qualité infecte tout le corps en telle sorte, qu'encore qu'elles reprissent leur cours ordinaire, on ne laisse pas le plus souuent d'en mourir. Il n'est pas moins facile de remarquer les incommoditez tres-facheuses qui resultent de la suppression de l'vrine, de la retention des moys & de la cessation du flux des hemorrhoides. Ainsi les euacuations necessaires estans supprimées produisent diuerses maladies de toutes les sortes avec plus d'efficacite qu'aucune autre cause euidente; parce que ces suppressions sont de prés & immediatement suivies d'un amas d'excremens qui sert de cause interne à plusieurs maladies. Ce que l'on prend avec beaucoup de plaisir & delices cause souuent beaucoup d'incommodité.

Au reste les euacuations soudaines & immoderées, quoy que cesoit de choses qui de tout leur genre outrepassent la Nature, engendrent aussi des maladies. Ce qui a donné subiect à Hippocrate de prononcer arrest de mort contre tous les suppurez ou hydropiques que l'on brusle, ou que l'on ouure,

si le pûs où l'eau fait vn desbord vniuersel & sort tout à coup. Ceux qui ont vn excessif flux de ventre, ou qui pissent trop, ou qui suënt tant que leur cotps semble fondre tout en eau, sont en beaucoup plus grand danger ; parce que souuent leurs forces s'affoiblissent de sorte, qu'enfin la vie leur defant. Car il sort beaucoup d'esprits & de chaleur vitale parmy ces superfluitez t ce qui fait que les fonctions & naturelles & animales deuiennent languissantes, & que de là s'ensuiuent des maladies qui tiennent du froid & de la crudité. C'est donc fort à propos qu'Hippocrate a escrit, que c'est chose dangereuse & ennemie de la Nature de purger beaucoup & soudain, quand principalement on n'y est pas accoustumé. Quant à l'effusion du sang qui sort de la matrice, des hemorrhoides, par le nez ou par quelque playe, si elle arriue promptement & avec excez, il n'y a rien qui espuise & dissipe plustost les forces, les esprits & la chaleur naturelle, qui ont leur siege & leur nourriture dans le sang. Et comme dit le Poëte

Plusieurs laissent l'esprit dans le sang respendu :

Or ceux qui ne iettent pas tant de sang que ce'a leur oste la vie, deuiennent secs, allangouris & subiects à des cruditez, enfleures, hydropiques & autres maladies de mesme sorte.

CHAPITRE XVI.

*Que l'excez du mouuement & du repos
est cause de maladie.*

IL y a deux fortes de mouuement ; l'vn naturel, & l'autre volontaire. Le ventricule, les intestins, les veines & toutes les autres parties attirent à soy l'aliment & reiettent les superfluitez par vn mouuement naturel : comme aussi le cœur & les arteres se meuuent naturellement d'un poulx assidu qui ne souffre point d'interruption. Quant au mouuement volontaire, il ne se fait que librement & à dessein, comme celuy des muscles & des nerfs, lesquels premierement & de soy sont meus à l'arbitre de la volonté qui l'ordonne, & meuuent en suite les os, les ligaments, les veines, les arteres, la chair & le reste des parties, & ce comme en consequence des os, & pour ce par accident.

Le mouuement naturel ne fatigue point, ny ne lasse iamais, ains en exerçant le corps, il le soulage & le rend plus dispos : mais le mouuement volontaire lasse & fatigue le corps, qui par la vehemen-
ce & continuë d'iceluy deuient lasche, foible & pesant, & succombe au trauail trop grand & trop assidu. C'est pourquoy le repos luy est en suite necessaire, pour le remettre & le soulager en quelque façon de sa peine. Partant l'usage alternatif du trauail & du repos est necessaire à l'animal. Au reste le mouuement volontaire est viste ou lent, fort ou foible, doux ou violent. Les mouuemens vistes & prompts sont, la dance, le ieu de la paulme, l'exer-

cice des armes & tous ceux où il est requis plus d'agilité que de forces. Les forts & robustes sont belcher, porter de grands fardeaux, & s'exercer à diuerſes ſortes de combats & de luites, qui ſe font non par agilité, mais par quelque grand effort. Lancer vn peſant iauelot, leuer & ietter loin quelque lourde maſſe, courir & ſauter armé de toutes pieces, & faire ſemblables actions qui conſiſtent en force & agilité tout enſemble, ce ſont des mouuemens violens. Or tous ces mouuemens, comme auſſi toutes ſortes d'exercices, & les trauaux des Artisans procedent de l'energie des animaux. Il y en a d'autres qui viennent du dehors, comme de nauiger, d'aller à cheual ou en caroſſe, d'eſtre porté, frotté & choſes ſemblables.

Tout mouuement cauſe de la chaleur en l'animal, non qu'il l'apporte de dehors, mais il la ſuſcite du corps meſme, tout ainſi que le vent allume le feu. Car il reſueille, dilate & pouſſe hors la chaleur preſque aſſoupie & languiſſante dans l'interieur des parties, & fait qu'elle ſe diſperſe par tout le corps, & trauerſe beaucoup plus de parties qu'elle ne faiſoit auparauant; ce qui aide à la diſteſtion, à la diſtribution de l'aliment, & à l'expulſion des excremens & de toutes les choſes ſuperflues. Voire meſme la ſubſtance du corps & des parties, peut eſtre manifeſtement alterée par le mouuement: d'autant que celui qui eſt viſte & prompt, attenué & reſerre le corps; celui qui eſt tardif, rareſie & augmente la chair; celui qui eſt fort, rend le corps vigoureux & endurcy; celui qui eſt foible, le rend laſche & mollasſe; celui qui eſt violent, extenué aucunement le corps & le fait emmaigrir, mais neantmoins il en deuient plus ramasſé, ſolide, ferme & vigoureux; au contraire

il deuient gras, mais languide, mollasse, enerué & infirme par vn mouuement trop lasche & trop doux. Or toutes ces alterations prouiennent du mouuement qui en son genre se retrouue temperé.

Quant au mouuement excessif, soit qu'il surpasse les forces, soit qu'il dure trop long-temps, il cause des maladies. Parce qu'une grande fatigue espuise & dissipe la substance des esprits & des forces, & enfin refroidist le corps : affoiblist les muscles, les nerfs & les ligamens, relasche ou fait quelquesfois creuer les membranes, de sorte que les intestins descendent & sortent de leur place: & mesmes par vne trop grande secousse des parties nobles, il se romp souuent de petites veines, d'où s'ensuiuent des reiections de sang par les vrines, par les vomissemens & par le cracher, des pleuresies & autres incommoditez. Quelquesfois le sang seramassant tout dans les veines par vn mouuement immodéré, s'eschauffe & subtilie tellement qu'il sort de ses propres vaisseaux & produict des phlegmons es parties: ou s'il est retenu, il engendre des maux de teste, des palpitations de cœur & des fièvres continuës.

Quand aux humeurs corrompuës qui se trouuent renfermées & comme assoupies dans quelque lieu peu important, sans causer beaucoup d'incommodité; & que la nature pouuoit avec le temps digerer, surmonter & enfin mettre hors tout doucement & sans aucune violence, c'est excez de mouuement les irrite & met comme en fureur, de façon que la mauuaise vapeur qui s'en exhale non moins que d'une sentine remuée, infecte le corps & le travaille en plusieurs sortes: & mesmes ces humeurs s'espanchant de costé & d'autre cau-

sent de la galle, des durillons, des abscez de toutes les espèces, des fièvres putrides, des cours de ventre, des vomissements & beaucoup de maladies diuerfes. Il ne faut donc pas que les corps impur & plethoriques ou replets subissent beaucoup de travail. Au reste le trop grand repos, & la longue intermission des exercices; comme de ceux qui passent leur vie en oyfiuete, rendent la chaleur debile, & les esprits lents & paresseux à toutes les fonctions des sens, de l'entendement, & de la nature; appesantissent tout le corps, & le font deuenir languide, mollasse, & infirme: tellement qu'en fin ce mot d'Ouide se trouue bien veritable.

L'oisuete corrompt vn corps plein de paresse.

De là viennent aussi les cruditez, les obstructions, & l'amas des excremens, qui sont causes prochaines de toutes sortes de maladies.

CHAPITRE XVII.

*Que le sommeil & les veilles sont
souuent causes de maladies.*

LE sommeil & les veilles ont du rapport en vertu de la liaison, selon l'ordre, aux choses que nous venons de deduire. Or le sommeil est non tant vn mouuement, comme vne cessation du sens & de toute fonction animale, en laquelle ont accoustumé d'estre assoupis non seulement les nerfs, les muscles, & les membres, à la façon qu'ils le sont dans le repos, mais encor le cerueau & tous les sens; de sorte que le sommeil

est comme le soulagement de tous les travaux, le repos de l'esprit, & la meilleure partie de la vie humaine. Il repare les esprits dissipés par le travail, & par les veilles, en subrogeant d'autres en leur place pour la continuation des fonctions accoutumées : il delasse les membres & les sens, conforte & augmente les fonctions naturelles, & principalement la digestion & la vertu retentrice ; car alors la chaleur naturelle n'est point dispersée, ains se ramassant autour des viscères, elle devient plus vigoureuse, & s'employe plus fortement à la cuisson de la viande, & des humeurs qui sont crues.

Mais les facultez d'attirer & de repousser deviennent plus languides par le dormir, à cause que la vertu qui auoit accoustumé de les aider, cesse pour lors, & se repose ; & que les choses contenues au corps, estans ébranlées par les veilles & par l'émotion, cedent plus promptement à la faculté qui les attire ou les repousse : voire mesme le sommeil empesche & retient les eruptions ou saillies du sang, les flux de ventre, les vomissemens, & toutes autres évacuations desordonnées, excepté la sueur. Car combien que, selon qu'Aristote a remarqué, la surface & les extremités du corps se refroidissent quand on dort, & qu'alors on ait besoin d'estre davantage couuert : si est-ce pourtant qu'on ne laisse pas de bien suer à la fin ; parce qu'après que l'aliment est digéré & distribué, les humeurs renfermées au dedans se rejettent manifestement & abondamment à la surface & aux extremités du corps. Quand on veille il se fait bien une plus grande dissipation par les pores de la peau, mais ce n'est que d'humeurs subtiles & legeres, qui s'exhalent imperceptiblement.

Au reste l'excez du sommeil obscurcit & appesantit les esprits, debilité & alentit toutes les forces des sens & de la raison, rabat la chaleur, empesche les fonctions naturelles, amasse des humeurs cruës & pituiteuses, & des superfluitez de toutes les façons. Tellement que le trop dormir refroidissant & humectant le corps, le rend plus lasche & plus pesant que ne fait le repos, & est vne source de defluxions, & vn seminaire de maladies, froides, & longues. Il n'y a rien de si semblable à la mort, que le sommeil, qui en est l'image & la representation. Les veilles font tout le contraire du sommeil : car elles excitent les esprits & les sens, les rendent prompts, subtils, & alaigres, recréent & redressent les forces de toutes les parties, épandent également la chaleur par tout le corps, hastent la distribution de l'aliment & des humeurs, & l'expulsion des excrémens, & ce pourueu qu'elles soient moderées. Mais les veilles excessiues épuisent les esprits, desseichent le corps, & sur tout le cerueau : & comme on dit;

Le corps des jeunes gens s'affoiblist par les veilles.
De plus elles hebetét les sens, & troublent l'entendement; échauffent la bile, d'où procedent les frenesies, les fièvres continuës, & les maladies arden-
tes; dissipent la chaleur naturelle, & l'humeur radical, & ainsi la digestion estant interessée, il se fait vn grand amas de cruditez.

CHAPITRE XVIII.

*Que les passions de l'ame causent
des maladies.*

SI l'homme n'auoit point du tout de passions, il ne laisseroit pas pour cela de viure en bonne santé : mais puis qu'il y est sujet, & qu'il ne se trouue aucune discipline qui puisse de telle sorte temperer & moderer ses mœurs, ou rabbatre & accoiser les impetuosités de l'appetit brutal, & empêcher les saillies de l'esprit, que l'on n'en soit encore souuent agité, ce n'est pas sans raison que nous arrangeôs les passions de l'ame entre les causes évidentes & nécessaires. Or on en conte ordinairement six, qui sont, la crainte, la tristesse, la chole-re, la joye, la honte, & l'anxiété. Nous auons assez amplement expliqué en la Physiologie, pourquoy, comment, & d'où procedent ces passions; & de combien grande suite elles sont accompagnées.

Les passions de l'ame, quoy que moderées, ne sont presque d'aucun vsage qui soit vtile à la santé, sinon la joye, laquelle dilatant le cœur, re-crée les esprits; excite la chaleur naturelle, subtilie le sang & les humeurs, ce qui cause & conserue la santé. La tristesse n'est vtile à personne, si ce n'est à ceux qui sont joyeux par excez: ny la chole-re, sinon aux paresseux & endormis: ny la crainte, fors qu'aux temeraires & furieux: ny la honte, qu'à ceux qui sont impudens, ou qui ont le visage trop bleśme. Quant à l'anxiété, elle ne vaut

rien pour qui que ce soit.

Au reste, ces passions estans immoderées, nous offensent grièvement, parce qu'elles acquièrent la force & la vertu des causes éuidètes: la joye trop grande & extraordinaire, dilate & dissipe si fort les esprits & la chaleur, que le corps en estant affoibly, tombe en syncope, ou perd entierement la vie: ce que l'on raconte de plusieurs, qui estoient neantmoins ou fort vieux, ou foibles & imbecilles. A tous les autres elle refroidist seulement le corps.

Pour la cholere, elle émeut aussi les esprits & la chaleur, & les attire du cœur à la surface du corps, mais tout à coup, & non peu à peu, comme fait la joye. Toutesfois on n'a point encore remarqué qu'aucun en soit mort subitement par vne entiere dissipation de la chaleur; dautant qu'il n'y a que les hardis & robustes qui se laissent transporter à la cholere, & à qui l'abondance de la chaleur boüillonne autour du cœur. En ceux-cy donc lors que le cœur s'échauffe & remplist de cholere, la chaleur enflammée s'estend par tout, pour emporter l'homme hors de soy. En premier lieu, elle échauffe les esprits, puis les humeurs. & le corps, les enflamme & cause souuent des fièvres, ou iournalieres, ou continuës: ou bien des fièvres putrides, si les humeurs sont corrompuës: & plusieurs autres maladies fondées en l'ardeur de la bile, & en la confusion des humeurs.

La crainte & la tristesse, font rentrer au dedans la chaleur & les esprits: celle-là subitement & tout à coup, & cette-cy peu à peu, & sans aucun effort. Partant elles refroidissent les parties externes du corps, sans toutesfois échauffer les parties du dedans, cōme fait le sommeil, ou le froid qui vient

de dehors, parce que cette chaleur & ces esprits retournent seulement au cœur. Or il paroist bien que le cœur est grandement oppressé, & sa chaleur presque estouffée par cette affection là, en ce que le poulx en deuient petit, lent, rare, & foible. Mais en particulier, la tristesse refroidit & dessèche tout le corps, & principalement le cœur, affoiblist, & empesche les esprits & la chaleur naturelle, cause par sa secheresse des veilles immodérées, ruine la digestion; épaissist le sang, & les humeurs, & amasse vn suc noir & melancholique. Ce qui fait que le corps deuient maigre, & tombe en atrophie, & en plusieurs autres maladies froides. La crainte cause bien les mesmes dangers, mais beaucoup plus euidentement, & avec dauantage de violence: d'autant que saisissant à l'improuiste, elle en a fait mourir plusieurs par la violente suffocation de la chaleur vitale du cœur.

Car la crainte soustrait les forces à chacun,

Quant à ce que le ventre se lasche, ou que les vrines s'épanchent lorsqu'on est surprins de quelque grande crainte, ie ne pense pas que cela soit, comme dit Aristote, vn indice du sang qui se jette dans le ventre, ains plustost de celuy qui retourne au cœur. Au reste, la honte ramasse d'abord au dedans les esprits & la chaleur naturelle, puis aussi tost les renuoye peu à peu vers la surface du corps, mais si doucement, que le cœur n'en est ny oppressé, ny refroidy, & que les esprits ne se dissipent pas. Mais l'anxiété, c'est à dire l'agonie, ou le combat, a deux certains mouuemens qui donnent de grandes secouffes: car participant de la crainte & de la cholere, elle menace des dangers de l'vne & de l'autre, quoy que ce soit avec inégalité.

Tous les autres mouuemens de l'appetit que

l'on conte pour passions de l'ame, se peuuent rapporter aux genres que ie viens de remarquer. La fâcherie, la haine, la discorde, l'inimitié, se rapportent à la cholere ; la peur, l'apprehension, la terreur & l'épouuente, à la crainte : la douleur de l'esprit, les pleurs, l'ennuy, les plaintes, le chagrin, l'angoisse, & le desespoir, à la tristesse : le contentement, l'aise, & le plaisir, à la joye. Et non seulement ces choses sont causes de maladies, mais aussi le soyn, le soucy, l'affliction, & toutes les peines de l'esprit qui viennent de l'ambition, de l'auarice, ou de quelqu'autre desir fort ardent, cōme est la contemplation assidue, & la trop grande application de l'entendement en la recherche des choses. Car l'excès de tout cela ruyne les esprits, & diminuë la chaleur naturelle. Cecy soit dit des causes évidentes & necessaires, & des façon, selon lesquelles les corps en sont alterez.

CHAPITRE XIX.

Des causes évidentes qui ne sont pas necessaires.

Quant aux causes non necessaires que nous ne pouuons euitier, & desquelles nous nous seruons sans aucune contrainte, elles se peuuent rapporter aux mesmes genres que nous auons cy dessus expliquez traittans des causes necessaires. Car entre les choses qui nous environnent, on peut mettre les estuues, lesquelles échauffent & desseichent le corps outre mesure, puis le refroidissent apres en auoir dissipé la cha-

leur; comme aussi les bains, dont les uns rafraichissent & humectent, les autres échauffent & humectent, & d'autres échauffent & dessèchent, telles sont les eaux sulphurées, nitreuses, alumineuses, & marines, lesquelles impriment au corps les qualitez dont elles sont douées. Semblablement les onguents & les emplâstres appliquez par dehors, nous communiquent leurs vertus, qu'ils vont influans, & enfonçans par les pores de la peau, quand nostre chaleur les excite. De plus, les habits dont nous sommes vestus, & les autres choses qui seruent à nous couvrir, nous échauffent quelquesfois d'elles mêmes, comme font les peaux des animaux qui sont d'une complexion chaude, & quelquesfois nous échauffent par accident, à cause que la chaleur naturelle du corps en est retenue au dedans, & ne se peut exhiler. Finalement les fleurs, les odeurs des aromates, & toutes sortes de fumées ou de vapeurs, qui ont quelque vertu, ou manifeste, ou occulte, alterent tout le dedans du corps, s'insinuans en iceluy parmy l'air que l'on respire.

Or ce que dessus concerne le genre des choses qui nous environnent.

En l'ordre des choses que nous prenons, se rangent les médicaments, qui toutesfois & quantes qu'on les aualé, soit sans dessein, ou de propos deliberé, affectent les esprits, les humeurs & le corps, par leurs qualitez premières, secondes, ou troisièmes, ou bien par la vertu de toute leur substance.

Entre les choses qui sortent du corps, l'éruption du sang qui coule des narines, ou d'une playe, n'est pas nécessaire, quand elle excède, & vient à épuiser la chaleur, les esprits & les forces; & de

quelque façon que le sang sorte, il n'apporte aucune commodité par son évacuation à ceux qui se portent bien. L'acte venerien n'est non plus salubre en quelque sorte que ce soit, sinon peut-estre à celuy qui depuis fort long temps s'en seroit abstenu contre sa coustume; car pourveu qu'il n'y ait point d'excès, cela-luy sert pour se décharger de la trop grande abondance du sperme qui le chatouille & l'incommode: Mais quand l'on s'y porte avec immoderation, les esprits, la chaleur & l'humide radical en sont épuisez, la digestion pervertie, l'entendement & les sens debilitiez, le corps énerué, rendu molasse & paresseux. Il n'y a toutesfois rien de tout cela qui passe iusques dans l'extremité; veu qu'és actions veneriennes il se retrouve presque tousiours quelque moderation, & personne ne se porte à ces actions là, sans appetit, comme l'on fait à la mangeaille, à peine se trouue-il quelqu'un qui puisse exercer l'acte venerien, sans en auoir enuie: mais on en void beaucoup, qui sans auoir appetit, mangent encore apres estre saouls.

C'est pourquoy il y a beaucoup plus de danger à l'un qu'à l'autre, & les maux qui s'ensuiuent de l'excès des viandes, sont plus grands & plus frequents, que ceux de la lubricité.

Le genre des mouuemens comprend les crieries & les efforts de la voix, qui sont quelquesfois rompre les veines, & déchirer les membranes; à cela pareillement se rapportent les douleurs, les grands & cruels tourmens, & les mouuemens externes; comme de nauiger, d'estre porté, d'aller à cheual, ou en carosse, & faire quelque autre exercice qui agite grandement le corps, les humeurs, & les esprits; toutes lesquelles choses sont fort effi-

caces pour engendrer des maladies. Comme en cor la friction seiche combien qu'elle n'agisse particulièrement qu'en la surface du corps. De plus, les froissemens, les contusions, les cheutes, les playes, les morsures des bestes, les piqueures des serpents, & tout ce qui nous attaque par dehors fortuitement, & qui nous arriue comme par fatalité, à l'occasion dequoy nostre corps est en danger, & sujet à diuers perils.

Je pense maintenant auoir remarqué toutes les causes évidentes des maladies qui nous peuuent alterer, desquelles seules l'on s'informe vulgairement, à l'imitation des anciens, s'enquerant fort d'où vient chèque maladie. Or de ces causes évidentes procedent celles qui sont interieures, desquelles nous allons parler incontinent.

CHAPITRE XX.

Causes interieures des maladies, combien il y en a; quelles sont ces causes, & comment elles procedent des causes évidentes.

LEs esprits, le sang, les humeurs, les excremens, & tout ce que nous auons dit, estre compris sous le nom de choses contenues dans le corps, sont causes interieures, lesquelles estans retenues en l'office & dans les termes que la nature leur assigne, meritent le tiltre de salubres & de conseruatrices de la santé : mais elles ruinent la bonne disposition naturelle, & produisent des maladies, quand elles s'écartent trop de la mode-

ration qu'elles doiuent auoir. Or elles pechent ou en quantité, ou en qualité, qui font deux vices contraires à la Nature. Les vices de la quantité font l'excez & le defect. Les esprits ne peuuent excéder, neantmoins ils defaillent lors qu'il y en a trop peu. Quant aux choses qui de tout leur genre outrepassent la Nature, comme le calcul, comme les vers, lors, qu'il s'en retrouue dans le corps, elles sont tousiours excedentes, & non iamais defaillantes. Le sang, les humeurs, les excremens, sont mauuais s'ils excedēt par trop, ou defaillent beaucoup. La seule abondance excessiue du sang s'appelle ordinairement plethore ou repletion; & la redondance des humeurs & des superfluitez est comprise sous le genre de cacochymie. Voire mesme l'intemperie tant simple que coniointe de toutes les choses contenuës; leur grossiereté & subtilité, leur dreté & mollesse, leur lenteur & acrimonie; comme encor leur putrefaction, & la corruption de toute leur substance, sont especes de cacochymie. En ces vices donc des choses contenuës consistent toutes les causes interieures des maladies.

Or ces causes interieures procedent des causes euidentes en ceste sorte. De l'ardeur de l'air qui nous enuironne vient le manquement des esprits & de la chaleur naturelle; comme aussi de l'usage des bains & des medicamens extenuans & purgatifs, du defect de nourriture, des euacuations immoderées, du trauail, & de toute sorte de mouvement violent, des veilles, de la ioye extraordinaire & excessiue, de l'immoderation es actions veneriennes, & des douleurs trop vehementes. L'accroissement de ces mesmes choses cause enfin la diminution & le defect du sang & des humeurs.

L'air grossier, obscur, plein de brouillars & couverts de nuages, le froid, l'abondance des aliments, l'amas des excremens, le long repos, le sommeil profond, la crainte & le chagrin, oppressent les esprits & la chaleur naturelle & reserrent les humeurs, & si ces choses sont violentes & hors de saison, elles estouffent & esteignent la chaleur naturelle, tout de mesme que si on auoit la corde au col. L'air puant & corrompu, la corruption des choses que l'on prend par dedans, leur putrefaction & usage desordonné, la suppression des excremens, les obstructions & en suite les empeschemens de la transpiration, infectent de pourriture les esprits, les humeurs, les excremens & tout ce qui est contenu dans le corps. Le mesme aussi font le repos & le sommeil, mais seulement par accident, & à cause qu'ils augmentent les superfluitez. L'air pestilent ou infecté en quelqu'autre façon, les poysons, la malignité du sperme retenu & des autres excremens, la contagion des choses veneneuses & les morsures des bestes envenimées, corrompent toute la substance des esprits & de la chaleur naturelle, du sang & des humeurs.

La chaleur de l'air qui nous enuironne, & de toutes les choses qui sont autour de nous, & tout ce qui reserre & condense la peau, causent vne intemperie chaude és esprits, au sang, & és autres choses contenuës. Ce que font aussi les aliments trop chauds, les medicamens chauds & acres, les excremens retenus & la putrefaction qui s'en ensuit, les mouuements & les exercices vehemens, la cholere & les veilles, si ce n'est que l'excez en fust trop grand. Pour l'intemperie froide, elle vient du rencontre de l'air & de toutes les choses froides, de la paucité ou trop grande quantité des aliments, de

leur froideur , & de celle des medicamens, des euacuations immoderées , de la grande suppression des excremens, de l'oyfueté & du peu d'exercice, du sommeil , de la crainte & de l'ennuy. Les causes effectrices de l'intéperie seiche, sont la constitution seiche de l'air & le rencontre des choses qui ont la vertu de dessécher , la subtilité des alimens & les ieusnès, les medicamens qui extenuent & dissipent, les euacuations excessiues , l'esmotion trop vehemente, les veilles , le chagrin, le soyn & le soucy. La trop grande humidité vient de l'air humide & pluuieux , des bains d'eau douce principalement apres le repas, de l'excez du boire, de l'abondance des viandes humides, de la trop petite euacuation des excremens, de la faineantise, du trop dormir , du contentement & de la tranquillité de l'esprit.

L'aliment grossier, comme le pain qui n'a point eu de leuain, la chair de beuf, le manger de poisson & de bestes trop grasses, les gros vins chargez de couleur, espaisissent les esprits & les humeurs, & produisent des excremens de semblable nature ce que font aussi par accident toutes les causes auxquelles nous auons attribué la force de refroidir & condenser. Le contraire arriue par les alimens & medicamens qui extenuent, & par l'excez des breuages trop subtils, les humeurs acquierent de la viscosité ou de l'acrimonie par la nourriture ou par les drogues qui sont de mesme qualité : car les extremités des bestes, plusieurs especes de poissons & le fromage, engendrent vn suc lent & gluant : toutesfois le miel, la cremeur de l'orge, & semblables medicamens engendrent vn suc detergent qui n'est aucunement visqueux. C'est donc en ceste sorte que les humeurs ou les excremens

s'endurcissent ou s'amolissent par les alimens, ou par les medicamens qui ont vne semblable consistance, lesquels estans grandement chauds & secs, ou excessiuement humides, produisent avec le tēps vn effect beaucoup plus notable. Les esprits & les humeurs du corps recoiuent du trouble & de l'agitation de la part de toutes les choses qui extēnuent fort, ou irritent les humeurs, & qui oppressent soudain & avec quelque vehemence, ou bien excitent par vn trop grand mouuement, comme vne douleur atroce, vn exercice immoderé, la cholere, la crainte & toutes sortes de passions tant du corps que de l'esprit.

De ce que dessus il est aisé de reconnoistre combien sont diuerses les forces des causes euidentes, dont les vnes fournissent de matiere aux maladies, comme les alimens & les excremens, qui sont causes principales; & par consequent ceux-là sont particulierement subiects à de tres griesues maladies, lesquels estans addonnez à leur bouche & à leur ventre, ne se seruent pas des remedes opportuns quand il en est besoin: Les autres alterent seulement la matiere, & luy communiquent leurs seules qualitez, comme l'intemperie de l'air & des choses qui nous viennent au rencontre, le mouuement & le repos, le sommeil & les veilles: & les passions de l'ame, lesquelles excitent plus rarement des maladies.

Voyla donc quelles sont les causes interieures des maladies, combien il y en a, & comment elles procedent des causes euidentes, & finalement qui sont les genres & les vertus de toutes les causes efficientes.

CHAPITRE XXI.

Quelle est la cause de chaque maladie.

IL est maintenant à propos de repeter icy les maladies selon l'ordre que nous en auons cy-deuant estably, pour examiner plus particulièrement de quelles causes procede chaque maladie, afin que par ceste obseruation l'on ait toute la connoissance requise à la pratique de la Medecine. Or dautant que quelques maladies prouiennent des seules causes euidentes & externes, & que quelques autres, outre ces causes externes, en ont aussi d'interieures, qui sont ou antecedentes, ou contenantes, il est besoin de sçauoir quelle est la premiere origine de chacune d'icelles.

L'intemperie tant simple que coniointe des parties similaires, comme aussi leur putrefaction & la corruption de toute leur substance, procedent le plus souuent des causes euidentes : car lors que ces causes viennent à attaquer tout le corps doucement & avec égalité, elles affectent de leur vertu ou de la qualité dont elles sont douées, premierement & promptement les esprits, lesquels se rencontrans dans vne substance tenuë & subtile, sont exposez à toute sorte d'affection ; puis les humeurs, & en suite tout le reste des choses contenues, finalement la substance des parties, qui a plus de solidité : mais si ces mesmes causes agissent fortement, & que leur attaque soit de longue durée ; si de plus elles sont proches du corps qui leur

est exposé , & que le corps soit defia fufceptible d'affection (car il faut que ces quatre conditions fe retrouuent en toute action de quelque chofe que ce foit) lors elles produiront leur effect immediatement en la fubftance du corps. Dauantage ces maladies fimilaires viennent quelquesfois des feules caufes antecedentes ou contenantes : car l'humeur peccante & corrompuë demeurant bien fort attachée à la partie , en corrompt enfin la fubftance ; comme nous auons fouuent apperceu es poulmons & au foye , qui fe pourriffioient de la forte. Ainfi la malignité de la femence fupprimée & de certains excremens fe tournans en venin , infecte la fubftance des parties nobles. Or de quelque intemperie ou eſtrangere qualité que foient affectez les eſprits , le fang , les humeurs & les excremens , auſſi-toſt les parties du corps en font entachées , quelquesfois legerement , & quelquesfois fi fort que cela demeure. Les maladies fimilaires prennent donc leur origine , tantost des feules caufes euidentes ; tantost & des euidentes ; & des antecedentes & contenantes. Venons maintenant aux maladies des organes.

La figure des parties fe peruertift par les caufes naturelles , ou par le vice du ſperme & de la faculté conformatrice , ou bien parce qu'en l'accouchement ou apres ; les membres eſtans encore mols & tendres , font deuenus tortus ; ou qu'à quelque long-temps delà , les membres ayans eſté froiſſez ou rompus ne ſe ſont pas bien remis & repris comme il falloit , par l'ignorance & la faute du Medecin , ou du malade , ou de quelqu'autre. Les caufes interieures peruertiffent auſſi bien ſouuent la figure , comme font la tumeur outre nature , la ſection , la conuulſion & la reſolution des meſſes.

Les vices des conduits & de la concauité, sont en grand nombre ; quand ils s'assemblent, se prennent & se collent, pour auoir esté mal pensez de quelque vlcere, cela vient d'une cause interieure.

L'obstruction à semblablement quelque cause au dedans, comme vne carnosité, vne dureté élée, vne tumeur, vn cal, vn grumeau, & quelque humeur grossiere & viiqueule, qui remplit le dedans du conduit. Quant au restrecissement, il se fait pour quelque chose qui presse par dehors, & repousse en dedans les costez des conduits; ou bien parce que ces costez se resserrent l'un contre l'autre, par la vertu des choses froides, astringentes, ou dessicatives. Et mesme cela procede souvent d'une cause interieure, quand la faculté de retenir estant trop forte, restreint les conduits, & leurs orifices, comme par impetuosité. Les causes de la lacheté contraires à celles de l'astrictio, sont les medicaments aperitifs, ceux qui ont la vertu d'inciser, deterger & purger, & ceux qui amolissent & lâchent grandement: comme aussi la faculté expultrice forte, ou la retentric foible.

Finalemēt, les causes de la rudesse sont les medicaments, les humeurs, & les excrements qui ne sont point encore meurs, ou bien acres, ou absterfis, dont la force vient quelquefois à estre si grande, qu'elle racle & vlcere les parties mesmes. Mais les viandes, les potions, & les humeurs, tant utiles que superflues, qui sont grasses & gluantes, tendent les parties plus polies & plus douces.

Quant au nombre, toute partie qui manque est pei.e, ou par le vice de la nature & de la conformation, ou par section, ou par brusleure, ou par pourriture, ou par trop de froid. Si quelque partie est superflue, ou vient de surcroist, c'est vn

effect d'une nature forte, qui d'une matiere utile & abondante, engendre quelque chose de naturel, comme en ceux qui naissent avec six doigts à chaque main, & en ceux ausquels après la naissance il vient quelque bosse charnuë; mais de la matiere inutile se font les glandes, les absces qui contiennent vn pus, semblable à du miel, ou à du suif, ou bien à de la bouillie, les verruës pendentes, & autres petites enleueures de mesme genre. Au reste l'abondance de la matiere & la nature forte aidée par frottement, chaleur, poix, & autres attractifs, augmentent plus qu'il ne faut la masse de la partie, laquelle est au cōtraire, diminuée par la vertu foible, par la disette de l'aliment, & par les autres causes que nous auons dittes retrancher quelque chose du nombre naturel.

Les parties se demettent & sortent de leur siege & de leur situation, par la solution & lâcheté des ligaments, comme en ceux qui ont les os desboitez, soit que cela arriue par quelque mouuement subit & vehement, ou au rencontre des choses ramollissantes: par la rupture ou relaxation des parties, comme en l'enterocele, & autres hernies, en l'ouuerture de l'epigastre, & quand le poulmon sort par quelque playe receuë en la poitrine: la conuenance des parties voisines est deprauee lors qu'elles s'attachent les vnes aux autres, ou que le lien commun qui les retient se relâche, se retire, ou vient à rompre. La solution du continu procede des ventositez & des humeurs qui surabondent, ou qui sont acrés, ou poignantes, ou corrosiues: & entre les causes évidentes le mouuement par trop immodéré, & tout ce qui nous frappe avec violence, rompent, entament, per-

cent ou brûlent. Ainsi voilà quelles sont les causes de toutes les maladies simples.

CHAPITRE XXII.

Les causes des maladies implicites & composées.

IL n'y a point de cause qui soit toujours déterminée à une propre & seule maladie, mais le plus souvent une simple & même cause en produit plusieurs & diverses. L'ardeur du Soleil excite les desfluxions froides de la teste, d'où s'ensuivent l'asthme, la goutte, & la paralysie: la même cause échauffe & irrite la bile qui engendre la fièvre: voire même les causes qui sont contraires concourent souvent en la procreation de la même maladie; car comme l'ardeur du Soleil dilatant le cerveau, & ouvrant les conduits d'iceluy, en fait sortir les extreimens qu'il rend coulants & fluides, aussi le trop grand froid les exprime & met hors, comme en pressant & resserrant. Quand donc il se rencontrera plusieurs maladies, il faut rechercher la cause de chacune en particulier; & si on apperçoit que chaque maladie ait plusieurs causes, il faut prendre garde si elles sont mêlées, ou alliées, ou desiointes, veu que l'observation des causes ne sert pas moins à procurer la guérison, que fait la connoissance des maladies: les causes mêlées ne se peuvent presque jamais ôter les vnes sans les autres. De celles qui sont alliées, il faut exterminer l'antecedente deuant que de venir la suivante. Les desiointes se doi-

uent oster ſeparement, & chacune à part.

Or d'autant que la deſluxion des humeurs engendre toutes les tumeurs outre nature, & quantité de maladies des parties, & qu'elle eſt vne viue ſource de beaucoup d'infirmitez, il eſt à propos de remarquer icy ce qui émeut la deſluxion, & la fait tomber ſur vne certaine partie, & non pas ſur vne autre. La matiere de la deſluxion c'eſt le ſang, la bile, tant jaune que noire, la pituite, les humeurs ſeréuſes, & tout ce qui reſulte du mélange de ces choſes. Or toute telle matiere decoule, ou de ſon propre mouuement, ou eſtant excitée & pouſſée. Elle decoule de ſon mouuement propre quand elle abonde trop, où qu'elle eſt rendue fluide, ou émeuë avec beaucoup de vehemençe; car en ce cas elle ne peut eſtre retenuë dans ſon propre lieu, ains coule & tombe de ſoy meſme. Celle là fluë par inpuſſion, laquelle eſt chaffée, ou par la force de la partie qui ne peut ſupporter ce qui luy eſt moleſte, tant en qualité qu'en quantité, où par la rigueur du froid, ou par la vertu de quelque choſe aſtringente, ou reſerrante. Voilà quelles ſont les cauſes effectrices de la deſluxion. Quant à ce qu'elle tombe plutoſt ſur vne partie que ſur l'autre, la partie qui la reçoit ou attire, en eſt la cauſe. Or elle eſt receuë dans la partie qui eſt ou foible, ou ſituée au deſſous de celle qui enuoye la deſluxion: la partie eſt foible, ou de ſa nature, comme la peau, les aiſſelles, les aiſnes, les adenes, & toutes les parties qui naturellement ſont lâches & molles: ou bien par maladie, comme celle qui eſt meurtrie, froiſſée, bleſſée, ou incommodée de quelque autre maladie. La partie baſſe & penchäte eſt ſuicte à la deſluxion, quand les paſſages qui conduiſent vers elle, ſont grâds & amples, & qu'au

contraire ceux par lesquels elle se pourroit décharger, sont trop estroicts. Ainsi la defluxion tombe facilement sur les reins, sur les poulmons. sur les jointures, & sur les autres endroicts où l'humeur a accoustumé de couler. La partie qui est située justement au dessous d'une autre, est pareillement sujette à recevoir la defluxion qui vient de ceste plus haute; car la matiere qui est pesante, descend plus facilement en bas, & s'écoule sur ce qui luy est au dessous, cōbien que le vent, la vapeur, & le plus subtil de la bile, se jettēt de tous costez. La defluxion est attirée dans la partie, par douleur, par émotion, par frottement, & par chaleur, tant de la part des causes interieures, que de celles qui sont externes.

L'humeur s'amasse dans la partie en deux façons, par accumulation, & par defluxion: l'accumulation ou amoncellement vient du vice & foiblesse de la partie, qui ne pouvant digerer ny consumer l'aliment, assemble en suite beaucoup de superfluitez: mais si la partie est forte, elle attire plus d'aliment qu'elle n'en peut digerer; ou bien estant trop épaisse & trop reserrée, elle ne depose ny dissipe facilement les superfluitez qu'elle a.



LIVRE SECOND.

DES SYMPTOMES, ET DES SIGNES.

CHAPITRE I.

*Ce que c'est que Symptome, en quoy il
differe de la maladie, &
de la cause.*



ESTE maintenant le troisieme genre des choses que nous avons proposees se retrouver en nous, outre l'ordonnance de la nature, sçavoir est des Symptomes & des Signes : dont le discours, aussi bien que l'origine, est consequent aux maladies. Et nonobstant que les maladies avec la plupart des causes qui les produisent, soient entierement cachees & renfermees au dedans ; tous les symptomes & les signes paroissent pourtant au dehors, & nous sont rendus manifestes : mais autre chose est le signe, & autre chose le symptome ; car tout symptome est signe, & tout signe n'est pas

symptome.

Or le symptome est vn certain effet outre nature, residant en quelque part que ce soit : le mot d'effet se prend icy moins précisément que nous ne l'auons prins en la definition de la maladie, de sorte que mesmes il comprend toute espee d'affection. Cest effet outrepassant la nature simplement, n'est point encor contraire à la nature, & n'offense manifestement aucune des fonctions du corps. La maladie & la cause de la maladie, different du symptome, en ce que la maladie offense la fonction premierement, & de soy, & la cause l'offense par accident, mais le symptome ne l'offense ny en l'une ny en l'autre façon, n'estant point encore contre, ains seulement outre nature. Ils different aussi d'autre sorte, parce que la maladie reside seulement en quelque partie du corps, & la cause est dans les choses contenuës ; mais le symptome se retrouve tans es vnes, & es autres, qu'es fonctions mesmes. En ce sens-là ; tout ce qui est outre nature, soit en la substance du corps, ou es choses contenuës, ou es fonctions, sans que les fonctions en soient manifestement offensées, doit estre reputé symptome, de quelque part qu'il tire son origine. C'est pourquoy le halle & la noirceur contractée par l'ardeur du Soleil, la couleur des vrines & des autres excrements, leur odeur mauuaise outre nature sans maladie, & les petits maux qui arriuent aux parties si legerement, que les fonctions n'en sont point encor incommodées. Tout cela sont des symptomes, qui ne peuuent estre rapportez à aucun autre genre des choses dont le corps est affecté outre l'ordre de la nature.

Il y a pourtant encor vne autre acception de ce mot, beaucoup plus estroite, selon laquelle on

appelle symptome seulement ce mal outre nature, lequel vient de la maladie. Tout ce genre de symptome est vne engeance & production de maladie, qui n'a rien de commun avec tout ce que ie viens de proposer : & neantmoins la mauuaise couleur de la jaunisse, les dejections pourries & puantes à cause de la fièvre, & toute offense de la fonction sont de ce genre. Au reste, lors qu'une maladie en engendre de soy & immediatement vne autre, comme quand la trop grande chaleur du foye produit quelque intemperie chaude en l'estomach, ceste derniere infirmité vient d'une maladie, & toutes-fois ce n'est pas simplement vn symptome, mais le nom de maladie luy conuient, pource qu'elle est adherente à vne partie, l'action de laquelle en est manifestement interessée premierement, & de soy. Et ces maladies sont celles que nous auons cy dessus nommées maladies consequentes, desquelles la premiere est cause de celle qui suit. Car qui est celuy si peu sçauant en ceste matiere, qui ait opiniõ que l'intemperie de l'estomach soit vn symptome de la trop grande chaleur du foye? Il n'y a donc rien qui puisse estre, & symptome, & maladie tout ensemble, non pas mesme selon quelque diuersité de respect: dautant qu'il ne se peut faire en aucune sorte que la mesme chose offense l'action & ne l'offense pas: voire mesme lors que le foye estât imbecile & languide, ne fait aucun sang qui soit loüable, l'action de la faculté qui fait le sang est offensée, d'où s'ensuit quantité d'humeurs corrópuës & peccantes en tout le corps, qui excitent des fièvres, & conséquẽment beaucoup d'autres maladies: & quoy que ceste corruption d'humeurs soit vn mal outre nature, causé par vne maladie elle ne doit pas toutes-fois estre reputée pour symptome, mais bien

pour cause de maladie, d'autant qu'elle a son siege dans les choses contenuës, & que par accident elle offense l'action.

Or on ne peut dire qu'une mesme chose soit & symptome & cause de maladie: cōbien qu'il puisse arriuer qu'un symptome soit cause d'un autre symptome, cōme quand plusieurs symptomes procedent d'une mesme maladie par une suite cōtinuée. L'intemperie froide du ventricule offense la digestion, d'où vient la crudité, puis la lyenterie, qui est une sorte de flux de ventre, & enfin l'empeschement de la distribution de l'aliment par tout le corps. Selon cest ordre, toutes les fois qu'il se fait quelque grand concours & mélange de maladies, de symptomes, & de causes, ce qui precede immediatement n'est ny la maladie, ny le symptome, & n'y a prochainement aucune cause qui suiue; mais ces choses sont tousiours de sorte liées & attachées l'une à l'autre, que la cause precede la maladie, & la maladie est de près suiue du symptome. Et cōbiē que quelques fois la mesme chose soit maladie & cause de maladie, neantmoins ny l'une ny l'autre ne peut estre dite symptome: car quelques fois une maladie deuient cause d'une autre maladie, & un symptome de l'autre, mais on ne remarque point que le symptome deuienne iamais ny maladie, ny cause prochaine d'icelle.

C'est pourquoy il semble qu'Auicēne n'ait gueres bien distingué les substances des choses, quand il a broüillé & confondu ces trois genres. Il dit, que le symptome deuient cause de maladie, lors que la trop grāde douleur de quelque coup receu. engēdre un phlegmon: certainement la douleur est bien cause prochaine & contenant, non du phlegmon,

mais de la defluxion ; & la defluxion , de l'amas qui se fait ; enfin de cest amas qui par son affluence fait estendre & enfler la partie, vient l'obstruction, d'où s'ensuit l'empeschement de la transpiration, l'extinction de la chaleur naturelle, la putrefaction des humeurs , & finalement l'inflammation que nous appellons proprement phlegmon. La grande abondance des humeurs amassées, & la pourriture de l'inflammation, sont donc la cause principale de la tumeur ; & la douleur n'en est que la cause incitante, sans laquelle il ne se feroit rien du tout. Auicenne bande tous ses nerfs, pour persuader que le symptome se tourne & change en maladie, quand la douleur de teste, qui procedé du vice de l'estomach , persiste fort long - temps. Mais quoy que ceste douleur qui ne venoit que de sympathie, soit rendue propre à la teste, elle ne degenerate pourtant pas en maladie, ny ne change sa premiere nature de symptome ; mais c'est ou l'interperie mesme de la teste, ou quelqu'autre maladie contractée par la communication de l'estomach, qui cause ceste douleur propre de la teste.

CHAPITRE II.

Les trois suprémes genres de Symptomes.

L'Offense de la fonction suit immédiatement la maladie, comme vn effet d'icelle, & en est le symptome premier, propre, & inseparable, duquel puis après procedent les autres, qui se rencontrent de deux sortes, sçauoir est, en la substan-

ce des parties, ou bien és excrémens. Tellemēt qu'il se retrouue en tout trois souuerains genres de symptomes, qui sont, l'action offensée, le vice des excrémens, & la simple affection du corps, les deux derniers viennent de la fonction offensée, & l'offense de la fonction vient de la maladie. Pour mieux entendre tout cecy, posons l'exemple d'une obstruction formée dans la bourse du fiel: en ce mal la masse du sang ne peut estre repurgée de la bile iaune, & ceste fonction estant de la sorte offensée, la bile meslée dans le sang, s'épand par tout le corps; d'où s'ensuit la mauuaise & desagréable couleur de la peau, & se fait la jaunisse, qui est vn symptome simple. De plus, lesvrines deuiennent iaunes & épaisses, & les excrémens du ventre blanchissent, comme estans destituez du mélange de la bile. Voila donc comment, & en quel ordre les simples affections du corps, & les vices des excrémens procedent de l'action offensée. Venons maintenant à colliger les differences des fonctions offensées par le denombrement de celles qui sont entieres.

Les fonctions sont, ou animales, ou naturelles: des animales les vnes concernent les sens, les autres le mouuement, & les autres la connoissance. Les sens sont au nombre de cinq, sçauoir l'attouchement, le goust, l'odorat, l'oüye, & la veüe. Quant aux fonctions qui concernent la connoissance, c'est la fantaisie, l'intelligence, & la memoire; chacune desquelles est offensée en deux façons, ou parce qu'elle ne se fait point du tout, ou bien d'autant qu'elle ne se fait pas comme il faut: celle qui ne se fait pas comme il faut, est ou amoindrie, ou depraüée. L'auëglement est vne priuation de la veüe, & s'en est vn affoiblissement quand on re-

garde trop de pres: mais quand les yeux se trôpent, & prennent vne chose pour l'autre, c'est vne erreur & vne deprauation. A cela correspondent en l'ouïe la surdité, la difficulté d'ouyr, & le tintement des oreilles. Il est facile sur ces exéples d'assigner toutes les fonctions animales qui sont offensées, quoy qu'elles n'ayent point encore de nom qui leur soit propre, en establisant trois differences de chacune d'icelles.

Il faut presque obseruer la mesme raison au denombrement des fonctions naturelles offensées: Chaque partie similaire estât douée de quatre facultez, & autât de fonctions, s'il arriue que chacune soit offensée en trois façons, ou parce qu'elle ne se fait point du tout, ou qu'elle est affoiblie, ou bien qu'elle se fait mal, il se retrouuera 12. sortes de symptomes en chaque partie, en tant que similaire: & si la partie est quant & quant organique, elle sera sujette à pareil nombre d'autres symptomes, d'autant qu'outre ce qui concerne la nourriture & la conseruation, elle a semblablement d'autres vertus qui sont communes à tout le corps. La crudité, la difficulté de digerer, & la mauuaise digestion de l'estomach, sont des vices de la commune faculté concoctrice offensée: il ne s'en retrouue pas moins en l'attraction, en la retention, & en l'expulsion, mais on ne leur a point encor imposé de nom conuenable, non plus qu'aux douze incommoditez des fonctions qui sont propres aux parties, en tant qu'elles sont similaires. Voila donc cōbien la fonction offensée comprend de genres de symptomes, lesquels arriuant à diuerses parties, doiuent estre contez selon les fonctions de chacune d'icelles.

CHAPITRE III.

*Differences des Symptomes qui se re-
trouvent , tant en l'affec-
tion simple , qu'és
excremens.*

Les simples affections qui surviennent aux parties outre l'ordonnance de la nature, sans incommoder aucune des fonctions, sont presque toutes sensibles & manifestes. C'est pourquoy on les a reduites en cinq classes, selon le nombre des sens, par lesquels on les reconnoist. Les visibles sont les couleurs mauuaises qui viennent de maladie, telle qu'est la jaune quand on a la jaunisse, la passe en ceux qui sont leucophlegmatiques, ou visligineux, & la noire en la lepre. Celles de l'odorat sont les odeurs puantes & fâcheuses qui sortent des aisselles, des oreilles, du nez, de la bouche, ou de tout le corps. A l'oüye se rapportent les sons outre nature, comme le tintoin des oreilles, le ronflement des poulmons, & du gosier, le craquement des dents, les rots de l'estomach & de la gorge, & le bruit des intestins. Les saveurs desagreceables qui infectent le palais & la langue, se perçoient par le goust, commē sont l'amertume de la bouche causée par la bile jaune, les aigreurs qui viennent de la melancholie, ou la saveur salée de la pituite. La peau rude, seiche, & ridée, est entachée de symptomes qui se remarquent par le toucher. Voila donc les differences

sous lesquelles sont compris les symptomes du second genre, qui sont les affections simples du corps.

Quant au troisieme genre, il se retrouue es excremens qui ont contracté quelque vice outre nature, soit en la substance, ou en la qualité, ou en la quantité. J'appelle vice de la substance, quand ce qui sort est de tout son genre outre nature, comme la pierre, la grauelle, les vers. Ou bien lors que non ce qui sort, mais sa sortie est outre nature: comme le sang que l'on rend par le nez, par les oreilles, par la bouche en crachant, en vomissant, par la vessie, ou par le fondement, & quelque eruption que ce soit outre l'ordre de la nature. Les excremens pèchent en qualité quand ils n'ont pas la couleur que la nature leur ordonne, comme si les vrines, les deiections, les mois, les crachats, les vomissemens sont de couleur noire, liuide, ou verte. Lors aussi qu'ils sentent mal, ou qu'ils ont quelque saveur amere, salée ou aigre: ou qu'on remarque quelque lenteur ou acrimonie, quelque grossiereté ou tenuité, ou quelqu'autre qualité qui excède la nature, tant en ces choses, qu'en toutes les autres qui sortent du corps. C'est vn vice de quantité lors que les excremens ne gardent pas la juste regle de la nature, mais sortent ou trop abondamment, ou trop peu. Voila donc les vices des excremens qui doivent estre mis au rang des symptomes, si principalement ils ont pris leur origine de quelque maladie: car ceux qui ne viennent pas de là, mais des alimens, dont ils retiennent ou la mauualse qualité, ou la quantité immoderee, ne doiuent pas proprement estre contez pour symptomes. Au reste, ces vices & symptomes des excremens, deuiennent souuent

causes de maladies, estans retenus au dedans plus que la nature ne requiert. Et certes ie ne pense pas qu'il y ait aucune autre cause qui engendre plus de maladies, que fait l'affluence des excremens. Ce sont là les differences des symptomes, maintenant ie m'en vay en peu de mots rapporter les causes d'iceux.

CHAPITRE IIII.

Les causes des fonctions offensées.

L'Offense de la fonction prouient immédiatement de la maladie, sans l'entremise d'aucune chose. Or la maladie qui offense le sentiment & le mouvement, reside ou dans le cerueau, qui est le propre siege de la faculté, ou dans l'organe du sentiment ou du mouvement. Celle qui empesche la faculté & en occupe le siege, est ou intemperie, ou solution du continu, ou constipation, ou obstruction, & cela procede ou d'une tumeur outre nature, ou de quelque humeur influente; car ces choses empeschent que la faculté ne passe dans l'organe du sentiment & du mouvement. Celle qui se retrouue en l'organe, travaille tantost la premiere & principale partie d'iceluy, & tantost les autres qui aident à ceste premiere, & luy seruent aucunement.

En la partie principale (telle qu'est en l'œil l'humeur cristalline) se font l'intemperie, la solution du continu & le changement de situation; car le crystallin de l'œil quitte souuent sa propre place. Es autres parties de l'organe, outre l'intem-

perie & la solution du continu, il se rencontre encore d'autres maladies organiques : comme sont l'eslargissement ou retrecissement de la prunelle, le defect ou la redondance des humeurs, la grossièreté ou la couleur estrangere de ces mêmes humeurs, & des tuniques qui les contiennent, la suffusion, l'onglée, & tout ce qui vient sur la prunelle, puis les vlcères, les inflâmatiōs, & autres tumeurs, qui sont neârmōins & maladies de tout l'œil, & causes de symptomes. Presque de même façon l'obstruction des oreilles se fait ou par quelque tumeur ou par vne carnosité, ou par quelques ordures, ou par les choses qui tombent dedans. Semblablement l'obstruction des narines vient de froissement & de tumeur, ou de quelque polype: comme aussi l'os spongieux se remplist & se bousche quand on est morfondu. Mais la puanteur de ces parties corrompt l'odorat: de même que quand la langue est pâteuse & chargée d'humeur salée, aigre, ou amere, cela peruertit le jugement du goust. Quant aux symptomes de l'attouchement & du mouvement, comme l'estourdissement, & la paralysie, ils procedent des nerfs qui sont ou refroidis, ou relâchez & pressez par dehors, de quelque lien ou autre chose astraignante, ou bouschez de quelque humeur grossiere & glaiante. Lesquelles causes ne permettent pas aux esprits & à la faculté animale de s'estendre & passer plus outre. C'est donc ainsi que les fonctions animales sont offensées par diuerses causes.

Quant à l'offense de la fonction naturelle, toute la cause en est, ou l'intemperie, ou la corruption de la substance: car ces vices attaquent & ruinent la partie similaire qui sert à l'exécution des fonctions, & n'y a aucunes fonctions naturelles privées,

privées, qui puissent estre offensées par d'autres causes : mais les publiques, telles que sont celles des organes naturels, ont encore quelques autres causes qui les offensent. Car l'essence organique de l'estomach, du foyé, ou de quelque autre organe, est quelquesfois pervertie par vn erysipile, vn phlegmon, ou quelque autre tumeur outre nature, en suite dequoy la digestion diminuée, ou dépravée, incommode & donne de la peine à l'homme. Voire mesme la maladie non seulement similiaire, mais aussi celle qui est organique trouble & interrompt l'action de la faculté attractive. Ainsi lorsqu'une carnosité, ou quelque autre tumeur se forme dans la gorge, qui empesche ou bousche le passage des viandes, l'attraction ne se fait point du tout, ou se fait difficilement, ou ne se fait pas bien. mais comme par boutées, ou avec quelque tremblement. Les mesmes causes, & la quantité des vents, empeschent la rétention, & font que l'estomach ne retient pas bien les viandes, & ne leur adhère pas assez fort. L'expulsion est offensée par les maladies similaires, par le retrecissement & obstruction des passages. Mais elle est hastée & facilitée par l'abondance ou acrimonie des excremens : comme au contraire, leur grossiereté ou viscosité la retarde. Il ne faut point en vérité chercher d'autres causes du vice de la distribution de l'aliment par les veines dans tout le corps, ou de la déjection du ventre, ou de la profusion de l'urine, ou de la purgation de la bile jaune en la bourse du fiel, ou finalement de celle de la melancholie dans la ratte.

CHAPITRE V.

*Les causes interieures des
Symptomes simples.*

QVant aux simples affections qui se rencontrent soit és parties, soit és excréments, sans incommodité d'aucune fonction, elles ont pour causes interieures celles qui suivent. La couleur qui n'est pas selon la nature, vient d'un suc, & de certaines humeurs decheuës de la bonté & médiocrité de leur estat naturel, lesquelles se sont jetées vers la peau, ou sortent parmy les excréments. Toute puanteur & odeur fâcheuse est un effet de pourriture. La mauuaise saueur imite la nature de l'humour qui decoule en la bouche, ou qui se trouve mêlée dans les excréments. Les sons outre nature, les bruits, & les murmures, se font ou par la petite capacité des organes, ou par l'abondance des flatuositez, ou par les vents qui courent de costé & d'autre. D'où l'on peut reconnoistre que les causes de ces symptomes, aussi bien que de ceux que nous auons cy dessus remarquez, sont des maladies.

Or la qualité vicieuse des excréments naturels, comme des dejections, des urines, des mois, & des sueurs, doit estre estimée auoir les mesmes causes, que nous venous d'attribuer à l'affection qui est simple. Pour ce qui concerne leur quantité, elle s'augmente outre mesure, ou par l'excès des viandes, ou par leur corruption & acrimonie, qui excite la vertu expultrice, ou par la

matiere qui est lubrique & coulante, ou par l'imbecillité de la faculté conténante, ou par le sentiment trop delicat du corps, ou parce que la distribution de l'aliment est empeschée, ou que les excremens sont renuoyez d'ailleurs, ou bien que tout le corps se fond & se liquefie. Car par ces causes les vrines, les deiections, les sueurs, & les mois, sortent plus fort, plus frequemment, & en plus grande abondance. Mais la quantité de ces excrémés est amoindrie par la disette du viure, par la grossiereté & adstriktion des alimens, par l'imbecillité de la faculté repoussante, par le peu de sentiment des parties qui seruent à l'expulsion, par le retrecissement ou obstruction des passages, & par la trop grande dissipation qui se fait par les pores de la peau.

Quant aux excretions qui de tout leur genre outrepassent la nature, elles ont d'autres causes. Comme la profusion du sang, laquelle se fait quand les veines qui seruent à contenir le sang, sont ouuertes, rongées, ou rompuës. Or les veines se rompent par vne trop grande repletion, & par la vertu des causes évidentes, qui sont remarquées au liure precedent. Le rongement des veines prouient d'une humeur acre & corrosiue, qui mange & ronge principalement celles qui sont molles & petites. Leur ouuerture se fait lors que l'abondance, la subtilité, & l'acrimonie du sang, en eslargissent les orifices, lesquels sont aussi quelquesfois ouuerts à dessein par la nature incommodée, pour se descharger par là de tout ce qui fait de la peine. Quelquesfois aussi le sang estant deuenu si clair, qu'il semble tout sereux, il sort & passe à trauers les plus rares & lâches runiques des veines.

Pour les vomissemens. ils sont excitez par la

quantité excessiue des viandes, & des autres choses qu'on prend par la bouche ; par l'acrimonie des choses contenuës, telle qu'est la bile ; & par ce qui incommode & charge de sa pesanteur, comme le sang & la pituite trop abondante renfermee en quelque lieu. Ces trois causes excitent les defluxions du cerueau, les distillations & larmes des yeux, le crachement, le flux de semence, & toute euacuation de quelque partie que ce soit, contre l'ordre de la nature. D'autant que pour lors la faculté contenant estant fatigüee du poids des excremens, laisse en fin tout escouler : & la faculté repoussante estant irritée, chasse les excremens avec impetuosité.

CHAPITRE VI.

Que la douleur est vn symptome de l'attouchement, & qui sont les causes d'icelle.

LÉ sentiment est attaqué & reçoit de la douleur par l'avehement des choses qui luy sont presentes ; comme l'œil par la trop grande splendeur, & l'oreille par le son rude, & le bruit vehement. Les douleurs du seul attouchement sont rendües fort cruelles, parce que ce sentiment residant en vne matiere tres-grosliere, & grandement ramassée, est le premier & plus commun à tous les animaux, & que les qualitez qui le concernent sont extremement efficaces, lesquelles venans à excéder & à frapper l'attouchement avec vehemence & soudaineté, excitent la douleur. Or ce n'est pas la perception

des qualitez nuisibles, mais bien l'affection qui en resulte aussi tost, quel'on appelle douleur; de mesme que c'est tristesse ou cholere quand la passion s'elmeut au rencontre d'une personne ennemie. Tout ainsi donc que la veue de l'ennemy n'est pas la cholere, aussi pour dire le vray, la douleur n'est point le toucher de la chose nuisible, mais c'est la peine & la facherie qui prouient du toucher. Par consequent la douleur doit estre prise pour symptome de l'attouchement, comme la cholere passe pour vn symptome de l'esprit.

Galien exposant le passage d'Hippocrate, où il dit, Que toute maladie est vlcere, soustient que toutes les douleurs ne se font que par separation & diuision du continu. Auerroës contestant contre Galien, est d'avis que la raison, comment la douleur se fait avec quelque solution du continu, est qu'il s'introduit vne qualite maligne & nuisible, qu'il establist pour cause seule & immediate de la douleur, laquelle qualite est seule l'objet prochain & propre de l'attouchement. Mais l'une & l'autre de ces opinions, semblent fondees sur des subtilitez sophistiques. Car l'attouchement n'a pas vn organe qui soit seul & simple, mais qui consiste en la mediocrite ou entredeux des extremittez de la chaleur & de la froidure, de l'humidite, & de la seicheresse, de la moleste, & de la dureté, de la rudesse, & de la douceur, de la pesanteur, & de la legerete: en leur forme conuenable, & en leur situation. C'est pourquoy en la Physiologie, j'ay demonstre que l'attouchement n'estoit point affecte par les choses temperees, ny par celles qui luy sont semblables, & que

meſmes il ne les perceuoit ; mais qu'il ſouffroit diuerſement par les choſes contraires, & qu'il ne les ſentoit qu'avec offenſe & incommodité. Partant tout ce qui eſt immoderément chaud ou froid, dur ou aigu, peſant, ou violent, venant à rencontrer l'attouchement, cauſe de la douleur, & ce en vertu de ſa qualité, laquelle eſt cauſe prochaine d'icelle; ſçauoir eſt en échauffant, refroidiſſant, briſant, coupant, rongéant, ou déchirant. Et pource il ne faut pas eſtablir vne ſeule cauſe de la douleur, mais autant que l'attouchement a d'objets. Tout ce qui attaque l'attouchement avec violence & ſoudaineté, peut faire de la douleur ſeulement pendant qu'il agiſt & qu'il émeut les ſens; & la douleur du ſens s'appaïſe au meſme temps qu'il ceſſe d'eſtre alteré. Or combien que quelques-fois la cauſe efficiente n'eſtant plus, il reſte quelque eſtourdiſſement (de meſme que l'image ou l'eſpece viſible demeure dans l'œil quelque temps après qu'on a regardé la choſe) lequel retient en-cor quelque foible apparence de douleur, ce n'eſt pas neantmoins vne douleur.

Il y a beaucoup de différences de douleurs que nous auons iugé à propos de mettre au rang des ſignes demonſtratifs. Et il me ſemble que cecy doit ſuffire en ce lieu, touchant les genres ſuprêmes des ſymptomes, & les cauſes d'iceux, reſeruant d'en traiter cy après d'un chacun en particulier, en parlant des maladies qui arriuent aux parties du corps. Venons maintenant aux ſignes.

CHAPITRE VII.

*Des signes, & combien il y en a
de sortes.*

LES maladies cachées au plus profond du corps, ne pouuans estre ny veües, ny apperceües par aucun sens, se cognoissent seulement par les signes, lesquels comme indices des choses, seruent fort à propos de guide & de conduite à l'entendement pour penetrer dans ce qui est de plus secret, & descouurir les choses fort obscures si clairement, qu'il semble qu'on les voye avec les yeux mesmes. Ainsi la necessité des signes est telle que sans eux les fondemens de la Medecine seroient fort mal établis. Or d'autant qu'outre les maladies de chaque partie, dont nous parlerons cy après, il en arriue souuent d'autres nouvelles ou meflées, d'une façon extraordinaire, lesquelles ne peuuent toutes estre enseignées ny par les liures, ny par des signes exprés, il est raisonnable de traiter tout premierement des signes en general, pour exprimer la façon de rechercher tant les maladies, que les causes interieures de chacune d'icelles. Et parce qu'il y a trois premiers genres de signes, il faut icy parler de ceux qui sont contraires à la santé, lesquels demonstrent & les maladies, & leurs causes; reseruant l'explication des signes prognostics au traité de la Prognostique; & celle des signes de la bonne disposition au discours des moyens de conseruer la santé. Tout ce donc qui se presentant à nos sens, accompagne

quelque autre chose occulte & cachee, il sert de signe à ceste chose là. Ainsi le symptome eſſant apparent & manifeste, sert de signe exprés à la maladie intérieure & cachee, de laquelle il procede; semblablement la cause evidente, comme quelque viande mauuaise & corrompue, est l'indice de la maladie qu'elle a engendree.

Or il a deux genres de signes, l'un demonstratif, & l'autre prognostic. Quelques-uns en ont adjoinct un cōmemoratif, qui fait resouuenir de la precedēte constitutiō du corps. Par les signes demonstratifs on reconnoist la constitution presente, & par les prognostics on preuoit celle qui est future. Les signes prognostics ne paroissent pas tout aussi tost qu'on est saisi de maladie, mais quelque tēps après, & pource on les appelle d'ordinaire, suruenants. Ces signes sont generalement de trois sortes: les uns de digestiō ou crudité, les autres de salut ou de mort, & les autres decretoires & critiques; & en chacun de ces genres il y en a de salutaires, de dommageables, ou de neutres, desquels en particulier nous parlerons quelque autrefois plus amplement. Entre les signes demonstratifs il s'en retrouue pareillement de salutaires, de dommageables, & de neutres. Les salutaires sont ceux qui marquent la constitution naturelle du corps, & la bonne tēperature des humeurs. Des dommageables, les uns declarent l'espece de la maladie, cōme le poulx frequent, viste, & inegal, declare la fiēvre; les autres marquēt la partie qui est affectee, cōme le poulx dur denote que c'est la membrane, le poulx mol & ondoyant, que c'est le poulmon, ou quelque autre partie fort molle: les autres monſtrēt la cause de la maladie, cōme sont les signes de la cacochymie & de la repletion. De plus en chacun desdits genres les uns sont propres

& inseparables, lesquels accompagnent tousiours l'essence propre de la chose, & n'en peuuent estre separez; ils viennent avec la maladie, & s'en vont avec elle, & parce on les appelle accompagnans ou paroissians quant & quant: Ainsi disons nous que la douleur poignante du costé, la difficulté de respirer, la toux & la fièvre aiguë sont les propres signes de la pleuresie. Les autres sont nommez assistans, qui viennent quelquesfois avec la maladie, quelquesfois pendant la maladie, & quelquesfois ne l'accompagnent point du tout, & partant ne sont ny propres, ny inseparables, mais communs à plusieurs ensemble. De ceste sorte la douleur qui s'estend iusques à la gorge, ou iusqu'aux flâcs, & la facilité plus grande de coucher sur le costé malade, que sur celuy qui est sain, ne sont pas signes propres de la pleuresie, mais signes assistans: de mesme que la douleur de teste qui n'accompagne pas tousiours la fièvre. Or laissant à part les signes salutaires & prognostics, nous entreprenons d'exposer icy seulement ceux qui se trouuent contraires à la santé.

CHAPITRE VIII.

Les genres suprêmes des signes dommageables à la santé, qui donnent connoissance des maladies, & de leurs causes.

TROIS choses se rencontrent dans le corps outre l'ordre de la nature, la maladie, la cause d'elle, & le symptôme. Le dernier tombant tous-

jours sous quelque vn des sens, se manifeste de soy-mesme, sans qu'il soit besoin d'autres signes. Mais la maladie & la cause interieure d'icelle nous sont le plus souuent cachees, & ne se descouurent point à nos sens, on les connoist neantmoins par leurs symptomes, qui en sont comme les signes. D'où vient que la plus grande partie de l'art de Medecine est fondée sur l'opinion & sur la conjecture, dont la verité n'est point autrement esclaircie que par la preuue des signes, & par le raisonnement. Or d'autant que la connoissance non seulement de l'espece de la maladie, mais aussi du lieu où elle est placee dans le corps, est requise en la methode de guerir, il est conuenable que des signes insalubres, les vns marquent le lieu affecté, & les autres la maladie qui s'y rencontre.

Les signes du lieu affecté sont les excremens, l'action offensée, la propriété de la douleur, la situation, & les accidens propres: non que tous ces signes paroissent tousiours necessairement en chaque lieu affecté, ains seulement quelques vns. Car souuent la propriété de la douleur, la situation, & les accidens propres, denotent clairement que le foye est enflammé, encore que l'action ne semble point offensée, & qu'il n'en sorte point d'excremens. De mesme le seul crachement de sang decouure qu'il y a quelque vlcere au dedans, & quelque veinerongee, bien qu'il n'en paroisse autre chose. Par le mot d'excremens, nous entendons tant ce qui sort, que la façon de sortir. Ce qui sort est quelquesfois vne portion de la partie affectée, dont il est vne preuue certaine: car le cartilage que l'on crache en toussant, est vne marque asseuree qu'en l'artere trachée il y a quelque vlcere, les petits morceaux de chair que l'on rend parmy les vrines

tesmoignent le mesme des reins, & les racleures qui se retrouuent es dejections du ventre, si elles sont minces, signifient que les boyaux superieurs sont vlceréz, & si elles sont grossieres & charnuës, c'est signe que l'ulcere est dans les boyaux qui se trouuent plus proches du fondement. Quelques-fois il ne sort aucune portion substantielle de la partie, mais bien quelque autre chose qui luy estoit adherante, comme la graisse des intestins: & d'autrefois c'est ce qui estoit contenu dans la partie affectee; ainsi quand l'urine decoule par la playe qu'on a receüe, c'est vn indice que la vessie est offensée, & s'il en sort quelque matiere fecale, c'est à dire que les boyaux sont percez. Mais la playe se trouuant en la poictrine, s'il en sort du vent, la membrane succingente est entamee. La façon de sortir descouvre pareillement le lieu qui est affecté: car le sang qui sort d'une playe comme par faillies, prouient de quelque artere; & quand on met hors vne portion pure & seule de la partie malade, ceste partie n'est pas beaucoup esloignée; mais si cela se trouue tout à fait meslé parmy les excremens naturels, c'est signe que le mal est bien auant. L'action offensée monstre que la maladie reside en l'organe qui seruoit à la produire, comme de l'auuglement on reconnoist que le mal est en l'œil, de la surdité qu'il est en l'oreille, & de la crudité, qu'il est dans l'estomach. Or pour scauoir si le mal qui est en la partie luy est propre, ou s'il vient par la communication d'une autre, on ne l'apprend pas de l'action offensée, mais par les autres signes. Car lors qu'il est solitaire & continuel, sans admettre d'interualle, ny augmenter par le rengregement du mal d'une autre partie, mais que tout autre cessant, il ne laisse pas de per-

fister, & que les remedes conuenables y apportent du soulagement, c'est vn mal qui est propre. Mais celuy qui se renforce quand vn autre s'accroist, & s'adoucit à mesme temps que celuy-là diminue, sans estre aucunement allegé par les remedes propres qui sont appliquez à la partie où on le sent, se fait par sympathie & communication. Semblablement la propriété ou espece de la douleur explique quelle partie est la premiere affectée, comme vne douleur qui bat signifie que l'artere, ou la partie qui en est fort proche, souffre de l'incommodité; la douleur espoinçonnante; signifie que c'est la membrane: celle de conuulsion, que ce sont les nerfs ou les tendons; celle qui est esparie, que ce sont les veines: celle qui est affommante, & profonde, que ce sont les membranes des os: la lasche & molle, que c'est la chair; la pesante & sourde, que ce sont les visceres, ou quelque autre partie qui n'est pas d'un sentiment fort subtil. Finalement la situation tant de la douleur que de la tumeur, fait reconnoistre la partie qui est affectée. Car si la douleur est toute vers l'hypochondre droit, c'est signe que le mal est au foye, & non pas à la rate: si vers la gauche, c'est en la rate, & non au foye. Si la tumeur de l'hypochondre droit s'estend par l'extremité des costes, & presente sur icelles la figure de la Lune croissante, alors le foye ne se porte pas bien; mais quand la tumeur est aduancée le long du ventre, & paroist toute pleine, la maladie se rencontre es muscles droits de l'epigastre. Voila les genres des signes qui font connoistre le lieu où le mal est caché, d'entre lesquels nous ceux qu'on nomme propres & inseparables,

sont très-affaiblez, parce qu'ils ont beaucoup de force pour demonstrier: mais ceux qui sont assistés, mettent quelquesfois fort en doute, à cause de leur communauté.

Maintenant quant aux signes des maladies, on les tire des mesmes choses, d'où on prend ceux du lieu où est le mal, quoy que ce soit vn peu diuersement, excepté de l'action offensée: car elle marque bié la partie qui est malade, mais non pas de quelle maladie c'est. Si donc il se retrouue dans les excremens vne portion de quelque partie, c'est signe d'vlcere: comme quand on rend quelques racleurs de boyaux, ou que l'on crache quelques morceaux cartilagineux de l'artere trachee. S'il y a du sable rouge au fond des vrines, les reins sont trauaillez de chaleur. Si les matieres fecales du ventre sortent come de la graine de courge, c'est signe que l'on est tourmenté de cette sorte de vers, qui s'appellent ascarides. La propriété de la douleur demonstre l'espece du mal: come la douleur qui enflâme demonstre l'interperie chaude, celle qui assoupit en demonstre vne froide. La douleur poignante, vlcerate, ou demangeante, prouient de quelque humeur acre ou salee. La douleur qui fait enfler monstre qu'il y a de l'eau subtile, ou du vet dans la tumeur. La nature du lieu & la situation, seruēt pareillemēt de signes pour bié discerner le mal, d'autāt que chaque partie a ses maladies propres & particulieres. Les ieux sont sujets à la suffusion, le calcul ne se forme gueres que dās les reins & dās la vessie: les vers s'engendrent dans les intestins, & non pas dans l'estomach: le cœur n'admet point d'vlcere penetrant, & les poulmons ny les cartilages ne souffrēt aucune douleur. Enfin les accidens propres monstrent aussi quelle est la maladie, comme les ongles recourbez sont signes de pulmonie; la langue noire, de fiévre ar-

dente; la couleur jaune estendue par toute l'apeau, marque l'obstruction du foye, & la noire celle de la ratte. C'est donc de ces genres de signes, que l'on doit tirer la connoissance tant de la partie malade, que de la maladie mesme.

CHAPITRE IX.

Comment il faut par le moyen des signes proceder à la recherche de l'endroit où est le mal.

Toute recherche conduist à la connoissance des causes secretes & cachees, par ce qui est decouvert & manifeste au sens: & ce qui est le dernier en origine, & selon l'ordre des causes, se rencontre le premier en la recherche; comme fait quelque euidente maladie, ou bien vn symptome. Or cela, soit fonction offensee, soit excrement, soit douleur, nous donne premierement quelque ombre de la partie affectee, & par sa situation, & par son espee: en suite dequoy il se faut informer s'il n'y a point aussi quelques autres symptomes de la partie suspecte, qui correspondent à la premiere conjecture. Car il ne se retrouue presque aucun symptome qui soit tout seul, mais on en remarque tousiours plusieurs en chaque maladie. Quand donc tout ce qu'on a appris tant par le recit des autres, que par les enquestes qu'on en a faites, conuient en la signification d'une mesme partie affectee, alors l'endroit où est le mal est decouvert & reconneu. Mais si cela ne s'accorde pas bien, il se faut destourner à la recherche d'une autre partie

jusqu'à ce qu'il s'en rencontre quelque vne qu'on reconnoisse affectée par les preuues tirees des signes qui soient certains. Si les significations de tous les symptomes se rapportent à vne mesme chose, & qu'il n'y en ait aucune qui s'estende ailleurs, c'est à dire, qu'il n'y a qu'une seule partie malade: touchant laquelle, il faut encore prendre garde si elle est trauaillée d'un mal qui luy soit propre, ou qui luy vienne par la communication de quelque autre partie, & quelle est ceste partie communicante. Si le mal est propre, il faut aussi voir s'il est premier, ou s'il prouient d'un autre qui le precede. Parce que tous ces discernemens sont principalement necessaires pour venir à bout de la cure.

Posons pour exemple quelque vn qui se plaigne d'une difficulté de respirer, puis qu'il conste par là que le mal est en quelque vn des organes qui seruent à la respiration, il faut rechercher si le goüer est entaché de quelque vice particulier, ou bien si c'est l'artere trachée. S'il n'en paroist rien en ces parties là, on doit rapporter la cause de ceste courte haleine ou aux poulmons, ou à la poitrine, ou au diaphragme, ou aux parties qui leur sont voisines. Quand il se fait vn certain bruit en respirant, & que la toux est importune, sans sentiment de douleur, le mal est dans les poulmons. Lors qu'une douleur presse en la poitrine, & ce vers les côtes bastardes du costé droit, il faut tâcher de la reconnoistre par d'autres signes: car si elle est espoinçonnante, accompagnée de fièvre continuë, & avec vne toux, en laquelle principalement on crache le sang, c'est marque de pleuresie: mais si elle est pesante, avec fièvre continuë, & vne toux seiche, elle fait conjecturer que le foye est enflammé. Il faut

donc alors prendre garde, si quelque tumeur représente la figure de la Lune en l'hypochondre droit, si la langue est rude & noire, la soif inextinguible, le degoust fort grand, le vomissement bilieux, les defecions frequentes, & pleines de bile, les vrines epaisses & enflammées: car si toutes ces choses se retrouuent, le foye est traiaillé de phlegmon; mais s'il en manque plusieurs, il faut rapporter le mal à quelqu'autre partie. Derechef, quelqu'un propose vne douleur venue au dessous des costes du costé gauche, après auoir examiné l'espece de la douleur, il fait parcourir & considerer de la pensée; totis les lieux de cette region là, comme la hanche, les muscles de l'epigastre, la ratte, l'intestin colon, & le roignon gauche, toutes lesquelles parties ont beaucoup d'affinité. Que si cette douleur descendant en bas, s'estend par toute la cuisse, & s'augmente quand on marche, & qu' auparauant il y ait eu des signes de destuxion, c'est vne douleur de la hanche: mais si on la descouure par le moindre attouchement de la main, & qu'elle s'irrite en toussant, esternuant, ou respirant en quelqu'autre façon, elle est es muscles de l'epigastre. Si avec la douleur on apperçoit vne tumeur encernee par l'hypochondre gauche, & qu'il ait de la peine à se tenir couché sur le costé droit; que plusieurs ventositez excitées par l'indigestion, fassent enfler l'estomach, ou sortent en roissant, & que la crainte & la tristesse durent beaucoup, le mal se doit rapporter à la ratte. Si la douleur estant arrestee s'estend depuis cette concauité qui est entre les dernieres costes & la hanche, le long de l'uretère par les flâcs, presque iusques dans la vessie, sans s'appaiser aucunement quand le ventre se descharge, & que le vomissement soit diuers,

l'enlue

l'enuie de pisser frequente, & avec ardeur, l'vrine beaucoup differente de la naturelle, ou en sa substance, ou à cause des choses qui s'y trouuent meslees, cette douleur vient des reins. Quant à la douleur de la colique; elle court ça & là, se dilate fort, & s'addoucist par le benefice du ventre. C'est donc ainsi qu'on doit proceder à la recherche du lieu où le mal est caché.

Or quád la chose s'explique de soy-mesme pleinement & ouuertement, avec tous les symptomes qui la concernent, il n'est pas besoin de recherche, mais seulement de jugement & d'esprit pour en decider. Cômme si quelqu'un rendoit par le bas, tous les iours trois ou quatre fois le iour, enuiron demie liure de vray pus, tantost avec les matieres fecales, & quelquesfois à part, sans qu'il en ressentit, ou ait iamais ressenty aucune douleur, sans soif, ny degout, ny fièvre beaucoup forte, mais lente seulement, & sans que le malade soit contraint de s'allicter d'où iugeriez-vous que vint cela? Plusieurs ont esté quelquesfois bien empeschez sur ce doute: mais certes il paroît bien que ce pus sort de quelque absces creué au dessous du diaphragme; lequel absces n'est pas dás le ventricule, ny dans les intestins, parce qu'il ne se pourroit faire qu'on n'en sentist de la douleur. Il n'est pas aussi dans les reins, ny dans la vessie, car il sortiroit avec l'vrine; & non point par le fondement: non au foye, ou en la ratte, d'autant que les absces qui se forment en ces parties là abbattent tout à fait le malade, & causent vne ardente fièvre, vne grande alteration, & d'autres fâcheux symptomes. Il reste donc que ce soit seulement au mesentere (lequel ne tient pas rang de partie noble; & est priné de tout sentiment) & ce dans

la partie basse, d'où il puisse couler tout par en l'intestin droit.

Maintenant s'il se presente plusieurs indices & diuers symptomes, dont les vertus & significations ne concernent point vne mesme partie affectée, la partie affectée ne peut estre simple & unique. Or c'est icy que les ignorans Medecins sont d'ordinaire embrouillez par le concours turbulent de tant de signes diuers, comme si c'estoit à l'abord de quelque nouuelle maladie, de laquelle on n'eust point encor ouy parler. Et d'effet il y a bien de la peine & de la difficulté à clairement expliquer les maladies qui sont confuses & meslees, lors principalement que les parties malades sont proches les vnes des autres, & conspirent à quelque fonction commune, parce que la pluspart de leurs symptomes sont communs. Neantmoins pour les discerner & expliquer, après auoir considéré la force & la nature de chaque signe, il faut mettre à part tous ceux qui concourent à la signification de la mesme partie, iusqu'à ce qu'en fin il conste combien il y a de parties qui soient les premieres affectées, à ce qu'en suite on puisse designer pareil nombre de maladies.

Quand donc la respiration est offensée, que la toux & le sifflement du gosier continuënt, que l'on crache beaucoup, & qu'avec cela il suruiene vne douleur de costé: d'autant que ny cette vieille toux, ny ce sifflement, ne peuuent prouenir de pleuresie, il est necessaire qu'outre le mal de costé, il y ait aussi dans les poulmons quelque obstruction contractée de longue main, & que l'asthme soit meslé avec la pleuresie. De plus, lors qu'on est travaillé de la difficulté d'vriner, & qu'en vrinant on ressent vne douleur acre & de l'ardeur, si quand on

cômence à piffer il sort du pus, & ce quelquesfois de soy-mesme sans que l'vrine sortey& que le cours de l'vrine soit souuent arresté : dauantage, si achenant de piffer la douleur se fait plus grande, & qu'il tombe quelque chose de sablonneux ou visqueux, & que le plus souuent la douleur soit vers le fondement : qui est-ce, lie vous prie, qui d'abord netrouue ce mal embrouillé & difficile à reconnoistre ? Et pourtant châce chose estant bien expliquée, on descouure qu'il y a plusieurs endroits affectez, & que le calcul de la vessie est meslé avec vn vlcere qui s'est fait dans le conduit de la verge. Mais quand les parties malades sont esloignées les vnës des autres, il est beaucoup plus facile de les discerner, & leurs maladies sont plus euidentes & plus aisées à reconnoistre, à cause qu'elles produisent des symptomes tous differens, & qui ne se peuuent rapporter à la mesme chose. Comme si l'on rend de l'vrine purulente, sans en receuoir de la douleur en urinant, & qu'avec cela on ait mal aux reins, que pareillement la gorge & le col deuiennent enflés & rouges, avec difficulté de respirer & d'aualler, & mesme avec quelque fiéure : il sera lors facile de distinguer l'vlcere des reins d'avec la squinancie.

En fin toutesfois & quantes que plusieurs parties setrouuent affectées, il faut prendre garde si l'une communique le mal à l'autre, & si l'une est cause que l'autre soit malade : car alors ce seront des maladies connexes & consequentes ; & on en discernera le genre, si l'on cōsidere quelle partie a esté la première surprise de mal, & si l'autre a esté incōmodée par quelque notable symptome qui en prouinst. Ainsi lors qu'en l'hydropisie l'hypocondre droit

deuient dur & enflé, que l'on a dé la peine à demeurer couché sur le costé gauche, & que long temps auparauant il a paru de la jaunisse: on doit iuger que ce sont des maladies meslees qui ont de la connexité, sçauoir est le scirrhe du foye, & l'hydropisie, & que la premiere de ces maladies est cause de la seconde. De mesme aussi quand le corps estant impur & remply de beaucoup d'humeurs peccantes, vient à tomber en fiéure par vne colique nephritique, cette colique est cause de la fiéure. Quant à la fiéure qui accompagne la pleuresie, elle est presque symptomatique: mais si elle a precedé la pleuresie, elle tient le premier rang, & luy est bien meslee, non toutesfois alliee, d'autant qu'elle n'en est pas la cause: & ces maladies sont appellees consequentes. Car ce n'est pas le premier mal qui tient lieu de cause, non plus qu'il ne s'ensuit pas que le second soit vn effet du premier, parce qu'il vient après.

CHAPITRE III.

Le moyen de reconnoistre la maladie & la cause contenant d'icelle.

L'Endroit où est le mal estant ainsi reconnu, Il faut en suite rechercher de quelle maladie c'est qu'il est affecté. Or d'autant que cela se reconnoist par la propriété & situation de la douleur, & par la quaiité des choses qui sortent du corps, en s'informant du lieu qui est malade, on apprend par mesme moyen beaucoup de choses touchant l'espece de la maladie, & souuent les

mesmes signes font reconnoistre l'un & l'autre. Quelquesfois la partie affectee se descouvre plus tost; & quelquesfois c'est le mal qui est le plus manifeste, comme quand on crache du pus, on aperçoit bien que c'est un absces, & quand on crache le sang, que cela vient de quelque ulcere; quoy qu'il ne consiste pas encor quelle partie est malade, il faut donc bien remarquer par les signes susdits, de quelle maladie c'est que la partie est affectee, si elle est similaire, ou organique, ou commune: si de plus elle est simple ou composee: si composee, quelles sont les maladies qui la composent: comme si les reins estans affectez d'intemperie chaude, il s'y retrouue au si quelque ulcere en mesme temps. Davantage, soit que la maladie soit simple, ou composee, il faut rechercher encore si elle est solitaire, & sans auoir de cause qui la foment (car ainsi elle en est plus facile à guerir) ou si elle est accompagnee de quelque cause interieure; parce que cette cause deuant estre ostee la premiere, rend la cure plus difficile.

C'est pourquoy après auoir reconnu l'endroit où est le mal, & l'espece de la maladie; il en faut rechercher toutes les causes internes, & premiere-ment la contenant & plus prochaine: sçauoir si c'est quelque flatuosité, ou aquosité, ou quelque autre humeur, comme pituite, sang, bile jaune, ou bile noire, ou bien autre chose outre nature, comme pierre, grumeau, ver, ou quelque sorte d'excremens. Or cela se remarque par la couleur & nature de la partie, par l'espece de la douleur, par le genre d'excrement: & par ce que nous dirons tantôt de la domination des humeurs. Car il y a des parties propres & disposees pour engédrrer & amasser certains excremens; la bile jaunes'engendre &

s'amasse au foye, la bile noire à la ratte, la pituite en l'estomach és intestins, & au cerueau, le calcul és reins, & en la vessie, & les vers és intestins. Si la partie qui se trouue affectée d'vne chaleur extraordinaire, & outre nature, paroist rouge & enflammee, elle est plus qu'il ne faut remplie de sang, ou de bile si elle est jaune: si celle qui est refroidie deuiant blanche, elle est chargée de pituite; si liuide, c'est de melancholie. La douleur tres-aigüe vient de la bile, celle qui est moins violente & mediocre, vient du sang; la pituite, les eaux, & les vents ne causent qu'vne douleur foible & sourde, si ce n'est que par leur abondance ils estendent trop la partie. Si ce qui sort du lieu où est le mal, est quelque portion de la matiere contenüe, on reconnoist quelle elle est à la couleur, ou à la substance. Voila donc comme se descouure la cause & matiere prochaine & contenant de la maladie, en suite dequoy il faut rechercher si elle est seule & sans compagne, ou si elle est fomentee par quelque autre qui la precede. Celle là est solitaire qui s'est comme entassée par vn certain amas procedant du vice de la seule partie malade: mais quand ou tout le corps, ou quelqu'autre partie d'iceluy est surchargee d'abondance d'humeur qu'elle renuoye sur la partie malade, comme pour se soulager d'vn fardeau qui l'incommode, alors la cause contenant est accompagnée d'vne autre antecedente; ainsi voila deux sortes de causes interieures qu'il faut travailler à destruire par les remedes: mais il faut icy bien prendre garde à la partie qui a coustume de descharger ses

excremens sur celle qui est malade, & remarquer quelle matiere, ou quelle humeur abonde le plus, tant en cette partie-là, qu'en tout le corps. Parce donc que fort souvent le mal vient de tout le corps, & se jette sur la partie affectee, & bien qu'il ne s'y jettast rien, si neantmoins on ne sçait reconnoître la constitution de tout le corps, & des parties plus nobles & principales, on ne peut comme il faut entreprendre la guerison d'aucune partie malade; il est à propos de traiter en ce lieu des signes qui seruent à faire connoître tout l'estat du corps, & principalement à discerner quelle humeur surabonde & domine en iceluy.

CHAPITRE XI.

*Les signes vniuersels de la cause
antecedente, & quelle hu-
meur domine au
corps.*

ENTRE les choses qui font remarquer l'humeur qui surabonde au corps, il y en a qui sont absolument & seulement signes; & d'autres qui sont signes & causes tout ensemble. Les signes simples & absolus, sont la couleur & l'habitude du corps & du visage, les mœurs de l'ame, les songes, les excremens que l'on rejette comme l'urine, la dejection, la sueur,

le crachat, & le reste des choses qui sortent du corps, par quelque endroit que ce soit ; les fonctions tant naturelles qu'animales, comme la digestion, le sommeil, & le poulx ; & les choses qui offensent ou qui aydent. Les signes qui tiennent rang des causes sont, la nature de tout le malade, le temperament tant du foye, parce qu'il engendre le sang & les humeurs, que du cœur, la vigueur duquel se communique à tout le corps ; la constitution des principaux viscères, les vices & defauts des parens, la suppression de quelque evacuation coutumiere, la façon du viure au manger & au boire, le genre de vie & d'exercitation, l'âge, le pays, la saison de l'année, & la disposition du Ciel : A quoy l'on peut adjoûter les maladies passées, desquelles d'ordinaire on a esté le plus souvent attaqué.

On reconnoist donc quelle humeur domine principalement en tout le corps, par la couleur, & par l'habitude du corps & du visage, veu que la couleur paroît semblable à l'humeur qui la cause, lors particulieremēt que les humeurs ne sont point repoussees & reservees trop auant dans le corps par le froid, par la crainte, ou par la tristesse : & qu'elles ne se jertent point trop impetueusement vers la peau, ou par la cholere, ou par la honte, ou par le chaud, ou par le bain, ou par quelque exercitation immoderee. Si donc le corps n'est pas fortement affecté d'aucune de ces choses, la couleur peut donner vne tres-certaine connoissance de l'humeur qui predomine. Quant à l'habitude & masse du corps, elle n'a pas moins de certitude : car l'euxie, c'est à dire la bonne habitude, qui consiste en la mediocrité de la corpulence, marque la bonté & mediocrité des humeurs : & la cachexie, ou mauuaise habitude, & l'atrophie, sont signes de ca-

cochymie, comme l'eufarcie d'abondance de sang.

Or ces indices prins de la couleur & de l'habitude paroissent & se font voir par tout le corps, & sur tout en la face, laquelle seule, entre toutes les parties du corps, n'a point la peau seperee de la chair qui est dessous, en sorte qu'on n'apperçoit pas que ce soit autre chose que la derniere & plus superficielle portion desséchée. C'est pourquoy tout ce qui se répand par la masse du corps paroist plutôt & plus clairement en la face, que sur la peau qui est au reste du corps. S'il y a quelque commencement de jaunisse, le dessus de la peau du visage devient jaune; si de pâles couleurs, il devient liuide; si de ladrerie, la face s'espaisist & devient grosse, & le poil tombe; si de verole, elle devient boutonnee & gâtée de pustules; si de leucophlegmatie, elle pallit & s'enfle; si les poulmons sont enflammez, elle se couure de rougeur; si le foye ou la ratte sont affectez d'obstruction ou de scirrhe, elle maigrist & paroist de couleur obscure; si il y a de la phthisie, elle devient comme celle d'un mort; si finalement on est saisi de quelque passion, il paroitra sur le visage autant de changemens & de signes, qu'il se passera de mouuemens en l'esprit. Il y en a qui se meslent de iuger de la constitution des humeurs & du corps, par la couleur mesme des ongles, mais moins asseurement que par la face. Tout ainsi donc que le visage est l'image de l'ame, aussi la face est-elle l'indice, & comme un discours tacite, non seulement des passions de l'ame, mais encor des affections interieures du corps.

Or si les mœurs & faillies de l'esprit n'ont esté moderées par un long exercice de la Philosophie, ce sont pareillement des indices certains des hu-

meurs & des affections du corps: car y ayant trois parties en l'ame, ſçauoir eſt là ſenſitiue, la concupiſcible, & l'iraiſcible, qui ſont tout à fait brutales, & qui ont beaucoup d'affinité avec le corps, il eſt neceſſaire qu'elles ſuiuent la nature & les forces du corps, dans lequel elles ſont toutes plongees. La ioye & l'alegreſſe abondent en celuy qui eſt ſanguin, & en celuy qui eſt jeune, & toutes choſes leur rient & paroiſſent joyeuſes, comme dans vn printemps paré de fleurs & de verdure: Aux vieillards & melancholiques, les meſmes choſes ſemblent triftes & fâcheuſes comme au declin de l'autône, & ſur la fin de l'annee. Or cette varieté ne vient pas de la choſe qui ſe preſente, mais du diuers iugement que l'on en fait, lequel imite la nature & conſtitution du corps. Ce qui plaiſt & eſt au gouſt de l'vn, eſt mauiſſade & deſagreable à l'autre Cettuy-cy deuient furieux d'amour; & cettuy-là n'en eſt iamais touché. Cettuy-cy a les ſens hebetez, tardifs, & groſſiers; & cettuy-là les a ſubtils, viſs, & prompts. L'vn a beaucoup d'eſprit; l'autre n'en a guere. Cettuy-là ſe laiſſe ſouuēt emporter à la cholere; cettuy-cy la retient, Cettuy-là eſt turbulēt; cettuy-cy eſt doux & paſible. Cettuy-là eſt trifte & ennuyé; cettuy-cy joyeux & cōtent. Cettuy-là a l'eſprit orgueilleux & insolent; cetty-cy l'a bas & humble. Puisqu'il ſe remarque vne ſi grande diſſemblâce & varieté de mœurs ſans occaſion, d'où en peut-on tirer la cauſe, ſin on de la uerſe nature du corps? Nous auons en nous certaines ſemences de mœurs conformes aux principes de noſtre nature. Or ces principes ſont le temperament, & cette excellente vertu, de laquelle nous tenons noſtre conformation. Ceux qui ont le temperament chaud & ſec, ſont d'eſprit & de

corps viftes, prompts, & actifs, mais ils ne font pourrant pas prudens. Les froids & humides font hebetez & tardifs. Mais les mœurs qui procedent de cette fecrette & excellente faculté qui nous a conformez, font beaucoup plus efficaces, lesquelles Aristote dit pouvoir estre remarquées par la figure & conformation de la face. La mâchoire d'embas estant grande, monstre qu'on est hebeté & tardif; estant courte & petite, qu'on est diligent & ingenieux. Le front grand est marque de paresse, le rond, de cholere: les oreilles grandes & droites, de stupidité & de sottise; les petites, de ruse & de tromperie: la Physionomie est pleine de ces choses là.

Outre les mœurs qui sont naturelles à vn chacun, il s'en forme d'autres & par le viure, & par les disciplines: car comme le vin pris par excés, rend les vns melancholiques, les autres furieux, & trouble le sens & la raison: & comme l'eau ou la laictuë esteint & rabbat l'impetuosité de la fureur, le nasitort, ou l'ail, rend endormy, le iusquiame fait deuenir fol: de mesme & plus efficacement les humeurs qui surabondent outre nature, nous font acquerir des mœurs qui leur sont conformes. Pour ces causes les mœurs des hommes sont dissemblables, & celles d'un seul & mesme homme, sont quelquesfois si diuerfes, qu'il semble estre fort different de soy-mesme. De là pareillement outre la coustume, & sans cause manifeste, viennent la phrenesie, la fureur, la melancholie, la tristesse, la crainte, la cholere, la morosité, & les autres symptomes de l'esprit. C'est pourquoy en obseruant diligemment les mœurs on a

souuēt descouuert des maladies qui n'estoiēt recōnuës par aucuns autres signes. Or les mœurs sont fort remarquables en ceux qui sont à jeun, & qui n'ont mangé ou beu depuis vn assez long temps, lors que l'humeur pur & sincere est en vigueur, & en esmotion, n'ayant pas encor esté reprimé par la benignité de l'aliment.

Quant aux songes, ils ont de l'affinité avec les mœurs en leur signification : car l'esprit n'estant point sollicité ny occupé par le rencontre des choses externes, quand les sens sont assoupis & liez par le sommeil, alors certes les humeurs exercent l'esprit avec beaucoup plus de force qu'elles ne font pendant les veilles. Or en cét estat l'esprit est agité, tant par les images fantastiques des choses qui estans souuent entrées par les sens, ont fait vne forte impression, qu'une étrangere constitution du corps. Car les songes sont causez par les choses qu'on a attentiuement veuës & ouyës, par ce qu'on prend à cœur, & qui donne du soin, & par la tacite constitution du corps. Partant tous les songes qui ne se peuuent rapporter à quelque meditation precedente, prennent leur origine de l'estat du corps, & en seruent de marques : car tout ce qui affecte le corps pendant le sommeil, enuoye en l'esprit vne certaine image de soy, qui cause le songe. Les especes & images des viandes se presentent à l'esprit des fameliques endormis, & celles des breuuages à ceux qui ont soif, & ceux qui ont beaucoup de semence roulent en dormant, par leur imagination des representations de femmes. Celuy qui a le corps chargé d'humeurs, pense que cependant qu'il dort, il ait quelque gros fardeau sur les espaules, ou qu'il soit grandement oppressé. Et celuy lequel ayant la teste remplie d'abondance

d'humeurs, est en danger d'épilepsie, de vertige, ou d'apoplexie, croit tomber de fort haut, & estre précipité dans quelque lieu profond: mais celuy songe voler ou courir legerement, qui a le corps leger & pur, ou bien quelque subtile vapeur qui luy monte à la teste. Songer receuoir vn coup ou vne playe en quelque partie du corps, signifie qu'il y a quelque cause de douleur ou de maladie en cette partie-là: de mesme que l'odeur puante est signe de la pourriture des humeurs, & la bonne odeur est marque de leur pureté. Ainsi l'esprit est donc agité par des songes, aussi bien que par des resueries conformes à la constitution du corps.

Pour les choses qui sortent du corps, d'autant que ce sont ou portions des humeurs, ou certains excremens des parties, elles retiennent en quelque sorte la nature de ce à quoy elles estoient attachees, & nous la proposent deuant les yeux, lors qu'elles viennent à sortir. Le vomissement est l'indice du ventricule, de la ratte, & des concauitez du foye; les deiections du ventre sont indices de ces mesmes parties, comme encor des intestins; l'vrine l'est des veines; la sueur & l'exhalaiso du corps l'est des parties plus externes & superficielles, lesquels indices ne marquent pas seulement quelle est la constitution, mais aussi quelle humeur c'est qui surabonde: de cette sorte encor la morve, qui sort du nez, est l'indice du cerueau; & le crachat, des poulmons.

Quant au poulx, comme il donne des marques du cœur & des arteres, aussi fait-il des autres parties qui sont voisines, & ont quelque rapport ou communication au cœur: car le poulx est affecté par l'éuaporation des humeurs qui surabondent, tant és vaisseaux, qu'és autres places, & selon la

condition de chaque humeur il se comporte & bat, ce que font pareillement toutes les arteres. Leur poulx est donc le messager certain de chaque humeur qui predomine, laquelle il annonce en la façon que nous declarerons cy après.

Or l'usage des choses externes exprime, comme en tentant & faisant l'espreeue de chaque naturel, quelle la constitution du corps & des humeurs. La bonne constitution posée au milieu de tous les extremes, demeurant ferme & stable, supporte esgalement toutes les injures externes, & n'est offensée que par vn grand excès. Celle qui est vicieuse & mauuaise, mais pourtant telle dès la naissance, & qui n'outrepasse point encor les bornes de la nature, se plaît es choses qui luy sont du tout semblables, comme en celles qui la conseruent & soustiennent : mais elle s'offense des semblables, qui sont excessiues, & de tout ce qui luy est contraire, parce que leur violence la fait decheoir de son estat naturel. Quât à celle qui est outre nature, & desia maladiue, elle s'offense, tant des choses semblables, que de celles qui excedent, à cause qu'elles l'esloignent dauantage de son premier & naturel estat : mais elle est aidée par l'usage moderé des choses contraires, lesquelles la remettent peu à peu, & doucement en son estat naturel. Or tout ce qui est excessif & demesuré, fait de la peine. Ainsi donc on peut coniecturer quelle est la constitution du corps & des humeurs, par la facile ou difficile tolerance de l'air, des viandes, ou de quelqu'autre cause externe.

CHAPITRE XII.

Qui sont les signes qui tiennent rang de causes.

Les causes evidentes qui font les maladies, sont pareillement beaucoup de vertu pour les faire discerner : car elles demonstrent necessairement les maladies & les causes interieures qu'elles ont engendrees. De ces causes, les vnes sont entées en nous, & nées avec nous; les autres arriuent après la naissance. Celles qui sont entées en nous sont le temperament, & la nature du tout receuë des parens en la generation. Les autres qui surviennent depuis, sont l'age, l'air qui nous environne, la façon du viure, le genre de vie en ce qui concerne les exercices, les estudes, & les perturbations de l'ame; la suppression des choses qui doivent estre éuacuees, & la condition des maladies qu'on a desja eües. Ces causes evidentes engendrent en nous & des humeurs qui leur sont conformes, & des maladies qui s'ensuiuent du vice de ces humeurs, lesquelles sont aussi-tost reconnües, qu'on a remarqué les causes susdites.

Le temperament naturel de tout le corps, imite presque la nature du foye & du cœur: car la substance des muscles & de toutes les parties qui sont vers la peau, & approché de la surface du corps, tirant du foye l'aliment, du cœur la chaleur & les esprits,

& constant en quelque façon de ces choses, il est nécessaire qu'elle retienne tout à fait leur condition & leur nature. Ceux qui ont naturellement le foye chaud, ont les veines grosses, & ce d'autant plus que le foye sera quant & quant humide; mais s'il est sec, elles auront certaine dureté. Car les veines estans comme des rameaux sortis du foye, elles suivent la temperature naturelle d'iceluy, & l'exposent à nos sens. De plus, ceux qui ont ainsi le foye chaud, ont le ventre & les flancs couverts de poil, plus ou moins, selon qu'avec cela le foye est humide. Mais au contraire, ceux qui ont le foye naturellement froid; les veines paroissent petites, & sont pareillement molles si le foye est ensemblement humide; ou dures, s'il est sec: ces gens n'ont point de poil au ventre, ny sur les flancs. Si le cœur est d'un temperament chaud, le poulx est grand, viste, & frequent: s'il est pareillement sec, le poulx est dur; si humide, mol: la respiration est lors en quelque sorte semblable au poulx, pourveu que la conformation de la poictrine, & la grandeur du cœur, correspondent proportionnement: on a quant & quant l'esprit grand & releué, present, subtil, hardy, prompt à la cholere: quand avec cette chaleur il y a de la seicheresse, l'esprit est bien plus tardif, mais plus feroce, & difficile à appaiser: si de l'humidité, l'esprit est prompt, mais facile à appaiser, & n'est aucunement feroce: Ceux qui ont ainsi le cœur chaud, ont la poictrine velue, beaucoup s'ils sont secs, & peu s'ils sont humides. Mais si le cœur est d'un temperament froid, le poulx est petit, & mol si cette chaleur du cœur est accompagnée d'humidité: dur s'il a quant & quant une intemperie seiche: La respiration est aussi telle que

que le poulx, si ce n'est que la disposition de la poitrine soit autre que celle du cœur : l'esprit est lors bas & humble, debonnaire, nullement sujet à la cholere; & ce avec crainte & paresse, si le cœur pareillement humide, & avec opiniastrété s'il est sec: la poitrine est dénuée de poil, plus s'il y a de l'humidité & moins s'il y a de la seicheresse. Ainsi donc par les signes du cœur & du foye l'on peut faire jugement du temperament de tout le corps; comme encor par la chaleur, par la corpulence, par la couleur, & par le poil. Car tout corps qui est d'un temperament chaud, paroist chaud quand on le touche; mais cette chaleur est acre & mordante si elle est meslée de seicheresse, si d'humidité, elle est benigne & vaporeuse: ce corps là est semblablement couuert de beaucoup de poil s'il est sec, & de peu s'il est humide.

La nature du cœur & des parties que nous auons receüe des parens, n'a pas moins de forces pour sentir de signes, qu'a le temperament. Les marques du temperament trompent quelquesfois, & si lors on a connoissance du naturel des parens, & principalement quel il estoit au tēps qu'ils engendrèrent, l'on discernera beaucoup mieux le temperament de celuy qu'ils ont engendré, & non seulement le temperament, ains encor tout le naturel d'iceluy, & quelles parties sont en luy vigoureuses, quelles foibles & debiles, quelles humeurs peuuent excéder en luy, & à quelles maladies il est sujet. Car les semences des parens, & mesmes le viure de la mere en sa grossesse, constituent le naturel de tout le corps, & des parties principales.

Quant aux causes qui suruiennent après que nous sommes nais, elles assemblent en nous des humeurs de l'une ou de l'autre sorte; car l'aage,

l'air qui est autour de nous, les alimens, les exercices & le genre de la vie, les passions de l'ame, la retention des excremens engendrent en nous des humeurs & des maladies conformes à leur nature, dont les marques sont pareillement notoires, comme nous ferons voir cy après, en les deduisant chacune en particulier.

CHAPITRE XIII.

Les signes de repletion.

IL y a deux sortes de repletion, l'une impure & mauuaise, qui n'est autre que la redondance du sang bilieux, soit pituiteux, soit sereux, flatueux, ou entaché de quelqu'autre vice. Et cette repletion est plutôt vne abondante cacochymie, que nous appellons repletion impure. L'autre est vne repletion pure, qui est vne redondance esgale du seul sang, ou de toutes les humeurs ensemble; car le sang n'abonde jamais si pur, qu'il ne soit broüillé du mélange des autres sucs & des serositez. Or on a de coustume d'appeller cette-cy par excellence du nom de plethore ou repletion, laquelle se subdiuise en deux branches, dont l'une surpasse les forces, en laquelle bien que le sang n'excede ny en qualité, ny en abondance, la symmetrie & la moderation, il oppresse neantmoins les forces de ceux qui par quelque autre cause que ce soit, sont imbeciles & foibles. L'autre est absoluë, laquelle excède desia la symmetrie de la nature, & prenant trop d'accroissement cesse d'estre naturelle: & cette-cy est ou legere, n'excedant pas beaucoup la mediocrité; ou tensiue quand

par trop d'abondance elle fait desia bander & presque rompre les tuniques des vaisseaux. Or combien que cette sorte de repletion excède immoderement, il se peut faire neantmoins qu'elle n'opresse point les forces: car souuent les forces vont croissant avec le sang & la masse de la chair, comme en ceux qui sont membrus & propres à la luitte: mais si les forces sont debiles, cette repletion les surpassera. Quant à la repletion impure, elle est tousiours par dessus les forces, & fâcheuse à la nature.

Or les signes communs de toute repletion des vaisseaux sont ceux-cy, sçauoir est, l'enfleure égale de toutes les veines, laquelle se remarque, lors que toutes les particules sont ensemble en mesme estat, & qu'il n'y a aucune partie plus basse que l'autre, sur laquelle le sang se jette; & quand elles ont toutes vne chaleur esgale & modérée, & que le sang ne se retire point par la violence du froid, ny s'esmeut & enfle par quelque chaleur immodérée causée ou de l'air, ou du bain, ou du vin, ou du travail, ou de fièvre, ou de quelque autre cause échauffante; ny ne bande & fait enfler les veines, pour estre rendu trop liquide. L'autre signe est, la tension ou bandement des veines avec quelque sentiment de douleur, ce qui marque non seulement la repletion, mais vne repletion excessiue; telle est cette tension qui vient de soy-mesme, en laquelle le corps & les membres deuiennent si pesans, que difficilement les peut-on mouoir, & à peine la main se peut-elle fermer. Si la masse du corps est desia deuenüe trop replete, & que les bras, les mains, & les jambes s'enflent, c'est lors non seulement vne repletion des veines, mais aussi de tout le corps. Le poulx est pareillement fort, grand, &

plein; d'autant que les veines estans trop pleines, enuoyent quelque chose de ce dont elles abondent, dans les arteres, par anastomose, si ce n'est que les humeurs soient demesurément grossieres & visqueuses. Or les arteres estans pleines font le pouls tel que nous auons dit, lequel se fait reconnoistre par vn fâcheux battement, non au seul poignet de la main, mais encor és temples, és doigts, & és extremités de chaque partie. La respiration n'est ny profonde, ny tout à fait libre: car on la remarque & plus difficile, & plus frequente, principalement quand on fait quelque exercice. Voilà quels sont les signes communs de la repletion.

Quant à l'observation des causes externes qui engendrent la repletion, elle tient lieu de signes demonstratifs. L'abondance des viandes grossieres sert d'aliment à la repletion. L'usage moderé des bains non accoustumez après le repas, attitent promptement les viandes quasi fondues & liquifiées, & les distribuent par le corps. La cessation des exercices accoustumez, la vie oysieuse & fainéante ne dissipe rien du corps, retient tout: de mesme que fait la peau quand elle est trop épaisse. Toute suppression des euacuations ordinaires fournit beaucoup plus manifestement de matiere à la repletion. Ces choses donc ayans dès long temps precedé, demonstrent avec beaucoup plus de certitude qu'il y a de la repletion.

Mais pour discernér maintenant quelle espee de repletion c'est, il se faut seruir non de ces signes communs, mais bien de ceux qui sont propres. Lors qu'en la repletion le corps n'en deuient pas plus pesant, & que toutes les forces persistent égales, c'est seulement vne repletion des vaisseaux. Mais si le corps & les membres s'apésantissent, &

que le mouuement deuienne plus lent, le sommeil pesant, profond & interrompu; & que le malade s'imagine en dormant estre grandement oppressé, ou porter vn fardeau, ou ne se pouuoir remuer, c'est repletion de forces.

Or pour connoistre de quelle humeur vient cette repletion, quand elle aura esgalement occupé tout le corps, la couleur en seruira de signe: car la rougeur qui ne vient ny du Soleil, ny du bain, ny du travail, ny de fièvre aiguë, ny de cholere, ny de honte, monstre que c'est du sang; la pâleur, que c'est de la bile; la blancheur, que c'est de la pituite; & la noirceur, que c'est de la melancholie. La bile occupant le cerueau cause les veilles; la pituite cause le sommeil, & l'atrabile des songes & des terreurs. Si l'orifice du ventricule est chargé de pituite, cela excitera la faim; si de bile jaune, la soif, l'enuie de vomir, l'amertume de la bouche; si de bile noire, la bassesse d'esprit, la morosité, la tristesse, & l'abondance de salive. Or dautant que ces choses ne proposent pas deuant les yeux assez manifestement l'espece de l'humeur qui predomine, il faut traiter plus exactement des signes propres de chacune en particulier.

CHAPITRE XIV.

*Les signes du bon sang, & de la
vraye plethore.*

Ceux-là sont propres & disposez à engendrer & amasser du sang, lesquels soit en la naissance, soit après, ont acquis vne temperie du foye &

du cœur : car le foye ayant le temperament mediocre , s'il n'est empesché par la trop grande intemperie du cœur , engendre vne mediocrité & commodation d'humeurs , qui est le sang bon & bien temperé , à la generation duquel ceux-là sont pareillement disposez , esquels on reconnoist , par les signes susdits , que le foye & le cœur sont de temperature humide & chaude , voire mesme à cause de l'aage , l'enfance , & la puberté , produisent vn sang bon & téperé ; l'adolescence & la jeunesse en produisent beaucoup , mais aucunement trop chaud. Finalement les viandes qui sont de bon suc & bien temperees , & qui se tournent facilement & promptement en nourriture , tiennent rang entre les causes externes & évidentes , parce qu'elles fournissent aux humeurs de matiere qui leur ressemble. Or l'exercice moderé & pris en temps conuenable , & sans se peiner , le dormir mediocre , la vie joyeuse & sans soucy , la clemence de l'air telle qu'est celle du printemps , & dans vn pays temperé , reduisent le sang , & toutes les humeurs à la mediocrité , ou du moins les conseruent sans aucune alteration. Quand donc ces causes conuiennent comme par quelque liaison , elles font le sang bon , & toutes les humeurs aucunement esgales ; & sont en l'esprit de celuy qui les remarque , des indices de l'abondance du sang.

Or les signes accompagnans qui demonstrent que dans le corps il y a vn sang pur & sincere qui predomine , sont la couleur du corps & de la face extraordinairement vermeille , & comme meslee de blanc & de rouge ; l'habitude ou corpulence charnuë , ferme , sans beaucoup de graisse , & avec vne chaleur douce , benigne , & vaporeuse : la symetrie des veines & de tous les vaisseaux , mais qui

s'enflent & se remplissent promptement par le travail, ou par le chaud: le poulx fort, grand, & plein, la vigueur des forces croissante par certaine proportion de mesme que le sang & la corpulence, l'urine abondante & mediocre en couleur, en substance, & és choses contenues: les mœurs de l'esprit tranquilles, joyeuses, & gayer: le sommeil paisible, pendant lequel on a des songes joyeux, delectables, & comme enrichis & rehaussez de fleurs & de lumiere; & la facilité de souffrir les causes externes, & mesme les injures. Maintenant si en cette constitution du corps les veines & les arteres s'enflent, & que quant & quant il y ait d'autres marques de repletion, il faut croire que c'est abondance de sang, & vne vraye plethore, si principalement on vsoit auant cela de viandes de bon suc, & de beaucoup de vin: car il est plus facile de se remplir de breuuage que de viandes: Or le vin, & tout ce qui est humide & liquide, se digere plus facilement que ce qui est solide, & se distribue tant és veines que par tout le corps. Ces choses donc sont causes de repletion, lors qu'elles arriuent opportunément, & avec vne conuenable concurrence des autres causes. Si de plus il y a quelque suppression d'vne accoustumee vuidange de sang par les narines, par les veines hemorrhoides, ou par la matrice: Si le malade a desia plusieurs fois esté attaqué de maladies procedantes de repletion; & si la plethore occupe desia la chair & la masse mesme du corps, les veines plus subtiles, comme sont celles des yeux, rougissent, & s'enflent, toutes les arteres battent fortement, & sur tout en la teste, & és temples, & à la moindre occasion il sort vne sueur abondante, douce,

& qui ne sent point mauvais. Or plus les signes de la repletion seront notables, on doit iuger cette repletion plus grande & plus dangereuse.

CHAPITRE XV.

Les signes de la bile iaune surabondante.

Ceux qui ont le foye & le cœur d'un temperament chaud & sec, amassent beaucoup de bile jaune, mesmes des alimens plus sains & bien temperez, lors principalement qu'ils sont d'aage constant, & en la force de leur jeunesse, qui est l'aage plus bouillant & plus sujet aux maladies bilieuses. Outre cela, si l'on a auparauant vsé d'alimens chauds & secs; si les ieunes, ou le viure fort subtil, petit & rare, ont precedé; cōme aussi l'exercice vehement, robuste, grand, & frequent; le chaud, soit qu'il vienne de l'air, ou du pays, ou de la saison ou des estuues, ou du travail; les courses frequentes; les veilles immoderées; les grands soins; les fortes applications de l'esprit, & les etiuuis; la suppression des euacuations bilieuses qui se faisoient d'elles mesmes, ou l'intermission de celles qu'on auoit accoustumé de procurer à l'aide des medicaments, par le vomissement, par les selles, par les vrines, ou par les sueurs. Celui en qui se retrouuent toutes ces choses, abonde necessairement en quantité de bile, laquelle venant à s'augmenter dauantage, & se rendre plus facheuse, produira pour signes sur le visage, es yeux, & par tout le corps, vne couleur pâle, iau-

ne ou citrine, approchant de celle qui paroist en ceux qui ont la jaunisse ; quelquesfois il s'esleue des pustules bilieuses , comme en façon d'erysipele : l'habitude du corps deuient seiche, maigre, & graille, & qui fait sentir au toucher vne chaleur acree & mordante : les veines & les arteres deuient amples & s'elargissent outre leur premiere conformation, par la force de la chaleur; le pouls vehement , viste, frequent , & dur; l'vrine jaune, enflammée, acree, & avec peu de sediment: il arriue par fois vne excretion ardente & bilieuse par le vomissement, par les dejections, par les vrines, ou par les sueurs : l'on est enclin à la cholere, à l'audace, & à la vengeance: le sommeil est leger, non profond, plein d'inquietude; les songes ne sont que de fureur, de guerre, de cholere, & de splendeur : l'on a de l'appetit pour les choses froides, & l'usage d'icelles est agreable & delectable ; l'on supporte facilement & avec vtilité les purgations de la bile.

Voilà les signes communs par lesquels on reconnoist que la bile surabonde, les symptomes de laquelle sont diuersifiez selon la varieté des parties où elle se jette & fait de la violence: car quand elle se jette dans le cerueau, elle cause des veilles, & des delires pleins de noises & de cholere; dans l'orifice de l'estomach elle cause la soif, l'enuie de vomir, le degoust, l'amertume de la bouche, & la defaillance de coeur: dans les intestins, la diarrhée & la dysenterie.

CHAPITRE XVI.

*Les signes de la melancholie
prédominante.*

Ceux qui de nature, ou par leur façon de vivre, ont le foye & le cœur de temperature froide & seiche, l'hypocondre gauche tendu, & en iceluy la ratte opilée ou imbecille, sont propres à faire amas de melancholie. Il s'engendre en eux des humeurs grossieres, gluantes, & tout à fait terrestres, qui quelquesfois se jettent sur la seule ratte, quelquesfois se respendent par tout le corps. L'aage desia declinant, & le commencement de la vieillesse, la ferueur de la vie estant passée ou rabatuë, tendent à ce temperament melancholique, auquel disposent pareillement le viure & l'usage frequent des alimens grossiers & terrestres, comme sont les chairs de bœuf, de cerf, de chéure, & de lièvre; le thon, la baleine, & toute sorte de grand poisson de mer, & sur tout celuy qui a esté salé, comme aussi les gros vins couverts, noirs, ou rouges: la condition de vie triste & trauersee de beaucoup de soins, & d'affaires, ou occupée à la contemplation & à l'estude, sans relasche, recreation d'esprit, ou exercice du corps; car viuant de la sorte, la chaleur naturelle s'alentist, & tout s'appesantit de paresse, & deuient plus grossier: l'automne, le pays, ou l'air froid & sec, inconstant & inegal: la suppression de quelque coutumiere euacuation

de la melancholie, soit qu'elle se fift d'elle mesme, comme par les hemorrhoides, par les mois, par les selles, ou par le vomissement, ou bien par les varices, ou par la galle; soit qu'elle fust procuree de temps en temps par l'usage des medecines. Par ces causes donc la melancholie se fait & s'amasse iusques à excéder immoderément, & lors elle produit des maladies conformes à sa nature.

Or quand elle vient à estre desia surabondante, elle donne pour signes vne couleur rousse, obscure, ou noircissante de la face & de tout le corps, quelquesfois vniuerselle & égale, quelquesfois disposée par des tâches distinctes: par fois de la galle noire & crousteuse, ou des marques vitiligineuses & noires sur la peau: vne habitude du corps seiche & maigre: le regard inconstant, affreux, & triste: le poulx petit, lent, rare, & aucunement dur: l'vrine subtile, & blanche, pourueu que quant & quant il ne soit rien sorty de l'humeur melancholique, car s'il y en a quelque chose meslee parmy, elle sera crasse, liuide, & tirant sur le verd, ou sur le noir: des rejections de melancholie, causees de l'abondance d'icelle, par le vomissement, par les selles, par les vrines, par les sueurs, par les veines hemorrhoides, ou par les varices: l'esprit se sent aussi pour lors incômodé, & est touché de crainte, de tristesse, de taciturnité, de solitude, de vaines imaginations; le sommeil est trouble & agité de songes horribles, & de spectres de choses noires, de fumees, de mort, de cadavres, de sepulchres, qui sont choses pleines de terreur: l'appetit est souuent corrompu & par fois desreglé, avec des rots qui sont aigres. L'on reçoit du

soulagement par les medicamens qui seruent à purger la bile noire ; & tous les alimens qui font vn suc bon & subtil, sont profitables, & ceux qui en font vn contraire, sont nuisibles. Quand donc toutes ces choses se rencontrent, elles demonstrent que la melancholie predomine, laquelle cause des symptomes particuliers es parties où elle se jette.

Quant à la bile noire qui d'ordinaire se fait de toutes sortes d'humeurs brulées, & principalement de la bile jaune, elle n'a pas les signes susdits, mais d'autres aucunement meslez de ceux là. Ses causes sont les mesmes que celles de la bile jaune, mais elles sont grandes & vehementes, durent long-téps, & font passer la bile jaune en bile noire. Pour les autres signes que l'on attribué à la melancholie, ils paroissent bien icy, mais avec quelque augmentation de chaleur ; parce que le tout passe de la mediocrité à vn excez d'ardeur, à cause que la chaleur qui vient de la bile noire, est plus acre que celle qui vient de la iaune ; c'est pourquoy & les mœurs de l'esprit, & les songes, tiennent beaucoup de la fureur & de la brutalité.

CHAPITRE XVII.

Les signes de la pituite prédominante.

QVand le cœur, le foye, & l'estomach sont de temperament froid & humide, & que la constitution de tout le corps conuient avec cette temperature, cōme quand on est d'habitude trop grasse, de couleur blāche, ou tirant sur le liuide, que les veines & les arteres sont deliées & estroittes, soit

qu'elles ayent esté premierement formées de la sorte, ou que depuis elles soient ainsi deuenues, il s'engendre d'ordinaire vne abondance de pituite: l'aage, & proprement celuy qui tire sur la vieillesse, & sur le declin, lors que la chaleur naturelle diminue; & l'enfance, en laquelle on mange beaucoup: l'usage immoderé des alimens froids & humides; & l'excez de boire de l'eau: le manger & boire beaucoup deuant que la digestion soit acheuée; & toute satieté & gourmandise: la vie sedentaire, & passée en oyfueté, principalement en des lieux humides & pleins d'eaux: l'air froid & humide, soit à cause du pays, ou de l'hyuer, ou de la disposition du Ciel, & à cause de l'art que l'on a accoustumé d'exercer: le sommeil long & profond, sur tout après le repas; comme aussi le bain après le repas; la vie sans soucy, sans estudes, ou sans ennuy: la suppression des euacuations de la pituite, qui des long-temps auoit coustume de sortir par la bouche, ou par le fondement, soit d'elle mesme, ou par artifice.

Ces choses engendrent assurement quantité de pituite, de laquelle puis après les signes paroissent au corps, cōme sont la couleur blanche, quelques-fois plombée ou liuide, du corps & du visage: la corpulence ample & grasse; la chair molle & froide au toucher: le pouls petit, tardif, rare & mol: l'yrine blanche ou pâle, tantost claire, tantost épaisse avec beaucoup de sediment: les rejections de pituite qui se font ou par le vomissement, ou par les selles, sans estre procurées; & la fréquente moiteur du corps: les ordinaires & fréquentes attaques de maladies pituiteuses, comme de tumeurs froides, de defluxions, & autres semblables: la pesanteur & paresse de tous

les mouuemens du corps, & des mœurs de l'esprit; les sens grossiers, l'entétement hebeté; le sommeil long & profond; les songes d'eaux, de pluyes, de neiges, ou de submersion. Le plaisir & l'vtilité qu'on reçoit des viandes & breuuages chauds, comme aussi du rencontre de tout ce qui eschauffe: le soulagemēt qui s'ensuit de toute euacuation de pituite, faite par artifice ou d'elle mesme. Ces choses seruent tousiours de signes lors que la pituite surabonde, & domine esgalement en tout le corps. Au reste, si elle s'amasse seulement en la teste, ou en l'estomach, ou es intestins, esquelles trois parties se retire d'ordinaire la pituite superfluë, elle se descouure par symptomes propres de la partie affectee.

Quant à la pituite salee, elle a des signes aucunement meslez; car ayant acquis vne chaleur outre nature, par vn mélange de la bile, ou par putrefaction, comme elle a pour causes la bile & la pituite meslees ensemble, aussi les signes en sont ils aucunement meslez. Elle se reconnoist encor le plus souuent par la demangeaison & par la galle qui suppure.

CHAPITRE XVIII.

Les signes de l'abondance des serositez.

LEs humeurs subtiles & sereuses abondent en ceux qui ont l'estomach froid, & la ratte affectee d'obstruction & de scirrhe: qui se remplissent de viandes humides, & boient beaucoup, principalement en la vieillesse: qui passent leur vie en oyfueté, pendant l'hyuer, en pays humide, & dans vn air de mesme constitution: qui rendent peu

d'vrine & en beaucoup moindre quantité que le breuvage qu'ils auoient pris, & qui ne fuent point du tout: qui ne font plus fujets aux cours de ventre, & aux euacuations des eaux qui auoient accoustumé de sortir d'elles mesmes.

Or l'humeur aqueuse estant desia respandue par tout le corps; le visage, les mains, & le reste du corps, paroissent enfléz, de couleur non viue, mais pâle & obscure, l'habitude du corps deuient le plus souvent œdemateuse, en sorte que le vestige demeure en l'endroit que l'on a pressé, de mesme qu'il arriue en la cachexie, & en la leucophlegmatie. Le ventre s'enfle quelquesfois, dans lequel on entend le bruit d'une eau qui est agitée, l'vrine est crüe & aqueuse, & souuentesfois frequente, comme en l'incontinence d'vrine; les dejections du ventre sont liquides & molles; la peau moite; le cracher frequent, simple, sans toux, venant le plus souvent de la redondance de l'humeur amassée en l'estomach: le poulx, les mœurs de l'esprit, le sommeil, les songes, tout cela est comme lors que le phlegme predomine.

CHAPITRE XIX.

Les signes des vents.

L'Abondance des vents qui s'engendrent dans le corps, vient de la froideur & humidité de l'estomach, & de toute imbecilité de chaleur prouenant ou de simple téperie, ou du vice des humeurs: de la ratte chargée de melancholie & oppilée, offendant par communication la digestion de l'estomach: des viandes flatueuses, comme sont les fruits

cruds, les chafstaignes, les febues, & les truffes, du breuuage immodéré, de la fluctuation des viandes liquides qui nagent en l'estomach, de l'yurongnerie, & de la gourmandise: de l'oyfuerie, du trop dormir, de la froideur de l'age, du pays, & de l'air.

Or quand ces causes ont beaucoup engendré de vents dans le corps, l'estomach & l'intestin colon, particulièrement vers l'hypochondre gauche, s'enflent, s'estendent, & font du bruit comme s'ils estoient pleins de vents qui courussent de part & d'autre; car l'intestin colon est la principale retraite des flatuofitez, par la violence desquelles il s'élargist quelquesfois tres-fort en quelques-vns. Les douleurs tensiues qui sont ainsi causées par les vents, courent ça & là par tout le corps, & changent facilement de place; l'on entend souuent sortir des vents par le fondement & par la bouche, dont on se sent aussi tout soulagé; les oreilles tintent; les membres palpitent: l'on est fort suiet à la colique, & autres maladies venteuses. En dormant l'on s'imagine voir des choses qui courent legèrement, ou qui volent, & quelquesfois on songe aux tonnerres & aux tempestes.

Voila tous les signes par lesquels on reconnoist quelle est la constitution de chaque corps, & quelle humeur y predomine & surabonde. Voila toute la cause antecedente des maladies, d'où la cause prochaine & contenante s'entretient & prend son accroissement. Voila finalement ce qui m'a semblé deuoir estre dit en general, touchant les signes demonstratifs.



LIVRE TROISIÈME.

DU POULX, ET DES VRINES.

LIVRE PREMIER.

*Ce que c'est que le poulx, & combien
il y en a de sortes.*

LE poulx & l'urine ne seruent pas
peu pour reconnoistre les mala-
dies: car le poulx descouvre la
constitution du cœur & des arte-
res, & l'urine celle du foye, & des
veines, par l'administration des-
quelles parties tout le corps est gouverné. Le
poulx represente premierement & principalement
la force & la vigueur de la faculté vitale, & de tout
le corps, & marque en second lieu assez claire-
ment la condition du cœur & du corps. L'urine
represente certainement & manifestement l'estat
du foye & des humeurs, & marque les maladies
qui en prouiennent; mais elle represente vn peu
plus obscurément la vigueur des forces du corps.
Partant il faut, autant que l'usage & pratique de

l'art le requiert, traiter en particulier de ces choses comme de signes certains.

Le poulx est vn mouuement du cœur & des arteres, qui sert à moderer la chaleur naturelle, constant de diastolé & de systolé. Diastolé, c'est à dire, distraction, est ce mouuement par lequel l'artere s'enfle, & s'elargist de tous costez, afin qu'ayant ainsi attiré l'air, & le sang plus subtil, elle tempe-re la chaleur naturelle, & fournisse de nourriture aux esprits. Systolé, c'est à dire, contraction, est ce mouuement par lequel l'artere s'abbaisse de toutes parts, & se retrecist, à ce que les esprits chassent d'eux cette suye qu'ils ont amassée par adustion. Or il est necessaire qu'entre ces mouuemens qui sont contraires, il entretienne vn certain repos, qui est double. l'vn superieur, qui termine le mouuement de distraction, & l'autre inferieur, qui termine le mouuement de contraction.

Quant aux differences du poulx, les vnes se prennent du mouuement de distraction eu diastolé, les autres du repos qui entreuient, & les autres de l'ordre. Le diastolé fournit cinq differences prinſes de la quantité, de la vehemence, du temps, de la qualité de l'artere, & du remplissement d'icelle.

La quantité cōprend celuy qui est long, large & profond: le poulx long est celuy par lequel l'artere s'estend en long; de mesme que le large est celuy par lequel elle s'estend en large; & le profond, par lequel elle s'esleue & s'abbaisse; & du concours de tous ceux-cy resulte celuy qui est grand, par lequel l'artere s'estend de tous les costez. A ces sortes de poulx sont contraires le court, l'estroit, le bas, & le petit, qui vient de la concurrence des trois autres. Celuy qui tient le milieu

de ces extremes s'appelle moderé. Partant tous les poulx qui prennent leurs differences de la quantité sont le long, le court, le moderé; le large, l'estroit, le moderé; & le haut, le bas, le moderé.

Par la vehemence de la distraction, le poulx est fort ou vehement, lequel frappe fort & ferme l'attouchement; foible ou languide, qui fait tout le contraire du fort; & modere entre ces deux.

A raison du temps le poulx est ou viste, qui estend promptement l'artere; ou tardif, qui est long temps à l'estendre; ou moderé, qui l'estend dans vn mediocre espace de temps.

La qualité de l'artere fait que le poulx est ou mol, quand la tunique de l'artere est lasche & delicate; ou dur, quand elle est dure & âpre; ou bien moderé.

Du remplissement de l'artere vient que le poulx est ou plein, par lequel on sent que l'artere est en la distraction non seulement ample & enflée, mais quant & quant pleine d'humeur; ou vuide, par lequel on sent que l'artere n'est pas remplie d'humeur, mais comme enflée de vent, si qu'en la pressant des doigts, on ne rencontre rien de ferme & solide qui face de la resistance; ou mediocre, qui tient le milieu des deux.

La sixiesme difference du poulx se prend du repos ou interualle des battemens, d'où vient que le poulx est ou frequent, qui souuent & en peu de temps enfle l'artere, & frappe l'attouchement, ou rare, qui bat par des interualles plus longs.

La septiesme difference vient de l'ordre, lequel estant tousiours seblable à soy-mesme, fait que le poulx est esgal, dont il y a de deux sortes: l'un qui entous, ou bien en plusieurs battemens, est égal, tousiours & en tout semblable à soy-mesme, & de

mesme façon, en chaque battement duquel on remarque vne esgalité & ressemblance precise en grandeur, en vitesse, & és autres differences : l'autre esgal en vn battement, dont le commencement & la fin, avec toutes les parties de l'artere, procedent esgalement.

L'inégal en multitude, est quand plusieurs poulx comparez l'un à l'autre, se trouuent inegaux & dissemblables, ou en grandeur, ou en vitesse, ou en vehemence, ou en quelque autre façon ; & celuy qui est tel en toutes les sortes, est dit absolument inegal. L'inegal se diuise derechef en inegal également, & en inegalement inegal.

Le poulx esgalement inegal, est celuy qui retient vne esgale & pareille mutation d'inegalité, comme quand le second poulx est vn peu moindre que le premier, & le troisieme vn peu moindre que le second, & le quatrieme encor vn peu moindre que le troisieme, & ainsi de suite iusques à vn grand nombre : & c'est cette sorte de poulx que les Grecs appellent myouros, que les Latins expliquent, peu à peu diminuant & s'amoindrissant. Si ce poulx continuë à diminuer peu à peu, de sorte qu'il vienne en fin à estre le mesme que le repos, il est dit myouros defaillant, qui quelquesfois demeure ainsi petit, & repos, quelquesfois il se rehausse & retourne à sa premiere grandeur, ou à vne pareille, ou bien à vne moindre, & est lors myouros reciproque.

Le poulx inegalement inegal, ne retient aucune ressemblance d'inegalité ; & si quelquesfois il vient à cesser, on a coustume de l'appeller proprement inegal defaillant ; mais si après auoir cessé deux, ou trois, ou plusieurs battemens de poulx, l'artere commence à estre derechef agitee, on le

homme defaillant reciproque, duquel approche celuy qui est inefgal intermittent, dont le repos est quelquesfois tres-long, & deuient grandement rare en ses reuolutions.

Quant au poulx inefgal en vn mesme battement, il y en a de deux sortes; car ou il se fait en vne seule & mesme partie de l'artere, ou en diuerfes parties d'icelle.

Le poulx inefgal en la mesme partie de l'artere est triple: car bien que le mouuement de l'artere soit continu, il n'est pas neantmoins le plus souvent pareil au commencement, au milieu, & à la fin, quelquesfois il est entrecoupé de repos, quelquesfois il redouble & fait deux battemens. L'imparité de mouuement qui se trouue au commencement & à la fin, est quelquesfois en vehemence, quelquesfois en grandeur, quelquesfois en vitesse, & en d'autres façons qu'à peine pourroit-on nombrer.

Le poulx entrecoupé est celuy duquel l'extension n'est pas continuee, mais interrompue par le repos qui l'entrecoupe; & combien qu'il frappe deux fois, ce n'est pas pourtant qu'un seul & mesme poulx. Que si le mouuement qui recommence après le repos est premierement plus viste & plus vehement, on le nomme lors caprisant.

Le dicrote, c'est à dire redoublant & frappant deux fois, est celuy lequel aussi-tost qu'il a entièrement acheué la distension, se rabbat vn peu, puis rebat incontinent, comme vn marteau qui rejaillist sur l'enclume; & ce poulx est tout à fait different de celuy qui est entrecoupé. Il arriue aussi quelquesfois que le poulx de l'artere rebat non seulement vne, mais deux ou plusieurs fois.

Le poulx inefgal en diuerfes parties de l'artere,

est lors que touchant l'artere avec plusieurs doigts ensemble, on ne sent pas vn rencôtre semblable du poulx en tous les endroits que l'on touche, mais on le sent premierement interrompu sous le premier & le troisieme doigt, ou bien sous le second & le quatriesme, & non sous les autres.

Le poulx est inegal en grandeur, en vehemence, en dureté, en plenitude, quand touchant esgalement l'artere avec tous les doigts de la main, on ne le sent pas esgalement grand, vehement, dur, ou plein; s'il est dur on l'appelle scié. Il se rencontre encor vne inegalité de poulx selon la situation des parties de l'artere, qui est lors qu'une partie se courbe à droït, l'autre à gauche, l'une en haut, l'autre en bas.

Or si cela se fait manifestement & apparemment, & que l'artere s'estende bien fort quand le poulx se hausse, on le nomme poulx eslancé, auquel il se fait vne secousse hastée, & inegale, comme quand on darde impetueusement quelque jaelot: mais si cela ne se fait que foiblement, & que l'artere paroisse tendue & retiree de costé & d'autre, c'est vn poulx conuulsif.

Le poulx ondoyant, est lors que l'artere frappe plainement & fortement le premier doigt de la main qui la touche, puis bat plus doucement & foiblement sous le second doigt, & derechef plus fort & plus à plein sous le troisieme, puis foiblement & doucement sous le quatriesme; ce poulx n'est pas interrompu, mais inegal comme le flottement des vagues.

Le poulx vermiculant est semblable au mouvement des vers qui se glissent comme par ondes, aussi approche-il du poulx ondoyant, duquel il differe pourtant, non pas à cause de quelque autre

inesgalité qui s'y rencontre, mais seulement en grandeur & en force.

A ceux-cy succede le fourmillant, lequel est merueilleusement petit, fort languissant, tres-frequent & autant inegal; il differe du vermiculant, que le vermiculant differe de l'ondoyant.

Or tout poulx inegal est ou ordonné, ou desordonné. L'inegal ordonné est celuy qui retient le mesme ordre d'inesgalité, comme quand quatre poulx sont entr'eux aucunement inegaux, en sorte qu'ils gardent tous quatre vne semblable proportion d'inesgalité: l'inegal desordonné est celuy en l'inesgalité duquel il n'y a proportion ny ressemblance, & qui ne garde aucun ordre en ses reuolutions.

CHAPITRE II.

Comment il faut observer & discerner le poulx.

Pour bien observer le poulx, il faut que la main soit temperee, molle, sans callositez, & d'un sentiment delicat: que l'on porte les quatre doigts, ou bien trois seulement, sur l'artere du bras, proche de la main, ou l'artere estant plus facile à rencontrer, plus sensible & mediocre, elle est aussi plus propre à faire les obseruations du poulx. Que la main du malade que l'on touche, ne soit ny esleuee, ny abbaissee, ny estendue, ny serree par aucun lien, ny pressee par le ply du coude, ny renuersee en bas, ou en haut: mais soit disposee dans vne situation commode & naturelle,

en sorte que la partie où est le petit doigt, soit retournée vers le bas. Si l'on ne rencontre pas bien le pouls au poignet de la main vis à vis du grand doigt, il le faut chercher en vn autre endroit, & mesme en l'autre bras; parce qu'il y a plusieurs causes qui le font varier, & souuent il s'efface en certain lieu, ou par quelque playe receüe en cet endroit, ou par quelque contusion, ou par obstruction.

Le pouls qui est vehement ne se discerne qu'en pressant fort l'artere avec les doigts, & la difference de ce pouls d'avec celuy qui est grand, & celuy qui est plein, se remarque en ce qu'on le sent resister au doigt, & repousser l'attouchement: Il ne faut pourtant pas le presser si fort, que la vigueur de l'artere soit surmontee par la violence de la main qui la touche. Le pouls languide est plus apparet, & se remarque mieux quand la main est abbaissée & penchante, & le faut toucher doucement, tenant les doigts presque suspendus sur l'artere; car si on le presse trop, ou on ne le sentira point du tout, ou bien il semblera immobile, encōre qu'il fust grād, comme en la lethargie. Quand le pouls est vehement, ou grand & dur, on sent aucunement le mouuement de systolē; mais quand le pouls est languide, on ne sent point du tout cette contraction, laquelle estant apparente & manifeste quand le pouls est tres-vehement & dur, ou du moins en celuy qui n'est pas mollasse, s'apperçoit en pressant l'artere non mediocrement, mais bien fort. On sent le repos externe du pouls en touchant mediocrement, & sans faire aucune force, mais l'interieur ne s'apperçoit point qu'en pressant les doigts sur l'artere.

Or celuy qui desire se disposer & s'accōtumer à

bien reconnoître le poulx, se doit premierement exercer sur le mouuement de contraction, & sur le repos interne du cœur, lors qu'il bat bien fort, & avec beaucoup de vehemēce, car ces choses sont faciles à reconnoître en touchant la poitrine, & à l'imitation de ce qu'on y remarque, on les apprend puis pres à discerner les arteres. Quant aux autres differences du poulx, on les doit reconnoître par vne certaine mediocrité du touchement.

CHAPITRE III.

Les causes generales du poulx.

LE poulx a trois sortes de causes, qui sont l'efficiente, l'impulsive, & l'instrumentale. La cause efficiente & principale du poulx, est cette faculté motiue qui procede du cœur les instrumēt̃s sont les arteres, lesquelles obeyssent à la faculté, & suivēt son impuls̃ion: la cause qui meut & incite la faculté, est l'usage & la necessité de ce mouuement, & cette cause est la premiere & plus forte de toutes, de laquelle aussi ce mouuement prend son origine. Or toute cette necessité prouient de quelque affection qui est outre la nature, laquelle venant à incommoder & fâcher le cœur, il tasche aussi tost de la repousser & de se garantir. Cette affection se trouue de trois sortes: car ou c'est vn manquemēt de chaleur & d'esprits, que le cœur s'efforce de reparer par le moyen du poulx: ou bien vne intēperie froide ou chaude. soit simple, soit de fiēure, soit de phlegmō, que le cœur cherche de moderer: ou finalement quelque substāce estrangere, que le cœur tra-

uaille à repousser, comme quand quelque fumée, vapeur, ou humeur vient à frapper d'une qualité mauuaise & vicieuse, ou l'oppressé par sa masse ou par son abondance. Voilà quelles sont les causes internes du poulx: dont les causes externes sont tous les mouuemens immoderez du corps, & les perturbations de l'esprit, comme la fâcherie, la chole-re, la crainte, & l'ennuy.

La faculté du cœur estant donc incitée par ces causes avec certaine nécessité, fait que par le mouuement de diastolé il vient vn nouuel air, dehors qui entre, & r'affraischissant la chaleur naturelle fournit aussi de nourriture aux esprits vitaux: & par le mouuement de systolé les excremens fuligineux des esprits sont renuoyez, & finalement tout ce qui est oultre la nature, dont le cœur & les arteres peuuent receuoir de l'incommodité. L'usage donc & la nécessité meuuét & portent la faculté à produire le poulx: la faculté estant incitée fait mouuoir les instrumens & les arteres; & ces instrumens obeyssent à la faculté, & suiuent le branle qu'elle leur donne.

Or le poulx se fait tousiours selon qu'il en est besoin, pourueu que la faculté soit assez vigoureuse, & que les arteres obeyssent; car ces deux choses, sçauoir est, la force vitale & la constitution des arteres empeschent souuent qu'on ne reconnoisse la nécessité du poulx; parce que les arteres qui sont amples, sont presque le poulx grand, & que l'on remarque tel quand les arteres ne sont point enfoncées trop auant: mais si les arteres sont deliées & estroittes, comme en ceux qui sont gros & gras, elles ne permettent pas que le poulx soit grand: voire mesme si la force vitale est vigoureuse, le poulx est naturellement grand & fort; mais il est

petit & foible quand elle est debile. Ce qui est cause qu'en quelques-vns, mesme sur l'extreme vieillesse, le poulx paroisse grand & fort, & en d'autres tres-petit, & presque nul, quoy que dans vn aage vigoureux. Or on ne peut pas facilement reconnoistre la cause de la force vitale: c'est pourquoy il s'en faut tenir à la seule obseruation des autres causes qui sont d'importance, dont on pourra tirer vne ample connoissance des poulx, & de la nature. Lors donc que par la concurrence de toutes les causes, il se rencontre vne certaine mediocrité, le poulx est pareillement moderé: & quád cette mediocrité manque, le poulx s'altere & s'éloigne quant & quant de la moderation.

CHAPITRE IIII.

*Combien les poulx naturels sont diuers,
& par quelles causes ils sont alterez
pendant la santé, & sans qu'on soit
atteint d'aucune maladie.*

Ces choses estans establies de la sorte, il faut premierement s'appliquer du tout à bien reconnoistre le poulx qui est moderé, & y arrester son esprit, comme à celuy qui doit seruir de reigle & de mesure à tous les autres. Or on appelle poulx moderé celuy qui n'est ny grand, ny petit, viste, ny lent, frequent, ny rare, vehement, ny languissant, dur, ny mol, ny inegal, ny excessif en quelque autre façon. C'est par comparaisón de ce poulx moderé que tous les autres sont dits grands ou petits, vistes ou lents, ou en quelque autre sorte ex-

cessifs & desordonnez. Le poulx moderé ne se re-
trouue qu'en vn corps de tres-bonne nature, bien
temperé, & de constitution tout à fait moyenne &
vrayement quarree : mais dans les corps intempe-
rez, quoy que sains, les poulx sont differens de cet-
tuy-cy: car ceux qui sont naturellement chauds,
ont le poulx viste, frequent, grand, & aucune-
ment vehement; parce qu'ils ont besoin de beau-
coup de rafraischissement, & de pousser hors quan-
tité d'excremens fuligineux, & que pour ce faire
la vigueur des forces ne leur manque pas: le con-
traire arrive en ceux qui sont froids. Ceux qui
ont le corps grasle & deschargé, ont le poulx
grand, parce que l'artere leur enfle facilement,
& sans estre empeschée, mais il est pareillement
rare, & en quelque sorte vehement. D'où vient
que les hommes ont le poulx beaucoup plus grand
& vehement, mais vn peu plus tardif & plus rare
que les femmes. Pendant l'enfance & la puerilité
le poulx est tres-viste & tres-frequent, à cause que
la chaleur abondante a besoin d'estre rafraischie
par le mouvement de diastolé, & la multitude
des excremens fuligineux doit estre lors sou-
uent rejettee par le mouvement de systolé. Les
vieillars au contraire, ont le poulx rare & tardif: le
poulx des autres aages tient l'entredoux: les jeu-
nes gens ont le poulx tres-grand, d'autant que leur
chaleur est acre, & leurs arteres fort amples; les
vieillards l'ont tres-petit: & celuy des enfans
tient le milieu, lequel pourtant seroit grand à
cause de la necessité, si l'artere n'estoit estroite:
le poulx des jeunes est tres-vehement, parce que
la faculté est tres-forte: celuy des vieux est tres-
languide: & celuy des enfans est mediocre. De ce-
cy l'on peut conjecturer quel doit estre le poulx
naturel de chaque malade.

Au reste, la disposition du Ciel, & le mouuement du corps, & les perturbations de l'esprit, alterent le poulx, sans mesmes interesser la santé. Selon les saisons de l'année, au milieu du printemps, le poulx est tres-grád, & tres-vehemét, à cause qu'é cette gráde téperie de l'air, la faculté est tres-robuste & vigoufeuse: mais il n'est ny trop viste, ny trop frequent, parce que dans la temperie l'vsage du poulx est moderé. Cela mesme arriue pareillement au milieu de l'automne. Au milieu de l'esté le poulx est viste & frequent, dautant que l'vsage & la necessité en deuient plus grands: mais il est quant & quant petit & languide, à cause que la faculté s'affoiblit. En hyuer le poulx est tardif & rare, & moindre que durant l'esté, l'vsage n'en estant pas lors si grand; mais toutesfois il est plus vehement. Selon les pays & les constitutions du Ciel, és contrees qui sont grandement chaudes, le poulx est de mesme qu'au milieu de l'esté; en celles qui sont froides, il est comme en hyuer; & és temperees, tout ainsi qu'au printemps. L'exercice moderé rend le poulx vehement, car l'effort que l'on fait excite la faculté; il deuient pareillement grand, frequent, & viste, dautant que l'augmentation de la chaleur en fait aussi croistre l'vsage: le contraire se remarque en la paresse & en l'oyfuieté. L'exercice immoderé, qui déjà surpasse les forces, rend le poulx petit & foible, mais viste & frequent par vsage: mais quand le trauail est si grand, que les forces viennent à s'affoiblir & à máquer, le poulx est tardif & rare. Les bains chauds font en cela le mesme que l'exercice, & les bains froids, sont côme l'oyfuieté & la faineantise: l'vsage trop abundant des viandes & du vin, fait le poulx

grand, vehement, frequent, & viste; toutesfois le vin altere plus promptement le poulx, que ne font les viandes, mais aussi cette alteration cesse bien plustost. Que si l'usage du vin est par trop immoderé, il excite vn poulx inegal & sans ordre. En dormant le poulx est petit, languide, tardif, & rare: & d'abord que l'on s'esueille, il deuient grand, vehement, frequent, & viste, avec certain eslan cement, puis retourne incontinent à la mediocrité. Quand on est en cholere, le poulx est grand, vehement, esleué, viste, & frequent: ceux qui sont tristes l'ont petit, languide, tardif, & rare: les craintifs l'ont vehement, viste, eslan cé, desordonné, & inegal. Voilà donc comme le poulx est alteré par les affections journalieres du corps, sans l'observation desquelles on ne peut bien reconnoistre le poulx, ny discerner combien la maladie l'esloigne de son estat naturel.

Il faut donc bien obseruer le poulx naturel, non pas incontinent après le trauail, le bain, le trop manger, le vin, ou les autres causes qui échauffent; ny aussi tost après quelque esmotion de cholere, ou de crainte, ou d'autres causes qui agitent le cœur & les esprits; & n'en rien determiner auant que la violence des causes externes soit rallentie, & le trouble du corps entierement appaisé. Or toutes ces sortes de poulx ne sont pas mediocres, mais neantmoins elles sont contenuës dans les termes de la nature. Reste maintenant à traiter des poulx qui sont contre nature, & declarer quelle signification ils ont dans les maladies.

CHAPITRE V.

*Qui sont les causes du poulx qui est
oultre la nature.*

Pendant que le cœur se porte bien selon l'ordre de la nature, il entretient & conserue par vn poulx moderé sa chaleur naturelle & la mediocrité de ses esprits : mais quand il est oultre nature affecté de quelque mal, il tasche par vn poulx diuers de repousser loing de soy tout ce qui l'incommode & l'offense, ou s'efforce mesme de reparer ce qui luy māque. Or en cela ie declareray premiere-mēt ce que demōstre & signifie le mouuemēt de diastolé; puis ce que signifie le mouuemēt de systolé. Le cœur estant agité par vsage & par necessité, produit premieremēt vn poulx frequent, soit que la faculté soit vigoureuse, ou foible, car le poulx frequent est le premier de tous, à cause qu'il est le plus facile. Si cette frequence de poulx ne suffist pas selon la necessité, la vitesse y est adjoustee; & si ces deux ne suffissent pas encor, la grandeur vient de surcroist; pourueu que la faculté ne soit pas debile; parce qu'alors elle fait tout son effort. Que si la faculté est quant & quant vigoureuse, elle fait le poulx robuste, ou vehement; & plein, s'il y a lors abondance d'esprits. Ainsi remarquons-nous par l'vsage & l'exercice de l'art, qu'en toutes sortes de fièvre, le poulx est frequent & vifte; mais non tous-jours grand : parce que quand les forces sont languissantes, le poulx avec sa frequence demeure petit & foible. De plus, on apperçoit ceux qui en

sont surpris de foiblesse, sans auoir de fièvre, comme és defaillances d'esprit, & en ceux de qui les forces sont oppressees par l'abondance ou impureté des humeurs, comme en la leucophlegmatie, que le poulx est frequēt & viste (car la frequēce du poulx n'est pas tousiours signe de fièvre) mais on n'apperçoit pas aussi-tost qu'il soit grand, au contraire il est en effet fort petit & languide.

Partant le premier changement du poulx ne se fait pas en grandeur, mais en frequence, en suite de laquelle vient la vitesse, puis la grandeur. Sur quoy ie m'estonne fort de ce mot de Galien, que toute forte de pouls pressant, deuient aussi-tost par necessité grand dès le commencement, soit que la faculté soit vigoureuse ou debile, & que la vitesse ne se rencontre iamais sans la grandeur. Le poulx qui est donc frequent & viste, demonstre ou l'excez de la chaleur, ou le manquement des esprits vitaux: celui qui est grand signifie que la faculté n'est pas foible, & le vehement marque qu'elle est vigoureuse. Quant au poulx qui se trouue petit, il signifie vn defect de chaleur naturelle, & en grand refroidissement. Ce qu'estant, on remarque en premier lieu vne rareté de poulx; puis dans l'accroissement du mal suit la tardiueré, & en fin vient la petitesse, tout au rebours de ce qui se fait en l'accroissement de la chaleur.

Maintenant quant aux differences des poulx en longueur, largeur, & profondeur, ils ne prouiennent pas de la necessité de la chose, & ne marquent point l'essence d'aucun mal, mais representent seulement les empeschemens qui arriuent autour de l'artere: Car l'artere se dilate tant qu'elle peut; mais la quantité de sa dilatation est quelquesfois couuerte, quelquesfois interrompue, ou par le nombre

nombre, ou par la grossiereté, ou par la dureté des corps qui sont à l'entour, comme de la membrane, de la peau, de la graisse, ou de la chair, qui font que le poulx paroist different, & le plus souvent tout autre que la necessité le requiert. Ainsi donc en ceux qui sont corpulens, le poulx se trouue court & petit : en ceux qui sont grailles, il est long & grand; & les quarrez l'ont moderé. Quant au poulx mol, il marque la moleste de l'artere, & signifie que le corps est remply de beaucoup d'humour phlegmatique, comme en l'hydropisie, en la leucophlegmatie, en la lethargie, & dans le coma: soit à cause des viandes trop humides, ou des bains immoderez, ou du dormir, ou de la vie trop mollesse. Enfin le mal croissant de plus en plus, & les forces s'affoiblissans, ce poulx deuient ondoyant & vermiculant. Le poulx descouure tousiours la dureté de l'artere, pourueu qu'il ne vienne point de langueur d'esprit, ny de peur, ny de vergongne: & à peine se trouue-il vn poulx dur, qui ne soit quant & quant petit, bien qu'il ne soit pas tout aussi tost languide. Or l'artere deuient dure, ou par secheresse, ou par constriction, ou par tension. La secheresse luy vient de l'vslage immodéré des vins trop puissans, des fièvres fort ardentes, de la maigreur, de la fièvre quarte, & de la melâcholie. La constriction procede quelquesfois du froid contracté par la rigueur de l'air, par le bain, ou à force de boire de l'eau : d'autresfois elle vient des fruiets de mauuais suc, qui engendrent vne pituite vitree & fort grossiere. La tension se fait par vne grande inflammation, & par le scirrhe du foye ou de la ratte. A ce poulx tensif & dur, reuiert celuy qui est conuulsif, lequel demonstre, ou que les nerfs sont affectez de conuulsion, ou que le ventre

a esté relasché trop demesurément, comme si on auoit pris de l'elebore. Le poulx eslançé, prouient de celuy qui est petit & dur: car lors qu'il est requis beaucoup de raffraischissement, & que la faculté est vigoureuse, si l'artere est dure le poulx s'elance par l'effort de la faculté qui est puissante, & de l'artere qui luy resiste. Et partant ce poulx marque les mesmes maladies que fait celuy qui est dur. Voila donc comme on doit juger du poulx par le mouuement de diastolé.

Quant au mouuement de sistolé, il est, aussi bien que celuy de diastolé, quelquesfois plus grand ou moindre, quelquesrois plus vehement ou plus languide, quelquesfois plus viste ou plus tardif, & quelquesfois plus mol ou plus dur. Neantmoins de toutes ces differences de poulx, le sens ne discerne que la vistesse ou la tardiueté, & encor en ceux-là seulement desquels on peut remarquer le mouuement de sistolé. La vitesse du mouuement de sistolé, marque vne grande abondance d'excremens bruslez, que la nature tasche d'expulser par la compression des arteres; & cet amas se fait ordinairement d'humeurs putrides qui allument nécessairement la fiéure toutesfois & quantes que leur substance ou leur vapeur putride attaque le cœur. C'est pourquoy le mouuement de sistolé estant plus viste que celuy de diastolé, c'est tousiours signe de fiéure putride; & cette vitesse ne vient pas seulement des fiéures que l'humeur pourrissante allume dans les veines, mais aussi de celles qu'il allume dans les poulmons, ou dans le foye, ou dans la ratte, ou en quelqu'autre particule que ce soit. La tardiueté du mouuement de sistolé vient de ce qu'il n'y a pas beaucoup d'excremens putrides & bruslez dans le corps, & qu'il

n'est pas besoin de grande euacuation. La fréquence de ce mesme mouuement, tesmoigne vn accroissement d'impuretez excrementeuses, & pource fait que, le repos externe soit tres-petit. Finalement, la rareté, en laquelle le repos externe est plus long, est vn indice que lors il n'y a guere d'excremens fuligineux.

CHAPITRE VI.

*De la connoissance des maladies par
l'observation du poulx.*

Maintenant il faut rapporter plus ouuertement ces choses à l'usage & à l'exercitation de l'art. Les differences du poulx demonstrent, & l'affection qui est outre nature, & la partie affectee. Les affections qui ne sont pas naturelles se descouurent par le poulx, les vnes tout premiere-ment, & de soy: & les autres seulement en second lieu. Celles qui se descouurent premierement & de soy sont, toutes les intemperies, tant simples, que causees par le vice des humeurs: à quoy se rapportent la plethore, la cacochymie, ou simple, ou avec putrefaction, le phlegmon, le scirrhe, & l'obstruction; lesquelles affections sont comme certains principes & causes contenant de toutes les autres. En la simple intemperie chaude, comme est celle qui vient pour s'estre eschauffe, ou par la fièvre ephemere, le poulx est frequent, vifte, & grand, & quant & quant inegal. Il est aussi tout demesme en la fièvre hectique, mais vn peu plus dur. En la simple plethore, qui n'opresse point

encore les forces, & en la synoche simple le poulx est non seulement frequent, viste, grand, & égal, mais aussi enflé, plein & vehemēt, parce que ces affections n'arriuent qu'à ceux qui sont robustes, & qui ont les forces entieres. L'intēperie qui prouient de la putrefactiō des humeurs, cōme aussi la fiēure putride, font pareillemēt le poulx frequēt, viste, & grand, mais inegal non seulement en plusieurs battements, ains mesme en vn seul: dautāt que pour lors le systolé est plus frequēt que le diastolé, afin de repousser les vapeurs putrides: le repos externe est pareillement plus court, à cause dequoy le poulx, deuient aussi plus frequent. L'inesgalité est aucunemēt manifestē au cōmencement de l'accez: mais elle l'est dauātage en l'accroissēmēt & en la vigueur: le phlegmō qui est notable, & dās vne partie noble, cōmuniquāt vne chaleur putride au cœur, & à tout le corps, cause vn poulx comme de fiēure, qui de plus est dur, & par fois sciant & eslançé: parce que la tension de la partie enflāmee incōmode les arteres: & si le phlegmon est en vne partie nerueuse, ou qui soit proche des membranes, des veines, & des arteres, le poulx en sera plus dur. L'intēperie froide fait le poulx rare tardif, & petit; la seichele fait dur, & l'humide le fait mol, & ce lors que ces intēperies sont simples. Mais si elles procedent de l'affluence de quelque humeur, il suruient à ce que dessus vne inesgalité de poulx, principalement quand l'humeur se jette sur quelque partie noble: car soit qu'il y ait de l'obstruction dās les arteres, ou qu'elles soient cōprimees par l'abondance des humeurs, soit que cela meisme aggrauē & oppresse la nature, le poulx deuient inesgal, & ce beaucoup plus quand les humeurs sont grossieres, visqueuses, & abōdātes, que lors qu'elles sont subtiles & en pe-

tite quantité. Quât à la partie du corps qui est affectée, on la reconnoist par le poulx mol, par le dur, qu'o appelle tésif, par celuy qui est sciât ou élançé: car le poulx mol denote & que l'affectiō est mollesse, & que la partie affectée est couuerte de chair & parsemée de veines & d'arteres: & le poulx dur demonstre que la partie est nerueuse & mēbreuse, voire mēme les parties proches du cœur, ou qui lui sont conjointes par les grands vaisseaux, luy cōmuniqēt le mal qu'elles ont, plus prōptement & plus abondāment: & les plus esloignees, & celles qui ne luy sont cōjointes que par les petits vaisseaux, le luy cōmuniqēt moins & plus tard. Par le mēslāge de ces choses l'on recōnoistra en secōd lieu quel est le poulx en chaque maladie. Car quād le diaphragme est enflāmé, on a le poulx tres-dur, grādēmēt sciāt ou élançé, & quelquesfois cōuulsif: mais en la pleurésie il ne l'est pas tant, & est encore moins tel s'il y a de l'inflāmatiō, ou quelque scirrhe en l'estomach, en la vessie, en la matrice, és intestins, és reins, au foye, en la ratte, ou és poulmons. En la pulmonie le poulx est grand, languide, mol, & quant & quant inesgal, tant en vn seul battement, qu'en plusieurs ensemble: & mēme souuent il se trouue ondeux & rebattant. En la lethargie, le poulx est presque semblable à celuy des pulmoniques, cōme encor en la catalepsie, excepté qu'il est égal. En l'epilepsie & en l'apoplexie (quand principalement le mal est enraciné, & la faculté grandement oppressée) le poulx est languide, petit, rare, tardif, & inesgal, puis enfin il denient viste. Le poulx de conuulsion s'appelle conuulsif, il est bien élançé & inesgal; toutesfois il n'est pour cela ny fort, ny grand. En la paralysie le poulx est petit, languide, & tardif, & aucunement intermittent, sans ordre. En l'hydropisie ascite, le poulx est petit, frequent, dur & tendu: en la tympanite, long, viste, frequent & aucunement dur: & en l'anasarque, ondeux, large, & mol. En la phrēnésie le poulx est dur, & consequemment

petit, merueilleusement viste & frequent, de sorte qu'il semble denoter vne prochaine syncope: quelquesfois il est tremblant, ou intermittent avec conuulsion. En la squinance, le poulx est grand & on-deux, aucunement conuulsif: & lors que desia l'on est en danger de suffocation, il deuient petit, tardif, frequent, & inegal. En l'orthopnée, le poulx est inegal, desordonné, frequent, tardif, & defaillant; puis enfin languissant: En la phthisie le poulx est petit, languide, non beaucoup viste & hectique. En la suppuration le poulx est hectique, inegal, & desordonné. En l'eruption du pus, le poulx est large, tardif, rare, & languide. Finalement és autres maladies l'on peut reconnoistre quel doit estre le poulx, à l'imitation de celles que nous venons de deduire.

CHAPITRE VII.

L'observation des forces par le poulx.

OR c'est principalement & proprement le poulx qui marque la vigueur & la constance des forces: parce que la faculté virale est la premiere & la conseruatrice de toutes les autres, en sorte que personne ne peut mourir tant que cette seule faculté demeure saine & entiere: c'est sur elle qu'on a coustume de fonder le jugement que l'on fait de la vie, & de la vigueur des forces. Lors que la mort s'approche, on remarque les signes de la decadence de cette faculté, quelquesfois long temps auparauant; comme quand par la longueur des maladies elle deuient languissante, & va peu à peu defaillant: quelquesfois fort peu auparauant

la mort; comme quand la vigueur vitale se dissipe & se perd par quelque immoderee & soudaine vacuation, par douleur, ou par quelque autre tres-grief symptome: ou quand elle vient à estre suffoquee par vn absces creué, ou par quelque subit débordement d'humeurs, ou par quelque obstruction. Partant si le poulx est le messager du cœur & de la vie, il sera pareillement l'indice des forces & de toutes les facultez.

Le poulx robuste & vehement, promet vne longue vie à ceux qui sont sains, & la seureté aux malades: le languide promet tout le contraire.

Le vehement qui force & surmonte le toucher, demonstre la force de la faculté, laquelle est d'autant plus grande, que ce poulx est plus vehement: il denote pareillement que les humeurs du corps sont louables, tant en qualité, comme en quantité, & qu'elles sont cuites de bonne sorte: ou bien que la nature traueille fortement à la concoction de celles qui sont demy cruës, comme és maladies salutaires; & principalement si cette vehemen-
ce de poulx ne prouient ny de cholere, ny de travail, ny de trop manger ou boire.

Le poulx languide qui est surmonté par l'attouchement, marque la foiblesse de la faculté; & demonstre en consequence ou vne defaillance d'esprits, ou quelque syncope, ou que les forces sont debilitées par longueur de maladie, ou perduës par quelque autre cause, comme par le ieusne, par les veilles, par les douleurs, par les passions de l'ame: ou bien qu'elles sont oppressees & accablees par quelque euacuation immoderee, ou par la grandeur excessiue du mal.

Le poulx robuste & vehement, est presque toujours grand; mais non pas necessairement, de mes-

me que celuy qui est jeune & robuste ne marche pas toujours à grâds pas & en hâte. Tout poulx lâguide n'est pas petit, & celuy qui est petit n'est pas toujours languide; car bien què le poulx des lethargiques soit lâguide, il est toutes fois grâd, Or pour reconoiſtre plus aſſeurement la vigueur des forces par le poulx, il faut eſtablir trois cauſes de debilité: l'une qui peu à peu, & par laps de tēps va conſōmant les forces de la ſubſtāce: l'autre qui les diſſipe & perd tout à coup: & la troiſieſme, qui les accable par ſon abondance, ou qui les amortiſt par ſa malignité. Le poulx languide teſmoigne bien touſiours la debilité des forces: mais les autres poulx qui accompagnent le languide, monſtrent quelle eſt la cauſe de cette debilité. Quand donc la faculté vitale eſt deuenue foible & debile, ou par intemperie, ou par quelque maladie longue, le poulx de ſoy paroiſt premierement languide, puis meſme petit ſans aucune ineſgalité; & s'il n'y a point de fièvre, rare, & lent; ou bien frequēt & viſte ſ'il y a de la fièvre. La faculté eſtant deſia deuenue fort debile, le poulx ſe fait myure reciproque, puis deſaillāt reciproque, & en ſuitte myure non reciproque, puis deſaillant non reciproque & fourmillant: apres cela le poulx ſemble aboly, ſi ce n'eſt que cela vint de ſyncope; enfin le dernier de tous, eſt du tout aboly és extremittez du corps deſia mortes, & és arteres memes.

Quād la debilité de la faculté viēt d'une ſubite diſſolution & diſſipation des eſprits, cōme par les douleurs, par les veilles, ou par les euacuations immoderees, les cauſes euidentes & eſſiciētes en ont precedé, & au cōmencement le poulx paroiſt languide & petit, frequēt, & viſte, neantmoins ſans ineſgalité: mais la faculté eſtāt deſia fort affoiblie, le poulx d'uiēt ondoyāt, vermiculāt, formicant, apparēmēt aboly, puis enfin du tout aboly. Quand la ſubſtāce

de la faculté ne se consume pas de soy mesme; ains succombe cōme oppressee & accablee, ou par obstructiō, ou par vne tumeur outre nature, ou par abondance & affluence d'humeurs: cōme aussi lors qu'elle viēt à estre esteinte par quelque venin, cōme par la malignité d'une fièvre pestilente, le poulx est lāguide, petit, tardif, & rare, & cōtinuellemēt inégal: car on y remarque vne si grande inégalité, que de lāguide il paroist aussi tost vehemēt: de petit, grād: de viste, tardif: & de frequent, rare. Et plus il s'en trouuera de grands & de vehemens, la faculté sera moins oppressee, cōme au contraire elle le fera de tant plus que les poulx seront petits & languides. Mais quād la faculté par vn accroissemēt d'oppression vient à estre suffoquee, le poulx sera premiere-ment entrecouppé, puis intermittent en plusieurs poulx: laquelle intermissiō sera d'autant perilleuse, qu'elle durera plus lōguemēt: on appelle lōgue cētte intermissiō, qui dure plus de deux poulx: & courte celle qui dure moins. Or l'intermission des poulx est tres-perilleuse és jeunes gēs, elle ne l'est pas tant és enfans, & point du tout en ceux qui sont vieux. Ellen'ēt pourtāt quelquesfois pas mortelle en ceux mesmes qui sont jeunes, lors qu'elle arriue d'ordinaire ou par obstruction des arteres, sans estre pour cela malades; ou par quelque mal de lōgue duree, cōme seroit vne difficulté de la respiration. Beaucoup de vieillards & d'ēfans ont souffert sans mourir l'intermission d'un seul poulx; mais pas vn des jeunes n'en est réchapé. Que si cette intermission continuē plus long tēps, elle menace de mort subite & inopinée, & que la chaleur vitale du cœur doit estre bien tost esteinte, comme aussi la faculté animale par quelque apoplexie.

La longue duree du repos externe. approche fort de l'intermission, toutesfois elle en differe, en ce

qu'elle est plus courte, & sans inégalité; mais avec tardiveté du pouls; au lieu que l'intermissio est accompagnée d'un pouls viste & inégal. Quant à cette tardiveté du repos externe, elle signifie que ou la substance du cœur, ou les esprits & le sang qui sont enclosés espaces d'iceluy, ou bien quelque partie voisine, sont surprins de froid excessif. Elle n'est pas si dangereuse que l'intermission; mais elle ne laisse pas quelquesfois de causer soudainement la mort.

Le pouls entrecoupé est bien de même signification, & a toutes les mêmes causes que le pouls intermittent; il n'est pas néanmoins si perilleux, d'autant que la faculté estant icy plus forte, résiste & combat avec les causes qui l'incommodent, ce qui ne se fait pas quand le pouls est intermittent.

A ceux cy succede celuy qui est intermittent en un seul pouls, lequel decouvre comme la nature estant attaquée par des causes mal saines, ne laisse pas de leur résister, & de les combattre. Or ce pouls est pire & beaucoup plus dangereux que celuy qui est intermittent en multitude de pouls, parce que la nature est empêchée non seulement en chaque quatre ou cinquiesme pouls, mais en tous, & partant denonce la mort estre presente.

De ce genre sont le caprisant & le dicrote ou redoublé, lesquels marquent assûremét ou que l'interperie du cœur est inégale, ou qu'il y a une abondance d'excremens fumeux, qui ne sont pas également dispersez par toutes les parties du cœur: car les parties chaudes combattent de sorte avec les parties froides, ou les libres avec celles qui sont oppressees, que celles qui s'eslancent par leur legereté ou par l'esmotion de la chaleur, sont rab-

fautes par celles qui sont froides & incommodees, lors principalement que la faculté est debile, & que l'artere est dure.

Le poulx ondeux & le vermiculant, sont indices de la foiblesse de la faculté, & d'une notable dissolution des forces, en suite desquels vient le poulx fourmillant. Quand il y a de l'inflammation, ou quelque tumeur dure au foye, en la ratte, ou en quelque autre viscere, le poulx ne peut estre ny ondeux, ny vermiculant, à cause qu'il est trop dur; non plus qu'en la fièvre hectique, ou en la maigreur qui vient de pulmonie, bien que le malade soit desja fort proche de la mort: mais on le remarque pourtant languissant & inégal.

Le poulx myoure, qui se va peu à peu diminuât en vne distension, denote la foiblesse de la faculté dans vn corps extenué, & que le cœur mesme est tellement debile, qu'il ne peut plus estendre sa vertu & son action esgalement iusques aux parties du corps qui en sont dauantage esloignées: Partant ce poulx est mauuais, & menace de mort, encor qu'il fust reciproque. Mais le poulx defaillant reciproque, est bien encore pire que celui-là; comme le myoure non reciproque plus d'agereux que cettuy-cy: mais le plus mauuais & pernicieux de tous, est le defaillant non reciproque. Quelquesfois aussi le poulx myoure vient de la mauuaise conformation de l'artere: comme quand la moitié de l'artere touche à la seule peau, & que le reste est de part & d'autre fort enfoncé dans la chair. Cette sorte de poulx monstre que la faculté est debile iusques à ne pouuoir esleuer esgalement l'artere. Souuent aussi on en remarque de tels au commencement des acces qui surprennent par le froid.

Le poulx tremblant, qui de necessity est languis-

de & petit, denonce que la faculté est debile, & l'artere molle, avec vne habitude graisse du corps: le conuulsif n'arriue pas fort souuent. Apres ceux cy s'ensuiuent comme derniers, l'aboly apparent, & le veritablement aboly, la faculté estant desia tout à fait esteinte.

Or de quelque genre que soit le poulx ordonné, il seruira de signe assure, & le desordonné sera incertain. Partant le poulx ordonné est tres-certain & tres-bon; le mauuais ordonné est tres-mauuais, & pire que le mauuais desordonné.

DES VRINES.

CHAPITRE VIII.

Ce que c'est qu'vrine, & comme elle demonstre les affections des humeurs, & des parties.

LEs excremens du corps estans certaines portions des parties affectees, ou des humeurs peccantes, ou du moins quelques reliquats retranchez d'icelles, font vn rapport assure de leur constitution, & tiennent le premier rang entre les signes demonstratifs. Or entre tous les excremens, la seule vrine part de tout le corps, & a pour ce vne signification tres-estendue: car l'vrine est la serosité & le vehicule du sang, que les reins en ont separee. Comme l'on void au lait quand il se prend, que le mesgue se separe du caillé, de mesme en la masse du sang, les serositez se separent de la substance plus grossiere & terrestre; lesquelles estoient auparavant meslees pour delayer le sang desia grossier & visqueux, par l'abondance de ses fibres, & luy seruir cōme de vehicule pour le porter par les veines plus deliees, iusques aux parties extremes du corps

Or cette liqueur sereuse vient du breuuage, ou des alimens liquides que l'on prend parmy les viandes plus solides, & sans lesquels à peine le corps receuroit-il aucun profit de la benignité des viandes. Pour cette cause le breuuage est tres-côuenable & necessaire à tous les animaux, aux vns moindre cômmeaux oyseaux, lesquels ne pissét point, aux autres plus abondant, côme à l'hôme & aux quadrupes.

Par la digestion qui se fait en l'estomach, la liqueur se mesle toute parmy la viande, & toute la vertu de la viande se communique à la liqueur, iusques à ce que des deux il s'en face vne substâce esgale, qui porte le nom de chyle, lequel deualât par les destours des intestins, est attiré & succé par les veines du mesentere, qui en prennent tout ce qu'il y a de substâce plus vtile, qu'elles portét aux portes du foye, par le moyen du breuuage qui sert cômme de vehicule. Quand de ce chyle le sang vient en suite à estre fait, l'vrine (qui est le propre excremēt du foye, côme les matieres fecales le sont du vëtriculé & des intestins) estât pour lors inutile & superflue, est attirée dans les reins par les veines emulgentes, de mesme que la melancholie dans la ratte, & la bile jaune dās la vessie du fiel. Toutesfois l'vrine ne passe pas toute dans les reins: car il en reste vne partie avec le sang distribuee par le corps, laquelle ayāt ainsi seruy de vehicule, & acheué cet office, s'éuapore par les sueurs, ou bien retournant par où elle étoit allée, elle est semblablement attirée par les reins dās la vessie. L'vrine part donc non seulement du foye, mais aussi des veines, tant grâdes que petites, & de la masse du corps: ce que sentira manifestemēt quiconque aura passé deux ou trois iours sans boire beaucoup, ou point du tout.

Or si l'vrine n'est ny trop claire par le boire excess.

fiſ, ny broüillee du mélange de quelque choſe étran-
gere, elle marque clairement les humeurs qui ſont
dans le foye & dans les grands vaiſſeaux; mais plus
obſcurement celles qui ſont tât és petits vaiſſeaux,
que preſque en chacune des parties, & en découure
la conſtitution. Car lors que l'vrine eſtoit pour
quelque temps meſlee avec ces humeurs, elle a cō-
tracté toute leur affection & toute leur qualité, de
ſorte qu'eſtant ſortie elle demonſtre apertement
quelle eſt la conſtitution d'icelles, comme ſi ſ'en
eſtoit vne portion détachée. C'eſt pourquoy ſ'il y
a du mal és viſceres, ou és grandes veines, ou en la
teſte, ou és poulmons, ou en quelque partie du
corps, l'affection ſ'en cōmuniquant aux humeurs
qui y ſont contenuës, certainement l'vrine qui eſt
compagnie du ſang & des humeurs, en ſera quant
& quant participante, & portera en ſortant les ſi-
gnes propres & les marques de cette affection: &
meſmes repreſentera le mal des parties par où elle
paſſe, comme des reins, des vreteres, de la veſſie,
& penil. Car encore qu'elle ne ſ'arreſte pas long
temps en ces lieux là, elle en emporte toutesſois
en paſſant les ordures & vilenies qui ſ'y rencontrent.
Et partant elle demonſtre les affections de toutes
les parties qu'elle atteint. Nous examinerons cy
après plus exactement ſi avec le mal elle deno-
te auſſi certainement & manifeſtement quelle par-
tie c'eſt qui eſt affectée. Au reſte, l'vrine demon-
ſtre les vices des humeurs & des parties, ou par la
conſiſtence de la ſubſtance, ou par la pureté, ou par
la quantité, ou par la couleur, ou par ſon odeur,
ou par les choſes qui ſont meſlees avec elle: dont
nous pourſuiurons cy après le diſcours, traitans
de la ſignification de chacune en particulier.

CHAPITRE IX.

*Ce qu'il faut observer avant que iugèr
des urines.*

IL faut prendre l'urine que l'on a renduë la premiere après le sommeil, la digestion des viandes étant entierement acheuëe; & la reseruer toute, parce qu'une partie d'icelle ne pourroit pas bien exprimer toutes les marques. Que l'vrinal soit clair & transparent, tel qu'est le verre; qu'il soit longuet, à ce qu'il ne represente point l'hypostase diuisee; & soit assez grand pour tenir toute l'urine. Ce vaisseau soit tenu couuert hors du Soleil, du froid, & du vent, afin que l'urine ne se trouble ou s'espaisisse: l'urine soit ainsi laissée reposer sans agitation, iusqu'à tant qu'elle soit peu à peu refroidie; il ne la faut pas neantmoins garder plus de six heures, de peur qu'elle ne vienne à se corrompre. Si d'auanture elle s'est espaisie ou troublee par le froid ou de soy-mesme, il la faut doucement faire dissoudre auprès du feu, mais sans l'agiter, crainte que l'hypostase ne se dissipe, laquelle toutesfois souffre bien le feu, qui d'ordinaire ne l'extenuë ny liquefie. Or que les urines tnt grossieres que subtiles, ne soient quelques-fois pas mesme troublees par vn grand froid, & que quelques fois elles se troublent en lieu temperé, la cause n'en peut estre autre que la chaleur naturelle de l'urine, qui dispose & distingue de place aussi bien le reste des parties, comme elle fait l'hypostase, laquelle chaleur se trouue quelquesfois

languide, & d'autresfois puissante & forte.

Pour considerer l'vrine, il faut estre en lieu qui ne soit ny obscur, ny trop clair, où les rais du Soleil ne donnent point, & que le jour donne plustost au dessus de l'vrinal, que par le costé. Or les choses qu'on doit remarquer en l'vrine, sont la consistance de sa matiere, sa limpidité, sa quantité, sa couleur, son odeur, & les choses qu'elle contient, en quoy consiste toute la signification des affections internes, tant celles qui sont selon la nature, que celles qui l'outrepassent. Lesquelles choses remarquables en l'vrine, partent & viennent tantost dece que l'on a prins par la bouche, & des choses externes; tantost des conduits des reins & de la vessie; & tantost des veines ou du reste du corps: car ces trois sortes de causes impriment en l'vrine des qualitez manifestes. Le boire excessif, principalement d'eau ou de vin blanc subtil, rend l'vrine fort abondante, subtile, & cruë, laquelle passant promptement sans beaucoup s'arrester, ne represente gueres bien les affections des humeurs, ny les qualitez qu'elles luy ont empraintes. Il y a pareillement beaucoup de choses, lesquelles, quoy qu'on en prenne mediocrement, chargent l'vrine de couleur, comme le saffran, la casse, la theubarbe, le sené, la grosse garance: d'autres la redent odorante, cōme l'ail & la terebenthine. Car les qualitez de ces choses estās outre nature, elles sont réuoyées & sortent avec les excremens: & partant cela peruertist la vraye & propre indication de l'vrine, en sorte que de là l'on ne peut bien reconnoistre ny maladie, ny constitution aucune du dedans.

Il faut donc que l'vrine, pour bien seruir à l'indication des maladies, ne soit brouillée d'aucun meflange de choses externes, & soit entierement
exempte

exépt de leurs qualitez. Voire mesmes s'il y a quelque vlcere ou abscez és reins, ou en la vessie, ou és vreteres, ou bien au conduit des parties honteuses, l'vrine en deuendra plus espaisse & plus trouble, & de couleur blanche, s'il y a du pus parmy; mais si elle est meslee de sang, elle sera rouge: il s'y retrouue aussi souuentefois du sable, ou quelques filamens. Et ces vices des reins & de la vessie, causent souuentit en l'vrine vn notable changement. Quant à celle qui n'est imbuë d'aucune qualité des choses externes, ny entachée d'aucune infection des reins ou de la vessie, elle demonstre plus asseurement quelles sont les affections des veines & du reste du corps. Il faut donc bien prendre garde que les choses externes, ou les reins ne vous trompent.

Pour à quoy donner ordre, nous diuiserons generalement en trois differences les causes des qualitez qui se remarquent en l'vrine, sçauoir est en externes, en celles qui se trouuent és conduits, & en celles qui concernent tout le corps: car par ceste obseruation & distinction l'on peut auoir la vraye signification des vrines.

M

CHAPITRE X.

Quelle urine est la meilleure, & quel changement elle reçoit du sexe, du temperament & de l'aage.

ON doit tout premierement considerer & reconnoistre quelle est la meilleure urine, laquelle puisse servir comme de loy & de reigle à toutes les autres.

La meilleure urine est de substance mediocre, n'estant ny trop claire comme l'eau, ny trop épaisse, comme celle des cheuaux; elle est limpide, & non trouble, de couleur aucunement dorée & iau-ne, laquelle couleur nous posons pour milieu entre les autres qui sont externes: La quantité en doit estre moyenne, & correspondante au boire du iour d' auparauant & des autres iours precedens, ou bien vn peu moindre, parce que le corps retient quelque chose du breuuage. L'hypostase de ceste urine est blanche, legere & esgale, & releuee en pointe, par la raison qui en sera cy-apres exprimée: il n'y a rien d'épais meslé, ny bulle, ny filament, ny aucune des choses qui seront cy-apres rapportees pour mauuaises. Ceste urine marque non seulement l'integrité & perfection de la digestion naturelle; mais aussi l'entiere santé du corps, & que l'homme qui l'a renduë est d'un tres bon temperament & en vn aage vigoureux; n'y ayant aucune autre personne qui rende les urines de ceste sorte:

car la femme, bien que fort temperée & d'aage fleurissant, n'a pas l'urine peu différente de celle-cy, veu que la substance en est, non subtile, comme il a semblé à quelques-vns, mais euidentement épaisse, & n'est pas pure & claire, comme celle de l'homme, ains aucunement trouble & broüillée, du mélange de plusieurs choses; d'autant qu'il s'amasse plus de superfluitez en la matrice & en la vessie de la femme, que d'as l'homme, dont les urines sont le plus souvent entachées. La couleur qui du blanc tire sur le liuide n'est pas seulement indice de crudité, mais est marque principale du sexe. A proportion de cela l'hypostase est plus abondante, plus épaisse & plus blanche qu'en l'urine des hommes. Et quiconque aura plusieurs fois diligemment confronté les urines de l'homme avec celles de la femme, en pourra finalement remarquer la différence à les voir de premier abord. L'urine des enfans & des petits garçons est bien plus blanche, mais plus épaisse & a plus de sediment, que celle de ceux qui sont d'un aage fleurissant; car quoy que la chaleur soit en eux fort abondante, parce neanmoins qu'elle est rabbatuë par la quantité de l'humeur, elle fait que les urines soient telles que ie viens de dire. Celle des vieilles gens est blanche, subtile, avec peu de sediment, ce qui est signe de crudité & de l'imbecillité de la faculté digestive, à cause que la chaleur est en eux petite & fort debile. En suite de ces exemples il ne sera pas difficile de coniecturer quelle doit estre l'urine en chaque temperament, & de combien chacune est esloignée de celle qui est la meilleure de toutes.

Quand donc on propose l'urine de quelqu'un, il faut penser & iuger par le sexe, par l'aage & par le temperament tant receu par la naissance, qu'ac-

quis depuis ce temps là, quelle doit estre naturellement cette vrine, afin d'en reconnoistre le changement promptement & sans peine, si vne autre fois on la represente altérée, & que la souuenance fasse discerner si elle est outre nature, & de combien elle differe de son estre naturel. Et deuant que iuger de la maladie par l'vrine, il faut prendre garde au genre de vie que la personne obseruoit vn peu auant qu'estre malade, parce que l'exercice vehement, les veilles, la cholere, les ieunes, l'vsage des alimens chauds, irritant la chaleur naturelle, enflamment aussi les vrines, & les rendent plus chargées de couleur, avec moins de sediment, par le meflange de la bile: de mesme que fait pareillement l'air trop chaud à cause ou du pays, ou de la saison de l'esté ou de quelque autre chose que ce soit. Au contraire l'oyfueté, le dormir trop long & profond, la paresse, la gourmandise, le manger des viandes froides, font les vrines blanches, espaisées, avec vne hypostase abondante & cruë; comme aussi l'air trop froid, ou du pays, ou de l'hyuer, ou de toute autre cause. Si on ne prend garde à ces choses, on ne fera gueres iugement qui vaille par l'inspection des vrines, & ne pourra on facilement discerner les vrines des sains, d'avec celles que rendent ceux qui sont malades.

CHAPITRE XI.

Que signifie l'abondance & la paucité de l'vrine.

SI la quantité de l'vrine est mediocre, c'est signe que les serofitez ne sôt point trop abon-

dâtes, & qu'en suite la nature se porte biẽ, & que le tout va comme il faut. Mais il arriue quelquesfois que l'vrine est fort abõdâte pour auoir trop beude vin subtil, ou d'eau, ou pour auoir prins des medicamens diuretiques, ou par la rigueur du froid, ou par quelque autre incommodité des choses externes. Quelquesfois aussi cela vient du vice des reins, qui attirẽt puissãmẽt de toutes les parties du corps, les serositez qu'ils font sans cesse respendre, & ce mal s'appelle Diabetes, à cause du prompt écoulement de l'vrine, laquelle estant en ce cas fort abondante, est quant & quant presque blanche, subtile, & sans hypostase.

Quelquesfois la trop grande quantité de l'vrine procedẽ d'un mal interne, cõme lors que quelque grand amas d'eaux retenuës depuis long tẽps en certain lieu, viennent à s'escouler, soit en l'hydropisie, soit par vne crudité aqueuse qui flottoit autour des viscères: d'où elle se jette sur les reins avec impetuosité, ou par la force de la nature; de mesme que quand l'on a quelque perturbation du ventre qui s'excite de soy mesme. Toute l'origine de cela est leuiure; car rien ne peut sortir du corps, dont la matiere n'y ait esté autresfois introduite. Et quoy que cette euacuation debilitẽ aucunement les forces, neantmoins l'estomach & le ventre en sont soulagez, cõme s'ils estoient par ce moyẽ déchargez de quelque fardeau, sans que le reste du corps en demeure extenué. Mais pourtãt quelquesfois la masse du corps & des humeurs viẽt à s'eliquiesier, & sort parmy les vrines, selõ qu'il nous l'auõs remarqué en vn certain yurõgne d'assez bõne constitution & replet, lequel de fort gros qu'il étoit, deuint extrêmement maigre dãs l'espace d'environ huit iours, sans

estre aucunement malade. On tient aussi que cela procede de chaleur, ou par la violence d'une fièvre qui fait ainsi fondre les humeurs; & lors l'urine est abondante, toutesfois on ne remarque pas qu'elle soit ny blanche, ny subtile, mais enflammée, vineuse, ou de couleur de passe, avec quelque chose de gras & huyleux au dessus. Et cela est un commencement de fièvre hectique.

La petite quantité de l'urine qui ne procede point ny de boire trop peu, ny du manger de choses trop seiches, ny du breuvage aspre & grossier, ny pour avoir beaucoup sué, ny pour avoir le ventre trop lasche, ny pour avoir excessivement travaillé, est marque de maladie, & que le mal est presque dans les conduits de l'urine. L'obstruction des reins, ou quelque tumeur qui s'y rencontre outre nature, en est le plus souvent la cause; & pour lors on sent certaine pesanteur en ces parties là, & en remarque-on quelque autre signe dans les choses contenues. Si l'obstruction vient du calcul, ou d'une autre cause qui soit deçà & delà autour des ureteres, l'on sent une tres-grande douleur, & icelle fixe comme en la nephretique. Si le col de la vessie est en quelque sorte empêché, soit par une carnosité, soit par quelque phlegme épais, ou par une pierre, l'on a de la peine à uriner, ou bien l'urine est tout à fait supprimée, avec douleur du penil & du peritoine, & l'urine est meslée de plusieurs choses qui vont au fonds, ou nagent en icelle. Quant à l'urine que l'on rend en petite quantité, sans que cela prouienne des causes susdites, elle vient d'une humeur grossiere & gluante, qui se separe difficilement, & ne sort qu'à peine; & lors cette urine est espaisse. La vehemence de la fièvre arreste par fois l'urine, & en ce cas s'ensuiuent & la chaleur, &

les autres signes de la fièvre. Ceux mesmes qui se portent bien, ne rendent gueres d'vrine, quand le breunage se tourne en la nourriture du corps, ce qui arriue d'ordinaire à ceux qui sont extenuiez, & aux conualescents qui releuent de maladie.

CHAPITRE XII.

Que signifie l'odeur de l'vrine.

C'Est vne chose vilaine, & tout à fait sale & indecete à la dignité du medecin, de s'arrester à flairer l'vrine: Il arriue neantmoins le plus souuent que bon gré, mal gré, la mauuaise odeur nous en donne dans le nez, sur tout quand l'vrine est encore chaude, ou qu'on l'approche du feu. A peine doit-on attendre aucune agreable odeur de l'vrine, si ce n'est qu'elle soit renduë telle pour auoir prins ou de la terebenthine, ou du musc, ou du silphion, ou quelque autre remede fort odorant. En ceux pourtant qui sont sains & bien complexionnez de corps, l'odeur de l'vrine est souuent moderé. Quelquesfois elle deuient puante par la qualité des choses que l'on a mangées, comme du fromage pourry, ou de l'ail : quelquesfois aussi cela procede d'un vlcere des reins, ou des parties honteuses, & lors l'vrine est blanche, espaisse, & avec vne hypostase purulente ; si cela vient de quelque pierre qui soit en la vessie, on trouue au fonds de l'vrine, vne morue espaisse, & sent-on de la douleur en vrinant. Quant à l'vrine puante qui decoule des parties superieures, soit qu'elle ait la couleur

rouge & trouble, soit, cōme il arriue quelquesfois, qu'elle soit subtile & claire, tantost avec fièvre, tantost sans fièvre, c'est tousiours marque de putrefaction, laquelle consiste ou és humeurs, ou en la substance des parties. Si la puanteur est recente & suruenue soudainemēt dans vne vrine espaisse & trouble, la putrefaction est en l'humeur; mais si elle est vieille & contractée depuis long tēps dans vne vrine subtile & claire, la putrefaction est en la substance de quelque partie. L'vrine qui deuient puāte par quelque crise, paroist telle au iour decretoire, & fort en abondance, en suite dequoy le malade recoit de l'allegement.

CHAPITRE XIII.

Que signifie chāque couleur des vrines.

LEs couleurs principalement remarquables és vrines sont, la blanche, la paillette, l'orangée, qui est en effet la moyenne de toutes, la dorée, la laffranée, la rouge, la tannée, la verte, la bleue, la liuide, & la noire. Les causes effectrices d'icelles sont deux, sçauoir est, la chaleur des viscères & du corps, & le meslange d'une humeur estrangere, car le trauail, le ieusne, le chaud, la fièvre, & toutes les causes qui eschauffent le corps, colorent aussi l'vrine, & ce d'autant plus qu'elles sont plus vehementes: & l'vrine qui a longuement esté retenue dans le corps, cōme aussi celle que l'on rend long temps après le repas, est plus chargée de couleur que les precedentes. Voire mesme la bile venant à se jeter dans les veines, se mesle parmy les serosités, & les teint de couleur jaune, ou orangée, cō-

me quand on a la jaunisse, ce qu'il faut pareillement estimer de quelque autre humeur que ce soit.

Or la couleur qui prouient de simple intemperie, differe de celle qui est causée par le meslange d'une humeur: car celle là ne surpasse iamais gueres la rougeur, & se trouue dans vne vrine subtile ou mediocre, au lieu que cette cy passe par tout, & deuient de toutes les sortes, & rend l'vrine ou trouble, ou épaisse. Partant la chaleur temperée & modérée, fait en vn homme temperé & d'aage fleurissant, la couleur de l'vrine orangée. Et toute autre couleur qui est hors de cette medioçrité, est marque de diminution de chaleur & de crudité.

L'vrine blanche estant quant & quant subtile & claire, & tout à fait aqueuse, si ce n'est qu'elle soit rendue telle par le breuuage subtil & abundant, demonstre ou vne grande obstruction des reins & du foye, ou bien vne grande foiblesse de la digestion, causée par vne extreme froideur du foye & de l'estomach. Souuent aussi dans les fièvres arden-tes, quand la bile monte au cerueau, l'vrine paroist de la sorte, & est présage de delire.

L'vrine blâche & épaisse venât à estre claire cōme de la corne (ce qu'on appelle louche) demōstre l'excès d'une pituite morueuse; mais si elle est obscure (c'est la lactée) elle denote abondance de pituite épaisse & gluâte. Si ces vrines cōtinuent de paroistre de la sorte, c'est signe de maladies froides & lōgues.

Après ces sortes d'vrine vient la paillette, qui monstre que la crudité n'est pas si grande, & que la chaleur approche de la temperature.

L'orangée tient le milieu entre toutes les vrines: au dessus de laquelle sont la dorée, la safranée, & la rouge, qui toutes signifient que la chaleur est de mesurement accreue: & si ces vrines sont pures &

claires, elles marquent vne intemperie pure & simple; mais si elles sont espaisſes & troubles, c'est ſigne qu'il y a de la corruption dans les humeurs dont les vrines ſont broüillées.

L'vrine rouge eſtant claire, eſt dite ardente & enflammée, & denote vne grande chaleur du foye, ſouuent auſſi c'eſt ſigne de fièvre ardente; mais ſi elle eſt eſpaiſſe & obſcure, ſoit que cela arriue avec de la fièvre, ou ſans fièvre, elle ſignifie vn meſlange de bile jaune, ou vitelline, ou rouge. Cette ſorte d'vrine ſe rencontre preſque ſur la fin de l'accès des fièvres: mais principalement quand la ſubſtance du foye vitiée par quelque phlegmon, ou par vn ſcirrhe formé, comme en l'hydropiſie: ou bien qu'ad il y a de l'obſtruction au foye, ou en la bouriſſe du fiel, qui fait que la bile ſe déborde dans les veines, & ſ'eſcoule avec les vrines, qui en demeurent teintes, que ſi vous trempez vn linge dedans, il deviendra tout jaune, de meſme que ſi on auoit prins de la rheubarbe, & cela demonſtre qu'on a la jauniffe, ou qu'on en ſera bien toſt atteint. C'eſt donc par cette raiſon qu'on diſcerne l'vrine ardente & enflammée d'avec celle qui devient ſaffrannée ou plus chargée de couleur par le meſlange de la bile.

L'vrine ſaigneuſe, ſoit qu'elle reſſemble ſeulement à quelque laueur de chair fraiſche, & comme à de la ſanie, ſoit qu'elle reſſemble à du ſang tout pur, quand elle eſt entierement refroidie, on y trouue au fonds comme certain grumeau de ſang caillé. Cette vrine devient telle par le froiſſement des reins, ou par l'ouuerture de leurs veines, d'où le ſang ſort auſſi toſt, ce qui arriue ordinairement par la peſanteur de la pierre. Ceux-là ſe trompent fort, qui attribuent auſſi cette ſorte d'vrine à la debilité du foye, car à peine peut-on comprendre

que le sang sorte d'ailleurs avec l'vrine, sans que les reins soient offensez. C'est pourquoy quand on rend des vrines meslées de sang, si ny les lombes, ny les reins ne sont point blesez par vne cheute, ou par quelque coup, cela prouient de la pierre qui escorche les reins, lors principalement que l'on fait quelque exercice trop vehement. Cette vrine est souuent precedée d'une autre trouble & noire, qui presage vne prochaine nephretique.

Après l'vrine rouge s'ensuiuent la vineuse & la tannée, qui tiennent fort de la couleur du raisin noir, & signifient que le sang ou la bile sont brulez, & declinent à la melancholie.

La verte, marque l'abondance & le meslange de la bile prassine ou erugineuse.

La bleuë, comme aussi la liuide ou la plombée, denote l'excès & le meslange de la melancholie, ou l'extinction de la chaleur naturelle, pourueu que cela ne vienne point de playes ny de coups,

La dernière de toutes est la noire, laquelle procedant de la rouge & de la verte, signifie vne tres-grande inflammation, & vn meslange de bile noire; mais si elle prouient de la bleuë & de la liuide, c'est signe d'une extreme extinction de la chaleur. Il arriue aussi neantmoins que telles vrines sont meslées de quelque crise, tant es maladies aiguës, qu'en celles qui sont longues, & qui viennent de melancholie. Et cela se fait au iour decretoire, sans peine, & pour le bien du malade.

CHAPITRE XIV.

Que signifie la substance de l'urine dans les maladies.

LA substance de l'urine se considere selon la simplicité, qui est ou subtile, ou grossiere, ou mediocre. La subtile se retrouve seulement es couleurs qui tendent au rouge, scauoir en celle qui est blanchastre, paillette, dorée, safranée, iusques à la rougeur; car on n'a iamais remarqué que la bleuë, la livide ou la noire fust de cōsistēce subtile. La grossiere prend toutes sortes de couleurs; car la grossiereté se rencontre quelquesfois aussi bien en l'urine blanche comme en la noire. Cest pourquoy l'urine subtile qui n'est point renduë telle par l'excès du boire, ny par aucune autre importunité des causes externes, s'ensuit de l'obstruction des reins & des vretères, laquelle empesche qu'il ne passe rien de grossier avec ce qui est liquide; comme on le remarque ordinairement en la vehemence de la douleur nephritique, lors que la pierre bouche l'entrée de l'vretère. Cela vient aussi quelquesfois du deffaut de la digestion, & de la debilité de la chaleur naturelle, par la seule intemperie, sans aucun vice des humeurs: quelquesfois la chaleur est si foible, qu'elle laisse aller l'eau & les autres breuuages que l'on prend, tout tel que l'on les auoit ayallez ce qui est vne extreme crudité.

Nostre chaleur naturelle digerant l'aliment ou les humeurs, trauaille premierement & principalement apres la mediocrité de la substance, à la-

quelle en suite elle adioust la couleur, selon la nature des parties : cest pourquoy l'on reconnoist mieux la digestion par la substance que par la couleur. Et pource Hippocrates a prononcé que l'urine rouille & subtile est marque de la crudité du mal.

La substance mediocre de l'urine monstre que la chaleur est vigoureuse, que la digestion de l'estomach, du foye & des vrines est fort bonne, & partant elle retient ces trois moyennes couleurs, qui sont la paillette, la dorée, & la safranée. L'urine espaisse & grossiere est vn effect de la chaleur oppressée, ou bien de crudité, si ce n'est que les conduits de l'urine fussent trop ouuerts & trop lasches: nō que la chaleur naturelle soit oppressée par l'intemperie, mais bien par l'excez des humeurs indigestes. Or l'urine, tant grossiere que subtile, acquiert enfin vne mediocrité de substance par la digestion.

A l'urine grossiere se rapportent la grasse & celle qui est huyleuse, non celle sur laquelle on void nager vne certaine grasse comme des toiles d'araignées; mais celle dont la substance est lente & espaisse comme de l'huyle ou de la grasse fonduë, & laquelle estant agitée semble pesante & gluante comme de l'huyle. Ceste urine demonstre que le corps se va fondant, ou par phthisie, ou par fieure hectique ou par hydropisie.

CHAPITRE XV.

*Que signifient l'urine claire, &
l'urine trouble.*

L'urine claire est celle, que la veüe penetre facilement; la trouble & obscure est celle au trauers de laquelle on ne peut voir. Or on reconnoist de combien

trouble differe de celle qui est grossiere, & la subtile de la claire, par comparaison du blanc de l'œuf & de l'huyle, du verre fond u & du vin noir, qui sont veritablement grossiers, & neantmoins ne sont pas troubles, mais tout a fait transparens & clairs. Comme au contraire le vin blanc, quoy que subtil, est quelquesfois trouble, de mesme aussi que l'eau de vie qui est encore plus subtile, laquelle ne laisse pas de se troubler & devenir obscure.

Or pour rendre la chose de plus facile intelligence, & plus fructueuse, nous distinguerons les vrines troubles en trois ordres & differences. L'une de ces vrines troubles, est celle qui est devenue telle par la rigueur du froid externe. Et celle cy qui est la plus obscure de toutes, enduit le verre d'une certaine viscosité, & le tache tout à l'entour, principalement par le haut, ce qui s'en va promptement par la chaleur, laquelle remet incontinent le verre en sa premiere transparence. Quant à ce qu'une urine se trouble plus facilement, l'autre plus difficilement, & qu'il y en a qui à peine se trouble jamais, il faut rapporter cela à leur condition: mais il paroist mesmes que le froid externe contribue beaucoup à la troubler, en ce qu'aucune ne se trouble dans vn lieu chaud, ains se maintient toutetelle qu'on l'a renduë. Il y en a vne autre, laquelle est veritablement trouble, dont la substance & liqueur s'espaissit, ou de soy-mesme, ou par certain meslange interieur; telle est celle qui decoule des reins, qui rendent le pus. Cette sorte d'urine ne se peut dissoudre par la chaleur, & est broüillée de beaucoup d'ordures qui nagent en icelle, & se laissent aller au fonds avec vne hypostase grossiere, quand l'urine a reposé, laquelle en suite reste

le plus souuent aussi tost nette & claire au dessus de l'hypostase. On compare cette vrine au vin trouble par le meſlange de la lye. La troiſieſme eſpece d'vrine trouble, s'appelle cenſuſe, dont le mot a deſia commencé de paſſer en vſage : en cette vrine on ne diſcerne manifeſtement aucune choſe qui ſurnage, mais elle eſt par tout ſemblable, ſans toutesfois depoſer aucune hypostase, ny autre choſe qui ſoit, dont elle deuienne plus claire, quoy qu'on la laiſſe repoſer aſſez long tēps, & demeure indiſſoluble au feu, & a toute autre chaleur. On la compare au vin qui a perdu ſa ſplendeur & limpidité en s'aigriſſant, pour eſtre vieil, éuenté, ou tourné à cauſe du tonnerre.

L'vrine claire & transparente, monſtre que la diſteſtion eſt entiere & parfaite, que les humeurs ſont en bon eſtat, & que la chaleur naturelle eſt fort abondante, la vertu de laquelle perſiſtant meſme dans l'vrine, en ſepare & diſtingue finalement l'hypostase. Celle qui ſe change par la force du froid, & qui en apres ſe remet par la chaleur, eſt de fort debile ſignification, ſi ce n'eſt que peut eſtre paroiſſant telle au commencement des maladies aiguës, on la prene pour retenir encor quelque marque de diſteſtion; parce qu'au cōmencement du mal l'vrine ſubtile ne s'eſpaiſſit pas tout auſſi toſt; mais eſtant peu à peu deuenuë épaiſſe, elle ſe trouble plus facilement.

Celle qui eſt vrayement trouble, eſt le plus ſouuent renduë telle par l'affectiō des reins, ou de la veſſie, eſquelles parties ſe rencontre abondance d'humour que l'vrine emporte avec ſoy, ou bien quelque vlcere ſimple, qui rend du ſang, ou vn vlcere ſordide qui rend du pus, de la ſanie, ou de la morue, par l'eſcoulement deſquelles cho-

les l'vrine deuient espaisse & trouble. Cest pour quoy ceux qui sont subiets à de grandes douleurs nephritiques, ne rendent presque iamais les vrines claires. L'vrine qui est trouble, sans ces accidens, marque vne abondance & escoulement d'humeurs grossieres contenuës dans les vrines, que la chaleur naturelle a de la peine à cuire: d'ou viennent des maladies longues & opiniastres & des douleurs de teste, surquoy Hippocrate a prononcé: Ceux qui font l'vrine trouble comme celle des iumens, ont ou auront mal à la teste: & si cela continuë, il y a danger de lethargie. Souuentefois aussi l'vrine deuient soudainement trouble lors que les obstructions estans ostées, & les conduits débouchez, la plus grosse matiere qui auoit esté longtemps retenuë, sort de la ratte, du foye, des reins, ou des grands vaisseaux: ce qui arriue d'ordinaire aux sains apres quelques exercices, & aux malades sur la fin de leurs maladies, & principalement en la crise des fieures longues, comme sont les quartes, & és maladies de la ratte & du foye, & quand vn abscez vient à se crever. Or en ce cas cela a coustume de sortir avec soulagement des corps. Voire mesme l'vrine rouge, ou citrine, ou sans sediment, telle qu'est celle qu'on rend au commencement des fieures, tant continuës qu'intermittentes, & celle qu'on nomme d'ordinaire simplement cruë, est aussi quelquesfois estimée trouble, mais non encore confuse; estant deuenuë telle à cause d'une humeur creuë & superfluë, qui sortant des veines, ou de la ratte, ou du foye, comme il arriue en la iaunisse, vient se mesler parmy les serositez du sang.

Au reste l'vrine confuse ne s'ensuit iamais de l'affection des reins, ou seulement des visceres;

mais

mais bien tousiours de celle des veines. Cette vrine denote non l'abondance des humeurs cruës, ains proprement la confusion, corruption, & pourriture du sang & des humeurs qui sont es grâds vaisseaux, & en marque ordinairement la malignité; veu que la pourriture brouille, confond & trouble tout. C'est pourquoy on ne la remarque telle que dans les fièvres continues, qui sont dangereuses & malignes.

Or par cecy ie veux bien que l'on sçache que l'vrine qui n'est mesme entachée d'aucun vice des reins, ne demonstre pas tousiours la condition du sang & des humeurs; car on la rend quelquesfois des vrines citrines, espaisles & troubles, & neantmoins le sang qu'on tire pour lors ne laisse pas d'estre grandement pur & vermeil. On remarque cela le plus souuent en la fièvre quarte, & en la tierce intermittente, & mesmes en la iaunisse, quand la bile sort du foye, ou de la bourse du fiel, ou de quelque autre endroit; & se iette dans les veines, sans se mesler parmy le sang, ains seulement parmy les ferofitez d'iceluy. Et en cecy ceux faillent lourdement qui ordonnent aussi-tost la saignée, à cause qu'ils voyent les vrines grossieres & rouges. L'vrine est aussi quelquesfois selon la nature, tant en substance, qu'en couleur & en sediment, & pourtant le sang que l'on tire alors paroist mauuais & vitié tant en substance qu'en couleur. Ce qui arriue communement en l'estat & deuant la crise des fièvres continuës, quand la digestion des vrines est bien faite; la nature ne s'estant point toutesfois encore efforcée de faire aucune euacuation de l'humeur nuisible & peccante.

Voilà ce que l'on peut remarquer & reconnoistre à la premiere veüe des vrines, touchant leurs

quantité, leur odeur, & principalement touchant leur couleur, substance, & transparence, combien qu'il ne fust encore rien descendu au fonds: mais ces choses, comme j'ay dit, doiuent estre discernées avec beaucoup de prudence & de iugement. Il faut maintenant parler des choses contenues.

CHAPITRE XVI.

Des choses qui se trouuent meslées parmy les vrines.

ENtre les choses qui sont meslées parmy l'vrine, les vnes nagent au dessus, les autres bauolent par le milieu, & les autres vont au fonds. En la surface est en premier lieu la couronne qui enuironne & borde le dessus. Elle se remarque difficilement en l'vrine qui est esgale & semblable par tout; & facilement en celle dont les parties ont quelque difference, ou en laquelle se retrouue quelque exagitation d'humeurs: car la partie supreme de l'vrine estant fort subtile, elle est plus suiette à se changer, & represente souuent beaucoup de choses, ou en couleur, ou en substance, lesquelles on ne peut encore connoistre au reste de la liqueur de l'vrine.

La couronne monstre ordinairement quel est le sang dans les grands vaisseaux: car estant subtile & blanche, c'est signe que le sang est meslé de serositez subtiles: estant espaisse & blanche, c'est signe que le sang est pituiteux: estant citrine, c'est signe que le sang est naturel: estant safranée, c'est signe qu'il est meslé de quantité de bile iaune; estant

rouge & enflammée, c'est signe qu'il est eschauffé & enflammé, estant verte, qu'il est infecté de bile prassine ou erugineuse; estant bleue, ou liuide, c'est signe qu'il est entaché ou de melancholie naturelle, ou de bile noire, ou bien que dans peu de temps il se corrompra & se tournera en la nature de ces humeurs. C'est pourquoy les dernieres de ces vrines designent ou vne maladie melancholique, ou l'epilepsie.

L'escume abondante au dessus de l'vrine, qui n'a point esté agitée, signifie qu'il y a beaucoup de vents dans le corps, qui trauaillent l'estomach & les boyaux, qu'on est en danger de colique, pour auoir trop magé de fruiçts, ou de legumes, ou parce que la chaleur naturelle est debilitée. Que si cette escume perseuere long-temps en forme de grosses bulles, c'est signe d'humeurs grossieres & visqueuses qui causent quelques obstructions; mais si ces bulles se desfont facilement, c'est signe que les flatuositez & les humeurs sont subtiles. Si les bulles sont petites & disposées autour de la couronne, c'est signe de douleur de teste, & que cette douleur vient de cephalalgie; si ces bulles enferment toute la couronne; mais si elles n'en occupent que la moitié, c'est de migraine; dont la douleur sera forte, si ces bulles sont dorées, ou citrines; & plus foible si elles sont blanches & pales; & de longue durée, si elles demeurent ainsi long-temps sans se défaire. Celles finalement qui se trouuent au milieu de la surface de l'vrine, signifient que la douleur est appaisée. Car veu qu'elles tiennent le haut de l'vrine, elles tesmoignent aussi que la teste, qui est la plus haute partie de l'homme, est atteinte de douleur causée ou de vent ou d'humeur, selon la couleur des bulles. S'il se

trouue des bulles au milieu de la couronne, qui soient semblables à de petits grains, & qu'en remuant l'vrine, elles descendent en bas, puis remontent aussi tost vers la couronne, c'est signe qu'il y a quelque defluxion qui tombe de la teste sur les poulmons, ou dans l'estomach, ou sur les épaules, ou sur les autres parties basses, de laquelle la force & nature se reconnoist par la couleur de l'vrine, & par les bulles de la couronne.

La graisse qui surnage à l'vrine en forme de toiles d'araignées, signifie, dit Hippocrate, que la personne tombe en chartre : car si cela ne vient de certaine colliquation & fusion des reins, il faut que ce soit tout le corps qui s'aille fondant & liquefiât, ou par vne fièvre ardente, ou par phthisie, ou par quelque fièvre heëtique. Si cette graisse est diuisée par points comme des gouttes d'huyle surnageantes, elle signifie semblablement l'un & l'autre, mais moins efficacement. J'ay neantmoins quelquesfois prins garde, que l'vrine deuenoit ainsi pour auoir beu de l'huyle. Or plus ces choses se dissipent promptement, c'est signe que le mal est moindre; & qu'au contraire il est plus contumace, qu'elles persistent plus long temps.

Au reste, on void voleter, & quelquesfois aller au fonds certains petits corps semblables à de grosse farine, ou à quelques paillettes, ou à du son. Et ceux-là ont la vessie galleuse, qui rendent en urinant certaines choses grossieres, qui ressemblent à du son. Mais si ces choses paroissent dans vne vrine subtile, elles signifient vne ardeur de fièvre enflammée & fondante, qui rotit le sang dans les veines, & leur substance estant bruslée, laisse aller certaines choses solides qui passent avec l'vrine, si quelqu'un jette en pissant de petites escailles & paillet-

tes, & que cela sente fort mal, la vessie est vlcérée: mais si cela sort sans qu'il y ait aucun vlcere dans la vessie, c'est signe qu'une fièvre ardente va fondant la surface des vaisseaux & les tuniques, & qu'elle les dissout comme par petites paillettes, d'où s'ensuit la consommation mesme des parties solides, mais d'autant moindres, que ces paillettes & écailles sont petites.

Les choses qui se retrouuent voletantes ou résidentes en l'urine, semblables à de la farine grossiere, ont bien la mesme signification, mais un peu moindre: car le gros sang estant rosty & bruslé, & ce qui est de tendre & gras en la chair estant fondu par l'ardeur de la fièvre, & la chair mesme estant desseichée, tout ainsi que les choses qu'on fricasse dans une poële, alors ce qui sort avec les urines ressemble à de la farine fort grosse: ce qui selon Hippocrate, est indice de longue maladie.

Il se trouue certaines choses semblables à de la farine menuë, ou à de l'amidon, qu'on void nager en l'urine des femmes grosses qui se portent bien, lesquelles laissent tomber au fonds quelque sediment un peu grossier, fait comme de la laine qu'on auroit subtilement cardée, le reste de l'urine demeure aucunement trouble, tirant sur le verd ou sur le liuide. Il paroist certains petits morceaux de chair dans une urine grossiere lors que les reins sont vlcerez.

Hippocrate dit, que ces filamens blancs qui se rencontrent en l'urine, viennent des reins: mais nous auons reconnu que le plus souuent ils sortoient de ces vaisseaux spermatiques, qu'on nomme Parastates, où ils prennent une figure ronde, & se font de la matiere de la semence, laquelle de-

coulant peu à peu par la violence du mal s'espaissit à la chaleur.

Or on trouue plusieurs choses en l'vrine de ceux qui depuis peu sont surpris de gonorrhée virulente & vlcérée, & és femmes qui ont des fleurs blanches, ou la matrice remplie de vilenies. Quelques fois aussi l'vrine qui sort la premiere apres le coït, a quelque chose de semblable, ou mesme aucunement plus grosse qu'un filament.

Maintenant quant au sang pur, ou congelé en grumeau, il signifie qu'il y a quelque vlcere recent és reins ou au col de la vessie : & le pus signifie que cét vlcere est inueteré & solide. Or on discerne si le mal est aux reins, ou au col de la vessie, par la douleur de la partie, qui est fort grande au col de la vessie, & n'est point du tout aux reins, & de ce que tout ce qui vient du penil, ou du col de la vessie, sort ou à part & sans vrine, ou bien quand on commence à pisser ; au lieu que ce qui vient des reins se trouue tout à fait meslé parmy l'vrine, ou sort quand on achève de pisser, mais cela tombe incontinent au fonds quand l'vrine est reposée.

Le grauiier sort ordinairement le dernier avec l'vrine : on tient que le grauiier ou sable rouge, & celuy qui tire sur le iaune, viennent des reins, & que le blanc vient de la vessie : nonobstant quand les reins sont affectez de quelque vlcere fordide, les pierres en deuiennent blanches, & sortent toutes endurcies comme d'un pus espais.

Les gros phlegmes qui sortent avec douleur en urinant, & qu'on trouue attachez au fonds du vaisseau, côme si c'estoit de la morue des narines, montrent qu'il y a vne pierre dans la vessie, ou que le col d'icelle est affecté de quelque vilain vlcere : car la vessie estant affectée, il s'y amasse des phlegmes

de cette sorte, à cause qu'elle est froide & membraneuse, lesquels sont aussi fomenrez par la masse du calcul. Mais ceux qui sortent sans douleur, viennent d'un ulcere, ou d'un abscez crud qui est és choses ou parties voy fines. Ceux là se trompent vilainement, qui n'entendans pas bien l'anatomie ny les œuvres de la nature, s'imaginent que ces phlegmes viennent du cerueau, ou de l'estomach refroidy, & de là descendent en la vessie : car comment est-ce que cela pourroit passer par les veines pour venir aux reins, sans se mesler avec le sang ou en retenir quelque teinture, & passer tout pur par les reins?

On rencontre dans les vrines trois choses qui se ressemblent, sçavoir, la semence, le pus & le phlegme, lesquelles toutesfois on distingue en cette sorte. La semence estant subtile est legere, nage toujours dans l'urine, au lieu que le pus & le phlegme vont au fonds : toutesfois le phlegme est espais & gluant, mais le pus se dissipe & défait incontinent quand on l'agite.

Or d'autant que la pluspart des choses qu'on trouue meslées dans l'urine, vient des conduits & passages d'icelle, de peur que cela ne trompe celuy qui voudroit par là iuger des autres parties, j'en deduiray toute la cause & la suite des effects depuis la premiere origine.

Le sable rouge vient des reins, lequel estant abondant & gros, menace de pierre. Ce sable s'amaissant & attachant l'un à l'autre, forme de petites pierres comme des grains de millet ou d'orge, lesquelles se separans de la substance des reins, pour se ietter dans la concauité d'iceux, rendent les vrines épaisses, troubles, rouges, ou tirans sur le noir, qui sont les indices d'une prochaine douleur nephritique.

Le calcul s'estant fourré dans l'emboucheure de

l'vretère, cause vne extreme douleur: & lors les vrines sont subtiles & blanches, telles qu'on les remarque presque en toute obstruction des reins. Au reste le calcul estant deuenu plus gros, est le plus souuent renfermé de telle sorte dans les reins, qu'il n'en peut aucunement sortir: & lors quand on vient à trauailler ou à faire quelque exercice violent, il escorche les reins, & rend l'vrine non seulement épaisse & trouble, mais quant & quant sanglante, au fonds de laquelle on trouue souuent des cailles de sang congelé. Nous remarquons par fois qu'il arriue quelque chose de semblable pour estre tombé, ou pour auoir receu quelque coup, & plus rarement par la violence du trauail.

Quand l'vlcere est desia formé, l'vrine paroist blanche, & aucunement épaisse quand on ne trauaille pas, mais quand on trauaille, elle deuiet plus colorée, avec vn sediment épais. En suite dequoy l'vrine se fait grossiere, blanche, puante, & tout à fait purulente, comme si c'estoit du lait, au fonds de laquelle on trouue du pus, lors que l'vlcere est creux & sordide. Les vrines qui se trouuent de cette sorte, ne peuuent seruir de signe asseuré d'aucune autre maladie, en celuy qui les rend, à cause que, s'il faut ainsi parler, elles apparoissent tousiours renales. Mais quand l'vlcere des reins est deuenu grandement sordide, & se tourne en fistule dans l'vrine qui est blanche, épaisse, trouble, & puante, on trouue certaine residence grossiere, visqueuse, & coherente, comme de la morue, ou du blanc d'œuf.

On en remarque aussi souuent de semblable, quand il y a vne pierre dans la vessie; car bien que cette matiere vienne des reins, elle s'amasse neant-

moins autour du calcul , par le vice & imbecilité de la vessie, ce qui se reconnoist, parce qu'elle ne laisse pas le plus souvent de demeurer telle, quoy que la pierre n'y soit plus. Voire mesme les ulcères du col de la vessie, & du penil, rendent quelquesfois les vrines de cette sorte, lors principalement que les parastates sont affectez de chaude-pisse. Et sur le commencement de ces maladies, on apperçoit dans les vrines certains filamens qui sont premierement subtils, puis vont en grossissant; lesquels rendent toute l'urine épaisse, & sur la fin le sédiment devient, comme j'ay dit, tout morueux: & quoy que par art on vienne à guerir l'ulcère, toutesfois ces filamens ne laissent pas de continuer, à cause de la debilité qui reste encor en la partie, & dans les vaisseaux spermatiques.

CHAPITRE XVII.

De l'hypostase, & des choses contenues en l'urine.

IL y a vn grand debat, & de fortes contro-
uerses touchant l'hypostase, dont nous touchero-
ns icy quelque chose, non tant à dessein de con-
tester, que pour en connoistre la vérité. L'urine
se fait de la matiere du breuvage, & des choses li-
quides que nous prenons, laquelle matiere pene-
trant par tout, se vient à mesler parmy l'aliment,
le sang & les humeurs, par la digestion qui se fait
en l'estomach, au foye, & dans les veines, & lors
elle acquiert tant la substance que la couleur que
nous y remarquons, de mesme que font les boüil-

lons; des legumes & des viandes. Car l'vrine n'est pas si simple, qu'estoit le breuvage qu'on a prins, mais elle est vn peu plus espaisse à cause des choses estrangeres qui s'y sont meslées dans le corps. Voir mesme, pendant qu'elle a demeuré au dedans de nous, & a acquis quelque chose de nostre chaleur naturelle, dont Aristote a fort bien remarqué, qu'il restoit certaine portion dans les excremens des brutes mesmes.

Tout ce donc qui se trouue dans l'vrine de substance plus grossiere, quoy qu'on ne la discerne pas aussi-tost, toutesfois il se separe & s'amasse peu apres, & trouble le plus souuent au fonds, de mesme que font ces residences qu'on void en l'eau distillée des roses; & cela se fait par le moyen de ceste chaleur naturelle, qui a la vertu de separer les choses heterogenées. Et cette plus grossiere portion de l'vrine, ainsi separée par la chaleur naturelle, est l'hypostase. Ce n'est donc pas (comme pensoit Actuarius) vn excrement de la seule digestion qui se fait es veines plus esloignées, ou mesmes des parties solides. Ce n'est pas aussi (comme il a semblé à plusieurs autres) la portion plus crüe des viandes, laquelle passe quelquesfois de l'estomach dans les veines, parmy les serositez; mais ceste hypostase a la mesme origine, & se fait de mesme que l'vrine. C'est pourquoy l'hypostase est indice non seulement de l'estomach & des parties solides, mais principalement des grands vaisseaux. Or comme elle a le-mesme principe que l'vrine, aussi est elle de substance fort semblable. Car l'vrine abondante, fort subtile & du tout aqueuse, n'a point d'hypostase; Celle qui est simplement subtile, a vne hypostase subtile, comme en ceux qui ont des cruditez & qui ne digerent gueres bien: Celle

qui est mediocre a vne hypostase mediocre, & la grossiere en a vne qui est grossiere, comme és enfans & és gourmands qui mangent beaucoup, & qui digerent bien. Quant à l'vrine qui s'espaissist & se trouble par le mēlange de quelque chose externe, qui vient ou des reins ou de la vessie, elle depose vn certain sediment grossier, qui n'est pas proprement vne hypostase, mais c'est la lye de l'vrine.

Ainsi donc l'hypostase tire sa matiere de la substance de l'vrine: & c'est la chaleur naturelle qui la separe, laquelle se rencontrant vigoureuse & forte dans l'vrine, separe & ramasse promptement la matiere qui estoit esparse dans la liqueur de l'vrine, & qu'on ne discernoit pas encore; puis elle la depose au fonds, & enfin la rassemble tellement qu'elle devient esgale, c'est à dire par tout semblable, & mesme plaine, sans auoir rien de raboteux, ny de creuassé. La chaleur estant plus foible dans l'vrine, ceste residence se separe plus tard, & ne tombe pas iusques au fonds, ains demeure suspendue dans le milieu, & c'est ce qu'on appelle eneoreme, lequel est ordinairement ou creuassé ou inégal. La chaleur languide est fort tardieue à separer, & n'estant pas assez forte pour ramasser l'hypostase, elle la laisse ou dispersée par l'vrine, ou nageante au dessus en guise de nuage. Partant la diuerse situation fait distinguer trois sortes de choses cōtenues: au fonds est l'hypostase, c'est à dire le sediment; au milieu est suspendu l'eneoreme, c'est à dire le suspens; & au dessus surnage le nuage. Finalement la chaleur qui est extremement languide, comme dans la fièvre putride mortelle, ou celle qui est oppressée par l'excez des humeurs effrenées, comme quand on a la jaunisse, & souuent dans la fièvre tier-

ce, lors que la bile trop abondante sort du foye pour se ietter dans les veines, & se meller parmy les serofitez, ne separe rien du tout, & laisse l'vrine meslée & tout à fait confuse: Mais cette vrine n'arriue qu'en ceux qui sont malades, dont il faut maintenant parler.

Ceux qui ont le plus subtilement discouru de l'hypostase des febricitans, selon la maxime des anciens, disent que par certaine proportion elle a du rapport au pus, & que c'est vne portion de l'humour qui s'est putrescée pendant la fièvre, mais qui est desia cuite, separée, & expulsée avec l'vrine par la force de la nature. Mais c'est là veritablement vne tres mauuaise supposition en fait de Medecine: car la matiere de la fièvre ardente, qui n'est autre chose qu'une bile brulée, ne peut par aucune cuisson se conuertir en pus, ou en rien qui s'y rapporte; & la raison de cela n'est pas pareille à celle du phlegmon: De plus la matiere de la fièvre, laquelle dans l'estat estant desia cuite, vient finalement à sortir par vne vraye crise, ne paroist iamais purulente, ou blanche, mais tout à fait iaune & bilieuse. Comment se pourra-il donc faire que l'hypostase qui se trouue blanche dans l'estat d'une ardente fièvre, soit quelque portion de ceste matiere iaune qui s'estoit putrescée, & qui ne blanchist iamais? Au reste si dans l'estat il sort quelque portion de la matiere nuisible, & qu'au commencement & dans l'accroissement il n'en sorte rien, l'vrine sera plus grossiere pendant l'estat, qu'au commencement, ou dans l'accroissement; ce qui se trouue faux par les obseruations qu'on en fait tous les iours: car comme on void qu'au commencement des fièvres aiguës l'vrine est crüe & confuse, aussi remarque on qu'elle est grossiere.

C'est pourquoy il faut raisonner autrement touchant l'hypostase de ceux qui sont atteints de fièvre; & dire que ce n'est point vne portion cuite de l'humeur qui s'estoit putrescée, mais que la matiere en est semblable à celle de ceux qui se portent bien: & lors qu'elle commence de paroistre dans les fièvres aiguës, que c'est signe que la chaleur & la nature predominant & sont les plus forts, de façon que les humeurs putrides qui peu auparavant estoient esmeuës & en furie, sont pour lors reprimées & domptées, & la nature se remet en son premier deuoir, n'ayant plus rien qui la destourne. Car ce qu'on appelle digestion de la matiere qui cause la fièvre, n'est ny suppuration, ny maturation proprement; ains seulement repression & empeschement de putrefaction; parce qu'en l'estat de la fièvre toute la matiere d'icelle est encore renfermée dans les veines, & rien n'en est encore sorty par la crise; & neantmoins à cause qu'elle est adoucie, & soumise à l'empire & au pouuoir de la nature, l'vrine en est renduë plus pure & accompagnée d'hypostase, qui est vne marque asseurée de cette repression & victoire operée par la nature. La fureur de l'humeur peccante estant donc alors rabatuë, il en sort moins parmy l'vrine, laquelle est plus subtile & moins trouble qu'au commencement, lors que les humeurs estoient grandement troublées & confuses à cause de la pourriture, qui faisoit mesme que quantité de ces humeurs s'escouloient avec l'vrine. Alors aussi la nature, estant superieure & maistresse, separe dans l'vrine la plus grossiere matiere & la ramasse en encreme ou en hypostase. Voyla donc en peu de mots ce qui concerne cette tres difficile question, que ie deduiray plus au long dans le traicté de la prognostique, où

à deſſein il fera diſcours de la diſteſtion des maladies.

Quand donc noſtre chaleur naturelle a pleinement ſurmonté & digéré les pernicieuſes humeurs de la maladie, il ſe fait vne bonne hypotafte, qui eſt blanche, polie & eſgale, & celle-cy eſt la meilleure de toutes. L'eneoreme qui eſt blanc, poly & eſgal, n'eſt pas ſi bon que l'hypotafte, & ſignifie que la chaleur eſt aucunement debile, laquelle ne peut bien ramaffer cette matiere qui n'eſt pas encore aſſez cuitte, & la rabattre au fonds. Semblablement le nuage qui eſt bon, c'eſt à dire celuy qui eſt blâc, poly & égal, eſt ſigne de crudité & de foibleſſe de chaleur. L'hypotafte noire ou liuide, eſt la pire de toutes, & menace d'un mal qui doit entierement accabler la nature. L'eneoreme noir ou liuide, ſignifie que le mal n'eſt pas ſi grand; & le nuage qui ſe rencontre de meſme ſorte, demonſtre que le mal eſt encore moindre: en ces cas la chaleur naturelle ne ſuccombe pas encor, ains conſerue touſiours quelque peu de vigueur. Chacune des choſes contenûes ſera donc iugée tres bonne, eſtant mediocre en quantité & en ſubſtance, blanche, polie & eſgale: & celle qui declinera de ces conditions, ſera mauuaiſe.

La grande quantité des choſes contenûes vient de la ſuppreſſion des ſueurs accouſtumées, ou des deiections du ventre, ou de quelque autre euacuation naturelle: & pour lors ces choſes contenûes paroiffent groſſieres & cruës. Quant à celles qui deuiennent abondantes par la quantité des alimens, & par la vigueur de la faculté, elles ſont mediocres tant en ſubſtance qu'en couleur.

La paucité de ces meſmes choſes procedent des ieunſes, des veilles, de l'exercice vehement, & de

toutes les autres causes évidentes qui consomment & dissipent la substance du corps, & ce en ceux qui sont sains : mais en ceux qui sont malades les choses contenues dans l'urine qui paroissent grossières, viennent ou de l'abondance d'une matière trop crüe, que la chaleur naturelle ne peut surmonter, & lors il s'y rencontre aussi d'autres signes de crudité : ou de la crise des longues maladies, & alors il s'en ensuit un manifeste allègement du mal. Cela vient aussi quelques fois & du pus, & des phlegmes visqueux, comme on le peut facilement remarquer par ce que nous en avons dit cy-devant. Car les choses contenues qui sont subtiles, denotent des maladies qu'il y a de la crudité, ou un commencement de digestion ; & en ceux qui se portent bien, que les humeurs subtiles n'ont pas encore acquis une médiocrité de substance.

Les choses contenues qui sont polies & continues, sans estre aucunement fendues, ridées ou creuassées, ny raboteuses, mais bien ramassées, acquièrent ces conditions par la vigueur de la chaleur naturelle qui a passé dans l'urine. Au contraire celles qui sont aspres & creuassées n'ont peu estre bien ramassées par la chaleur qui n'est pas assez forte pour cet effet. Le mesme aussi se doit dire de celles qui sont esgales, & dont toutes les parties sont par tout semblables en grossiereté & en couleur : comme le contraire de celles qui sont inegales, es parties desquelles on remarque quelque difference, & ne paroissent pas esgalement cuites ou colorées.

Or entre les couleurs des choses contenues, les paillettes, les dorées & les rougeâtres signifient que la bile abonde dans les veines, ou que le sang se corrompt par une grande inflammation : com-

bien que Hippocrate ait estimé que la residence rouge & polie dans vne vrine rouge fust marque de feureté. Les bleuës, liuides & noires signifient que la chaleur vitale va s'esteignant, ou que c'est vn sang corrompu, ou quelque humeur noire, qui s'est engendrée là, ou qui decoule d'ailleurs.

Si d'auanture és veines de ceux qui se portent bien, il ne se retrouue aucunes choses contenues, cen'est pas tousiours mauuais signe, car souuent l'vrine deuient subtilé, ou par quelque grande obstruction; ou pour auoir prins en trop grande quantité d'un breuuage subtil, qui se distribue auparauant que s'estre méllé parmy les viandes, & sans auoir esté digeré, & en cette sorte d'vrine on ne void que fort peu ou point de choses contenues, à cause qu'il n'y a pas de matiere propre à cela. Mais en ceux qui sont malades d'humeurs corrompuës, quand il ne se trouue point de choses contenues dans leurs vrines, c'est tousiours vn mauuais indice, parce qu'il ne manque pas d'humeur peccante dans les veines, & cela signifie que l'abondance des humeurs corrompuës est retenue & empeschée.

Or nous ne traiçtons icy que des signes demonstratifs des vrines, reseruant de parler ailleurs de ceux qui sont prognostiques, par lesquels dans les maladies on peut preuoir ou la digestion, ou le salut, ou la mort.

CHAPITRE XVIII.

*Exercitation du iugement des
urines.*

Tout ce qui se rencontre outre nature dans les urines, s'il ne vient de la qualité des choses qu'on a prinſes, il demonſtre que les viſceres ſont affectez, ou les veines & les extremittez du corps, ou bien les reins, ou les conduits de l'urine, leſquelles parties communiquent à l'urine les vices dont elles ſont entachées. C'eſt pourquoy deuant que d'en rien decerner, il faut bien prendre garde de quel endroit principalement ces choſes proüiennent. Si elles proüiennent des reins, ou des conduits de la veſſie, il ſera facile de le reconnoiſtre par ce que nous auons rapporté des maladies de ces parties. Mais ſ'il ne paroïſt rien de cela, il faut aſſeurément rapporter toute la ſignification de l'urine, ou aux viſceres, ou aux grandes veines, & au reſte du corps.

Or pour bien iuger de ces choſes, il ſe faut toujours rememorer quelle eſt la ſaiſon de l'année, quelle la conſtitution du Ciel, & quelles maladies ſont plus communes en ce païs-là, ou quelle maladie court alors parmy la populace, car il faut toujours craindre & redouter ce qui d'ordinaire en attaque pluſieurs. En après ayant reconnu le ſexe du malade, il ſe faut informer ſi c'eſt quelqu'un que l'on connoiſſe, afin que ſe reſouuenant de la ſiature & conſtitution de la perſonne, on ſçache à quelle maladie elle eſt ſujette, parce que cette re-

marque sert beaucoup à la recherche & connoissance des maladies, lors principalement qu'elles sont encore recentes, ou qu'il n'en paroist aucun signe dans les vrines. Car si cest vn vieillard qui soit malade, en hyuer, par vn temps pluvieux, & dans vn pays humide, il est bien difficile qu'il n'ayt la toux, & qu'il ne soit affligé de defluxions, & de debilitez d'estomach, sur tout s'il est adonné à la gourmandise & au vin, & qu'il soit d'un temperament trop humide, il doit souvent estre attaqué de defluxions. Ou si c'est vn ieune homme d'un temperament bilieux qui soit malade, pendant le fort de l'esté, dans vn air & pays grandement chauds, apres auoir vſé d'un régime de viure fort eschauffant, & en suite d'un trauail immodéré, il y a du soupçon de fièvre ardente, ou de fièvre intermittente bilieuse, ou de dysenterie, ou de pleuresie, selon la disposition du malade, ou selon la maladie qui est lors plus commune parmy le peuple. Suiuant ces exemples, on pourra semblablement iuger des autres maladies, sans auoir encore considéré l'urine.

Au reste, l'urine qui n'est point alterée par le vice des reins, & des conduits, ny par la violence des causes externes, demonstre quelle est l'intemperie, tant des visceres que des veines, & de tout le corps: puis elle marque si cette intemperie est simple, ou si elle vien, du vice des humeurs, & quelle sorte d'humeur c'est qui excède, & si elle est accompagnée de pourriture & de fièvre. Car la chaleur marque l'intemperie, la substance grossiere, ou turbulente marque le vice de l'humeur, & la confusion marque la pourriture; desquelles causes viennent presque toutes les maladies interieures: & combien que l'on ne connoisse pas

bien encore l'espece du mal, on peut neantmoins de là tirer vne connoissance suffisante pour scauoir ce que l'on doit faire, & ce qui doit estre purgé. Les choses mesmes qui sont contenuës dans l'vrine, donnent aussi quelquesfois connoissance de la partie affectée.

Or d'autant que c'est maintenant vne coustume que plusieurs se meslent de deuiner beaucoup de choses touchant l'estat du malade absent, à la seule veüe de l'vrine, celuy qui voudra s'estudier à faire de mesme à dessein d'en acquerir de la loüange, doit en premier faire vn recueil de tout ce qu'il aura remarqué dans l'vrine. Car l'esprit des simples s'empestre facilement dans l'ambage des paroles. Partant si l'vrine que l'on propose est blanche, ou paillette, & subtile, qu'il die que l'estomach & le foye sont grandement refroidis, que le malade est desgousté, & qu'il a presque perdu l'appetit, que l'estomach s'enfle, & fait mal après le repas, qu'il sort souuët des rots aigres, qu'il y a beaucoup de vents qui courent de costé & d'autre, que le plus souuët on sent du froid, qu'on a la teste pesante, & que le corps est grandemët lâche, qu'on a comis auparauant beaucoup d'excès en la façon du viure, & ce pour auoir trop beu d'eau, ou mangé des fruiçts, ou à force de veiller, ou pour s'être laissé emporter à la tristesse & à l'ennuy. Si le mal est inueteré, il faut dire que tout le corps est remply de crudités, que le visage a perdu sa viue couleur, ou que le malade est attaqué de lienterie, ou qu'il a les pieds enflés, & qu'il est en danger de tomber en leucophlegmatie, ou en cachexie. Et parce que cette vrine se rencontre aussi souuentefois dans la melancholie, & dans l'enfleure de ratte, il faut pareillement discourir des

symptomes de ces maladies, sçauoir est, de la tristesse, de la crainte, des songes turbulens, des rugissemens, de l'hypocondre gauche, de la palpitation du cœur, & des autres semblables. Quand l'vrine est ensemble blanche & grossiere, ou trouble, parce que cela prouient de l'abondance d'une pituite épaisse & visqueuse, on dira que la teste est agitée de douleur, ou appesantie d'une grâde enuie de dormir, que les viscères sont empeschés de beaucoup d'humeurs, que les intestins & les hypocondres sont pleins de vents, qu'il y a danger de colique, que l'estomach est incommodé & pressé d'enuie de vomir, ou que le vomissement est pituiteux. Si cette vrine paroist quant & quant confuse, qu'il y a de la fièvre ou quotidienne, ou lente, & qu'elle sera de longue durée; & qu'on est attriqué des symptomes qui accompagnent ordinairement les fièvres. Si l'vrine est dorée & subtile, il faut dire qu'il y a une intemperie chaude dans le foye, qu'on a soif, que le corps va s'extenuant, qu'on a de la peine à dormir, que le sommeil est turbulent, que le dedans des mains & les plantes des pieds sont grandement chaudes. Or si cette vrine est grossiere, que la bile jaune surabonde & est agitée, que les vomissemens sont bilieux, que la bouche est amere au parauant le repas; qu'on est sujet aux defaillances de cœur, que l'estomach & les entrailles se vont échauffans, & ce d'ordinaire avec la soif, que le ventre est tourmenté de trenchées, ou d'enuie d'aller souuent à la selle, avec danger de dysenterie, ou que le corps est incommodé d'une grande demangeaison, ou qu'il est couuert de galle. Si cette mesme vrine est quant & quant confuse, qu'il y a de la fièvre tierce, ou

de la fièvre ardente, de la douleur de teste, des veilles, du delire, de la soif extreme, & autres symptomes qui accompagnent ordinairement ces sortes de fièvres, ou qu'on est en danger de tomber en ces accidens là. Si l'urine est rouge & subtile, ou mediocre, il faut dire qu'il y a vne ebullition de sang, qu'on sent vne douleur de teste qui bat, & vne grande pesanteur, avec vne lassitude tenfue des membres: & si cette urine est confuse, que c'est vne fièvre synocheputride, avec les symptomes qui l'accompagnent. En cette mesme façon si par les autres couleurs de l'urine on conjecture qu'il y ait, ou de la jaunisse, ou vn scirrhe dans le foye, ou vn phlegmon, ou de la melancholie dans la ratte, ou quelque autre maladie, il faut diligemment parcourir tous les symptomes, tant ceux qui en sont resultés, que ceux dont on est communement menacé, comme aussi les causes évidentes qui ont coustume de les produire.

Voilà à peu près comme il faut discourir des parties affectées par l'observation de l'urine. Mais il faut d'abord s'informer prudemment, depuis quand la personne est malade, si la maladie est venue tout à coup, ou lentement, & peu à peu, & avec combien de vehemence; afin que de là on puisse conjecturer si la maladie est aiguë, ou si elle est de longue durée: car cela adjousté avec l'estimation de la nature, du temps, du pays, & des maladies qui courent, on approche bien près de l'espece du mal. De plus, si l'on void des bulles arrangées au haut de la couronne de l'urine, c'est signe que la teste est appesantie d'un amas d'humours, & affligée de douleur, en suite dequoy il faut iuger aussi tost, que le malade est fort assou-

py, & qu'il a les sens hebetez, & qu'à cause de cela on est en danger de lethargie, ou de paralyfie, ou de quelque grand catarrhe : ou si l'on remarque desia des signes certains de defluxion, selon que ie les ay cy deuât declarez, il faut iuger que l'humeur tombe ou sur le col, ou sur les espaules, ou sur les costez, & sur la poitrine, ou sur les poulmons avec de la toux, ou bien sur les jointures : & si avec la defluxion il y a des signes de fièvre, il faut dire que le malade est attaqué de pleuresie, & principalement si pour lors cette maladie est commune. Mais si avec la defluxion, l'vrine est oleagineuse, qu'il y a de la phthisie, ou qu'il y en aura bien tost. Or le vulgaire ignorant conte d'ordinaire pour parties du corps, seulement celles-cy, sçauoir est, la teste, le costé depuis le bout de l'espaule iusques à la cuisse, l'estomach depuis les clauicules iusques au nombril, le ventre, le dos, les bras, & les iambes. Lors donc qu'on aura reconnu quelle partiec'est qui fait mal, (car la douleur, comme grandement importune & incommode, est d'abord conneuë de tous) on racontera tous les symptomes qui sont suruenus à cette partie, puis aussi tost on ordonnera prudemment les remedes conuenables. Celuy ne remportera qu'un profit incertain & le plus souuent fort douteux, qui essayera de faire deuiner les Medecins, comme s'ils estoient des Prophetes : mais celuy qui consulte prudemment & fidellement, remportera le fruit d'un bon conseil.



LIVRE

QUATRIESME.

DES FIEVRES.

PREFACE.



AY cy dessus exposé les genres plus estendus des maladies, & des symptomes, avec leurs causes, & leurs signes, & par quel moyen l'on peut reconnoistre l'essence & la cause de chacune, bien qu'elle fust inouye, ou diversement meslee de plusieurs autres; tellement qu'il ne manque, ce semble, plus rien de ce qu'on doit aduancer pour servir à la façon generale de medeciner. Mais dautant que personne ne peut remporter aucune chose digne de grande louange par la connoissance des choses uniuerselles, sans l'usage & l'exercice qui concerne les choses particulieres: ie deduiray maintenant en detail & par le menu

toutes les differences & les especes des maladies qui attaquent le corps humain, observant l'institut & l'ordre des Anciens, autant qu'il sera possible. J'escriray donc premierement des fièvres, & des maladies qui concernent tout le corps; & de là ie passeray à celles qui sont propres à chaque partie. Cependant le Lecteur trouuera icy plusieurs choses dont les Anciens n'ont point parlé, ou qu'ils n'ont pas assez suffisamment expliquées, ou qui sont mesmes quelquesfois contraires à ce qu'en ont dit ceux qui nous ont précédé; mais pourtant ce sont choses autant appuyées sur la raison, qu'approuvées par un long usage. Car c'est ainsi que quiconque se mesle d'examiner la verité, doit publier pour l'utilité commune, non seulement ce qu'il aura leu, mais aussi ce qu'il aura trouué de soy mesme par son estude particuliere, & ce que la pratique luy aura fait remarquer de meilleur.

CHAPITRE PREMIER.

Ce que c'est que la fièvre, quelle est son essence, & quels en sont les signes.

LA fièvre est vne chaleur outre nature, laquelle partant du cœur, se respand par tout le corps. Quant au frisson & tremblement qui survient és fièvres intermittentes, bien que ce soit vn commencement de l'accès, cela neantmoins ne peut estre estimé fièvre, dautant que la chaleur n'est pas encor éprise. Le froid qui dans vne fièvre mortelle saisit les extremittez du corps, n'est plus de l'essence de la fièvre: & n'y a fièvre aucune qui puisse avec raison estre nommée froide, veu qu'il n'y en a point qui generalement ne provienne de chaleur.

La chaleur outre nature est contraire à la chaleur naturelle. Or la chaleur naturelle est de deux sortes, l'une est inserée & meslée parmy l'humide radical des parties solides, dont l'origine est celeste; l'autre est elementaire, moderée, & temperée du meslange de tous les quatre elements. Celuy-là est le premier ouurier, & la cause principale de toutes les fonctions; & cettuy-cy en est la cause aydante, parce que la temperie des elements excite & fomentte cette chaleur inserée. Nous avons autresfois demonstté que cette chaleur inserée ne pouvoit estre excessiue, & que l'abondance d'icelle n'estoit iamais reputée viciieuse, mais que plus elle est grande (comme en l'aage de l'en-

fance) d'autant se font mieux les fonctions naturelles de la vie. La fièvre ne peut donc en aucune façon venir de cette chaleur: mais l'essence de la fièvre consiste en vne chaleur outre nature, laquelle nous surprenant, comme vn fâcheux ennemy, combat & interesse tousiours la substance de cette chaleur inserée, & trouble toutes les fonctions.

Or il faut conter trois differences de chaleurs outre nature, dont la premiere est fort simple, laquelle n'est qu'un excès de la chaleur seulement, causé de ce que la chaleur elementaire quittant la temperature & mediocrité, par vne croissiance continuë, vient à excéder plus qu'il ne faut, & ainsi la chaleur qui auparauant estoit naturelle, s'est rendue peu à peu non naturelle, & partant vicieuse, & déjà ennemie de la nature. La seconde est vne chaleur causée de matiere putride, qui bien qu'elle ne soit pas beaucoup ardente, parce toutesfois qu'elle se ressent de la condition de la matiere qui l'a causée, elle est outre nature, & incommode la chaleur qui y est inserée. La troisieme est maligne & pernicieuse, & prouient d'une matiere pestilente & veneneuse, laquelle offense la chaleur vitale & inserée, non par l'excès d'aucune qualité, ny à cause de la putrefaction, mais par certaine contrarité de toute la substance. La fièvre ne consiste donc qu'en la seule chaleur qui est outre la nature, & qui desia est éprise & permanente: car si le corps deuiant tout échauffé du Soleil, par le baing, ou à cause du travail, & qu'incontinent après l'agitation il vienne à se refroidir, personne ne dira que cette chaleur soit fièvre, non plus que maladie: ny finalement la chaleur outre nature, laquelle occupe seulement ou la teste, ou

le bras, ou la jambe, d'autant qu'elle n'est point épan-
duë partout le corps, non plus que l'inflammation
de quelque membre, quoy qu'elle s'estende fort;
nymelme l'ardeur qui procedant de l'intéperie du
foye, & s'espendant dans le sang & par les humeurs
vaporeuses, brusle presque le dedans des mains &
le dessous des pieds, ou semble estre diffuse par
tout le corps; parce qu'elle ne prouient pas du
cœur. La chaleur outre nature, laquelle, proce-
de du cœur, se jette avec les esprits dans les arte-
res, peut seule estre vniuerselle, & elle se com-
munique promptement & legerement par tout
le corps: & partant c'est à cette seule chaleur
que conuient le nom de fièvre.

De plus, quād il n'y a que le foye affecté, le poulx
n'en reçoit point de changement, & n'y a seulemēt
que les fonctions qui en soient alterées. Mais quād
le cœur, qui est le principe de la vie, ressent de l'in-
commodité, tout le reste luy compatist aussi tost,
& toutes les parties sont quant & quant troublées
en l'exercice de leurs offices. C'est pourquoy la
fièvre, comme maladie tres-vniuerselle, offensant
toutes les fonctions en toutes les parties, doit estre
reputée affection de la partie qui est necessaire à la
conseruation & à l'usage de toutes les autres; &
la seule chaleur outre nature, qui prouenant du
cœur, se respand par tout le corps, doit estre
prise pour vraye fièvre.

Le dire d'Auicenne, que la chaleur de toute fié-
vre s'allume dans le cœur, n'est pas tousiours veri-
table. Et quoy que nous reconnoissions que cela
se rencontre dans les fièvres contenuës & prin-
cipales, neantmoins la chaleur des fièvres in-
termittentes & symptomatiques, ne s'allume pas
premierement dans le cœur, ains s'esleuant

d'ailleurs, elle vient attaquer le cœur, d'où elle part toute esprise, & de là se respand avec les esprits dans les arteres par tout le corps.

Au reste, les marques communes de toutes les fièvres, sont le pouls vif & frequent, & quelquesfois inegal; qui est vn signe propre & particulier de la seule chaleur excessiue qui est au cœur: la languueur & debilité des forces, avec pesanteur du corps & lassitude des membres; d'autant que tout le corps participe & se ressent de l'incommodité du cœur: la chaleur acre & poignante au dehors, ou qui fait de la peine au dedans, & qui sort quelquesfois avec le souffle par les narines.

CHAPITRE II.

Les differences des fièvres.

L'Essence de la fièvre consistant en vne chaleur outre nature, il en faut establir les genres propres & plus estendus, selon les differences de cette chaleur. Il y a donc trois premiers & supremes genres de fièvre, aussi bien que de chaleur outre nature, sçauoir est, simple, putride, & pestilente. La fièvre simple est celle, dont la chaleur elementaire excède les bornes de la nature & de la temperie, par son seul accroissement; on peut aussi dire que c'est la chaleur naturelle tournée en chaleur ignee. La putride est celle qui procède de pourriture. Et la pestilente, celle qui est causée par quelque expiration veneneuse & pernicieuse.

De plus, il y a trois sortes de fièvre simple, l'ephemere, la synoche, & l'hectique: lesquelles dif-

ferent seulement à cause du sujet de la chaleur, qui se retrouve ou dans la substance du corps, ou dans l'humeur, ou dans les esprits; car il n'y a que cela dans le corps. L'ephemere s'attache premierement aux seuls esprits qui vont ça & là, lesquels en deuiennent tout enflammez, en sorte que leur chaleur se communique pareillement à tout le corps. Or cette fièvre ne subsistant que dans vn sujet subtil, & qui se dissipe facilement, elle ne dure gueres qu'vn jour, & pource on l'appelle ephemere, c'est à dire, journaliere, & rarement dure-elle dauantage. La synoche, c'est à dire la contenant simple, est vne ebullition du sang, qui s'est eschauffé sans putrefaction ny corruption, dont la chaleur se va communiquant au cœur, & à toutes les parties. L'hectique est la seule d'entre toutes, qui premierement & de soy subsiste & s'attache à la substance des parties solides.

Elles sont donc toutes au cœur, mais de façon differente. Dans l'ephemere, la chaleur s'est éprise aux esprits du cœur, dont les humeurs & la substance deuiennent en suite seulement eschauffees. Dans la synoche, la chaleur s'est éprise dans l'humeur, & a passé dans la substance. Dans l'hectique, la chaleur s'est éprise en la substance du cœur, & y demeure entierement fixe & attachee. Or l'hectique est double, l'vne vniuerselle & principale, qui saisit premierement le cœur, puis s'attache esgalement à la substance de toutes les autres parties; l'autre est particuliere, laquelle attaque premierement & de soy, la substance de quelque partie seulement, d'où neantmoins elle se communique tant au cœur, qu'au reste des membres; & cette fièvre est de plusieurs fortes, car il y a l'hectique du ven-

tricule, celle du foye, celle de la ratte, & celle des poulmons.

Quant à la fièvre putride, elle reçoit deux différences par l'espece & par la situation de l'humeur qui se pourrist, & est, ou continuë, ou intermittente. Lors que la putrefaction se rencontre si grande dans les grands vaisseaux, que de soy-mesme, ou par sa vapeur elle atteint sans cesse le cœur, & l'incommode sans relasche, la fièvre deuiant continuë; mais si la putrefaction est moindre, ou tellement esloignée du cœur, qu'il n'en puisse estre continuellement atteint, la fièvre est intermittente. La fièvre continuë est de deux sortes, l'une vraye & principale, qui prouient de la putrefaction de l'humeur qui se rencontre és grands vaisseaux qui sont scituez entre les aisselles & les aines. L'autre symptomatique, qui comme compagne suit la putrefaction de quelque viscere, ou partie. Et celle qui vient de l'erysipele du foye, de la ratte, des reins, ou de quelque partie que ce soit, s'appelle Thyphodes: celle qui vient d'un phlegmon formé en l'un de ces viscères, ou en quelque vne des autres parties plus nobles, ou qui vient de peripneumonie, de pleuresie, ou de phrenesie, s'appelle phlegmonodes, & tant l'une que l'autre, est symptomatique continuë. La symptomatique vient aussi quelquesfois lors que l'humeur enclose dans ces viscères se putresce, sans qu'il y ait aucune inflammation: & si cela arriue tout à coup, & subitement, la fièvre en est aiguë; mais si cela se fait lentement, & peu à peu la fièvre en est lente & continuë, qui dure d'ordinaire assez long temps.

Les especes de cette fièvre continuë, que j'ay nommée principale, se prennent de la nature de

l'humeur qui predomine. Car si le sang des veines & des arteres est bien temperé, & dans l'esgalité des quatre humeurs, quand il vient à estre surprins de pourriture & d'inflammation, il excite vne fièvre synoque putride, dont nous expliquerons l'incontinent les espees. Si le sang est plus chaud qu'il ne faut, & abonde plus en bile, qu'en aucune des autres humeurs, il cause vne fièvre tierce absolument continuë; l'inflammation de laquelle estant fort grande, tirant vers le cœur, & les parties precordiales, & les attaquant, c'est vn vray Causus, c'est à dire, fièvre chaude. Mais si le sang est pituiteux, & qu'il vienne à se corrompre & enflammer, il cause vne fièvre quotidienne continuë, & s'il est melancholique, il cause vne fièvre quarte continuë. La fièvre putride intermittente est, ou simple, ou composée, ou confuse. La simple est de trois sortes, sçauoir est, tierce, qui vient de la bile jaune, laquelle se corrompt hors des grands vaisseaux; La quotidienne, qui vient d'une pituite pourrie; & la quarte, qui vient de corruption de la simple bile noire. La fièvre confuse ne vient pas d'une seule humeur, ains du meslange de plusieurs corrompues, ramassées ensemble en quelque endroit hors des grands vaisseaux: de cette sorte est la tierce bastarde, qui vient de bile & de pituite meslées & corrompues ensemble. La fièvre composée procede du meslange des intermittentes, comme la double tierce, la triple quarte, & l'hemitrite, qui consiste de la quotidienne continuë, & de la tierce intermittente. Et en ce cas, comme il se rencontre plusieurs fièvres, aussi y a-il plusieurs humeurs qui se corrompent separément, sans estre confuses en vn seul & mesme lieu.

Voilà comme dans vne table quelles sont les especes de fièvre putride, prises de l'espece & de la situation de l'humeur. Finalement la fièvre pestilente gaste & corrompt, tantost les esprits, tantost les humeurs, tantost la substance des parties, non par la simple chaleur, ains par vne malignité pestilente, & de là viennent les differences que nous deduirons cy après. Or il est à propos de reprendre en particulier le discours de ces mesmes choses, autant qu'il est requis pour bien exercer la Medecine.

CHAPITRE III.

De la fièvre ephemere.

LA fièvre ephemere est vne chaleur outre nature, laquelle reside principalement és esprits. Or ces esprits ne sont pas de ceux qui sont naturellement inferez en nous, & que nous auons dit en la Physiologie, estre contenus au dedans des parties solides, & en accomplir la principale substance: ains ils sont communs aux arteres, & procedans du cœur, se respandent par tout le corps. Ces esprits sont la matiere & la cause contenante de l'ephemere, d'où, comme de la base qui la soutient, elle deriue, & se communique à tout le reste du corps, & interrompt les fonctions d'iceluy. Et comme ces esprits sont fort subtils, aussi la fièvre qui reside en iceux, est elle la moindre de toutes, & se dissipe facilement, passant & s'esoulant legerement, sans beaucoup arrester. Elle vient ordinairement de quelques causes euidentes, par la violence

lence & impulsion desquelles, ces esprits subtils, chauds & bouillans, s'enflamment plus promptement qu'aucune des autres choses qui soient dans le corps. C'est pourquoy les humeurs ne pouuans estre enflâmées, que premierement les esprits ne le soient, il est necessaire que toutes les fièvres putrides qui prouiennent de ces causes euidentes, soient précédées de quelque fièvre ephemere.

Les marques de cette fièvre sont, qu'elle ne vient pas peu à peu, après auoir perdu l'appetit des viandes, ny en suite de quelque lascheté & lassitude des membres, sans auoir fatigué, ou de quelque pesant sommeil, & d'un frequent bailllement, ains elle surprend tout à coup, & ne prouient que de la seule violence des causes euidentes. Au commencement de l'accès on ne sent que peu ou point de frisson; & si on en sent, c'est seulement lors que le corps estant remply de mauuaises humeurs, enuoye beaucoup d'exhalaisons chaudes & acres, qui frappent les parties nerveuses, estans rabbatuës, ou à cause que le froid resserre la peau, ou bien d'autant que les pores sont bouschés. Il ne s'ensuit aucuns symptomes facheux, ny douleur vehemente, ny grande agitation du corps, Le poulx est bien viste & frequent, mais pourtant esgal & ordonné, grand & fort, si ce n'est que cette fièvre vint d'ennuy, ou faute de manger, ou de crudité, ou de froid; pareillement dans le poulx, le diastole est plus grand & plus viste que le systole: la respiration est de mesme plus grande & plus viste que l'aspiration. La chaleur est au toucher douce, suauë & vaporeuse, laquelle d'ordinaire en ce mesme iour, ou s'exhale toute couuertement, ou se dissipe & resout en moiteur & sueur naturelle, douce, & sans aucune

odeur mauuaife. L'vrine en fubftance, couleur & fediment ne differe en rien ou fort peu de ce que naturellement elle doit eftre.

Les caufes precedentes & euidentes de la fièvre journaliere font, toutes celles qui introduifent vne intemperie exceffiuement chaude: l'ardeur du Soleil, & de tout ce qui nous enuironne: la laffitude & le travail vehement: les veilles, les ieufnes, la trop forte application & contention de l'efprit, par la cholere, par les foins, par la trifteffe ou par la crainte. Or les plus facheufes de toutes font, la crudité foit qu'elle vienne de gourmandife & pour auoir trop mangé, foit pour auoir beu du vin trop fort, ou pour auoir mangé des fruiçts ou des viandes gaffées: toute retention des euacuations naturelles, comme du ventre, & des vrines; la fupprefion de la fueur ou des vapeurs par l'epaiffeur & conftipation dela peau, à caufe du froid, ou des bains adstringens: les tumeurs & bubôs des emonctoires, & fur tout des aignes, caufez du travail; & les cruelles douleurs qui enflamment le corps, & agitent les humeurs. Ces trois caufes retiennent dans le corps, ou apportent d'ailleurs non feule-ment de mauuaifes qualitez, mais auffi des matieres vicieufes, & en fuitte ameinent fort fouuent de la fièvre avec friffon, & mettent en danger de fièvre putride; au lieu que les autres ne caufent que quelques qualitez, & la feule intemperie. La recherche des caufes antecedentes peut affez faire connoiftre d'ou vient la fièvre journaliere, fans qu'il foit befoin de s'arrefter, en chofe de fi peu d'importance, à faire vne plus ample difcuffion des fignes d'icelle.

Ceux-là font principalement fubieçts à ces fortes de fièvres, qui font d'un temperament chaud

& sec, & qui ont beaucoup de vapeurs acres dans le corps, & desquels la sueur l'urine & les deiections sont grandement puantes. Quand la fièvre iourna- liere dure plus d'un iour, sans diminution, sans sueur, ou si apres la sueur elle demeure en mesme estat, il y a danger qu'elle ne se change ou en syno- che, ou en putride, ce que l'on pourra discerner par les signes de la fièvre dont on se doute, & qui semble plus imminente.

CHAPITRE IV.

De la fièvre synoche.

LA fièvre synoche, que nous appellons conte- nante, est la premiere de toutes celles qui pro- cedent du vice de l'humeur. Ceste sorte de fièvre trauaille sans relasche, n'irrite pas beaucoup, & ne reçoit point d'intermission, que lors qu'elle vient à cesser entierement. Or il y en a de deux sortes, l'une sans putrefaction, & l'autre putride. La matie- re & cause contenant de l'une & de l'autre est con- tenue & placée dans les grands vaisseaux qui sont situez entre les aisselles & les aignes. Le sang en est la matiere, non le simple sang, mais bien celuy qui consiste du meslâge esgal des quatre humeurs. C'est pourquoy la synoche ne saisist que ceux qui sont temperez, ou aucunement chauds & humides, d'aage moyen, de corpulence charnuë & tout a fait quarrée, & qui sont replets, c'est à dire, remplis de beaucoup de sâg, & chargez d'un esgal excez d'hu- meurs: & ceux qui sont d'autre nature & constitu- tiõ n'y sont pas subiects. Et c'est la cause pourquoy la synoche ne se rencontre gueres toute seule.

La synoche, qui ne procede point de putrefaction, est donc vne certaine ebullition & simple inflammation, qu'on appelle Phlogose. Or comme la masse du sang qui sert de matiere à cette fièvre, est par tout de mesme sorte, & en tout semblable à soy mesme, aussi l'inflammation dont elle est affectée, est elle d'une seule & mesme sorte, & ne souffre presque qu'un accez depuis le commencement iusques à la fin. Ce qui peut arriuer en trois façons: car tantost la chaleur persiste de mesme sorte pendant tout le cours de la fièvre, & autant qu'elle s'esprend de nouveau, autant se dissipe elle; & cette cy est la synoche homotone. Quelquesfois l'inflammation recente est plus grande que la dissipation; & lors la chaleur se fortifie en augmentant, & la synoche deuiet epacmaistique, c'est à dire, croissante. D'autresfois il se dissipe plus de chaleur, qu'il ne s'en esprend de nouveau, & lors la chaleur ayant esté du commencement tres-forte, va diminuant peu à peu, iusques à cesser du tout, & la synoche deuiet paracmaistique. Toute synoche qui ne procede point de putrefaction, vient des mesmes causes que la fièvre journaliere, laquelle. n'estans bien fortes, ne causent qu'une fièvre journaliere, mais estans vehementes, elles causent la synoche.

Entre les causes, celles-cy peuuent beaucoup, sçauoir est, vne grande astriction & constipation de la peau, & la redondance du sang, prouenant ou de suppression de l'éuacution qui a coustume de se faire par les hemorroïdes, par les mois, ou par les narines, ou bien de l'usage excessif des viandes de bon suc, qui sont chaudes, & de grande nourriture. C'est pourquoy celuy qui ayant la temperature bonne, meine vne vie desreglée, est

ordinairement sujet à cette espee de fièvre, comme encor celuy qui se portant bien, se remplist neantmoins de beaucoup de vin, & se gorge de chair; car ces personnes engendrent quantité de sang chaud, lequel ne se corrompt pas facilement. Par ces causes donc les esprits sont premiere-ment enflammez, puis le sang en deuient peu à peu eschauffé; car l'espaisseur, ou astriction de la peau, retient les vapeurs subtiles & acres de ces esprits, & la chaleur mesme qui est outre la nature, & les empesche de s'exhaler, en sorte que venans à se redoubler, elles enflamment le sang, & font vne synoche simple.

Les marques de cette fièvre sont les mesmes que de l'ephemere, mais aucunement plus manifestes. Neantmoins tout le corps, & principalemēt le visage, en deuient proprement rouges & enflammez: on sent par tous les membres vne lassitude qui les estend & fait roidir; le corps est grādemēt agité; les veines s'enflent & bandent beaucoup; les temples battent fort; la teste fait mal & s'appesantit; l'on est souuent oppressé d'un grād & profond sommeil; l'on respire avec peine; le poulx se fait grand, frequent, & vifte; la peau n'est point rude ny aspre; ains molle & moite avec vne chaleur benigne.

Nous auons souuent remarqué vn autre genre de fièvre, approchant de cettui cy, procedant d'une trop grande agitation de la bile & des humeurs chaudes. Car quand les causes euidentes attaquent avec trop de vehemence vn corps bilieux, quoy que sain, elles n'échauffent pas seulement les esprits, ains irritent quant & quant les humeurs acres, dont l'ardeur excite la fièvre, sans qu'il y ait aucune putrefaction. Cette fièvre n'est

outrepasse les bornes del'ephemere, & neantmoins ce n'est pas la synoche dont ie viens de parler; parce que celle dont ie traicte en ce lieu, est vne ebullition du sang, & ceste cy est vne esmotion de la bile, sans aucune corruption: celle-là n'arriue que dans vn corps bien temperé & de bonne constitution, & celle-cy dans vn corps chaud & sec, & tout à fait bilieux. Les causes euidentes de ceste cy ne sont autres que celles qui excitent l'ephemere; & sur les douleurs cruelles, comme sont celles d'un nephritique, ou d'une femme qui est en travail d'enfant; l'exercice & fatigue excessiue; l'ardeur du Soleil, le bain; la fâcherie de l'esprit, & les autres qui sont de pareille force. En ceste sorte de fièvre il ne se remarque aucun signe de putrefaction, ny par le pouls, ny par les veines; neantmoins la bouche deuiant amere, l'on perd l'appetit, l'on est tourmenté de soif, l'on est affligé de douleur de teste, & inquieté de veilles; la peau deuiant seiche, avec vne chaleur acre. La cause euidente estant ostée, peu de iours apres la fièvre avec ses symptomes s'appaise & cesse de soy-mesme, par le seul repos & sans aucun aide de l'art. Lors que la fièvre journaliere passe plus d'un iour ou deux, sans qu'il paroisse aucun indice de corruption, il y a subiet de soupçonner que ce ne soit l'une des deux susdites.

CHAPITRE V.

De la Synoche putride.

LA fièvre Synoche putride est la continuë qui
prouient de la pourriture du sang. Les Mai-
stres de l'art sont en grande controuersie touchant
l'origine de ceste fièvre, sçauoir mon si le sang se
peut pourrir; & si la fièvre qui s'en ensuit, est Sy-
noche ou fièvre bilieuse. Au reste leur difference
se peut terminer par ceste obseruation. Le sang se
pourrist en deux façons, l'une generale lors que par
la violence de la chaleur outre nature les substan-
ces dissemblables, qui sont dans la masse du sang,
viennent à se separer les vnes des autres, & la bile
jaune & subtile se desmelle d'auec la noire qui est
terrestre & grossiere. Or cét empiement est plu-
tost corruption que putrefaction, comme nous l'a-
uons ailleurs expliqué plus au long. Et quand le
sang se corromp en ceste sorte, & que cela cause la
fièvre, ce n'est pas synoche, mais fièvre bilieuse,
ou melancholique. L'autre façon en laquelle le
sang se pourrist, est lors que, sans aucune sepa-
ration ou diuision des substances, toute la masse
du sang vient à se corrompre avec puanteur ou
mauuaise odeur. Car comme le sang qui sortant
des veines se iette outre nature dans la poitrine,
dans l'estomach, dans les boyaux, ou dans quel-
que autre capacité, vient à se corrompre & tour-
ner presque en vne substance veneneuse; & s'es-
coulant de la sur les muscles, forme vne tumeur
outre nature & vn phlegmon, puis se putrefie, &
enfin suppure: de mesme il ne faut point douter

qu'il ne se corrompe dans les grands vaisseaux par des causes capables de cela, comme quand l'air est corrompu & pestilent. Voire mesme lors que la substance du foye est affectée de quelque phlegmon: toute la masse du sang deuiant non seulement corrompuë, mais aussi quelquesfois purulente. De plus, tous aduoient que le sang reçoit quelquesfois vn si grand changement, qu'il ne peut estre remis en son estat naturel, ny reprendre de rechef la premiere bonté de ses suc, par aucune concoction de la nature. Finalement celuy que l'on tire pendant la fiéure, se trouue souuent non seulement puant, & de fâcheuse odeur, ains mesmes tellement pourry, qu'il ne se peut prendre ny coaguler, à cause que toutes les fibres en sont pourries. Quand donc le sang sera corrompu de cette sorte, il se fera vne fiéure synoche putride,

Cette fiéure, aussi bien que la synoche simple, n'est presque qu'un seul accez, & ne s'adoucit ou relasche, que lors qu'elle cesse du tout. Cette fiéure est pareillement de trois sortes: car la putrefaction persistant en mesme estat pendant tout le cours, elle est homotone: s'il se fait plus de putrefaction qu'il ne s'en dissipe, elle est epacmaistique & poracmaistique, s'il s'en dissipe danantage qu'il ne s'en pourrit. Elle ne s'épréd aussi que dans vn corps bien temperé, & de bonne constitution, lequel soit remply de sang abundant & louable.

Au reste, les causes en sont plus fortes que celles de la simple, & apportent non seulement de l'inflammation, mais aussi de la putrefaction. La plus efficace de toutes, c'est, non la simple constipation du cuir, ains vne vraye obstruction formée par quantité d'humeurs grossieres & gluantes, la-

quelle ne bousche pas seulement les pores de la peau, mais aussi les petites veines du foye, & des autres parties du corps, Combien donc que le corps fust entierement sain, & toutes les humeurs sinceres & selon la nature, parce neantmoins que l'obstruction estant grande, empesche la transpiration, & que la fraischeur du dehors ne peut entrer au dedans, de mesme que les excremens subtils, acres, & fuligineux, ne peuvent sortir dehors, de là vient que la chaleur naturelle est suffoquée, & faut de necessité que tout ce qui est de chaud & humide dans le corps, vienne à se pourrir. Quelquesfois aussi cette fièvre s'éprend au rencontre de semblables choses pourries.

Les marques en sont de mesme que celles de la simple synoche, mais plus insignes & plus évidentes. De plus, en cette fièvre la chaleur se sent plus forte au toucher: le poulx est non seulement grand, vehement, viste, & frequent; ains encor inégal, & desordonné: l'vrine épaisse, rouge, trouble, & sans hypostase.

CHAPITRE VI.

En quelle façon les humeurs se pourrissent dans les grands vaisseaux, & qui sont celles qui causent la fièvre continuë.

LEs corps chauds & humides se pourrissent facilement, & ce d'ordinaire lors que leur chaleur vient à se diminuer par quelque cause que ce soit:

d'autant que l'humidité se trouuant alors la plus forte , & n'estant point rabbatuë par la chaleur, se separe du meſlange de la substance terrestre, avec vne odeur fâcheuse & puante. Et c'eſt ainſi que les humeurs de noſtre corps ſe pourriſſent facilement , & ſe tournent en vne ſubſtance eſtrangere: tantost dans les veines, ou en toutes, ou dans les plus groſſes: tantost dans vne certaine particule , & ce quelquesfois avec phlegmon, quelquesfois ſans phlegmon. La fièvre continuë s'éprend dans les grandes veines & arteres , & y perſeuerer, tant que les humeurs qui l'engendrent ſoient, ou conſommées & diſſipées par la chaleur, ou reſrenées en quelque autre façon. Car la pourriture qui eſt dans les veines, ne ſe corrige pas facilement, à cauſe qu'eſtant reſſerrée, la denſité du lieu l'empêche de prendre l'air , & ſe meſlant avec les autres humeurs, elle infecte celles qui luy ſont plus voiſines, puis delà paſſe & s'eſcoule dans les autres vaiſſeaux, & ne ceſſe point qu'elle n'ait rauagé tout ce qui ſe rencôtre de vicieux dans les veines.

Or il y a deux fortes de putrefaction. L'une ſe forme eſgalement dans toutes les veines , ou du moins, dans les plus grandes : l'autre, commençant en quelqu'une d'icelles, va peu à peu s'eſcoulant & paſſant dans les autres par celles qui luy ſont plus proches. Celle qui ſe forme en toutes les veines , quoy qu'elle infecte le ſang qui eſt en icelles, elle n'en occupe toutesfois pas également toutes les parties. Car le ſang n'eſtant pas tout à fait ſimple , ains compoſé du meſlange de pluſieurs humeurs , & accompagné de beaucoup de ſeroſitez , la pourriture ſe met premierement en la portion qui en eſt plus ſuſceptible, puis en attaque vne autre meſlée & broüil-

lée avec celle où elle est desia, laquelle n'est pourtant pas si vicieuse : & se glissant de la sorte peu à peu avec la chaleur outre nature, elle va s'augmentant & fortifiant, sans s'arrester iusques à ce qu'elle ait gâté & perdu toutes les parties du sang qui se trouuent disposées à la putrefaction. Cela se fait tout de mesme qu'en quelque grand phlegmon, dans le sang qui est amassé, ne se pourrit pas tout à coup, mais les parties d'iceluy se putrescent & suppurent l'une après l'autre, l'une plus tost, l'autre plus tard, & ainsi la putrefaction s'augmentant peu à peu, deuient en fin tres-grande : de mesme que quand nous faisons du feu, la paille plus seiche & plus menuë, brusle la premiere, puis les petites branche, & finalement le gros bois, chacun en son rang. Après que tout ce qui estoit susceptible de pourriture est consommé, la putrefaction & la chaleur febrile viennent à cesser; toutesfois la meilleure portion du sang demeure dans les vaisseaux, laquelle estât moins susceptible de pourriture, n'en a point esté entachée, & bien qu'elle fust meslée avec celle qui estoit corrompue, elle n'a pourtant point esté interessée, ains seulement eschauffée par la contagion d'icelle ; & parce la putrefaction estant esteinte & appaisée, cette portion retourne en sa premiere pureté. Et pour lors, les vrines paroissent pures, & entierement loüables, au lieu qu'elles estoient épaisses, troubles, & sans hypostase. Il s'ensuit d'oc que le sang n'est ny tout, ny totalement gâté, par cette putrefaction, si ce n'est qu'elle fust extrêmement pernicieuse. Car la fièvre estant passée, les veines ne demeurent pas vuides, ains on remarque qu'il y reste encore quelque chose qui est utile & capable d'entretenir le corps, qui neantmoins estoit auparauant meslée de pourriture. Le

mesme arriueroit, bien qu'il ne se fust de nouveau engendré aucun sang, & qu'on n'eust prins aucune nourriture pendant toute la maladie : ce qu'Hippocrate ordonne de faire dans les maladies qui sont extrêmement aiguës. Le sang se pourrit à peu près de cette façon en la synoché putride, & presque la mesme chose arriue dans la fièvre chaude, dans la tierce continuë, & dans les autres qui ne sont pas intermittentes. Parce qu'en icelles toute la masse du sang ne se corrompt pas, ny pareillement toutes les humeurs qui la composent (car autrement toutes les espèces de fièvres continuës seroient confonduës, & sans distinction) mais seulement celle qui est la plus viciëuse de toutes. Et quelle est la nature de cette humeur, tel doit consequemment estre le genre de fièvre qui en resulte; si c'est la bile jaune qui se mesle dans le sang, la fièvre qui en proüient est tierce continuë; si c'est la pituite, la fièvre est quotidienne; & si la corruption est en la melancholie, la fièvre doit estre quarte.

Il y a vne autre sorte de pourriture, qui ne se forme pas également dans toutes les veines, ains seulement en quelque vne d'icelles (où peut estre elle aura prins son commencement) d'où par continuation elle passe dans les autres, & infecte le sang & les humeurs qu'elles contiennent. Cela arriue lors que la cause corrompante est plus proche d'une veine que de l'autre, ou quand le sang n'est pas également semblable en toutes les veines; car il commence premierement à se pourrir en celle, en laquelle il se retrouue plus susceptible de pourriture: puis si on n'y met ordre, en celles qui sont contiguës, & cette pourriture ne cesse de s'étendre avec la fièvre, qu'elle n'ait peu à peu parcouru toutes les veines, & rauagé tout ce qui s'y

rencontre disposé à la putrefaction. La diuersité & le changement se reconnoissant souuent par l'ouverture de la veine ; car quelquesfois le sang qui sort le premier est pur & sincere ; puis le corrompu sort incontinent après : d'autresfois il arriue tout le contraire, & quelquesfois celuy qui sort du nez est tres pur, & celuy qui sort par l'incision de la veine du bras est corrompu : ce qui est mesme confirmé par l'autorité d'Hippocrate. De là vient la diuersité des symptomes, aux vns pendant la fiéure les lombes s'aggraüent ou s'enflamment : aux autres les parties precordiales sont tourmentées de soif & d'ardeur ; les autres ont des defaillances de cœur, ou de tres grandes difficultez de respirer : les autres sont trauaillez de douleurs de teste, ou de veilles, ou tombent en delire, selon la nature de la partie qui est attaquée de corruptiō. De là viennent aussi les fiéures desordonnées, lors que la corruption quittant l'humeur où elle estoit auparavant, vient à s'emparer de quelqu'autre. De là vient encor le meslange des fiéures, quand diuerses humeurs sont attaquées tout à la fois. De là vient pareillement que les prédictions sont trompeuses. quand la premiere humeur estant presque dōptée & vaincüe, il commence de s'en pourrir vn autre en quelque autre endroit, laquelle rend derechef les urines crües, après celles qui estoient cuites.

La cause efficiente de la putrefaction, est de deux sortes, l'vne propre & interne, l'autre externe. Les humeurs du corps se pourrissent par vne cause propre & interne, lors qu'elles ont en elles mesmes quelque vice, qui ne se peut corriger par aucun benefice de nature, & ainsi elles se corrompent peu à peu, & par succession de temps, & ce d'elles mesmes, sans y estre excitées par chose au-

cune de dehors. Ce genre de vice se contracte d'ordinaire par les alimens corrompus, & desquels la substance est vicieuse, comme sont les bleds, les legumes, les œufs, les poissons, les chairs, & tout ce qui est aucunement corrompus de vieillesse, ou par nonchalance de l'auoir bien conserué. Il se contracte aussi par les alimens qui ne sont point gastez, mais qui viennent facilement à se corrompre, ou à se pourrir; comme le laiët, les fruiëts qui ne sont pas de garde, & tous ceux qui ont vn suc vicieux & estranger: dautant que le sang qui s'engendre de ces choses, quoy qu'il reçoie diuers changemens par la concoëtion, neantmoins il retient toujours quelque chose de sa premiere condition, & de ce dont il a prins son origine. Il se contracte encor par les viandes prinſes hors du temps & sans ordre conuenable, comme quand on recommence à manger auant qu'auoir acheué la digestion, ou quand les choses plus dures & plus difficiles à digerer sont prinſes auant, qui sont plus legeres, & de substance plus debile. Finalement les humeurs se corrompent & putrescent, par la mauuaise affection des parties interieures, comme du ventricule, du foye, & de tous les visceres; car ceste affection s'imprime és alimens par la concoëtion, lesquels quoy que d'eux mesmes tres purs, viennent par cemoien à estre infectz de ce mal.

Quant à la cause externe de la putrefaction elle est double, sçauoir est, l'obstruction & le rencontre des choses putrides. L'obstruction prouenante d'humeurs grossieres & visqueuses estant telle & si grande qu'elle empesche la transpiration, fait pourrir les humeurs, que que bonnes de foy, parce que lors elles ne peuuent estre ny esuentées, ny rafraichies. L'obstruction qui resulte de la plenitude des

vaisseaux a la mesme vertu & opere le mesme effect : Mais la repletion qui surmonte les forces, n'est cause de la putrefaction des humeurs, sinon d'autant qu'en ce cas elles ne peuvent estre digerées, ny dirigées par les forces, qui sont lors trop debiles. Le rencontre des choses putrides corromp premierement les esprits, & en suite les humeurs mesmes, comme la respiration d'un mauuais air, d'une exhalaison & d'une vapeur putride ; comme encor de coucher, avec un galleux, un malade de fièvre putride, ou quelque verolé.

Ily en a plusieurs qui soustiennent que la seule obstruction qui empesche la transpiration des humeurs, est la cause de toute putrefaction, & que sans icelle rien ne peut se corrompre dans nostre corps : & que l'humeur d'où la chaleur outre nature & la mauuaise vapeur, peuuent toutes facilement sortir, & qui est aisément esuentée, n'est iamais entachée de pourriture. Mais contre cela : c'est chose euidente & manifeste, que souuent les mauuaises viandes se corrompent dans l'estomach, ou es autres parties, & que par un temps de peste les humeurs deuiennent corrompuës & par la respiration, & par transpiration, quoy que le corps soit bien ouuert & perspirable, & que tous pores soient desbouschez & donnent un libre passage à la fraischeur de l'air. Car il y a beaucoup d'autres causes lesquelles sans aucune obstruction peuuent diminuer la substance de l'humide radical & de la chaleur naturelle, & introduire une chaleur estrangere, qui soit cause efficiente de la putrefaction.

CHAPITRE VII.

*De la fièvre continuë, qu'on appelle
concluse, & des differences
d'icelle.*

LA matiere qui sert de subiect à la fièvre continuë est enclose dans les grands vaisseaux, où venant à se pourrir elle enuoye continuellement vers le cœur, ou sa mesme putrefaction, ou du moins vne vapeur putride, qui cause vne fièvre putride continuë, qu'on appelle concluse. Mais quand elle se trouue renfermée ou dans l'aiguë, ou dans quelque autre lieu fort esloigné, alors elle n'enuoye au cœur ny sa putrefaction ny sa vapeur, ains seulement vne chaleur qui est portée par la continuité des parties, d'où procede vne fièvre ou iournaliere, ou symptomatique. Or ceste matiere enclose dās les veines c'est le sang, dans lequel (pourueu qu'il consiste d'un esgal meslange des humeurs) reside la synoche: mais s'il vient à dechoir de ceste mediocrité, & qu'il soit ou bilieux, ou pituiteux, ou melancholique, la fièvre qui s'y espend est putride continuë. Comme donc la synoche ne s'engendre ordinairement que dans vne nature temperée, laquelle abonde en quantité de sang mediocre, & dans vn corps de corpulence charnuë: aussi la putride continuë ne saisist que ceux qui n'ayans pas ceste mediocrité, sont bilieux, pituiteux ou melancholiques.

Or ie desire qu'on se soutienne icy de ce que nous auons plus au long demonstté dans la Physiologie,

siologie, sçauoir est, qu'il n'y a rien dans les veines que le sang avec les serositez, & que tout ce qui se peut prendre & coaguler apres en estre fort, est compris sous le nom de sang : que là il n'y a point d'humeurs selon la nature, qui soient synceres & superflus, ains que toutes les quatre, dont la masse du sang est composée, sont veritablement des suc dont nous sommes nourris, & que la bile qui se trouue en ceste masse n'est autre que la portion plus subtile & chaude du sang, laquelle aussi nous appellons sang bilieux ; ny la pituite, autre chose que la portion plus cruë du mesme sang ; ny la melancholie, que celle qui est plus terrestre, & qu'on nomme sang melancholique. En ceux donc qui n'ont pas vn meslange esgal desdits suc, le sang venant à se pourrir egallement, il se fait vne fièvre continuë, mais en ceux qui ont le sang fort bilieux, la fièvre deuient tierce continuë ; en ceux dont le sang participe dauantage de la pituite que des autres humeurs, la fièvre est quotidienne continuë ; & quand le sang tient trop de la melancholie, la fièvre est quarte continuë.

Or le genre de toutes les fièvres continuës est double, l'vn de celles qui perseuerent depuis le commencement iusques à la fin, sans aucun ordre arresté d'augmentation ou diminution ; telle est la synoche putride, & celle qu'on appelle Causus : L'autre genre est de celles qui ne discontinuans iamais, se diminuent & s'augmentent, ou tous les iours comme font les quotidiennes continues, ou de trois en trois iours comme les tierces continues, ou bien le quatriesme iour comme les quartes continues. Celles qui se rengregent sans garder aucun ordre, ont leur matiere dans les veines qui sont plus proches du cœur, & pource la corruption d'icelles

attaque le cœur continuellement d'une vehemence pareille. Quant aux autres, leur cause est dans quelques veines aucunement esloignées, d'où la corruption ne peut assiduellement passer au cœur d'une esgale impetuosité. Or l'accez de ces fièvres ne commence point par tremblement, ou par horreur, ou par frisson, comme fait celuy des fièvres intermittentes, ny se resoult par la sueur, ny se termine, en apyrexie.

Voila quelles sont toutes les fièvres cōtenuës, que j'ay nommées concluses. Parce que la matiere d'icelles estant renfermée & se pourrissant dans les veines, ne peut estre entierement ostée avant la solution parfaite, quoy qu'il s'en dissipe insensiblement quelque chose par les pores du cuir. La tierce est la plus frequente de toutes les continues, la quotidie arriue moins souvent, & la quarte continuë est la plus rare: la continue desordonnée est encor plus frequente que les deux dernieres susdites: car tout sang est ou fort pituiteux, ou grandement melancholique, d'autant que celuy qui est froid a beaucoup de peine à se pourrir, & la fièvre qui en resulte n'est pas vehemente, mais seulement lente ou languide, laquelle ordinairement devient desordonnée.

La fièvre putride se discerne dès le commencement d'auec l'ephemere par ces marques icy. Il precede vne certaine inegalité & neutre constitution du corps, d'où s'ensuit de la repletion, ou cacochymie, laquelle s'amasse peu à peu cōme pour seruir de matiere à la fièvre future. De là vient la lassitude du corps sans auoir trauaillé; le mouvement pesant & paresseux, le sommeil turbulent, les veilles immoderées, l'enfleure des hypochondres, la difficulté de respirer, la repletion des veines, la

faſcheuſe & quelquesfois battante douleur de la teſte & des temples. En ſuite de cela l'amas des excremens ſ'augmente outre l'ordinaire & la portée de la nature ; comme la ſueur inaccouſtumée, l'abondance du cracher & du moucher, la nausée ou le vomiffement ; la deiection du ventre, où l'vrine abondante & de fort mauuaife odeur.

Voyla ce qui ſe rencontre d'ordinaire en la conſtitution neutre qui precede la fièvre putride. Mais quand la fièvre eſt aétuellement eſprinſe, on remarque ſi elle eſt putride en ce qu'elle prouient de la cōſtitution neutre du corps, & non des ſeules cauſes euidentes. Car ou elle ſe fait de ſoy-mefme par la diſpoſition du corps, ou elle vient des cauſes euidentes leſquelles excitent & eſmeuent le corps qui eſt deſia diſpoſé. La chaleur de ceſte fièvre n'eſt ny douce, ny benigne; mais acre, mordante & qui frappe rudement le ſentiment de celuy qui la touche, non pas ſur le commencement de l'accez, mais ou en l'accroiffement, ou quand elle eſt en eſtat, & ce principalement ſi l'on tient long-temps la main ſur le corps du malade. Le poulx & la reſpiration ont de l'ineſgalité ; car le mouuement de ſyſtole eſt viſte, & celuy de diaſtole eſt tardif, ſur tout lors que la chaleur ſ'augmente ; car les eſprits & les humeurs eſtans oppreſſez de quantité d'excremens bruſlez & fuligineux, par l'inflammation de la matiere pourrie, la nature ſe haſte de les pouſſer hors en reſſerrant promptement l'artere par le mouuement de ſyſtole : & n'eſt point ſi preſſée d'attirer du rafraiſchiſſement par le mouuement de diaſtole. Il ſe retrouue auſſi de l'inégalité entre pluſieurs battemens du poulx: car tantost le poulx eſt viſte, tantost tardif, & ce par l'inégalité & le diuers mouuement de la putrefaction : & derechef, il eſt

tantost fort, tantost languide, quelquesfois avec oppression de la nature, quelquesfois avec allègement. Le poulx est aussi sur le commencement viste & petit tout ensemble, & neantmoins dans la vigueur il devient viste & grand, le raffraichissement estant lors plus necessaire. L'urine est tout à fait crüe, ou obscurément cuite, & sur tout au commencement; car elle se trouue espaisse, rouge & trouble, & en icelle rien ne se separe: quelquesfois aussi dans vne obstruction vehemente l'urine est à la verité subtile, mais rouge & trouble: souuent elle est acre & mordicante, & souuent elle expire vne vapeur fascheuse & puante. L'haleine ou la sueur sentent plus mal que de coustume. Si apres vingt & quatre heures passées, la fièvre ne cesse pas tout à fait, on peut asseurement croire qu'elle prouient de la corruption des humeurs, si cen'est qu'il y eust quelque soupçon de fièvre hectique, ce qui arriue fort rarement.

Finalement vous discernerez la continuë d'avec l'intermittente par les marques qui suivent. La chaleur saisist l'homme tout à coup, sans auoir auparavant aucun tremblement ou frisson; ou si l'on ressent quelque tremblement horreur, ou frisson, comme il arriue souuent, c'est signe qu'il y a quantité d'humeur mauuaise autour des parties precordiales, qui excite de l'horreur iusques à tant que la chaleur l'ait toute enflammée. L'inegalité du poulx est plus grande, que ne semble requérir la vehemence de la chaleur: la fièvre dure plus de vingt & quatre heures, apres lesquelles elle ne va pas cessant peu à peu, ou par vne sueur manifeste comme fait l'intermittente; ains elle perseueretant qu'elle vienne à s'esteindre tout à fait.

Or en la fièvre continuë qu'on appelle *Causus*,

les communes marques de putrefaction sont tres manifestes : l'ardeur est perpetuelle & constante, presque esgale, & sans manifeste augmentation, comme par certain mouuement de tierce : la chaleur des parties precordiales est vehemente : la respiration difficile & presque estouffée ; le corps est en continuelle inquietude & agitation : les veilles sont frequentes ; l'on tombe souuent en delire ; l'on est trauaillé de soif inextinguible ; la langue est chargée, noire, rude, & ordinairement amere. Que si la malignité est tellement grande, que les parties interieures & les visceres mesmes semblent estre tout en feu, & qu'à mesme temps les extremittez demeurent froides, lors on appelle ceste fièvre d'un nom particulier *lipyrie*, laquelle est la plus mauuaise de toutes les fièvres ardentes, & en icelle par la vehemence de l'ardeur qui est au dedans, la chaleur du reste du corps est attirée, comme par vne ventouse.

Quant à la tierce continuë, la remission en est plus manifeste, comme aussi le rengregement, lequel se fait sans tremblement ny frisson, & se mitige sans qu'il sorte aucune sueur : les autres marques sont telles que dans le causus, mais aucunement moindres.

Quant la continuë quotidienne, ou la quarte continuë arriuent, on les discerne par l'ordre & la reuolution de leur rengregement. L'une & l'autre s'augmentent sans horreur ny frisson, & se rabbat sans sueur, la premiere tous les iours, & la seconde de quatre iours en quatre iours. Elles donnent bien des marques de putrefaction, mais fort obscures, & le poulx ne bat point lors avec telle viftesse, frequence, ou inegalité comme és autres : l'vrine pareillement n'est pas si enflammée ou rouge, com-

bien que d'adventure elle fust espaiſſe, & les ſymptomes ne ſont pas ſi falcheux. De plus la nature, l'habitude & la façon de viure antecédée du malade, monſtrent quel doit eſtre le ſang qui eſt dans les veines, & quelle eſt la fièvre qui en procede.

Or la fièvre continuë qui n'eſt pas tierce, ſe trouue ordinairement deſordonnée, en ſorte qu'elle ſe rengrege deux ou trois fois par iour, ou bien vne fois en deux iours, ou point du tout. Dautant qu'il arriue rarement que dans la maſſe du ſang, il n'y ait qu'une ſeule humeur pourrie. C'eſt pourquoy les ſignes & ſymptomes des fièvres putrides ſe rencontrent fort diuers. Au reſte l'on peut colliger par les ſignes qui ſont propres à chacune des fièvres continuës, de quel genre la fièvre deſordonnée participe dauantage. Voyla quant aux fièvres continuës principales ou conclues.

CHAPITRE VIII.

De la fièvre ſyptomatique.

Toute fièvre ſyptomatique eſt du genre des continuës, & iamais ne s'en eſt veu d'intermittente. La matiere prochaine & la cauſe contenant d'icelle n'eſt pas dans les grands vaiſſeaux, mais dans quelqu'une des parties, d'où il ſ'écoule quelque choſe de pourry, ou ſ'eſleue quelque vapeur putride, qui attaque le cœur.

Il y a pluſieurs genres de cette fièvre: l'un deſquels vient en ſuite, & procede des inflammations, & ce genre contient ſous ſoy pluſieurs eſpeces. Car quand l'inflammation eſt, ou externe, ou eſſoignée, il ne ſe fait qu'une fièvre ephemere, parce qu'il n'y a que la ſeule chaleur qui ſe glisse

au cœur, par la continuité des parties. Mais s'il y a de l'erysipele, & quelque phlegmon és parties interieures, & principalement és parties nobles & voisines du cœur, alors le sang, ou la bile, venant à se corrompre passent de là vers le cœur, ou du moins enuoyent vers iceluy quelque vapeur mauuaise & corrompuë, laquelle se respendant par les arteres, cause vne fièvre putride. Et c'est ainsi que se fait la fièvre phlegmoneuse, qui vient de phrenesie, de squinancie, de pulmonie, de phthisie, de pleuresie, d'hepatique, de splenitique & de nephritique; & que la fièvre typhode vient d'erysipele; & chacune d'icelles est d'autant plus fascheuse, que la partie affectée est plus noble, & plus voisine du cœur. Quelquesfois l'inflammation qui excite ceste fièvre, est du commencement comme enue-loppée & couuerte, au lieu que la fièvre symptomatique qui en prouient, est fort manifeste; laquelle est par ce moyen discernée d'avec la continuë principale. Toutes les deux sont fort aiguës, & donnent des marques de putrefaction, mais la symptomatique ne s'augmente par aucunes periodes reglées, les vrines ne portent aucun indice de putrefaction, si ce n'est que peut estre il sortit quelque pourriture de la partie affectée, qui se iettast dans les veines; & si du commencement elles ne donnent signe aucun de la partie qui est enflammée, elles en donnent neantmoins incontinent apres. Rarement finist elle au septiesme iour, ou au quatorziesme, ou és autres iours critiques. Tout le contraire apparoißt en la fièvre continuë principale.

L'autre genre de fièvre symptomatique est beaucoup plus obſcur, & comprend sous soy ceste espece de fièvre, que j'ay nommée fièvre lente. Elle ne procede point de l'in-

flammation d'aucun viscere ou d'aucune partie, mais elle vient d'une obstruction & putrefaction couverte, laquelle adhère & est opiniastrement attachée à quelque viscere, de sorte que la substance même de ce viscere en est souvent entachée. Quelquesfois il se glisse dans les veines une portion de ceste pourriture, laquelle se mesle parmy le sang. Ceste fièvre porte les marques de la symptomatique, qu'on appelle ou phlegmoneuse ou typhode. Or on la distingue en ce qu'elle est la plus benigne de toutes les putrides : le malade n'est travaillé d'aucun symptome fâcheux, & le plus souvent il ne croit pas estre malade. Il paroist, neantmoins quelquesfois des marques de putrefaction dans les urines : le poulx est frequent, viste & inégal, non toutesfois grand, ou vehement : les forces se debilitent & se perdent, en sorte que le malade ne peut même pas marcher. La masse du corps va fondant peu à peu, bien qu'on ne laisse pas de prendre des alimens. Ceste fièvre est pareillement fort longue, & dure plus long-temps qu'aucune des autres continues, de façon qu'elle passe le vingtiesme & quelquesfois le quarantiesme jour.

Quand on se doute de cette fièvre, il en faut chercher l'origine, & parcourir de l'esprit toutes les parties du corps, iusques à ce que les signes fassent reconnoistre en quel endroit est la source du mal. Souvent la corruption à demy maligne de quelque humeur que ce soit, amassée dans l'estomach, ou au foye, quelquesfois en la ratte, ou au mesenteré, & quelquesfois dans les poulmons, excite ceste fièvre là. Il faut donc soigneusement prendre garde, s'il n'y a point quelque apparence de tumeur és hypochondres & en l'hypogastre. Souventesfois aussi dans la cachexie, ou és pasles couleurs

des filles, ceste fièvre prouient d'une legere corruption de la pituite sereuse qui est espandue par tout le corps. Et ceste fièvre se doit nommer lente simple. L'autre est lente plus dangereuse, laquelle procede non seulement d'une humeur adherente à quelque viscere, mais aussi de la corruption & putrefaction de cemesme viscere auquel elle se retrouve.

La corruption & simple putrefaction du foye, du poulmon, du cerueau & de la ratte, & quelques-fois aussi des reins, & des parties plus esloignées, bien qu'elle ne soit accompagnée d'aucune humeur putride, attaquant neantmoins sans cesse le cœur par vne fascheuse expiration, elle excite vne fièvre continuë, ne plus ne moins que feroit quelque humeur putride, laquelle fièvre continuë est symptomatique & tout à fait lente, que plusieurs ont appellée hectique, abusez en cela par l'affinité de ces choses. Ceste fièvre se reconnoist par les mesmes signes, que l'autre dont nous venons de parler. Or on la discerne en ce qu'elle se forme peu à peu, & persiste long-temps : elle vient d'ordinaire en suite de quelques autres maladies : elle ne diminue que fort peu ou point du tout par la purgation, & ne cede à aucuns remedes, ains le plus souuent elles'irrite par l'usage d'iceux : elle offense & debilitte grandement les forces, & à la moindre occasion fait tomber en syncope ; elle attenuë & mine la personne peu à peu, & ce bien souuent sans qu'on s'en apperçoie. C'est ce genre de fièvre qui accompagne la phthisie ; car ce n'est pas fièvre hectique, mais putride causée par la putrefaction de la substance des poulmons ; car il n'est pas necessaire que toute fièvre putride soit residente en quelque humeur.

Il semble qu'apres ce que dessus se doiue icy

terminer le discours des fièvres continuës, pour traicter en suite de celles qui sont intermittentes,

CHAPITRE IX.

Que la cause contenant & prochaine des fièvres intermittentes n'est point en l'habitude du corps.

C'Est vne vieille opinion depuis long-temps establie, que l'humeur qui sert de matiere contenant & prochaine à la fièvre intermittente, se corrompt & putrefie hors des veines & dans la seule habitude du corps: qu'au commencement de l'accez ceste humeur sort des grandes veines, dans lesquelles elle estoit meslée parmy le sang, & s'escoulant par les petites, passe de là dans l'habitude du corps. Que par cette impetuosité les parties supérieures du corps, qui sont d'un sentiment plus delicat, viennent à estre saisies de frisson & de tremblement au rencontre de l'humeur qui les attaque. Qu'en suite cette humeur se va eschauffant peu à peu, s'enflamme & se putrefie: & qu'estant finalement attenuée par la force de la chaleur, elle se dissipe toute en sueur: & que de ceste façon l'accez se termine, pour retourner de mesme vne autrefois. Ceux qui ont en ceste opinion taschans par là de descouvrir avec quelque vray-semblance la cause du frisson & du tremblement embroüillent & obscurcissent la vraye origine de la fièvre intermittente.

Il semble premierement que par ceste opinion ces gens establisent vne tres-grande absurdité, qui

est que presque toutes les humeurs qui causent des maladies soient contenues dans les veines, & que de là elles prennent toute leur premiere origine, comme s'il n'y en auoit aucune qui peüst s'amasser & se pourrir, ny és visceres, ny au mesentere, ny en ceste partie que nous appellons pancreas. De plus ils estiment qu'à la premiere attaque de l'accez, la matiere nuisible est toute expulsée hors des veines dans l'habitude du corps, ce qui est contre toute raison : car comment est-ce que l'humeur peccante qui est meslée parmy le sang, & principalement la pituite espaisse & visqueuse, ou la bile noire, se peut si soudainement toute separer d'auec le sang plus pur, & se ietter comme en vn moment, tout à coup sur les extremittez du corps, és doigts des mains, és artils des pieds, & au nez, qui sont les parties esquelles d'ordinaire on sent premierement le froid ? Voila certainement vne admirable separation & depulsion de choses meslées, & ie ne pense pas que iulques à present on en ait remarqué de si prompte. Dauantage, veu que és fièvres continuës la nature peccante est toute contenuë dans les grands vaisseaux, pourquoy ne s'en desgorge il aussi quelque portion par la masse du corps, laquelle cause souuent du frisson ? Parce, diront-ils, que l'obstruction des petites veines est plus grande en ces fièvres là, qu'en celles qui sont intermittentes, & est mesmes telle, qu'elle retient toute l'humeur au dedans. Mais ceste responce n'est qu'un eschapatoire ; car il y a beaucoup de fièvres continuës qui commencent par frisson ou par tremblement : que si dès le commencement d'icelles la bile se respädoit sur les extremittez du corps, pourquoy par apres ne s'y iette elle encor de mesme façon toutesfois & quantes

qu'elles s'augmente, ou se rengrege par vn nouveau mouuement? Combien donc que le tremblement qui suruient en la fièvre chaude, & qui la resout, soit excité par la bile eschappée des veines & respandue par la masse du corps, cela pourtant n'arriue pas de mesme quand au commencement de la fièvre continue, ou de celle qui est intermittente, l'on est saisy de tremblement.

Or l'euenement des choses demonstre fort bien cela. Dans le frisson & pendant le tremblement des fièvres intermittentes, les vrines que l'on rend sont blanches, subtiles & cruës. Ce qui monstre euidentement que la bile, tant iaune que noire, est lors plustost resserrée au dedans qu'expulsée au dehors. On est alors pareillement trouuillé d'une fascheuse suffocation, d'une toux le plus souuent seiche, de baaillemens, d'inquietude, de distention des entrailles, & souuent d'une vehemente douleur: puis on a des enuies de vomir, & sur la fin du tremblement l'on vomist de la bile. D'as le progres del'accez, & encor plus sur le declin, toutes ces choses se mitigent, & les vrines deuiennent espaisies, citrines ou rouges: ce qui est vn argument que par là s'espand & vers les extremittez du corps & dans les vrines. Ce qui arriueroit tout au contraire, si la bile se iettoit vers les extremittez du corps dès le commencement de l'accez. Quant à ce que mesmes quelquesfois pendant tout le cours de la fièvre intermittente nous remarquons l'urine estre loüable en la substance, couleur & hypostase, cela ne fait il pas voir qu'il n'y a dans les veines aucune putrefaction de ceste fièvre-là?

Venons maintenant aux differences de ces fièvres. Quand la vraye fièvre tierce n'est gueres violente, en laquelle on ne sent aucune horreur, ains seule-

ment (comme souuent il arriue) du froid és extremités, comment est-ce que la bile iaune respan due par la masse du corps, sera cause de ce froid? ceste humeur qui est chaude & acree, refroidira elle l'habitude du corps? Ou bien lors qu'une partie du corps, laquelle est debile & foible, ou de sa nature, ou par maladie, vient toute seule & toute la premiere à frissonner à l'abord de la fièvre, n'y a-il lors qu'elle seule qui soit attaquée par l'acrimonie de la bile? Je laisse à penser ce qui arriue aussi dans les autres. La quarte continue est la plus rare de toutes les fièvres, dautant que (selon qu'Auicenne mesme l'a remarqué) la melancholie peche rarement dans les grands vaisseaux, & beaucoup plus rarement s'y corrompt elle: au lieu que la quarte intermittente est grandement frequente & souuent populaire. Si donc la melancholie se trouue rarement vicieuse dans les veines, comment s'y en peut il trouuer en si grande abondance, ou en deriuer si frequemment sur la masse du corps, qu'elle suffise pour engendrer tant de quartes intermittentes?

Mais maintenant, ie vous prie, que ceux qui tiennent ceste opinion rendent raison des fièvres composées, & pourquoy c'est que dans la double tierce il se respan tous les iours par toute la masse du corps certaine portion de la bile, qu'ils estiment estre contenue dans les grandes veines & seruir de matiere antecedante à ceste sorte de fièvre. Si c'est l'abondance qui fait cela, toute tierce vehemente, prouenant d'un excez de bile, setournera en double tierce; & toute quarte violente, deuiendra double ou triple quarte. Les interpretes de ceste opinion s'embrouillent tellement eux mesmes dans ces difficultez, qu'ils ne s'en peuuent iamais bien depestrer. Apres tout qu'on considere la methode

& façon de guerir. Si la matiere antecedente de la fièvre intermittente est toute dans les grands vaisseaux, qu'on en face la cure par la seule saignée, laquelle oste promptement ceste matiere. Mais cela n'emporte pas la fièvre, & celui qui n'applique son esprit & sa pensée qu'aux seules humeurs qui sont dans les veines, ne viendra jamais bien à bout de ceste cure. Ceste ignorance de la cause obscurcist tellement la verité, qu'on n'a pas encore bien reconneu la vraye façon de guerir aucune fièvre intermittente, & le plus souuent elles se passent plustost d'elles mesmes, que par l'industrie du Medecin.

Je n'ay peu m'empescher de rembarrier icy en peu de mots (car les autres trouueront d'autres raisons) ceste opinion si fausse & si pernicieuse au bien de la santé des hommes. Certainement il me fasche, & j'ay mesmes aucunement honte de me departir d'une opinion confirmée par tant d'anciens autheurs & depuis si grand nôbre d'années. Mais que nous doit il chaloir de leur autorité & multitude, puisqu'ils sans s'appliquer à la recherche de la verité, ils se sont arrestez au dire les vns des autres, & à l'imitation d'un seul ont suiuy la mesme route & sont tombez en mesme faute. En choses de peu d'importance, il n'y a pas grand mal de souscrire & conuiuer à quelques erreurs; mais c'est vne tres grande fraude de n'y pas contredire quand la chose le merite, & importe tant au bien des hommes comme fait celle-cy, & pource doit on hardiment en descouurir tout à fait la verité. On reconnoitra par la raison & par l'usage ordinaire que ce que i'en ay dit est conforme à la verité.

CHAPITRE X.

Quelle est la matiere des fièvres intermittentes, & en quel endroit du corps elle reside.

C E que ie viens de dire fait assez voir, que comme la matiere de la fièvre intermittente ne sort pas des veines pour se ietter dás la masse du corps, aussi est-ce dans ceste masse qu'elle reside, & adhère autour des parties precordiales: & que ceste matiere n'est pas le suc des veines destiné pour la nourriture du corps, ains vne humeur superflue, laquelle étant extraite & separée de la masse du sang, auparavant mesme que le sang passe du foye dans les veines, s'escoule & renferme dans ses propres receptacles. Et pource la fièvre intermittente differe de la continue tant par sa matiere, que par le lieu qui la retient & foment. La matiere de la fièvre tierce, c'est vne bile iaune, laquelle est semblable à celle qui est renfermée dans la vessie du fiel. Celle de la fièvre quarte, c'est la bile noire qui se retire en la ratte; & celle de la quotidienne (si tant est qu'il y en ait quelqu'une qui soit vraiment telle) c'est la pituite morueuse & superflue, laquelle s'amasse en grande quantité dans l'estomach & dans les intestins. Le propre siege & la source de toutes ces fièvres est dans la premiere region du corps autour des entrailles, de l'estomach, du diaphragme, de la cavité du foye, de la ratte, du pancreas, de l'omentum ou du mesentere. Car ces parties-là sont

comme l'esgout & la sentine commune du corps, où descoulent & s'amassent toutes les ordures du corps.

Or il faut premierement monstrier comment c'est que les humeurs & les frissons des fièvres prouiennent de ces endroits-là. Le froid, l'horreur & la rigueur different en intensiō & remission: le froid saisist les parties extremes du corps: l'horreur secouë & agite legerement tout le corps, car c'est comme vne certaine diminution de rigueur: & la rigueur fait tellement trembler tout le corps, qu'à peine se peut-il contenir. Tous ont vne mesme & semblable cause, sçauoir est l'attaque violente de la chaleur & de la froideur, de quelque chose poignante, ou qui incommode en quelque autre sorte que ce soit, dont les parties sensibles du corps sont tout à coup assaillies. Et leurs differences viennent seulement ou de l'abondance de la cause, ou de la vehemence, ou de l'acrimonie, ou de l'impetuositē de l'esmotion. Car comme le corps deuient froid au rencontre de la froideur de l'air ou del'eau; aussi quelquesfois en fremit il, ou tremble tout à fait. Or les entrailles & toutes les parties qui sont à l'entour, estans enuelopées de membranes, & parsemées des nerfs sensitifs qui prouiennent de la fixiēme coniugaison du cerueau, ont le sentiment fort delicat. Elles ont pareillement vne grande affinité & communication avec les autres parties du corps tant principales qu'externes, & conuiennent tellement ensemble, qu'aussi tost que les parties nobles sont affectées, tout le reste du corps s'en ressent: car c'est ainsi qu'apres auoir beu du vin trop fort, combien qu'il ne fust pas encor escoulé de l'estomach, on sent neantmoins aussi-tost vne augmentation de douleur en la vessie quand elle est vicerée,

en la iambe où il y a quelque playe, & és parties at-
taquées de la goutte. Ainsi pareillement le trop
boire d'eau froide, cause du frisson & du fremisse-
ment par tout le corps. Celuy qui est sur le point
devomir de la bile, est saisi de tremblement, &
beaucoup plus encor celuy qui a mangé quelque
chose de mauuais, comme des champignons. Celuy
tremble pareillement qui a prins quelque medica-
ment chaud & mordicant qui luy trauaille l'e-
stomach, & les entrailles, ne plus ne moins que s'il
picquoit fortement la peau nuë, ou vn vlcere. Ce-
luy là finalement fremit, dans le corps duquel le
pus sortant d'un absces creué, se respand sur les
membranes. Et de fait, la bile venant à se corrom-
pre pendant la fièvre, elle acquiert vne qualité acre
& maligne; & au cōmencement de l'atcés, estant
deuenue comme enflée & accreue, elle se iette avec
impetuosité, & tout à coup, sur les membranes
des parties precordiales, ce qui se reconnoist par
les mesmes signes que i'ay cy deuant rapportez,
de la toux seiche, du baaillement, de la suffocation,
de l'inquietude, de la distension & douleur des en-
traillies, des nausées, du vomissement, & des vrines
blanches & subtiles. Combien donc peut-elle da-
uantage exciter pour lors d'horreur & de tremble-
ment, que ne font pas les autres causes que nous
venons de remarquer.

Quant à cette bile citrine, & de couleur de
porrée ou bleuë, qui sort souuent toute pure par le
vomissement, on reconnoist si elle est la propre
matiere de la fièvre intermittente, en ce que ve-
nant à sortir toute facilement, elle extirpe & dis-
sout entierement toute la fièvre. Elle ne pour-
roit certes iamais sortir des veines si sincere
& si pure, sans causer la mort, mais bien peut-el-

le venir ainsi des entrailles seulement, où elle s'amasse. Cela même consiste encor parce que si au commencement de l'accez on applique des fomentations humides, & conuenablement chaudes sur les parties precordiales, & principalement sur la ratte dans la fièvre quarte, sur le foye en la tierce, ou sur quelque partie que ce soit, où l'on remarque estre le siege de l'humeur qui foment la fièvre, elles addoucissent l'horreur & le tremblement, d'autant qu'elles mitigent la source même du mal.

Maintenant quant aux sueurs, on peut reconnoître qu'elles ne viennent pas seulement de la masse du corps, mais aussi des entrailles: d'autant que si celui qui a grand chaud, ou pour auoir trauaillé, ou à cause de l'ardeur du Soleil, vient à boire quantité d'eau froide, aussi tost il deuient tout en sueur, non pas que veritablement l'eau soit incontinent épandue & diffusée par tout le corps, car on la sent encor flotter long temps après dans le ventre. mais parce que la vapeur d'icelle s'esleue & s'estend en tout le corps, par la chaleur ardente des entrailles, laquelle finalement se condense en sueur. Mais ie desire que l'on remarque encore cecy; que celui ne peut suer par quelque violence que ce soit, non pas même dans la fièvre, qui a le foye ou la ratte, desséchée par l'aage, ou par quelque maladie, ou endurcie, par quelque grande obstruction, ou par quelque scirrhe, comme en l'hydropisie, en la jaunisse; ou eu la cachexie, combien que tout le reste du corps soit grandement humide: & que celui qui a beaucoup de chaleur & d'humidité naturelle au foye, & en la ratte, est tout en sueur à la moindre occasion. On peut donc par là reconnoître

re que la premiere source des sueurs, est dans les entrailles.

Après auoir donc dissipé ce brouillard, afin que la lumiere de la verité puisse eclatter dauantage, nous concludrons ainsi sommairement toute cette matiere. L'humeur chaude & putride en quelque endroit qu'elle reside hors des veines, agite rarement le corps, tandis qu'elle n'est point émeuë: mais venant à estre irritée & ébranlée hors de là par quelque impetuosité qui n'est pas selon la nature, elle l'agite & afflige en diuerses sortes. Si elle est en petite quantité, comme dans les fièvres tierces qui ne sont pas beaucoup violentes, ou qu'elle ait peu d'acrimonie, comme la pituite corrompue, ou que le mouuement en soit lent & foible, elle cause seulement du froid, la chaleur & les esprits estans comme rappelez des parties externes au dedans par maniere d'aide & de secours. Mais si elle est plus abondante ou plus acre, ou que son mouuement soit plus violent, alors le fremissement suruient. Et si elle est en tres grande quantité, & qu'elle soit grandement acre & mordicante, & attaque les entrailles avec beaucoup d'impetuosité, l'on est tout à fait saisi de tremblement.

De plus, cette matiere du tremblement & de la fièvre, estant adherante autour des entrailles, elle répand hors de soy, comme vne source, vne vilaine & maligne vapeur, laquelle s'étend par tout le corps; & qui peut estre vne seconde cause du froid, du fremissement, & du tremblement. Et ainsi l'accez de la fièvre intermittente se fait presque de mesme façon, qu'Hippocrate a iugé que se faisoit la fièvre putride, prouenante d'un absces formé dans l'aigüe, quand non seulement la chaleur, mais aussi la fumée & vapeur putride n'estant

point retenuë, paruient iusques au cœur, par la continuité des parties. L'humeur putride étant donc esmeüe & comme grossie, la portion & la vapeur qui s'en esleue, frappe les membranes, & en suite se fait le frisson ou le tremblement. Alors aussi la mauuaise vapeur qui vient de cette sentine, monte premierement au cœur par certains conduits secrets, & de là se respendant de tous côtez par les arteres, elle remplit tout le corps. Et quand cette expiration commence d'attaquer le cœur, elle abbaïsse & diminuë le poulx, & remplissant le cerueau, elle l'appesantit & assoupit. & finalement elle engourdit tous les membres. Mais venant puis après à se ietter comme vne bouffée de vent par le corps, elle l'eschauffe & enflamme peu à peu, & pour lors, elle esmeut l'ardeur de la fiëure, & les symptomes d'icelle. Finalement étant grandemēt attenuée, elle se dissipe, tant de son propre mouuemēt, que par l'impulsion de la nature, ou s'en va tantost manifestement par les sueurs, tantost couuertement par vne insensible transpiration. Et cette sorte de fiëure est vne pure & pimple espece d'intermittente; en laquelle les vrines paroissent souuent louables en couleur, substance, & sediment, pendant tout le cours de la maladie, dautant qu'il ne passe aucune bile des parties precordiales dans les veines; & souuent on les remarque telles dans les premiers accez des intermittentes. Quelquesfois aussi par l'impetuosité de l'accez, il se jette dans l'estomach vne portion de l'humeur qui est grandement agitée, laquelle excite vn vomissement bilieux, & ce d'ordinaire sur la fin du tremblement ou du frisson. Quant à l'autre portion plus subtile, cette mesme

impetuofité la fait fortir de fon lieu, & paffer dans le foye & dans les grandes veines, pour fe reſpandre par tout le corps; & c'eſt lors que l'accès deuient plus violent, ſur la fin duquel les vrines deuiennent eſpaiffes & iaunes, & fort differentes de ce qu'elles eſtoient vn peu auparauant l'accès. Et meſme l'accès deuient beaucoup plus violent, quād de jce meſme ſiege de l'humeur peccante, la plus grande portion d'icelle penetre dans les veines, mais quelquesfois auſſi l'accès eſtant paſſé, il demeure vne certaine inegalité de fiéure, qui fait que l'intermiſſion n'eſt pas pure: ce qui ſe remarque principalement en l'hemitrite, de laquelle ie traiteray cy après.

Au reſte, outre les raiſons que ie viens de deduire, ie veux bien confirmer par vn exemple quel eſt le ſiege & la ſource des fiéures intermittentes. Certain personnage noble, d'aage fleuriffant, & qui faiſoit ordinairement bonne chere, eſtoit depuis long temps ſuiet à vn vomiffemēt bilieux, qui luy arriuoit tous les iours. Ce vomiffement s'eſtant vne fois arreſté tout à coup, il fut en ſuite faiſi d'vn grand mal d'eſtomach, & trauaillé de nauſées & de toux ſeiche. Puis auſſi toſt luy ſuruint vn friffon vehement par tout le corps, ſans auoir pourtant aucune fiéure, dont il eſtoit agité par reprises plus de vingt fois le iour, tout de meſme que s'il euſt eſté atteint d'vne fiéure tierce. Enuiron quinze iours après, la bile commençant à ſe putrefier, la fiéure tierce le print, laquelle venant à ceſſer à quelques iours de là, il ſ'enſuiuit vne reſolutiō de toutes les parties qui ſont au deſſous de la teſte, & peu de iours après il mourut. En luy ouurāt le corps nous reconneuſmes que la cauſe de tous ces ac-

cidens, estoit vne pure bile de couleur de porree, amassée dans la concavité du foye, du poids d'une liure, & envelopee de membranes, vne portion de laquelle s'estoit desia glissée dās les nerfs de l'espine du dos. Nous en auons depuis ce temps là remarqué plusieurs autres qui auoient presque le mesme mal: à l'exemple desquels on peut apprendre que le tremblement vient quelquesfois des entrailles, tantost sans fièvre, tantost avec de la fièvre; & que l'humeur qui fomente la fièvre intermittente, est située dans ces mesmes parties là. De là vient aussi, ce que nous voyons souuent par effet, que la fièvre tierce qui dure long temps, & la fièvre quarte; se terminent en certain fascheux tourment, plus cruel que la colique, lequel se change quelquesfois, & en douleur des jointures, & en paralysie. Cette douleur est sans fièvre, neantmoins elle s'augmente & s'engrege ordinairement au temps de l'accez accoustumé, & reprend sa premiere periode. A peine s'apaise-elle que par l'éuacuation de la bile, que l'on sçait estre aussi bien la cause de cette douleur, comme elle l'est de la fièvre: car elle se jette hors des entrailles & visceres, sur les membranes du peritoine, & des intestins, ce qui consiste, de ce que & la fièvre & la soif, & le degoust, se mitigent à l'abord de cette douleur. Tout ainsi donc que le siege de cette douleur est au peritoine & es intestins, aussi la source de la fièvre intermittente, est elle autour des visceres & entrailles.

CHAPITRE XI.

Quelle est la cause des reuolutions, & ce que c'est qui change l'ordre & la forme d'icelles.

C'EST vne dispute pleine de dissention, & toute cōtrouersée, de sçauoir que c'est qui cause le mouuement des humeurs, & pourquoy la pituite se putrefie & s'ēmeut tous les iours, la bile au troisiēme iour, & la melancholie au quatriesme. Il y en a plusieurs, à la verité, lesquels ont demōstré par raison, que toutes les maladies qui prouiennent de defluxion, reçoient de l'intermissiō, & puis recommencent, toutesfois & quantes que les excremens sont amassez & accreus de sorte, qu'ils viennent à stimuler la partie où ils sont, pour sortir hors de là: car alors celle qui est la plus forte, s'en descharge, comme d'un fardeau, sur celle qui est la plus debile. Et delà quelques-vns augmentent, qu'il se se peut amasser tous les iours assez de pituite pour exciter la nature, & causer la reuolution, & qu'il ne s'amasse de bile suffisamment pour ce faire que de trois en trois iours, ny de melancholie, qu'en quatre iours. Mais ceux qui raisonnent ainsi, n'ont point du tout atteint la cause de la periode, ny pourquoy c'est que la pituite, bien qu'elle ne putrefiait qu'ēpetite quantité, vient neātmoins tous les iours à s'ēmouuoir & irriter, ny pourquoy la bile jaune estant fort abondante en un mesme endroit du corps, ne s'ēmeut pas plus souuent que de trois en trois iours, ny la melancholie plustost que le quatries-

me iour. Qu'y a-il ie vous prie, qui empesche, que tout es ces causes efficientes venans à concourir, il ne s'amasse tous les iours tant de bile iaune ou noire, qu'elle irrite tous les iours la nature, & excite la reuolution? C'en'est donc pas la seule quantité de l'excrement, ains quelque autre plus grande vertu, laquelle esmeut & irrite necessairement chaque humeur avec ordre & par certaine reigles.

Or ceste vertu là n'est autre que la propre nature & condition de la pourriture ou de la qualité contractée en l'humeur, laquelle altere & trouble tout l'estat naturel du corps. De mesme que l'accez de l'épilepsie, ou l'attaque de l'hydrophobie ne sont pas excitez par le genre de l'humeur; mais bien par la nature de la qualité qui se rencontre dans l'humeur: & ce n'est pas l'abondance du sang qui cause par periodes reiglées les purgations menstruales des femmes, car elles ne laissent pas de se faire tous les mois, soit qu'il y ait peu ou beaucoup de ce sang en la femme, sinon qu'il se rencontraist quelque chose qui interrompist l'ordre de la nature; mais c'est la vertu de la qualité qui y est suruenue: aussi est-ce vne certaine vertu ou qualité engendrée en l'humeur, qui fait que la pituite, venant à se putresier, s'esmeue tous les iours, & la bile au troisieme iour, & au quatriesme la melancholie. Or l'humeur superfluë estant amassée en grande quantité, & ne pouuant pas seulement estre surmontée & digérée par la chaleur & le benefice de la nature, elle vient à se corrompre & à se putresier en quelque façon; & acquiert lors ceste qualité qui cause telle ou telle esmotion & reuolution. Et comme chaque humeur est d'espece differente, aussi la putrefaction & qualité de chacune est elle differente, & le mouuement diuers. C'est pourquoy la pituite

contracte en se putrefiant vne certaine qualité & vn certain mouuement ; la bile iaune en contracte vne autre, & la melancholie vne autre. Or voyla la raison de l'ordre & du retour de l'accez. Quand la fièvre est sur le point de venir, l'humeur qui estoit comme retenuë dans sa cachette, commence à s'émouuoir, & venant comme à se grossier & gonfler, elle s'irrite, & par ceste impetuosité enuoye & respand par tout le corps quantité de vapeur mauuaise, & mesmes desgorge quelquesfois vne petite portion de sa substance qu'elle iette sur les entrailles & dans l'estomach ; laquelle passe aussi quelquesfois par le foye dans les grandes veines : & ainsi persiste l'accez iusques à ce que l'impetuosité vienne à cesser, & que ce qui estoit fortý du lieu, où est la source du mal, soit consommé & dissipé par la chaleur, ou se resoluë en sueurs. En apres vient l'intermission, qui dure iusques à tant que l'accez retourne par vne nouvelle esmotion de l'humeur, laquelle recommence à se remettre vne autrefois comme en furie. Or l'accez reprendra ses premieres erres, selon l'ordre periodique dont ie viens de parler, si ce n'est que quelque chose en interrompe la reuolution.

Plusieurs choses empeschent que les fièvres ne soient bien reiglées, & font que leurs paroxismes aduancent ou retardent. Ils aduancent plus que de coustume, lors que la matiere qui sert de subiect à la fièvre, vient à s'augmenter, comme par les viandes impures & vicieuses, & par la suppression des excremens : ou quand elle deuient fort atténuée, comme par l'usage de la moustarde & des espiceries, ou des autres choses qui sont chaudes & atténuantes : ou bien lors qu'elle est agitée par

quelque mouvement, comme par l'exercice, par les bains, par le chaud, ou par la cholere. Mais ils retardent quand par des causes contraires la matiere se diminuë, ou s'épaissit, ou deuient plus lente & plus debile. Et toutesfois & quantes qu'il arriue-
ra tant de changement és reuolutions, qu'elles ne gardent plus aucun ordre, c'est que l'humeur passe en la nature d'une autre, ou qu'elle est brouil-
lee par le meslange d'une autre de genre different. Finalement, les accez deuiennent longs, quand l'humeur qui est espanduë, & la vapeur qu'elle ex-
pire, sont en grande quantité espaisies, & visqueu-
ses; parce que lors elles ne se peuuent enflammer ny dissiper qu'avec beaucoup de temps; comme aussi lors que les conduits sont retrecis, ou que les forces sont debiles; car ces choses empeschent la dissolution. Quant aux causes de la briueté & pe-
riteffe des accez, ce sont la petite quantité, & la subtilité de l'humeur; l'amplitude des passages, & la vigueur des forces.

CHAPITRE XII.

De la fièvre quotidienne.

CHaque fièvre intermittente prend son nom de l'ordre de son mouvement, & de sa reuolution. D'où vient que la quotidienne est appellée amphemere, parce que tous les iours elle retourne de mesme façon. C'est bien la plus rare de toutes les fièvres, & qui à peine se rencontre vne fois entre six cens: mais quand il arriue qu'un mala-
de est tous les iours attaqué de fièvre, cela se fait

d'ordinaire par vne double tierce. Or pour establir également les genres des fièvres & des humeurs, on a colloqué cette espece de fièvre dans la pituite: laquelle neantmoins se putrefie tres rarement, & à peine peut elle acquerir par la putrefaction aucune qualité, qui puisse causer vne veritable fièvre. Quand la pituite superflue, de quelque genre qu'elle soit, vient à se putrefier dans les intestins, ou dás le mesentere, ou dans l'estomach, & cõcau-
tez des visceres, & que là elle acquiert vne qualité febrile, en s'irritant de iour à autre, elle expire vne vapeur conforme à sa nature, qui est la cause contenante de l'accez.

Cette sorte de fièvre arriue à ceux qui abondent en pituite, qui sont humides de leur nature, ou à cause de l'aage, à ceux qui sont gras, aux femmes, aux chastez, aux vieillards, & à ceux qui font amas de cruditez, & de pituite, par l'oyfueté, ou par le trop dormir, ou par la frequence des bains, ou par les alimens trop froids & trop humides, ou par vne continuelle gourmandise, ou pour manger trop souuent, comme font les enfans, ou par l'yurongnerie; & sur tout en hyuer, en pays froid, & dans vn air pluuieux. Ces gens là ont d'ordinaire la face blesme, & aucunement bouffie, l'orifice de l'estomach debile, fort peu d'appetit, & des rots frequents & aigres.

Or l'accez ne saisit pas tout à coup, ains peu à peu, refroidissant seulement les extremittez du corps, & fort rarement cause il de la rigueur & du tremblement: le corps deuient pesant, & l'en-
uie de dormir est si grande-qu'il n'est pas possible de s'en empescher: souuent aussi dans ce commencement l'esprit s'abbat tellement, qu'il tombe en defaillance ou en syncope. Après cela la cha-

leur s'accroist avec peine & peu à peu, non sans vne fort grande inégalité, qui fait qu'on a tantost chaud, tantost froid. La chaleur estant esprinse, n'est point acré; mais d'abord elle paroist emouffée & humide au toucher, comme si c'estoit vne vapeur qui s'esleuast de quelque bois verd auquel on auroit mis le feu, & ensuitte elle deuient auement plus mordicante & plus acré. Lors qu'elle est desia respandue par tout le corps, on ne sent aucune ardeur vehemente qui contraigne de se mettre à nud pour receuoir du rafraichissement, ny aucun espointement d'ardeur qui agite ou inquiete le corps, & n'a-on aucune peine de respirer pour attirer en abondance la fraischeur de l'air, ny aucune soif vehemente qui oblige de demander à boire de l'eau. L'accez venant à decliner, on ne sue point pendant les premiets iours, & apres on rend quelque peu de sueur, laquelle est grasse & visqueuse, selon l'espece de la vapeur. Toute la durée de l'accez est de dix-huit heures, & l'intermission de six heures, encor est elle rarement pure & entiere.

Le poulx est petit, languide, fort bas & rare, & sur tout au commencement & en l'accroissement de l'accez, à cause que la chaleur naturelle est grandement oppressée par l'agitation de l'humeur, qui est froide, grossiere & visqueuse: puis il deuient frequent, mais non pas tant que dans la tierce & dans la quarte, neantmoins il est aussi viste que dans la quarte: quant à son inégalité, elle est plus grande pendant tout le temps de l'accez, que dans les autres fièvres intermittentes.

Durant les premiers iours l'vrine paroist subtile & blanche, avec abondance de matiere crüe, laquelle cause vne fort grande obstruction, & suffo-

que la chaleur naturelle: mais la matiere venant puis apres à se cuire, & s'esoulant quelque chose d'icelle parmy les vrines, elles deuiennent rouges, espaisles & troubles. Les deiections du ventre sont liquides, cruës & pituiteuses. Par ces choses donc on discerne souuent, dès le premier accez, la fièvre quotidienne, lors principalement que ceste sorte de fièvre court parmy la populace.

La fièvre epiale se rapporte ordinairement à ce genre de fièvres pituiteuses, pendant ceste sorte de fièvre on sent en mesme temps dans chaque particule du corps la chaleur & le froid ensemble, & chaque partie du corps est agitée de tremblement & de fièvre. On tient que la cause d'icelle est vne pituite aigre & vitrée legerement corrompuë dont vne portion est desia enflammée, & l'autre n'est point encore pourrie.

Or ie veux bien, en ce lieu principalement, aduertir ceux qui s'appliquent plus diligemment en la connoissance des fièvres, que tant les continües (qui durent quelquesfois deux ou trois iours) que toutes les especes d'intermittentes, attaquent fort diuersement. Souuent dans le frisson & tremblement les parties tant internes, qu'externes, sont grandement refroidies. Mais quelquesfois aussi les parties internes fremissent & tremblent de froid, lors neantmoins qu'ës parties externes on ne ressent point de froid, mais bien vne chaleur esgale. D'autresfois les parties externes & superficielles du corps sont saisies de froid, pendant que les internes brulent & demandent d'estre continuellement rafraischies dans le frisson. Or la cause d'vne si grande varieté ne se doit pas rapporter à la pituite aigre & vitrée, mais

tablement à la matiere de la fièvre, laquelle estant esmeuë, & venant à exciter le frisson en attaquant les parties precordiales, elle rappelle tantost au dedans la chaleur des parties externes, tantost elle ne la rappelle point: quelquesfois aussi la matiere du frisson estant acre ou salée, excite beaucoup de soif.

CHAPITRE XIII.

Des causes & des signes de la fièvre tierce.

LA vraye fièvre tierce vient de l'inflammation de la bile iaune superflue, laquelle se putresce, ou dans la vessie du fiel, ou bien autour des entrailles, & es cautez des viscères; d'où neantmoins il en passe quelquesfois dans les veines vne certaine portion, qui se mesle parmy le sang. Elle saisit principalement ceux qui sont de nature chauds & secs, de corpulence graille, d'aage fleurissant, qui sont habituez au trauail, aux veilles, aux chagrins, aux soucis, aux ardeurs, & à vn viure échars, chaud & sec; & ceux qui ont le foye excessiuemēt chaud. Car ces personnes là font vn grand amas de bile iaune, & sur tout en esté, dans vn pays chaud & sec, & dans vn air grandement eschauffé. S'il y a manque quelque vne de ces choses, la fièvre ne peut estre vraye tierce.

Cette fièvre surprend tout à coup, par vn tres-grand frisson, qui fait trembler quelquesfois tout le corps, sur la fin duquel la bile s'estant épandue, sort souuent par le vomissemēt qu'elle prouoque.

Puis la chaleur vient promptement à s'allumer, & à se respendre par tout le corps, & s'augmente incessamment de forte, qu'elle atteint en peu de temps le plus haut point de sa vigueur, & devient acre, poignante, & qui frappe rudement la main quand on la touche; mais elle se rabbat aussi tost. Le malade brusle tellement, qu'il est contraint de se decouvrir le corps, & se tourner de costé & d'autre, sans pouvoir demeurer en mesme posture; & ayant de la peine à respirer, il faut qu'il attire souvent quantité d'air par de grandes & frequentes respirations; & mourant presque de soif, il demande incessamment à boire; & est trauaillé de veilles, de douleur de teste, de fâcherie, & de fureur. Le plus long accez est de douze heures, quelquesfois il n'en dure que sept ou quatre, & finit par vne grande sueur chaude & vaporeuse, après laquelle suit la pure intermission.

Au commencement de l'accez, le poulx est retiré, & petit, puis après il devient plus viste & plus frequent que dans les autres fièvres, dautant que la necessité du rafraischissement est plus grande; il est pareillement vehement & fort, mais aucunement dur, à cause de la secheresse de l'artere; fort peu inegal, parce que la matiere estant subtile, elle s'enflamme facilement, dautant aussi qu'il n'est pas moins besoin de rafraischissement par la dilatation de l'artere, que de rejeter les fumées putrides par le resserrement du systolé. L'urine est iaune ou de couleur de feu, de substance mediocre, & d'odeur forte & mauuaise. Et cette cy est la pure & vraye fièvre tierce, laquelle selon le iugement d'Hippocrate, ne passe point le septiesme accez tout au plus.

La tierce bastarde, s'engendre ordinairement

tantost de la bile vitelline, qui se putrefie dans l'estomach, & y demeure fermement attachée: tantost du meslange de la bile & de la pituite, & pour ce les causes euidentes d'icelle ne sont pas toutes bilieuses, mais il y en a aussi quelques vnes qui tiennent de la pituite. Les reprises des acces se font sans aucun ordre certain d'anticipation ou de retardement; & quoy qu'ils fussent reglez, on ne doit pas pour cela penser que cette fièvre soit tierce; car l'essence de la fièvre ne se prend pas de la seule revolution: le frisson n'est pas à la verité si vehement, mais il dure plus long temps: la chaleur est moins poignante & moins vehemente, laquelle ne se respand pas également par tout le corps, estant aucunement semblable à vn feu éprins en du bois vert & sec, meslé ensemble. Tous les symptomes de l'ardeur sont moins violens, à cause que la pituite rabbat & modere la fureur de la bile; & pour ce aussi l'accez se passe il avec peu de sueur, laquelle encor n'est pas grandement chaude. L'accez dure beaucoup plus de douze heures, & plus il est long, d'autant il est plus impur: Cette fièvre ne se termine jamais au septiesme acces; rarement finit elle à la quatorzième revolution; & souuent elle passe plus outre.

CHAPITRE XIV.

Des causes & des signes de la quarte intermittente.

LA melancholie corrompue & pourrie, est reputée la cause contenante de la fièvre quarte. Car venant par ses propres causes à s'amasser en telle

relle abondance, qu'elle ne puisse plus estre cõduite & gouvernee par le benefice de la nature, elle se putrefie & allume cette sorte de fièvre. Or il y a deux especes de melancholie, l'une naturelle, qui est comme la lye & le limon du sang: l'autre brûlée, laquelle est cõme la cendre de chacune des humeurs trop dessechees; & cette cy procede tantost de bile iaune brûlée, tantost d'une aride melancholie, & quelquesfois, mais plus rarement, de pituite ou de sang brûlé. D'où vient qu'entre les fièvres quartes, l'une prend son origine de soy mesme, & non d'aucune autre fièvre qui ait precedé, & cette cy s'ensuit ordinairement d'une tumeur de ratte, causée par vn excès de melancholie naturelle: l'autre est vne production des autres fièvres, ou continuës, ou intermittentes erratiques, de laquelle Hippocrate a dit, que quand la fièvre intermittente est erratique, elle se tournera en fièvre quarte, si principalement on est proche de l'automne. Car si l'humeur qui a causé la premiere fièvre, n'est entieremēt euacuee, elle deuient brûlée & grossiere, & passe en nature de melancholie, & venant à se putrefier, elle sert de matiere à la fièvre quarte.

Ceux en sont donc attaquez, les quels sont amas d'humeur melancholique; cõme sont ceux qui sont sujets au mal de ratte. & ceux qui ont eu peu auparavant des fièvres brûlantes. ou erratiques, qui ne sont encor parfaitement gueries. Ce n'est pas neantmoins seulement en la ratte, mais aussi dans le mesetere, & autour des hypochondres, que la melancholie superfluë a coûtume de s'amasser. Ceux là sont propres pour en engendrer beaucoup, qui sont froids & secs, qui sont maigres, & qui n'ot gueres de poil par le corps, qui sont d'âge

constant, ou desia inclinant ; qui sont accablez de soins & de fâcheries, & qui sont depuis long temps addonnez à manger des viandes grossieres, terrestres, & du tout seculentes. La melancholie abonde grandement en ces gens là, principalement en Automne, & dans vn pays & climat de constitution & temperature inégale. Et lors qu'il se presentera des causes pour corrompre & faire putrefier cette humeur, il se formera vne vraye fièvre quarte. L'accès commence par vn grand froid, qui s'accroist peu à peu, iusques à donner des frémissemens vehemens, non toutesfois poignans & tiraillás, comme ceux de la fièvre tierce, ains du tout assommans, par lesquels tout le corps tremble, les dents claquent, & les jointures & les os craquent comme s'ils estoient chargez de quelque contre-poids: après que le froid est passé, l'ó a des vomissemens fort amers, lors principalement que l'humeur trouue des passages pour se glisser en l'estomach, il s'excite lors vne chaleur, non si vehemente qu'en la fièvre tierce, mais plus ardente que celle quotidienne; laquelle n'est pas égale par tout le corps, ains meslée d'vne certaine froideur, & accôpagnée de quelque reste de douleur és os & es jointures. La soif, les veilles, la douleur de teste, & les autres symptomes sont bien plus fâcheux que dans la quotidienne, mais plus doux que dans la tierce. L'accès est plus long que celuy des autres fièvres intermittentes, & se termine par vne sueur plus abondante que dans la fièvre quotidienne.

Le poulx est au commencement de l'accès beaucoup plus languide, moindre, tardif & rare, que le naturel; puis il deuient grãd, fort, fréquent, & vif, & plus inégal qu'en toutes les autres fièvres. L'vrine est ordinairement pendant les premiers iours,

subtile, blanche, & aqueuse; puis elle change souuent & en substance, & en couleur, & en choses contenuës, parce que la matiere d'icelle varie souuentefois, & qu'elle passe & se iette dans les veines tantost peu, tantost beaucoup. A peine tout le cours de cette fièvre passe il plus d'un an, si ce n'est par quelque accident: il se termine souuent en six mois, & quelquesfois en trois. Toute fièvre qui s'esloigne beaucoup de la condition de celle cy, n'est pas vraye quarte, ains elle participe des autres humeurs. Cette là ne doit pas aussi estre estimee vraye fièvre quarte, laquelle continuë pendant deux ans, ny celle que i'ay veüe s'estendre iusques à neuf ans, ny celle que les enfans ont contractee dès la naissance, par la communication de la mere, & sans aucune erreur du viure.

Plusieurs estiment que c'est à ce genre de fièvres qu'il faut rapporter celles qui ont de longs interualles, & de grandes intermissions, comme sont la quinte, la sexte, ou s'il s'en retrouue quelques autres dont les periodes soient plus rares. Parce qu'ils establisent pour matiere de ces fièvres là, vne melancholie fort grossiere. & terrestre, telle qu'est celle qui prouient de la pituite bruslee, & disent qu'elle est en si petite quantité, & de longue main resserree dans quelque partie tellemēt esloignee, qu'à cause de cela elle ne s'esmeut que fort tard. Galien n'a point voulu admettre ces sortes de fièvres, quoy que cōfirmees par l'autorité d'Hippocrate, pour n'estre cōtraint d'establir plus de quatre humeurs, ou bien de leur assigner quelque siege ailleurs que dans les veines. Voila quelles sont essentiellemēt les fièvres simples; mais pourtāt elles variēt quelquesfois. Car la fièvre quarte ayant quelquesfois commencé par un froid moderé, elle continuë puis

après par vne douce chaleur pendant quatre ou six heures seulement. Et bien souuent la tierce est plus fascheuse & plus longue que la quarte, tant en frisson, qu'en ardeur. Or il sera facile de discerner par l'ordre de la reuolution, celle qu'on ne pouuoit pas bien reconnoistre par idée, dès le premier accez.

CHAPITRE XV.

Des fièvres composées.

LA fièvre pure & simple, procede d'une seule & simple humeur corrompue, & toutes les causes & signes d'icelle, içauoir est, la nature, l'age, la façon de viure, la saison de l'année, & la disposition de l'air, & finalement tous les symptomes se rapportent à la predomination d'une seule & mesme humeur.

Or la fièvre est dite en deux façons composée, ou parce qu'elle consiste de plusieurs confonduës ensemble, ou parce qu'elle consiste de plusieurs entrelassées. Les confuses sont celles, qui sont tellement brouillées, qu'elles commencent ensemble, & finissent ensemble. Or elles se forment de diuerses humeurs meslées & confonduës en vn mesme lieu, & qui se putrescent en mesme temps. On n'en peut discerner aucune separement, & n'y en a aucune qui paroisse pure & simple, ains leurs signes sont tous confus & brouillez. Ce sont ces fièvres là que cy deuant nous auons appellées bastardes. Quand

le nombre des confuses est esgal, à peine en peut on determiner le genre: mais quand le nombre n'est pas pareil, la fièvre ainsi composée prend le genre & le nom de celle qui est la plus forte & principale. Celle dont le sujet abonde plus en bile corrompue, qu'il ne participe des autres humeurs, aura le nom de tierce, mais bastarde & illegitime: & quotidienne bastarde celle, en laquelle la pituite ne se corrompt pas toute seule, mais est accompagnée de quelque autre humeur qui se corrompt quant & quant; & quarte bastarde celle en laquelle la melancholie putride est semblablement meslée des autres humeurs.

Les fièvres entremeslées, sont celles qui commencent à diuerses heures, & finissent à diuerses heures. Chacune d'icelles subsiste separement, & a sa propre essence distincte, nonobstant que quelques parties des accez viennent à concourir en mesme temps. Ces fièvres procedent de diuerses humeurs, qui ne se rencontrent pas en mesme lieu, mais dont chacune a son siege particulier, son essence, & son mouuement. Il est fort aisé de reconnoistre chacune d'icelles par ses propres signes, comme si elle estoit toute seule & separee des autres. Vne continuë avec vne autre continuë se confondent bien, mais ne s'entremeslent pas: & ce qu'escriit Auicenne est vne chose absurde, que la putrefaction d'une fièvre continuë vienne d'un certain lieu, & que celle de l'autre vienne d'un autre endroit: car veritablement en l'une & en l'autre les humeurs se putrefient dans les grandes veines, & venant à estre agitées, elles se meslent en icelles. Mais vne intermittente s'entremesle ordinairement avec vne autre in-

termittente, qu'auec vne continuë. Veu donc qu'il n'y a en tout que trois simples differences de fièvres intermittentes, qui sont la quotidienne, la tierce, & la quarte, chacune d'icelles peut s'entremesler avec vne autre de mesme genre, ou diuers.

De l'entrelasement de celles qui sont de mesme genre, se font celles cy, sçauoir est, la double quotidienne, quand il arriue tous les iours deux accés definis de mesme sorte, ce qui ne se voit gueres. La double tierce arriue souuent, les accés de laquelle viennent tous les iours; mais ils ne sont pas pareils, & ne se font point à mesmes heures: car ordinairement les accés qui se font aux iours de nombre impair, sont semblables entr'eux, & ceux là sont semblables qui arriuent en des iours de nombre pair. La double tierce prend d'ordinaire son commencement de la tierce simple, à laquelle en suite il s'en adjoit vne autre; & l'une des entrelasées a coustume de se terminer pendant que l'autre persiste encore. La quarte double, & mesme triple, n'est pas moins frequente: elle traueille par deux iours, & laisse vn iour d'interualle; les accés s'en font tous iours, & rarement sont ils pareils. L'une & l'autre s'engendrent ordinairement de la simple, à laquelle il s'en conjoint vne seconde, puis à ces deux il en suruiuent pareillement vne troisieme. Toutes ces fièvres se distinguent d'auec la quotidiene, par leur forme & façon de faire, en ce que les accés de la quotidienne sont entr'eux semblables, & les accés de celles cy ne se ressemblent pas: & quoy que d'auenture ils se rencontraient semblables, on les peut toutesfois discerner par l'impetuosité de l'é-motion, & par les signes dont nous auons cy dessus parlé. Car la double tierce ne fait pas les mesmes,

accès, que fait la quotidienne; ny la triple quarte, les mêmes que la double tierce, ou la quotidienne: ny les causes évidentes qui font predominer la melancholie & la bile, ou la pituite, ne sont pas semblables. Quant aux intermittentes de genres diuers, elles s'entremeslent fort rarement, comme la quotidienne & la tierce, la tierce & la quarte, & si quelquesfois cela arriue, à peine le peut on reconnoistre les premiers iours.

Au reste, l'intermittente, comme la tierce, se conjoint quelquesfois avec la continuë, & cette cy differe de la tierce continuë, en ce que les atteintes se font sans fremissement ny tremblement, & finissent sans aucune sueur; au lieu qu'en celle là elles commencent tout au contraire, par le tremblemēt, & cessent avec sueur: & pourtant après la sueur il ne s'ensuit pas vne intermission comme dans l'intermittente, mais bien la continuation de l'autre. Telle est celle qu'on nōme demie tierce, laquelle est continue, sans auoir aucune intermission; & l'un des iours elle surprend avec frisson, & va puis après augmentant & rendant plus fâcheuse, & en l'autre ellen'est pas si forte. Car elle consiste de la tierce intermittente, & de la quotidienne continuë, & a deux accès en l'un des iours, & vn seul accès en l'autre. Si les deux humeurs qui la causent sont égales, il en resulte vne vraye demie tierce: mais si la bile est la plus forte, la fièvre en deuient plus ardente, & approche plus de la tierce; & si c'est la pituite qui predomine, elle tient plus de la quotidienne, & n'est pas si violente. S'il arriue que la quotidienne intermittente vienne à se joindre & à se mesler avec la tierce continuë, il s'en fera pareillement vne demie tierce exquise, & semblable à la precedente, pourueu que les humeurs se retrou-

uent aussi dans vne esgalité; mais si l'une exce-
de par dessus l'autre; elle ne sera pas exquise.
Or il me semble que la tractation des fièvres pu-
trides, est toute exactement comprinse en ce que
dessus.

CHAPITRE XVI.

Les degrez, causes, & signes de la fièvre he- ctique.

LA fièvre hectique est vne chaleur outre na-
ture, laquelle est premierement & de foy
attachée & residente en la substance du cœur.
Or ayant d'abord attaqué la substance du cœur,
qui est le principe de la vie, elle se jette pareillement
aussi tost sur la substance des autres parties simi-
laires, parce que toute intemperie du cœur se
communique aussi tost facilement à tout le reste
du corps.

Cette fièvre consiste en la substance du cœur &
des parties similaires, non pas legerement, comme
fait la chaleur de la fièvre ephemere, ou de la pu-
tride, laquelle s'estant éprinse dans les esprits, ou
dans l'humeur, vient aucunement à se resandre
sur la substance des parties similaires; ains elle est
attachée & comme plongée premierement, & de
foy, dans la propre substance des parties. Et la cha-
leur des parties similaires estant de deux sortes,

l'une elementaire, l'autre diuine, ce n'est pas en cette cy qu'est l'essence de la fièvre hectique, mais bien en la seule chaleur elementaire demesurement accreüe; par la vertu de laquelle neantmoins, tant cette chaleur diuine, que tout ce qui se rencontre en la partie similaire, est enfin consommé. Car il y a trois sortes de substances en la partie similaire, la solide, l'humide, & la spiritueuse; De plus, la substance humide est aussi de trois sortes, l'une charnuë, laquelle n'est autre chose que l'humeur alimentaire coagulé; l'autre radicale, qui est la propre substance de la chaleur naturelle, en laquelle consistent premiere-ment & les esprits, & la chaleur vitale: la troisieme, aqueuse, ou elementaire, qui sert comme de colle pour faire prendre & tenir la substance solide. Cette chaleur febrile venant donc à faisir le cœur, & attaquer chaque partie similaire, la substance charnuë de ces parties, s'embrase aussi d'abord; & n'estant que fort peu ou point dissipée, c'est le premier degré de la fièvre hectique. Le second degré, c'est quand la chaleur ayant passé plus outre, cette substance charnuë est ou toute, ou pour la pluspart consommée: car il y a encore plusieurs ordres en ce degré. Le troisieme degré de fièvre hectique est lors que la substance charnuë estant consommée, cette chaleur febrile & cruelle gaste & rauage manifestement l'humide radical, & ce degré est la vraye maigreur, & la fièvre hectique accompagnée de maigreur, que les Grecs appellent *Marasmode*; par laquelle les esprits naturels, & la chaleur qui reside en cette humide radical, & toutes les facultez qui en procedent, deuiennent grandement debili-

tees, toutes les forces du corps s'affoiblissent & s'abbattent, & toutes les fonctions viennent en suite à cesser.

Quand cette fièvre là est desia manifeste, elle est du tout incurable : car cette humidité radicale estant inserée en nous, est contractée par la semence, ce qui s'en consomme ne peut iamais estre réparé, & faut de nécessité que la personne meure fort long temps avant que la plus grande partie de cette humidité soit consommée. Mais la substance charnuë pouuant estre reparee, le second degré de fièvre hectique n'est pas incurable, si ce n'est peut estre qu'il approchast fort de la maigreur. Or comme cét humide charnu se consomme par la chaleur de la fièvre; aussi fait il par le cours de l'aage, sans fièvre, sans douleur, & quelques fois par la seule vieillesse & secheresse naturelle, en suite dequoy l'humide radical vient pareillement à se dissiper, & se fait la simple maigreur de la vieillesse: de mesme que nous remarquons aux arbres que l'aage & la vieillesse fait secher.

Au reste, la fièvre hectique, qui est simple & vraye, vient ou de soy tout premierement, ou bien en suite de l'ephemere. Elle n'attaque seulement que ceux qui sont d'un naturel fort chaud & sec. Or elle prouient de causes euidentes, qui sont accompagnées de vehemence, comme de cholere, d'ennuy, de travail, de chaud, de soif, & de ieusne. Car ces causes n'estant guerès vehementes, elles ne produisent qu'une fièvre ephemere, mais si elles sont grandement fortes, elles engendrent l'hectique; c'est à sçauoir, aussi tost que les parties solides sont enflammées.

Les signes de la fièvre hectique commençante, dans le premier degré, sont, quand il a precedé de vehementes causes euidentes. Quand après s'estre

escolé trois ou quatre iours, la fièvre ne pouuant plus estre dite ephemeré, cōtinuë de persister égale, sans aucune notable augmentation ou diminutiō: & sans faire aucune douleur, à cause de son esgalité, tellement qu'à peine le malade s'apperçoit il qu'il ait la fièvre; & lors les forces sont grandement debiles, avec certaine langueur. On sent en touchant vne chaleur premierement douce, puis aussi tost acré & mordicante. Le poulx est foible, petit, & frequent, & les arteres paroissent plus chaudes que les autres parties qui en sont proches, & principalement dans le diastolé. Vne heure ou deux après le repas la chaleur se rēd plus forte, & le poulx deuient plus frequent & plus viste: mais quand la digestion est acheuée, la fièvre retourne en sa premiere esgalité. Car tout ainsi que si vous humectés de la chaux, il en sort quantité de vapeur acré, de mesme les parties solides du corps estans affectées de chaleur hectique, elles deuiennent plus chaudes par l'humidité des viandes.

Dans le second degré de fièvre hectique, outre ce que dessus, la secheresse du cœur se rendant plus forte, le corps commence lors à se fondre & consumer manifestement. On void surnager en l'vrine vne certaine graisse semblable à des toiles d'araignees; la peau deuient, non pas molle & ridee, comme quand l'on est extenué par quelques autres causes; mais seche & crasseuse, aussi bien que le reste des parties solides. Le poulx est dur & tendu, & beaucoup moindre & plus foible.

La fièvre marasmode & la vraye maigreur, ou troisieme degré de l'hectique est, lors que par la trop grande secheresse & consommation du corps, les yeux sont grandement enfoncez, & les os qui sont autour aduancent fort; à peine les paupieres

arides se peuuent elles hauffer, & ne s'ouurent qu'à demy, comme si l'on s'endormoit, & pourtant on ne dort pas, car on n'en a pas enuie: les temples sont abbatuës & fort caues, d'autant que la chair d'icelles est consommée: le front est dur, tendu, & aride: la faee liuide & crasseuse, n'ayant plus sa viue couleur: le ventre est comme flasque, plat, & retiré, & tout le reste du corps tellement sec, qu'il semble que ce ne soit plus que des os couuerts de membranes & de peau, & presque comme vn squelette: & la peau paroist en la prenant, comme vn cuir grandement aride: le pouls est tres dur, petit, debile, & frequent Et cette sorte de fièvre hectique est tout à fait simple, sans meslange d'aucune autre fièvre, laquelle on ne void sans doute arriuer que fort rarement.

Il y a pareillement vne autre fièvre hectique aucunement plus frequente, qui vient en suite de la fièvre aiguë & ardente. Car l'ardeur de la fièvre estant grandement forte, & le malade d'un naturel chaud & sec, venant à estre long temps sans manger ou boire, & sans prendre aucun remede pour rabbatre l'ardeur de sa fièvre, la substance charniue des parties similaires vient à se fondre, & la fièvre s'emparant des parties solides, les rauage & consume. Cette sorte de fièvre est proprement ardente & fondante, faisant en peu de temps ce que la simple hectique fait peu à peu, & à la longue.

On conte encor vne troisieme espee de fièvre hectique, laquelle prouient de l'affection de certaine partie, principalement du foye, de la ratte, de l'estomach, des poulmons, de la poitrine, des reins, ou des intestins, où il y a eu quelque inflammation qui n'est pas bien guerie, & sur tout,

si elle deuient purulente. Car la chaleur febrile persistant longuement en ces parties là, & continuant d'attaquer le cœur, elle deuient certainement fort difficile à guerir, & desseche extrêmement, tant le cœur, que le reste des parties. Au reste, cette fièvre ne peut estre estimée proprement hectique, mais c'est vne fièvre symptomatique, & qui souuent est de longue durée, & lente, dont i'ay desia fait mention cy dessus. Voire mesmes, ny ce genre icy, ny l'autre precedent, ne peuuent estre comprins sous le genre de simple hectique; car l'vn & l'autre naissent de putrefactiō, de laquelle ils se ressentent encore long tēps après, parce que les marques en demeurent au poulx, és vrines, en la soif, & és autres symptomes. Et mesmes elles se rengregent sans auoir mangé, & deuiennent inegales, & causent souuent des frissons, lors principalement qu'il y a quelque amas de pus, Et partant toute hectique, ainsi appellée, laquelle prouient de fièvre putride, participe semblablement de la putrefaction.

CHAPITRE XVII.

*De la fièvre maligne & pestilente,
qui est vne maladie de toute
la substance.*

LA fièvre est maligne quand elle attaque le cœur, non par sa chaleur seulement, mais aussi par vne qualité veneneuse. Car entant que fièvre, elle incommode par chaleur; & entant que maligne,

ne, elle incommode par son venin. On appelle qualité veneneuse, celle dont la violence & malignité, outre-passe la condition d'une putrefaction commune. Or ou elle s'engendre en nous de soy mesme, ou bien elle vient de dehors, & ce tantost du Ciel, tantost par autres causes. La fièvre veneneuse qui vient du Ciel, est pestilente; & celle qui vient des autres causes, est simplement maligne.

Elle se forme donc lors que les humeurs qui sont en nous, outre la simple putrefaction, acquiert encore par les causes susdites une malignité estrangere. Car ces humeurs degenerent ainsi quelques fois peu à peu d'elles mesmes par laps de temps, comme fait la bile de couleur de porrée, ou bleue, ou noire, qui se va putrefiant; ou bien ce sont les mauuaises viandes & les mauuais breuuages, lesquels estans participans de quelque venenosité, produisent des humeurs & des fièvres qui tiennent de leur nature. Semblablement la corruption de l'air, qui prouient de l'infection des marecages, des lacs, des antres, des fosses, des charongnes ou des excremens des hommes & des bestes, ou par quelques autres fort mauuaises exhalaisons: & celle qui procede du desordre des saisons & de l'influence des astres. Et quelque malignité que ce soit qui prouienne de ces causes, passe & penetre au dedans de nous, ou avec l'air, ou parmy les viandes, ou en quelqu'autre façon, & si le corps est préparé pour receuoir la fièvre, elle infecte les humeurs, & engendre une fièvre simplement maligne.

Or la cause de la fièvre pestilente est une qualité maligne & pernicieuse, introduite en l'air par les astres, laquelle, comme furieuse, court & s'épand parmy la populace. Car cette pestilence estant parsemée dans l'air, & s'insinuant en nostre corps

par la respiration & par les pores de la peau, si le cœur est disposé à ce mal, il en est aussi tost attaqué, puis les esprits qui sont és arteres, viennent en suite à s'en ressentir, & finalement les humeurs & tout le corps en demeurent interesséz. Mais il est tres-difficile de reconnoistre ce que c'est qui rend chaque corps suiet & disposé à recevoir cette pestilence.

Quand la fièvre pestilente ou maligne, est simple & solitaire, sans estre accompagnée d'aucune fièvre putride, le poulx est languide, petit, frequent, vifte, & tout à fait inegal: toutes les forces s'abbatent, & principalement celles de la faculté vitale: les defaillances de cœur sont frequentes, & quelques fois l'on tombe en syncope: l'on ne fait que vomir, en sorte que les meilleures viandes ne touchent point le cœur: les veilles sont fâcheuses, le corps ne peut demeurer en place, les vrines ne sont ny cruës, ny troubles; l'on n'est pas beaucoup travaillé de la soif, l'on n'est point trop desgousté, l'ardeur n'est gueres grande, ny la fièvre beaucoup forte, tellement que souuent les malades ne pensent point auoir de fièvre, & leurs forces diminuës ainsi sans aucun sentiment de douleur, ils meurent inopinément. Voila donc quelles sont les marques de la fièvre pestilente & maligne.

Or quand elle n'est pas solitaire, ains meslée de fièvre putride. les signes precedens sont accompagnez de douleur & pesanteur de teste, d'enuie de dormir, puis l'on tombe en delire, la respiration est difficile, & l'haleine puante, l'on est tourmenté d'une soif inextinguible, l'on pert l'appetit, les vomissemens sont bilieux, les parties interieures brûlent, & les extremitéz sont froides, tellement que la fièvre est debile au dehors, & tres-forte au de-

dans, les vrines sont cruës, troubles, & de mauuaise odeur, les deiections du ventre sont sales & puantes, avec plusieurs autres accidens qui suruiennent, selon la diuerse constitution du corps & des humeurs. Car cette varieté de constitution, fait qu'à peine voit on iamais deux personnes entachées d'une mesme contagion, qui soient trauailles de semblables symptomes.

Au reste, il y a certains presages des maladies fâcheuses & malignes qui doiuent arriuer: comme sont, le printemps pluuieux, pendant lequel les vents continuent du costé du midy, & les grandes chaleurs de l'esté: car cela fait corrompre les corps. La longue continuation du vent austral, sans amener aucune pluye, lequel estant de nature chaude & humide, fait corrompre toutes choses; au lieu que celuy qui est pluuieux, tempere & rabbat la chaleur; l'air trouble, chargé, étouffant, & non esuenté, ou seulement agité d'un petit vent de midy. Car le grand vent & la tempeste purifient l'air, & l'empeschent de se corrompre. Les comètes, les estoiles tombantes, les ouuertures, les ardeurs, & les autres choses qui de nuit se remarquent en l'air. Car si chacuné de ces choses persiste longuement, c'est & cause & signe de corruption future.

Quant aux signes de celle qui est desia engendrée, ou qui doit bien tost arriuer, c'est la grande quantité des insectes, & de la vermine qui s'engendre de pourriture, comme sont les puces, les punaises, diuerses especes de mouches, les sautrelles, les grenouilles, & les rats. On voit souuent sortir & courir ça & là des animaux, lesquels auparauant se tenoient cachez dans la terre: les petits oyseaux ayas ressentý quelque chose de la corruption

ruption, abandonnent leurs nids, & changent d'air: quelquesfois il precede vne grande mortalité du menu bestail, qui a d'ordinaire le nez contre la terre, comme sont les brebis. L'on peut donc preuoir par ces signes que l'année sera maladiue & calamiteuse, & qu'en icelle il courra des maladies putrides & malignes. On ne peut pas neantmoins conjecturer de là, que l'année doiuë estre pestilente, cela se reconnoist seulement par la disposition des astres, qui en sont la cause procreatrice.

CHAPITRE XVIII.

Du charbon, & du bubon de la peste.

ENTRE les fièvres pestilentes, les vnes ne sont accompagnées d'aucun autre mal, & les autres portent avec elles vne certaine marque de leur malignité & de leur venin. Or cette marque est, ou vn charbon, ou vn bubon, ou bien du pourpre; lequel sort lors que la maladie est en estat, quand le mal n'est pas beaucoup violent, & se monstre par tout le corps, quelquesfois de couleur bleuë, ou noire, sans qu'il y ait rien d'esleué. Le charbon est plus dangereux, & ne vient pas tousiours en vn mesme endroit, ains indifferemment tantost en vn lieu, tantost en l'autre. Or il s'esleue d'ordinaire comme vn grain de mil, & quelquesfois comme plusieurs ensemble, avec vne grande demangeaison au commencement, puis avec rougeur, ardeur, & douleur vehemente. Et venant ainsi à croistre peu à peu, la partie se brulle, & il s'y fait vn vlcere croû-

steux, noir, ou cendré, comme si c'estoit quelque brusleure faite par vn fer chaud. Quelquesfois aussi si il cōmence par vn vlcere crousteux, ou par vne pustule. La chair qui est autour de l'vlcere, deuiene grandement enflammée & noire, & fait vne extreme douleur, puis s'estant corrompuë, elle tombe finalement. On tient que la cause prochaine & contenante de ce mal est vn sang grossier & bruslé, fort different de celuy qui engendre le phlegmon. Au reste, que ce mal soit pestilent, & coure parmy le peuple, cela vient de la constitution de l'air, qui est non seulement putride, mais aussi veneneuse, laquelle s'attachant aux corps qui sont disposez à la receuoir, donne cette marque du mal qui est desia contracté.

Or on a esté long temps en peine de sçauoir si la fièvre procedoit du charbon, ou si le charbon estoit vn effet de la fièvre. Parce qu'il paroist quelquesfois vn cōmencement de charbon fort long temps auant qu'il y ait de la fièvre, quoy que Galien vueille que la fièvre vienne necessairement du charbon. Mais c'est chose certaine que la seule malignité veneneuse est tellement la cause de l'vn & de l'autre, qu'elle n'est pas toute dans le charbon, ny pareillement toute dans la fièvre. Car tant que le charbon est sans fièvre, qui est-ce qui dira que tout le venin est renfermé dans la partie affectée? Cōbien qu'on extirpast la partie qui est affectée, ou que l'ayant cernée tout autour, on empeschast que le venin ne rentraist au dedans, le reste du corps ne sera pas pour cela tout à fait hors de dāger. Car le mal ne vient de cette partie là, cōme il feroit si l'on auoit esté mordu de quelque beste veneneuse, mais il vient de l'air corrompu que l'on attire en respirant. Lors dōc que le cœur est attaqué de ce venin, si les forces sont robustes, elles reiettent aussi tost vne

portion de ce venin sur quelqu'une des parties externes du corps, où s'accroissant peu à peu, la partie en demeure contaminée : cependant l'autre portion du venin qui reste enfermée au dedans du corps, gagnant & se renforçant peu à peu, cause la fièvre pestilente. Mais si les forces sont debiles, le venin s'enflamme au dedans, & engendre la fièvre, par l'impetuosité de laquelle une portion du venin est poussée en dehors, d'où vient en suite le charbon.

Il en est tout de même du bubon pestilét, lequel procède d'une même malignité que fait le charbon ; mais la matière en est moins ardente, & du tout phlegmoneuse, parce qu'en guerissant elle suppure. Il se forme seulement és émonctoires, sçavoir est, ou derrière les oreilles, ou sous les aisselles, ou dans les aignes. Les anciens n'ont rien écrit du bubon, ou parce que ce mal n'arrivoit pas souvent, ou parce qu'il ne s'en formoit point du tout dans les pays chauds. Mais maintenant c'est chose assez commune pendant la peste, principalement és pays Septentrionaux, où on le remarque, tantost accompagné de charbon, tantost tout seul, & fort quelquesfois auparavant la fièvre, & quelquesfois après la fièvre. Quand il est accompagné de charbon, ils sont d'ordinaire tous deux proches l'un de l'autre, & le bubon vient aux glandules qui sont voisines du charbon ; comme si le charbon est en la teste, ou en quelque autre partie qui n'en est gueres esloignée, le bubon vient au col, & és glandules qui sont derrière les oreilles ; s'il est aux bras, le bubon vient sous les aisselles ; si aux cuisses, il vient dans les aignes. Néanmoins le bubon n'est pas toujours proche du charbon ; mais quelquesfois aussi on les remarque esloignez l'un de l'autre.

La rougeole & la petite verole approchent fort des choses susdites. La petite verole s'esleue sur la peau en forme de pustules blanches, avec de la rougeur à l'entour. Et la rougeole vient comme de petites taches rouges, ou pourprées, ou noires. Or cōme ces choses paroissent en la surface du corps, aussi sont elles au dedans, & occupent tous les viscères, les muscles, les nerfs, & les autres parties solides, où elles ont leur premiere origine. La propre cause de ces deux maux est dans l'air, laquelle est vne certaine qualité maligne, qui est autre, & moins violente que celle qui engendre le charbon & le bubon pestilent : & pource elle n'attaque seulement que les enfans, & ceux qui sont fort jeunes, mais elle ne fait rien à ceux qui sont plus aagez, si ce n'est qu'elle fust plus grande & plus fascheuse. Ces maux ne procedēt ny des vents de midy, ny de l'air pluuieux, ny des chaleurs excessiues; mais bien d'une secrette malignité qui suruiuent en certaines années, tant durant l'hyuer que pendant l'esté : car ces vilenies là cōmencent & finissent avec elle. Le commencement s'en fait par vne fièvre qui ressemble à la synoche, en laquelle le poulx est fréquent, vifte, & vehement. Tous les membres s'appellent, le sommeil surprend, la teste fait mal, le nez distille, les yeux s'enflent, & deuiennent chassieux, le visage deuient rouge & enflammé, la voix enrouée, la respiration difficile & frequente. Au troisieme, quatriesme, & quelquesfois au cinquieme iour, la rougeole, ou la petite verole, sort par la force du mal, sans qu'il se face lors aucune crise, ny que la fièvre cesse; car elle dure iusqu'à ce que le ventre se lasche, & qu'il en soit sorty quantité de vilenies, ou qu'elle se dissipe par le temps.

Il y a plusieurs autres maladies pestilentes, qui

arriuent ou souuent, ou raremēt, chacune desquel-
 les a pour cause euidente & propre, vne certaine
 malignité contractée en l'air, par l'influence des
 astres, dont l'essence ne se peut autrement recon-
 noistre & cōprendre, que par l'euenement. Mais
 neantmoins parce que chacune d'icelles est accō-
 pagnée d'une fièvre maligne & pernicieuse, qui
 prouient de cette contagion, laquelle s'insinuant
 au dedans, attaque premierement le cœur, qui est
 le plus noble de tous les viscères, on les doit fort à
 propos toutes rager sous le genre de fièvre pestilē-
 te. Quant à toutes les maladies ou epidemiques, ou
 contagieuses, ou veneneuses, qui suruiennent sans
 estre accompagnées de fièvre, quoy qu'elles parti-
 cipent de certaine malignité secreete & cachée, il ne
 les faut pourtant pas rapporter icy, ains les reduire
 au nombre des maladies particulieres, dont nous
 allons traiter en suite.

CHAPITRE XIX.

Des symptomes des fièvres.

IL n'y a point de fièvre qui marche seule & sans
 compagnie, mais chacune est assistée tant de
 symptomes, que le plus souuēt de quelques autres
 maladies. Tous les symptomes legers & benins,
 sont prins d'ordinaire seulement pour des signes;
 mais ceux qui sont fâcheux, & qui souuent ne tra-
 uailent pas moins le malade que fait la fièvre, &
 qui debilitent ou abbatent grandement les forces,
 sont dignes de remarque & de consideration.
 Quand il se rencontre donc quelque chose outre

la fièvre, qui tourmente trop le malade, il faut bien prendre garde, & diligemment rechercher si cela vient de la fièvre, comme estant le propre symptôme, ou si c'est de quelque autre maladie qui soit meslée avec la fièvre, & dont la cause propre soit difficile & separée.

Or le symptôme est rendu plus fâcheux, ou par la situation de l'humeur, ou par la débilité de la partie. Car la matière de la fièvre n'estant pas également espandue par tout le corps, ains demeurant particulièrement attachée à quelque partie, il en résulte des symptômes selon la condition d'icelle. Lors aussi qu'auparavant la fièvre, il y avoit quelque partie du corps débilitée, ou de nature, ou par le vice de quelque humeur, ou de quelque mal précédent, bien que l'affection du corps soit égale, neantmoins la partie qui estoit desia depuis long temps offensée, est la première qui en est intéressée & incommodée; & s'il y a en icelle quelque vice caché, il se refueille aussi tost avec la fièvre.

Les symptômes des fièvres qui ont coustume de tourmenter le plus, sont ceux cy : la soif, la soif, la secheresse & rudesse de la langue, la difficulté d'avaler, l'appetit depravé, le dégoût des viandes, l'envie de vomir, le vomissement, le flux de ventre, le hoquet, la syncope, la défaillance de cœur, l'oppression, l'ardeur immodérée, l'agitation & comme contusion du corps, la pesanteur des lombes, la douleur de teste, les veilles, le delire. Et dans la fièvre intermittente, le frisson véhément, & la sueur abondante.

La soif vient de ce que la tunique intérieure du vètricule est ou desséchée d'ardeur, ou imbuë d'une humeur nitreuse, acre & chaude. Celle qui vient d'ardeur s'estanche en beuvant; mais celle qui pro-

cede d'humeur acre, ne s'estanche point pour boire, quand bien le ventre seroit tout plein & tout gonfle d'humeur : car souuēt mesme on est trauaillé de cette soif, que la bouche est toute humide. La seule eschauffaïson du corps n'excite pas vne soif qui tourmente beaucoup, si ce n'est que ces choses entretiennent. Car le corps est quelquesfois embrasé de fièvre, sans aucune soif, non pas que [comme le vulgaire croit] il tombe vne defluxion froide dans l'estomach, dont il soit abreué, mais parce que la cause de l'ardeur est fort esloignée de l'estomach.

La langue deuient quelquesfois seche pendant la fièvre, sans aucune soif, de mesme qu'en ceux qui estans en santé, dorment la bouche ouuerte: elle se desseche aussi par vne ardeur excessiue, & par vne vapeur acre & chaude, qui môte en la gorge, à la bouche & au palais. Cette vapeur a quelquesfois tant de force, qu'elle rend la langue rude & âpre, & quelquesfois creuassée. Si la vapeur est vn peu plus grossiere, ou que la pituite regorge de l'estomach en la bouche, ou qu'elle distille du cerueau, la chaleur l'épaissit & l'endurcit sur la langue, & autour des dents, & quelquesfois le gosier en est tout empasté. Ces mesmes causes venans à occuper le gosier, & l'œsophage, & à estreindre ou dessecher le passage des viandes, il s'en ensuit vne difficulté d'aualer. On n'a pourtant iamais remarqué, que par ces causes seules le gosier vint à se boucher tout à fait, ce que neantmoins plusieurs appréhendent.

Le goust se depraue lors que la langue ou la bouche deuient amere, à cause de la bile, ou est infectée de la substance, ou de la vapeur de quelque humeur corrompue: & quoy que le goust soit depraué, on ne lais-

se pas pour cela d'auoir quelquesfois de l'appetit. Quant au degoust des viandes, ou il precede la fiéure, ou c'en est le premier symptome. Car il prouient de plusieurs causes: parce que la seule perturbation du corps, & toute humectation du vètricule arrousé de quelque humeur, laquelle ou le remplist & le soule, ou en assoupit & rabbat la vertu appetitiue par quelque estrangere qualité: comme encor vne vapeur corrompuë esleuée de quelque part que ce soit, en l'orifice de l'estomach, ou bien seulement vne qualité ennemie qui s'attache là, peruertissent & ostent l'appetit.

La nausée & le vomissement ont pour causes, ou vne humeur, ou vne vapeur, ou vne qualité, qui tantost relasche & ramollit par trop, comme fait la pituite douce: tantost excite & prouoque la faculté expultrice par son abondance, ou par son acrimonie, comme toute sorte de bile: tantost attaque ou ruyne par sa malignité, la vigueur de cette mesme faculté, comme fait la qualité maligne & pestilente de la fiéure. Lors dōc que quelqu'une de ces causes s'attache & adhère tellement, ou à l'orifice de l'estomach, ou autour des tuniques d'iceluy, qu'elle ne s'en puisse destacher, si l'estomach est remply de breuage & de viandes, elle les fait reuomir. Mais si cette cause n'est point attachée, ny collée à l'estomach, ains qu'elle flotte en iceluy, ou y regorge d'ailleurs, il s'en ensuit vn vomissement de bile ou de pituite.

Le flux de ventre qu'on nomme lienterie, succede quelquesfois à la fiéure, non moins que le vomissement, & ce quand l'estomach est incommodé ou par l'abondance, ou par l'acrimonie, ou par la malignité des humeurs ou des vapeurs, iusques à ne pouuoir retenir ou digerer la viande. Quel-

quesfois aussi cela vient pour auoir beu de l'eau froide, ou en trop grande quantité, ou sans necessité, principalement après que l'estomach a esté trauaillé de quelque purgation.

Le hocquet, suiuant l'autorité d'Hippocrate, vient, ou d'inanition, ou de repletion; mais celuy dont on est surprins dans les fièvres aiguës & malignes, estant d'ordinaire pernicieux, vient d'une autre cause, & procede, ou de l'acrimonie, ou de la malignité & mauuaise qualité d'une humeur corrompue, telle qu'est celle qui se remarque en la fièvre pestilente; parce que comme elle prouoque le vomissement, & cause le plus souuent de la defaillance de cœur, aussi quand elle vient à se coller fortement aux tuniques de l'estomach, elle excite le hocquet.

Le cœur fait mal & defaut en la fièvre, tantost par la malignité de l'humeur qui cause la fièvre veneneuse, tantost par une bile erugineuse, ou prassine, ou noire, laquelle mord & tireille fortement l'orifice de l'estomach, ou les membranes des parties precordiales. Or quand cette matiere émeue, sortant des veines, se iette sur le cœur, il s'en ensuit une defaillance beaucoup plus grande, & mesmes une syncope fort d'agereuse, lors qu'elle s'y iette soudainement, & tout à coup. La defaillance viét aussi quelquesfois de l'accez des symptomes qui accompagnent les fièvres, cōme sont les veilles, la douleur, la crainte, toute euacuation soudaine & immoderee, & le viure subtil & prins en petite quantité.

Tout ce que j'ay rapporté iusques ici, prouiet d'ordinaire de l'offese de l'estomach, ou des entrailles, lors qu'une bile tres acre, ou quelque autre humeur pourrie ou veneneuse, se iette avec trop de ve-

hemence sur ces parties là, ou y enuoye quelque mauuaise vapeur. Quant aux autres symptomes qui ne procedent point de ces causes là, ils tirent leur origine de quelqu'autre maladie particuliere.

L'oppression dont on est presque suffoqué, & qui agite ça & là le malade, vient quelquesfois de l'ardeur d'une bile prassine, ou erugineuse, qui bouillonne autour du cœur, comme il arriue dans le caufus: d'autresfois elle prouient de l'abondance de l'humeur attachee aux entrailles, ou aux visceres, laquelle estant esmeuë par la fièvre, presse l'estomach & le diaphragme. Cette derniere sorte d'oppression n'est pas moins frequente dans la fièvre intermittente, que dans la continuë, & est ordinairement accompagnée d'une distension des entrailles, & fait de la douleur quand on touche ou presse sur ces parties là. Finalement l'oppression est tres grande, lors qu'il y a quelque phlegmon au foye, ou en la ratte. La difficulté de respirer approche fort de l'oppression, & n'est pas de peu d'importance dans les maladies aiguës. Elle vient souuent en suite de l'oppression des parties precordiales; quelquesfois elle prouient de l'excessive chaleur du cœur, & des poulmons, quand, comme dans le caufus, la bile & la pourriture s'enflamment autour de ces lieux là: ou bien lors que la matiere émeuë dans les veines, se iette là avec impetuofité.

La difficulté de respirer est rare & profonde, en ceux qui tombent en delire, & qui ont le sens distrait ailleurs; mais elle est profonde & frequente en ceux qui sont desia proches de la mort: & cela vient non tant de la vehemence de l'ardeur, que du defaut de la chaleur naturelle, & de la foi-

blesse des forces. Quant à celle qui est procedee de defluxion, ou de quelqu'autre cause, elle ne doit point estre contee entre les symptomes des fièvres.

La douleur & pesanteur des lombes, se fait principalement lors que le poids de l'humeur peccâte presse fort la veine caue, ou la grande artere des lombes: & si cette humeur est pareillement grandement enflammee, elle excite des ardeurs es lombes, & es reins. Mais quand vne portion d'icelle s'épand par les petites veines qui sont vers les extremités du corps, & mesmes par les muscles, on est trauaillé de lassitudes, de pesanteurs des membres, & de douleurs des iointures.

De ces causes là, & principalement de l'oppression, de la douleur des lombes & des iointures, comme aussi de l'ardeur, s'ensuit vne grande agitation du corps, qui fait que tantost on se leue, tantost on se couche; tantost on se tourne d'un costé, tantost de l'autre, sans pouuoir demeurer en repos. Mais quand le corps n'est point agité ny par la force de la douleur, ny par les causes susdites, il faut croire que la matiere du mal est émeuë dans les veines, & court ça & là, ou que le cœur est attaqué par quelque malignité secrette, comme dans la fièvre pestilente.

La douleur de teste pendant la fièvre, vient du consentement des parties inferieures, & principalement des entrailles, d'où l'humeur bouillonnante enuoye quantité de vapeur à la teste, par les regions qui sont entre les deux, (car le corps est perspirable par tout,) & cette vapeur frappant les meninges & le pericrane, par sa chaleur ou acrimonie, ou

ou les estendant par son abondance, cause la douleur de teste. Quelques fois aussi le sang plus subtil montant des grandes veines & des arteres, excite vne douleur qui bat vers les temples. Or toute douleur de teste prouenuë de fièvre, attaque, ou les temples, ou le front, ou tout le deuant de la teste. Quant à celle qui prend au derriere de la teste, ou sur le col, ou bien autour des oreilles, quoy qu'elle vienne avec la fièvre, la cause particuliere en est dans la teste, & ce n'est pas vn symptome de fièvre. Car il arriue souuent que par l'émotion de l'humeur, il se refueille avec la fièvre quelque vieille douleur, qui estoit comme assoupie en ces lieux-là, de mesme que quand il y a quelque humeur que ce soit outre nature autour des membranes & des iointures, laquelle ne faisant point de mal auparauant, vient à s'esmouuoir, & faire de la douleur après auoir beu quantité de vin trop pur.

Les veilles prouiennent de toutes les causes qui empeschent le sommeil & le repos; comme sont, la douleur, la chaleur excessiue, l'oppression, la soif, & tout ce qui incommode par trop le malade, & quoy que le plus souuent ces choses ne soient pas beaucoup fascheuses, l'on ne peut toutesfois reposer. Cela arriue ordinairement lors que quelque vapeur chaude & acre offensant plus la substance du cerueau, que les meninges la desseche & l'eschauffe, & attenuë grandement les esprits, lesquels en suite se dispersent de costé & d'autre. On remarque pareillement qu'il arriue là mesme chose, sans qu'il y ait beaucoup d'ardeur, toutesfois & quantes que le cœur est attaqué de quelque qualité pernicieuse. La

condition du sommeil est aussi fort considerable : car dans les maladies aiguës, il arriue souuent que les malades se resueillent sans se souuenir ny penser qu'ils ayent dormy. Si ces dernieres causes sont fort vehementes, ou si quelque bile chaude monte au ecrueau, & ce quelquesfois après que les vrines sont deuenues plus pures, alors l'esprit se trouble, & l'imagination est trauaillée de phantosmes monstrueux, en suite dequoy vient aussi tost le delire, & l'alienation du iugement, dont nous exposerons cy après les diuerfes especes.

Or le delire est plus espouuantable que dangereux, elautant qu'il oste souuent l'vsage de la raison sans aucun peril de la vie. On preuoit quand il doit arriuer, par le babil importun, par le geste immodéré, ou par toute autre imprudence effrenée du malade. Or il arriue d'ordinaire qu'après que l'humeur s'est adoucié, le delire cesse, & le malade s'endort fort profondement. Le tremblement ou frisson, bien que propre aux fièvres intermittentes, est neantmoins quelquesfois demesuré. Or il prouient des causes que nous auons cy deuant expliquées. Celuy qui suruiuent quelquesfois dans la fièvre continuë, est vn indice de changement, ou de solution.

La sueur est commune, non seulement és fièvres intermittentes, mais aussi és continuës, & en quelques autres maladies. La matiere d'icelle est vne humeur qui incommode, ou par son abondance, ou par sa qualité; laquelle s'exhale manifestement; & tout à coup, par les pores de la peau. Quant à ce qu'elle est chaude ou froide, benigne, ou acre, subtile, ou grossiere, & visqueu-

se, puante, ou fuaue, cela exprime le genre de l'humeur qui la produit. La sueur sort ou par la force de la nature qui tasche de rejeter quelque chose de superflu, ou de soy-mesme, & par la propre impetuosité. On appelle celle là naturelle, & cette cy symptomatique. Celle qui sort en abondance sur la fin de l'accez de la fièvre intermittente, & celle qui vient dans la crise des fièvres continuës, sont naturelles; & celle là est outre la nature, & symptomatique, laquelle arriue en quelque autre façon que ce soit, ou en quelque autre temps de la maladie. Elle commence d'ordinaire par la teste, puis elle sort peu à peu des autres parties. Car celle là seulement doit estre estimée vtile & selon la nature, laquelle vient après que le ventre s'est déchargé, & qui après que la plus crasse matiere de la maladie a esté euacuée, dissipe le reste du plus subtil par la surface du corps. Mais celle qui sort dès le commencement de la maladie, ou en quelque autre temps, ou deuant la concoction, ou bien auant la crise, est inutile & symptomatique, de laquelle on ne peut asseurément iuger de la solution du mal. Celle qui suruiet en la syncope, & en la defaillance du cœur, n'est pas dite sueur, ains moiteur proprement.

Voilà quels sont les principaux symptomes des fièvres, par l'espece & grandeur desquels l'on peut reconnoistre en quelle partie réside particulièrement la matiere contenant de la fièvre, où quelle partie du corps c'est qui estoit la plus debile, ou plus incommodée du vice de l'humeur auant que la fièvre commen-

est. Voilà tout ce que j'ay pensé deuoir dire
touchant l'essence & le discernement des fièvres,
dont ie termine icy le discours, pour
passer à celuy des maladies des
parties singulieres.



LIVRE CINQVIESME.

DES MALADIES ET
Symptomes de châque partie.

PREFACE.



CEUX qui ont tout les premiers posé les principes, & comme ietté les fondemens de la Medecine, se sont iustement, & à bon droit, attribuez cette gloire, d'imposer des noms à leur fantaisie, aux maux non accoustumez, qui auoient esté par eux premierement reconnus. Mais par ce qu'ils n'auoient encor qu'une rude & grossiere connoissance des choses, ils ont forgé des noms aux maladies, prins, non de l'essence de la chose à laquelle le Medecin doit appliquer son soin premierement & principalement, ains de ce qui d'auenture leur venoit le premier au rencontre; de mesme qu'en ce siecle on a donné plusieurs noms à la grosse vero-

le. Les maladies ont donc esté nommees, & receu leur denomination, les vnes de la partie affectée, en laquelle elles résident, comme la pleuresie, la nephritique, la pulmonie: les autres de la matiere efficiente, comme la melancholie, la cholere, la pierre: les autres de quelque grand symptome, comme l'epilepsie, l'apoplexie, la paralysie, la tremeur: les autres de la ressemblance & du rapport qu'elles avoient avec certaines choses externes, comme l'elephantiasis, le cancer, le polype, le satyriasis. Voila comme ces Anciens & premiers Medecins, qui ne faisoient profession que de la seule empirique, ont baptisé les maladies, & fondé la Medecine, que les dogmatiques ont par après reduite en Art, redigeant les longues observations de leurs predecesseurs, en regles & en preceptes: & pour ne brouiller & obscurcir les choses par des mots nouveaux, ils ont retenu les noms des maladies tels qu'ils estoient desia depuis long temps en usage, dont aussi les autres se sont servis depuis. Nous nous servirons pareillement de ces mesmes noms, & gardans l'ordre des parties du corps, nous en examinerons toutes les maladies avec leurs causes, & leur crigine, que nous deduirons non seulement par fantaisie, comme plusieurs se les imaginent, mais sur tout conformement à la façon de les guerir, & à ce qu'il conste de là comment il y faut remedier. Et de

fait, ie ne pense pas qu'on puisse iamais bien reconnoistre & discerner entierement aucune maladie, si on ne sçait comme' toucher au doigt, & voir à l'œil, quel endroit c'est dans le corps humain, qui est le premier affecté, quell'est l'affection qui s'y retrouue outre l'ordre de la nature, d'où elle prouient, si le mal s'est formé en ce lieu là, sans venir d'ailleurs, s'il y resulte par sympathie & communication, & si finalement il y a quelque cause interieure qui le foment. Car il faut que celui qui veut bien entreprendre la cure des maladies, sçache rechercher & discerner chacune de ces choses là par des signes certains.

C'est seulement en cette doctrine des maladies, & de leurs causes, que ie m'employe maintenant, reseruant en vn autre lieu de parler du moyë de les guerir, afin de ne me point embarrasser dans la turbulente confusion de tant de choses ensemble, qu'on ne pourroit ainsi traiter selon l'ordre de la discipline. Autre est la methode de connoistre les maladies, & autre celle de les guerir, & le tout ensemble ne se peut conuenablement accommoder à chaque chose en particulier.

Or ie traitteray premierement des maladies internes du corps, puis des externes, lesquelles paroissans au dehors, requierent ordinairement le secours de la chirurgie: aduer-

passant dès l'entree, que personne ne mette icy le nez, qu'auparavant il ne sçache tres-bien l'anatomie; & que par une forte application de l'esprit, il contemple dans le corps humain ce qu'il aura icy leu, ou ce qu'il en aura entendu, (or l'entendement est rendu plus attentif aux choses que l'on oit, qu'en celles qu'on lit) afin qu'il enracine mieux en sa memoire la sommaire connoissance de ces choses.

CHAPITRE PREMIER.

De la douleur de teste, & des causes d'icelles.

TOVS les maux de teste qui ont iadis esté remarquez par la pratique, sont des symptomes, & non des maladies. Nous les diuison en trois ordres, selon les diuers endroits qui en sont affectez : car les vns attaquent les membranes de la teste, les autres la substance du cerueau, & les autres sont és passages & dans les conduits. L'appelle membranes les meninges & le pericrane, où seulement se font les douleurs plus sensibles de la teste, qui sont la cephalalgie, la cephalée, & la migraine. Dans la substance du cerueau, qui est le siege & l'organe des facultez principales, sçauoir est de l'entendement, de l'imagination, & de la memoire, les symptomes de la fonction deprauee sont, la phrenesie, le delire, la melancholie, la lycanthropie, la manie: & ceux de la fonction abolie sont, la folie, le defaut de iugement, la perte de memoire, l'assoupissement, le profond sommeil, la catalepsie, la lethargie. Dans les ventricules du cerueau, & és conduits par où les esprits animaux se communiquent aux organes du sentiment & du mouuement, se font ces symptomes de l'un & de l'autre, sçauoir est, le vertige, l'epilepsie, l'incube, l'apoplexie, la paralysie, la conuulsion, le tremblement, & le catharre, sur chacune desquelles choses il nous faut derechef estendre plus au long.

Toute douleur de teste se fait és membranes, lesquelles n'estans point d'ailleurs offensées ny par quelque coup, ny par quelque odeur forte, il faut qu'elles soient affectées par quelque cause interne, qui en altere la temperie, ou les frappe, ou les separe, ou les étende. Or les mêmes signes qui marquent l'espece de la douleur, en font aussi reconnoistre les causes efficientes. La douleur acre, rongeante, & perçante, vient d'une humeur ou d'une vapeur bilieuse & acre, qui frappe les membranes: celle qui est pesante, vient de l'abondance des humeurs froides & phlegmatiques: celle qui se fait avec tension, procedé des vents, ou de l'exuberance des humeurs moins malignes, qui s'insinuent entre le test & le pericrane, ou bien entre le test & la grosse meninge, & separent ces membranes de l'os: la douleur qui est accompagnée de battement, est causée d'un sang subtil & bilieux, ou par une redondance d'esprits, dont les arteres estans remplies & enflées, font leur battement avec plus de vehemence, & choquent les membranes. Et c'est presque de cette façon que se font toutes les douleurs de teste qui se resueillent tous les iours reglement à certaines heures, soit avec fièvre, ou sans fièvre. Mais l'on peut encor plus asseurement découvrir les causes de ces douleurs, par les mêmes signes qui font reconnoistre quelle humeur c'est qui excède en la teste.

Toute douleur de teste est ou externe, ou interne: l'externe ayant pour siege le pericrane, fait qu'on ne peut souffrir que la racine des cheveux soit renversée, & s'augmente quand on vient à presser la teste, au lieu que celle qui est au dedans du crane se diminue. C'est une chose fausse, & entièrement esloignée de la verité, qu'il n'y ait que

les douleurs internes qui s'estendent iusques aux racines des yeux; car les exterieures mesmes donnent souuent iusques là, parce que le pericrane où elles se font, entoure la cauité de l'œil. La douleur de teste ordinaire, & dont la personne est depuis plusieurs ans souuent trauaillée à la moindre occasion, est ou cephalée, ou migraine: la cephalée tient par toute la teste, ou en la plus grande partie d'icelle, & la migraine ne prend que d'un costé, & commence ordinairement par le battement des temples. De plus, la cephalée a tousiours sa cause prochaine dans la teste; au lieu que la mygraine vient quelquesfois par sympathie des entrailles & des parties basses. La cephalalgie comprend l'une & l'autre, voire mesme toute autre douleur de teste excitée ou par la fièvre, ou par l'ardeur du Soleil, ou par l'vyrongnerie, ou par quelque autre cause euidente. Voila donc comme on doit discerner l'espece de cette douleur, & la cause d'icelle.

CHAPITRE II.

Les symptomes de la faculté principale.

LA deprauation de la principale fonction de l'Ame, qui a son siege dans la substance du cerueau, comme en son propre domicile, est la folie, que les Grecs appellent *Paraphrosyni* & *Paranoia*, qui est vne alienation d'esprit. Ceux qui en sont attaquez raisonnent mal, ou forment des pensées extrauagantes de choses qui ne sont point, ou

qui vont tout autrement qu'ils se les imaginent. Ceux, dit Hippocrate, qui ont ainsi l'esprit blessé, ne sentent aucune douleur.

Il y a trois sortes de foux: les vns extrauaguent seulement de la pensée, qui mesme en veillant ont l'imagination travaillée de quelques vains phantomes: les autres extrauagans de parole, disent beaucoup de choses sans ordre & sans iugement, ou avec effronterie & impudence: les autres en passent iusques à l'acte, & font effectiuement ce qui leur vient en l'imagination. La cause de tous ces degrez d'extrauagance, est vne humeur ou vapeur tres chaude, espanduë par la substance du cerueau, & dans les ventricules d'iceluy, par l'impulsion & agitation de laquelle l'esprit est transporté en des resueries fausses & imaginaires.

Or l'alienation du iugement est quelquesfois accompagnée de fièvre, & quelquesfois sans fièvre. Celle qui se rencontre meslée de fièvre est ou phrenesie, ou delire; en quoy il y a ceste difference, que le simple delire vient de bile, ou bien d'un sang fort subtil épandu dans le cerueau, ou de quelque vapeur chaude, qui monte de l'estomach, des entrailles, ou mesme de tout le corps, comme il arriue au fort d'une fièvre tres ardente: & la phrenesie procede tousiours de quelque mal qui attaque proprement & premierement le cerueau, tel qu'est vne inflammation ou vne erysipele. Ils different encore, en ce que le delire est souuent un symptome de fièvre, ou d'une violente maladie; au lieu que la phrenesie n'est point symptome, mais bien cause de fièvre. De plus, le delire est grandement frequent, & la phrenesie n'arriue que bien peu. Or pour discerner clairement si la cause

du delire est le sang, ou la bile iaune, il faut prendre garde à l'espece de la resuerie: car les delires, dit Hippocrate, qui sont accompagnez de ris, ont moins de peril, que ceux qui sont serieux; parce que ceux là viennent de l'abondance du sang, & ceux-cy estans farouches, sont excitez par l'acrimonie de la bile. Finalement on les discerne par les mesmes signes qui demonstrent quelle humeur c'est qui predomine. Voila quelles sont les especes de folie qui sont accompagnees de fièvre.

Quant à celle qui est sans fièvre, elle est ou simple, ou melancholique. La simple, qui est la moindre, vient quelquesfois de l'inanition du cerueau, & d'une debilité de la faculté principale, comme celle qu'Hippocrate a dit proceder d'une trop grande effusion de sang, ou par des veilles excessiues. Elle s'ensuit aussi quelquesfois d'une secousse & impulsion du cerueau fort vehemente, qui trouble les esprits animaux, & broüille l'entendement, comme cette espece de folie, dont Hippocrate a parlé, qui est causée de quelque coup receu en la teste. On tient mesme qu'elle vient encore pour auoir trop beu de vin & c'est le plus souuent sans aucune fièvre, sçauoir est, quand la teste est eschauffée & fortement esmeuë de l'abondance du sang & des vapeurs excessiuement chaudes.

La folie melancholique est de trois sortes: la melancholie, la lycanthropie, & la manie. La melancholie est une alienation d'entendement, par laquelle ceux qui en sont attaquez, pensent, disent, ou font des choses absurdes, & grandement esloignées du iugement, & de la raison, & tout cela avec crainte & tristesse, lesquelles Hippocrate prend toutes deux pour signes tres certains de melancholie. Ceux qui commencent à deuenir melan-

choliques ont l'esprit abbatu, lasche, & fort hebeté, ils negligent & leur personne & leurs affaires, la vie leur est fascheuse, & tres - desagreable, quoy qu'ils en apprehendent grandement la priuation. Le mal estant desia fort enraciné, ils se figurent beaucoup de choses en l'esprit & en la penlée, & proferent des paroles d'extrauagance, mal à propos, & confusement; & ce presque tousiours de choses tristes : les autres s'imaginent qu'ils ne doiuent pas mesmes parler, mais pensent qu'il leur faut passer toute leur vie dans la retraitte & dans le silence; ils fuyent en suite, tant qu'ils peuuent, la compagnie & la presence des hommes, plusieurs cherchent les solitudes, & se plaisent quelquesfois à errer parmy les sepulchres des morts, ou à se cacher dans les cauernes affreuses, & hurlent souuent comme des loups, d'où vient que ce mal est lors proprement appellé lycanthropie. Il y a vne infinité de ces melancholiques; parce que ces resueries se font diuersement, selon qu'a esté autresfois l'application de l'esprit, & la condition de la vie. Car comme Aristote l'a remarqué, de mesme que le vin opere conformement à la nature, & aux mœurs de ceux qui le boiuent, ainsi s'accommode la melancholie à la constitution de ceux qui en sont attaquez. Il y en a beaucoup qui resuent sans fièvre, lesquels passans pour melancholiques, si principalement ils sont tristes & craintifs, ne sont pas malaisez à gouuerner, & ne font rien de violent : parce que la folie melancholique vient d'humeur froide; au lieu que toutes les autres fortes de folie sont causées par la chaleur.

A la melancholie succede la manie, que nous appellons fureur, ou forcenerie, laquelle quant aux pensées, aux paroles, & aux actions, se rappor-

te bien aux extrauagances des melancholiques, mais elle a cela de plus, qu'elle emporte le patient à la colere, aux querelles, & aux crieries, luy rend l'aspect horrible, & finalement luy travaille le corps & l'esprit avec beaucoup plus de trouble & d'impetuosité, iusques à se ietter furieusement, & avec vne rage extraordinaire, comme des bestes feroces & cruelles, sur ceux qui se rencontrent, pour les mordre à belles dents, les déchirer des ongles, ou les assommer à coups de poing. Venons maintenant aux causes de ces sortes de folie melancholique. La melancholie vient d'une humeur noire & feculente, ou de quelque vapeur de mesme nature; qui attaque le siege de l'entendement; & cette humeur quelquesfois croupist en la ratte, & és parties voisines d'icelle, quelquesfois elle s'amasse en la teste seulement, & d'autresfois elle se respand dans les veines, & mesmes par tout le corps. Ce qui fait que la melancholie est ou hypochondriaque, ou primitive, ou vniuersellement causée par le vice de tout le corps.

L'hypochondriaque, qu'on nomme aussi flatueuse, est la moins fascheuse de toutes, elle s'excite par la sympathie de l'hypochondre gauche, d'où s'esleue vne vapeur noire & obscure vers les organes de l'esprit. Les signes en sont remarquables au dessous des entrailles, où le battement des arteres est vehement & fascheux, comme Hippocrate mesme l'a remarqué. Si les veines des entrailles battent, c'est marque ou de trouble, ou de delire: les entrailles sont eschauffées par l'ardeur de l'humeur, sans neantmoins exciter de soif, car la digestion de l'estomach estant lesée, la bouche est humectée de beaucoup de salive: d'où s'ensui-

uent aussi des rots, des vents, des bruits, & des flottemens: souuent il suruient quelque douleur & palpitation de cœur, & mesmes quelquesfois vne suffocation. Après auoir mangé des viandes trop chaudes & difficiles à digérer, il s'esleue vne vapeur chaude, qui augmente tant les symptomes susdits, que toutes les sortes de resuerie melancholique; au lieu que tout cela se diminue par les viandes rafraischissantes, par les dejections du ventre, par le vomissement, & par les rots. Il s'en rencontre aussi plusieurs qui ont quelque tumeur dure & douloureuse en la ratte, ou au mesentere, & autres semblables marques de ces mesmes symptomes. En d'autres, lors principalement qu'ils sont deuenus tels par l'adustion de la bile iaune, & que ce n'est pas la seule lye melancholique, ains la bile noire qui s'est renduë fâcheuse, on ne s'apperçoit point qu'il s'y soit fait vn manifeste amas d'humeurs.

La melancholie primitiue, en laquelle le cerueau est le premier affecté, soit qu'elle procede du vice particulier d'iceluy, ou du desordre de tout le corps, se reconnoist, en ce qu'on est trauaillé sans que les entrailles soient offensées, & qu'il se trouue des signes qui demonstrent que l'humeur melancholique abonde & predomine ou en la teste, ou par tout le corps. Or quand la bile noire est engendrée par l'adustion ou de la melancholie, ou du sang, ou de la bile iaune, lors suruient la manie, qui par ce moyen succède souuent à la melancholie échauffée. Cette humeur noire, aussi bien que la melancholie, s'amasse tantost és entrailles, tantost en tout le corps, tantost seulement en la teste; & cette humeur estant chaude, excite des resueries cruelles & horribles: laquelle venant à se pour-

rir, amene la fièvre; mais si elle ne fait seulement que s'échauffer outre mesure, elle cause vne manie solitaire sans fièvre. Voila quelles sont les fonctions depraüées ou troubles de l'esprit, lesquelles sont presque tousiours accompagnées de veilles qui se rencontrent quelquesfois si opiniastres & tellement longues & continuës, qu'il s'est trouué telle personne trouuillée de ce mal, qui passa quatorze mois sans dormir. Venons maintenant aux symptomes contraires.

La folie ou fatuité, que les Grecs nomment *Morosis*, est vne fonction de l'entendement diminuée, & affoiblie, ou vne certaine paresse & pesanteur d'esprit. L'alienation de l'esprit, ou anoiä des Grecs, est vn defect & priuation ou de l'imagination, ou du iugement, qui fait que ceux qui en sont atteints dès la naissance, apprennent malaisément à parler, pour n'auoir pas assez d'esprit. De cette classe est la decadence, debilité, & perte de la memoire, qu'on appelle oubliance. Et la cause de tout cela est l'intemperie froide du cerueau, qui rend toutes les fonctions d'iceluy pesantes & paresseuses; cela vient aussi quelquesfois d'une vehemente concussion du cerueau, ou des temples, par vn coup, ou par vne playe, qui interesse & debilitte cét organe. Quant à ceux qui sont entachez de ce vice dès le ventre de la mere, c'est qu'ils ont la teste mal faite, & le cerueau mal formé, ou bien qu'ils n'ont gueres de ceruelle, comme ceux qui ont la teste petite.

Or quand l'intemperie froide du cerueau n'est pas telle simplement, ains procede d'une humeur froide & pituiteuse, outre ce que dessus, il suruient encor quelque symptome soporeux, comme sont le sommeil, l'assoupissement; la cataphore & la

lethargie. Le sommeil naturel est bien vn repos du cerueau, & de la faculté animale, qui sert à recueillir & reparer les esprits & les forces, dissipées par les veilles, & dispersées par les organes des sens & du mouuement. C'est pourquoy l'inanition & la lassitude sont aucunement causes du sommeil & du repos, ce qui fait que l'on dort plus fort & plus paisiblement après auoir veillé & beaucoup fatigué. Mais le sommeil qui n'est pas naturel, prouient, comme veut Aristote, de la repletion du cerueau, qui est, ou attaqué de quelque exhalaison vaporeuse, comme il arriue pour s'estre baigné, pour auoir trop prins de vin & de viandes, pour n'auoir pas le ventre libre: ou occupé d'une abondance d'humeurs qui ne sont excessiuemēt ny chaudes, ny froides: car si elles estoient froides, & entierement pituiteuses, & qu'elles se répandissent en grande abondance par la substance du cerueau, & dans les ventricules d'iceluy, où le propre excrement du cerueau a cōstume de s'amasser & reserrer, elles exciteroient, non le sommeil simplement, ains vn assoupissement profond, que les Grecs appellent *Cataphora batheix*, ou mesmes le *verterne*, qui est encore plus que l'assoupissement, si l'abondance de ces humeurs est grandement excessiue. Que si de plus cette humeur venant à se pourrir, cause la fièvre, suruiendra la lethargie, qui ne differe de l'assoupissement qu'à raison de la seule fièvre bilieuse, mais l'assoupissement qui est profond, se peut à peine distinguer de l'apoplexie; cōbien qu'il y ait cette difference, que l'assoupissement laisse la respiration libre & facile, sans raallément; au lieu qu'en l'apoplexie elle deuient peu à peu empeschée, & fait raaller. Quant aux autres fonctions du mouuement, du sens, & du iugemēt,

elles demeurent toutes interceptées, & cessent aussi bien; voire d'auantage, dans l'assoupissement que dans l'apoplexie, quoy qu'il me soit arriué de rencontrer vn de ces malades qui auoit encore l'usage de la memoire. Ce personnage estant si fort assoupy pendant l'accez de son mal, qu'il ne sentoit aucunement quand on luy arrachoit les cheveux, & quand on le picquoit, tesmoigna neantmoins, tout en cholere, après qu'on l'eut esueillé, qu'il se ressouuenoit bien de tout ce qu'on luy auoit fait pour le tourmenter dans son assoupissement.

Les symptomes soporeux arriuent encore d'une vehemente concussion du cerueau, par quelque coup, ou par quelque cheute, parce que les esprits estans émeus & agitez, ils ne peuuent bien faire aucune action, & alors la personne demeure estonnée, comme qui seroit surpris, ou de frayeur, ou de honte. Que si le test, estant rompu & enfoncé par la violence & impetuosité de la concussion, oppresse les meninges & le cerueau, le malade perd aussi tost le sentiment & la parole. Mais si le cerueau vient à estre offensé, & qu'il y ait solution de continuité en la substance d'iceluy, ou es nerfs qui en procedét, tout estant par ce moyen en desordre & debilité, il s'ensuit vn assoupissement tres pernicieux, qui nous laisse fort peu d'esperance de salut. Ce qui a fait dire à Hippocrate, Que l'estourdissement causé de quelque coup receu en la teste, est vne chose mauuaise. Et de rechef, Que ceux qui ont le cerueau attaqué par quelque cause qui le blesse, perdent necessairement tout aussi tost la parole. J'ay veu quelqu'un terrassé de la violence d'un coup si grand & si rude, que le sang luy sortoit par les yeux, par les oreilles, par le nez, & par la bou-

che; en suite dequoy il fut faisi d'un tel étourdissement des sens & de l'esprit, qu'on luy perça le test, bouscha l'ouverture, & appliqua tous les remedes conuenables, sans qu'il en sentist rien du tout, & ayant esté finalement guery dans le troisieme mois, il ne se souuint aucunement de tout ce qui luy estoit aduenu. Or pour sçauoir si le symptome soporeux vient de contusion, ou de l'abondance des humeurs froides, cela se discerne facilement, tant par les signes propres, que par ce qui a precedé le mal.

Il se trouue encore vn autre symptome produit par vn meslange de causes contraires, lors que la pituite & la bile iaune se rencontrent ensemble au cerueau dans vn excez immodéré. Ce mal s'appelle Catoche, ou Catalepsie, c'est à dire, saisissement ou sommeil veillant, parce que l'esprit & tous les sens estans soudainement saisis, gardent la mesme forme & figure que d'une personne qui veille, bien que toutes leurs fonctions soient cependant assoupies. En quelque posture que soit le malade quand il est surprins, il y demeure pendant le mal. A dire le vray, ce symptome est rare & merueilleux, & cause de l'estonnement à ceux qui voyent cela. Je rapporteray à ce propos l'histoire de deux personnes saisies de la sorte, pour faire discerner tous les autres par la marque de ceux-cy. Vn de ces malades estant fort attentif à l'estude, fut tout subitement atteint de ce mal, & demeura tellement ferme, qu'estant assis, & tenant encore sa plume entre les doigts, les yeux fichez sur ses liures, il sembloit continuer son estude, iusques à ce qu'estant appelé & poussé, on s'apperceut qu'il estoit tout à fait sans sentiment, & sans mouuement. Visitant l'autre de ces per-

sonnes, ie la trouuay toute étendue, comme si elle eust esté morte, elle ne voyoit goutte, n'oyoit rien, & ne sentoit point qu'on la picquast; elle auoit neantmoins la respiration facile, & aualloit promptement tout ce qu'on luy mettoit en la bouche. Estant leuée hors du liét, elle se tenoit toute seule sur les pieds, & cheminoit à mesure qu'on la pousoit, & de quelque sens qu'on luy fist plier la main, le bras ou la iambe, elle les retenoit au mesme estat: de sorte que vous l'eussiez prinse pour quelque fantosme, ou pour vne statuë mouuante artificiellement. Qu'il conste donc de là, quels sont les symptomes du cerueau qui prouiennent de la simple intemperie, & quels ceux qui sont causez par le vice des humeurs. Passons maintenant aux maux qui se rencontrent és ventricules & conduits.

CHAPITRE III.

Les symptomes du mouuement & du sentiment.

LE vertige est, quand il semble que tout tourne, dont le cerueau & les sens sont tellement agités, qu'il arriue souuent que le malade tôle, s'il n'enencôtre quelque appuy. La suffusio est vn symptome moins fascheux que le vertige, car elle fait qu'il semble seulement qu'on voye voleter ça & là deuant les yeûx des fumées, des nuages, des mousches, & choses semblables. La cause prochaine de cela est vne vapeur subtile & chaude qui s'épand par les arteres, dans les ventricules du cerueau,

veau, laquelle agitant & pouffant diuerfement les esprits & les humeurs en la partie de l'entrelasement choroïde, trouble les sens & le mouuement. Et ceste vapeur s'exhale d'ordinaire de quelque humeur vicieuse, non point par vne suite continuée, ains par certaines reuolutions, & quand elle vient à estre excitée par des causes euidentes. Or ceste humeur croupist quelquesfois dans le cerueau, le plus souuent dans l'estomach & dans les entrailles, ou bien dans les autres parties. D'où vient qu'il y a vne espece de vertige causée par quelque mal qui attaque immediatement le cerueau, & vne autre qui se fait par communication de l'estomach & des autres parties. La premiere se reconnoist par la douleur ou pesanteur de la teste, par le tintement des oreilles, par l'alteration de l'odorat & de l'ouye: & la seconde a pour marques la nausée, le dégoust, l'amertume de la bouche, & la mordication du cœur, qu'on nomme Cardiogme. Ou bien s'il y a quelqu'autre partie qui donne origine à ce mal, on en verra paroistre les signes propres: comme en certaine personne en qui le vertige procedoit du derriere de la teste, dont il n'y auoit qu'une fort petite partie qui fist de la douleur, au moindre attouchement de laquelle, l'humeur s'excitant expiroit vne vapeur par tous les sens, qui les offusquoit aussi-tost. Ceux qui sont subiets au vertige ou à la suffusion, tombent en l'accez de ce mal par des causes euidentes, telles que sont, l'ardeur du Soleil, l'exercice immodéré, & tout ce qui eschauffe ou agite les humeurs, ou qui frappe le cerueau; puis le roulement des rouës & le tournoyement des eaux.

L'Epilepsie est vne frequente distention de tout

le corps, ou bien vne conuulsion non continuë, qui fait que les fonctions de tous les sens & de l'esprit venans à estre interrompuës, la personne tombe soudain, sans qu'il luy demeure cependant aucun vsage de l'ouye, ny de la veüe, & sans se resouuenir après, de ce qui s'est passé. Par la concution qui se fait lors, l'escume sort de la bouche, & quelques-fois il arriue, que les muscles estans relaschez, l'on rend malgré qu'on en ait, ou les vrines, ou les excremens du ventre, ou mesmes le sperme, & la voix deuient basse. Mais ces choses sont les marques de la vraye epilepsie. Il s'en rencontre souuēt vne moindre, les symptomes de laquelle ne sont pas si manifestes; car elle approche fort du vertige, ou garde comme le milieu entre le vertige & l'epilepsie. Ce qui a fait dire à plusieurs, que le vertige estoit vn diminutif de l'epilepsie, & que venant à s'accroistre, il se terminoit en icelle.

On tient que la cause interne de ce mal, est vne grande abondance d'humeur pituiteuse ou melancholique, qui remplissant tout à coup les ventricules & conduits du cerueau, fait que les esprits animaux estans retenus, le malade tombe par terre. Elle ne bousche pourtāt pas d'abbord, & tout à fait, les passages, mais il en coule encore quelque peu, à l'aide desquels le cerueau fait de l'effort pour se défaire de ce qui l'incommode. Au reste, la seule abondance del'humeur peccante ne cause pas l'epilepsie, d'autant qu'elle se rencontre bien dās l'assoupissement sans aucune conuulsion; & que si cela estoit, aussi tost que l'epilepsie viendrait soudain à cesser, il faudroit necessairement, comme en l'apoplexie, que l'humeur se respendant sur les nerfs, s'ensuiuist la paralysie, ce qui ne s'est ja-

mais veu. C'est pourquoy, ainsi qu'ailleurs nous auons plus amplement demonsté, il faut, outre l'abondance de l'humeur, reconnoître pour cause de l'épilepsie, quelque qualité veneneuse & fort contraire & ennemie de la substance du cerueau, laquelle fait l'épilepsie toutesfois & quâtes qu'elle s'excite & tend vers le cerueau, lequel en estant attaqué, tâche de la repousser, & dresse comme vne partie pour la combattre.

Or le sujet qui foment ce venin, a sa retraite tantost au cerueau, tantost dans l'orifice de l'estomach, & quelquesfois aussi dans les autres parties plus esloignées, d'où il expire occultement par des conduits inconneus, & monte vers le cerueau, d'où vient qu'il y a trois sortes d'épilepsie, l'vne est assignée au cerueau, l'autre appartient au ventricule, & la troisieme est celle qui se fait par la communication de quelque autre partie.

L'épilepsie qui a sa cause dans le cerueau, selon qu'on l'a reconneu par l'ouuerture de la teste de ceux qui estoient morts, entachez de ce mal, procede le plus souuent d'ailleurs que de la repletion des ventricules. J'ay quelquesfois remarqué que la cause de ce symptome, estoit vn abscez du cerueau, quelquesfois vne portion corrompue de la meninge qui adheroit au test, avec vne extreme douleur; desquels endroits s'esleuoit vne vilaine vapeur, laquelle penetroit dans les ventricules du cerueau. Cette sorte d'épilepsie se reconnoist par la pesanteur de la teste, ou mesme par la douleur excessiue d'icelle, par la stupidité & tardiueté des sens, & de l'esprit, par la couleur palle du visage, par les songes turbulens, & parce que l'accez surprend soudain la personne, sans qu'auparauant on

en ressentir aucun symptôme.

L'autre espèce d'épilepsie qui a son origine dans l'estomach, aussi bien que la suffusion des yeux, est précédée d'une douleur d'estomach, d'extension & d'époinçonnement en cette même partie, d'une difficulté de supporter la faim : & lors que l'accez approche, de nausée, mal de cœur, ou de faillance d'esprit : & après que l'accès est passé, suit le vomissement, tantost pituiteux tantost bilieux. La troisième espèce a souvent sa cause es doigts des mains & des pieds, ou bien es iambes, quelquesfois dans la matrice, principalement durant la grossesse, pendant laquelle, il s'y amasse d'ordinaire quantité d'humeurs pourries. J'ay connu beaucoup de femmes qui tomboient souvent d'épilepsie, toutes les fois qu'il leur arrivoit d'estre grosses d'enfant, & n'en ressentoient plus aucune atteinte quand elles estoient delivrées. Cette sorte d'épilepsie peut aussi quelquesfois proceder de quelque autre partie que ce soit ; car on en a vu dont la source estoit tout au haut de la teste, d'où sortoit une vapeur, qui se respendant de costé & d'autre, causoit le vertige, lors que les seules parties externes en estoient attaquées ; mais venant à penetrer iusques au cerueau, elle excitoit l'épilepsie. Cette espèce est la plus aisée à decouvrir de toutes les autres : parce que sur le point que l'accez commence, on sent quelque vapeur froide qui sort de l'endroit où est cachée la source de ce mal, & coulant le long des parties voisines, attaque le cerueau ; le cours de laquelle on peut mêmes retenir & empescher de passer outre en serrant estroittement la partie, si on la peut lier commodement.

L'incube est vne grande oppression du corps, qui arriue & suffoque de nuict, empeschant la respiration, & retenant la voix. On ne perd pas neantmoins l'vsage des sens, mais ils deuient hebetes & stupides, aussi bien que l'entendement & l'imagination : car il semble à celuy qui est travaillé de ce mal, ou que quelque ennemy se jette sur luy, ou que quelqu'un luy montant sur le corps pour exercer l'acte venerien, le presse comme s'il auoit quelque fardeau sur luy, qui s'euanoüyt aussi tost qu'il y porte la main ; ou bien il s'imagine & forge en son esprit des choses encore plus absurdes. La cause de ce mal est vne pituite espaisse, ou vne humeur melancholique, attachée, non point au cerueau, mais bien autour des entrailles, laquelle venant à s'enfler par crapule ou par crudité, presse le diaphragme & les poulmons ; & la vapeur grossiere qui en sort, s'esleuant de là, par le gosier iusques dans le cerueau, supprime la voix, trouble les sens, & l'entendement, & remplit l'imagination de tristes phantosmes. L'incube approche fort de l'epilepsie, & de l'apoplexie, esquelles souuent il degene par la continuë.

L'apoplexie est vne soudaine priuation du mouuement & du sentiment, voire mesme de toute autre fonction animale : car celuy qui en est frappé, sans presque auoir presenty les approches de ce mal, tombe soudainement comme tout estonné ; & si l'attainte est forte, il demeure gisant les yeux fixes, sans sentiment, sans mouuement, sans iugement, ne differant d'une personne morte que par la seule respiration, laquelle encor deuient aussi tost fort

difficile, & avec vn tres grand ralement. Enquoy principalement ce mal ne differe de l'assoupissement & de la suffocation de matrice, qui n'empeschent pas d'ordinaire que l'on ne respire facilement & librement. Car bien que dans le care, & en tout assoupissement, les parties anterieures du cerueau soient oppressées, & que les sens qui en procedent soient abbatus; neantmoins les parties posterieures n'estans point incommodées, respandent assez d'esprits par les nerfs qui seruent à mouuoir, pour conseruer le mouuement, & sur tout celuy de la respiration, laquelle est principalement necessaire à l'entretien de la vie. Mais l'apoplexie occupant & offensant tout, oste tout mouuement & respiration, & par ce moyen cause la mort. De plus, le care estant passé, il arriue ordinairement que la personne se porte bien; au lieu que l'apoplexie se termine souuent en paralysie. Quant à la suffocation de matrice, elle empesche beaucoup moins la respiration, si ce n'est qu'elle bouchast le gosier, parce que le cerueau n'est lors attaqué que de vapeur. L'apoplexie differe aussi de la syncope, en ce que le battement des arteres est ou nul, ou fort obscur & languide en celle cy; mais en l'apoplexie il se trouue plein & fort, si ce n'est quand la mort commence d'approcher. Si l'apoplexie est plus douce, il reste bien quelque sentiment ou mouuement, mais fort stupide & incertain, & lors souuent l'vn des costez du corps en demeure affoibly & incommodé.

La cause de cette maladie a son siege dans le cerueau, qui est le principe commun de tout mouuement & sentiment. Or cette cause est vne pituë fort grossiere & froide; car il n'y a point d'api-

parence que cela vienne ny du sang, ny de la melancholie, quoy que le corps en fust tout surchargé. Et bien que cette froide pituite soit le propre excrement du cerueau, lors toutesfois qu'elle remplist à coup & vniuersellement tous les ventricules d'iceluy, ou quand il en tombe tant soit peu qui bousche ou referre soudain les arteres du rets admirable, par où les esprits passent du cœur dans les sinuositez du cerueau, elle cause l'apoplexie; parce que les sinuositez du cerueau venans lors à estre destituées de l'influëce de ces esprits, ne peuuent plus rien fournir aux nerfs des sens & des mouuemens, & faut qu'aussi tost l'animal aille par terre, de mesme que si on luy serroit avec quelque ligament les arteres carotides. Ceux qui ayans la teste pesante sont d'ordinaire assoupis, & ausquels tout le corps deuient lourd & paresseux, & la veuë commence de s'obscurcir, sont sujets à l'apoplexie, & principalement les vieilles gens, les pituiteux, ceux qui s'addonnent à la gourmandise, & qui ont le col court & ramassé.

La paralyfie qui est complete, priue de mouuement & de sentiment vne certaine partie du corps, & non le tout; mais l'imparfaite n'oste quelquesfois que le sentiment & laisse le mouuement; quelquesfois elle fait perdre le mouuement, sans que le sentiment en soit interessé; car nous auons démontré en la Physiologie que la perte de l'un de ces deux peut quelquesfois arriuer sans que l'autre en reçoie aucun dommage. Il se peut aussi rencontrer que par vne imparfaite paralyfie le sentiment ou le mouuement deuienne engourdy & hebeté, ce qui s'appelle proprement stupeur, de laquelle ie veis vne fois toute la peau du corps de

quelqu'un estourdie par excez de gourmandise & d'yurongnerie, sans aucune incommodité du mouvement.

Or la Paralyfie vient quelquesfois d'une legere Apoplexie, & lors elle est proprement appellée Paraphlegie; quelquesfois elle procede d'une stupeur accreue peu à peu, laquelle sert d'auant-coureur à la Paralyfie. La premiere sorte est la plus fascheuse & perilleuse, & retourne souuent en apoplexie: l'autre est plus douce, mais neantmoins opiniastre. Celle-là occupe presque ou toutes les parties qui sont situées au dessous de la teste, ou du moins l'un des costez du corps, & est proprement hemiplegie: & ceste cy attaque quelquesfois toutes ces mesmes parties basses; quelquesfois elle en attaque seulement quelqu'une, comme la langue, l'œil, la maschoire, la levre, le bras, la main, la iambe, le pied, ou tout ce qui est sous le diaphragme. La partie paralytique est incontinent saisie de froid, deuiant pesante, & quand on la leue elle s'apaise & retombe aussi-tost par sa propre pesanteur, estant lasche, molle, despourueue tantost de mouvement, tantost de sentiment. Et quand le mal est desia contracté de longue main, elle se desseiche & deuiant atrophique. Quelque partie que ce soit de la face qui deuienne paralytique, elle se tourne du costé de la partie aduerse qui reste saine.

Au reste il faut estre diligent à rechercher le premier siege de ce mal. S'il se retrouue dans la face quelque partie priuée du sentiment, le mal est dans les nerfs qui prouiennent de la troisieme coniugaison du cerueau; mais s'il y a priuation du mouvement, la cause en est es premieres vertebres de l'espine. Si le mal occupe toutes les parties qui sont

sous la face, c'est le commencement de toute l'espine qui est affecté. La cause de l'hémiphlegie n'est pas inhérente à toute l'espine, mais seulement à l'autre partie d'icelle. Quand la paralysie est en l'une des jambes ou en toutes les deux, l'on n'en doit pas rechercher la cause au dessus des lombes, Si toute la moëlle de l'espine est affectée, par le trauers, la resolution occupe toutes les parties qui sont au dessous tant du costé droit que du costé gauche; mais s'il n'y a qu'un costé de la moëlle qui soit affecté, la resolution n'est aussi qu'és parties qui sont de ce mesme costé. Quelque partie donc qui soit résolue, il faut soigneusement prendre garde si le mal est seulement en ceste partie là, ou bien s'il est dans le nerf d'icelle. Mais on doit aussi rechercher s'il est tout le long du nerf, ou en quelque partie d'iceluy, & si seulement en son origine, ou dans la moëlle mesme du cerueau ou de l'espine. Pour à quoy paruenir, il faut bien scauoir par l'anatomie toute la distribution des nerfs.

Au reste ceste cause qui interrompt l'influence & distribution des esprits, est pour l'ordinaire vne pituite crasse fortement attachée au nerf, qu'elle bousche & empesche par ce moyen que les esprits animaux ne soient distribuez à la partie dans laquelle ce nerf est estendu. Voire mesme toute autre sorte d'humeur attachée en la moëlle de l'espine peut causer la Paralysie; & souuent elle produit de la bile jaune qui s'est iettée sur l'espine du dos & sur les sources des nerfs, au declin des fièvres intermittentes. Elle se fait aussi par vn cal ou tubercule du nerf, & par toute sorte de tumeur non naturelle qui presse le nerf ou la moëlle, & beaucoup plus par quelque pressante ligature, &

par contusion de cheute ou de quelque coup, & par luxation des vertebres, arriüée ou du costé droit, ou du costé gauche. Or il sera facile à vn chacun de reconnoistre par les signes propres laquelle de ces causes aura produit la paralyfie.

La conuulsion, est vne perpetuelle contraction non volontaire, des nerfs & des muscles vers leur origine. En icelle il est necessaire que le membre dans lequel le tendon du muscle est inseré, se tourne & se retire quant & quant de ce costé là, & dechée de sa figure naturelle, & soit affligée d'une douleur tres-vehemente qui tourmente & abbate les forces, tantost moins, tantost plus. Il est vray que la conuulsion n'est pas commune, & arriue assez rarement, si est-ce neantmoins vn mal fort violent, & qui fait bien tost mourir. Elle attaque quelquesfoistout le corps, quelquesfois les parties. Celle qui se fait par tout le corps, l'incommode si fort, qu'il ne se peut fléchir: & lors que le corps se courbe en deuant, cette espee de conuulsion s'appelle *emprosthotone*; quand il se courbe en derriere, c'est *opisthotone*; & quand d'une force esgale il s'estend des deux costez, on la nomme *tetane*, c'est à dire distension: lesquels noms se donnent aussi d'ordinaire aux conuulsions du col. C'est chose hors de controuerse, que la cause & le defect de cela, est au commencement de l'espine. Quant à la conuulsion des parties, elle se remarque quelquesfois en l'œil, en la peau du front, en la racine de la langue, en la mâchoire, és léures, d'où vient le ris Sardonien: quelquesfois au bras, en la main, en la jambe: scauoir est au nerf, ou au muscle affecté, qui est destiné au mouuement de la partie. Or la partie du nerf laquelle est premièrement affectée, se reconnoistra par le mesme raison-

nement que nous auons desia fait en la paralyfie.

Les causes de la conuulsion sont en grand nombre, lesquelles toutes Hippocrate a reduites à deux, à l'inanition, & à la repletion. Car toutes celles que l'on dit qui se font ou en suite d'une fièvre ardente, ou pour auoir prins de l'elebore, ou bien quelque autre medicament; ou par quelque excessiue profusion de sang, ou par des veilles immoderées, ou par les ieunes, ou par vn trauail violent, viennent d'inanition, aussi bien que celle qui est excitée de playe, ou de picqueure du nerf. Ces sortes de conuulsions sont accompagnées de simple inflammation, & d'une ardeur qui interesse les parties nerveuses, & le cerueau. La propre substance du cerueau estant donc dissipée par ces causes là, les nerfs & les membranes se dessechent & se retirent. Mais toute conuulsion qui prouient, ou du phlegmon, ou d'yurongnerie, & de gourmandise, ou de la suppression de quelque éuacuation accoustumée, ou de l'intermission des exercices, se doit rapporter à la repletion. L'on discernera donc l'espece & la cause de la conuulsion par les choses qui l'ont précédée, comme aussi parce que celle qui vient de repletion, se fait d'ordinaire tout à coup; au lieu que celle qui vient d'inanition se fait peu à peu, & à la longue.

Outre ces especes de conuulsion, il s'en retrouue encor vne autre, que l'on peut proprement appeler flatueuse, par laquelle il arriue souuent que les doigts, des pieds & des mains, & quelquesfois mesmes les jambes, ou s'estendent, ou se retirent, avec vne tres-grande douleur, mais qui ne dure gueres, & qui s'appaise par la seule friction. La cause de cela est vne vapeur grossiere & visqueuse, qui s'insinuant dans les rameaux des nerfs, les rem-

plift & fait bander comme les cordes de luth: d'où vient que ceux qui s'addonnent au vin, & à la crapule, ou à la paresse & oyfuieté, y sont fort sujets.

L'en ay encore depuis peu remarqué vne de ce genre, qui ne surprenoit pas seulement les parties extremes, mais aussi les autres. Elle prenoit tous les ans, seulement en hyuer, mais tous les iours deux ou trois fois. En l'accez d'icelle, la teste premierement se consommoit par interualles avec vn certain essancement; puis peu apres le mal tomboit comme un froid le long du col; & quand il venoit entre les espaules, le corps estoit surprins d'opisthotone, sans aucune alteration de l'esprit ny des sens, & se jettant enfin sur l'vn ou l'autre des costez, ou sur le bras, ou sur la iambe, il faisoit retirer ceste partie là de telle sorte, que tous ceux qui s'y rencontroient ne la pouuoient redresser pour quelque effort qu'ils fissent, iusques à ce que l'accez fust entierement passé. D'où l'on peut reconnoistre que la cause conuenante & prochaine de ce mal n'estoit pas vne humeur; ains vne vapeur froide, grossiere & visqueuse, qui se dissipoit toute sur la fin de l'accez, de laquelle neantmoins la source estoit dans la teste.

Le tremblement est vn mouuement de praué, qui agite quelque membre sans qu'on le vueille. Il se fait lors que le membre s'abbaisse par sa propre pesanteur, & que la faculté debilitée ne le peut releuer ny redresser assez vigoureusement: car il se fait en ce rencontre vn certain combat de la faculté qui resiste à la pesanteur, & rehausse le membre autant que son poids le rauale. La principale cause est la foiblesse de la faculté & des nerfs, laquelle se contracte quelquesfois par l'aagé, comme quand

l'on est desjà fort vieil ; quelquesfois par vne cause qui dissipe les forces , comme est quelque longue & grande maladie, l'acte venerien par excez & hors de saison , & la peur , ou quelque autre passion de l'ame; quelquesfois elle se contracte par les choses qui selon toute leur substance sont ennemies des nerfs , comme la vapeur excessiue du vis argent; quelquesfois par les choses qui frappent & remplissent trop fort les nerfs , comme l'yurongnerie , & l'usage frequent & plein des vins puissans , & c'est icy la plus commune cause du tremblement. Voire, même on en establist encor vne autre cause, outre la foiblesse des nerfs, qui est l'obstruction des nerfs, par des humeurs visqueuses & grossieres , qui pourtant ne se fait pas si grande qu'en la stupeur, ou en la Paralyfie ; parce qu'on veut que ce soient causes communes à ces symptomeslà , & qu'il n'y ait que l'ordre qui les distingue, en sorte que le tremblement s'esloigne autant de la stupeur, que la stupeur fait de la Paralyfie. Et par ainsi la bile iaune, aussi bien que la pituite, se iettant sur les nerfs, deuient cause de ces symptomes , presque en la mesme façon qu'il a esté dit touchant la Paralyfie ; car on a souuent remarqué que le tremblement arriuoit sur la fin des maladies aiguës.

Nous auons, ce semble, maintenant acheué tous les symptomes de la faculté tant principale, que sensitive & mouuante. Venons en suite à ceux qui procedent des excremens.

CHAPITRE IIII.

*Les symptomes des excremens
du cerueau.*

LA defluxion, que les Grecs nomment *Catar-rhe*, est l'escoulement d'une humeur superflue qui tombe de la teste sur les parties qui luy sont inferieures. Les modernes prennent ce mot en un sens fort estendu, par lequel toutesfois les Anciens n'ont designé que celle qui se jette sur le gosier. La cause donc & la matiere de la defluxion, est un excrement de la teste. La mouëlle ample & copieuse du cerueau a besoin de beaucoup d'aliment, duquel par necessité il s'engendre aussi beaucoup d'excrement, & sur tout s'il est grandement froid & humide, ou debilité en quelque autre sorte, & qu'il recoiue un aliment ou trop abondant, ou non assez conuenable: car en suite de ces causes il se fait par tout un grand amas d'excremens. Quand l'excrement est moderé, il se reserre tout dans les premieres sinuosités du cerueau, lesquelles sont en quelque façon destinées à cet usage, mais quand il y en a trop, il se déborde & regorge mesmes en dehors autour du cerueau & des meninges, où il a esté respandu par les orifices des veines interieures. Les sinuosités ou ventricales du cerueau se purgent aisément par le palais; & l'autre capacité, tant par le palais, que par les narines, par les oreilles, & par les yeux. Et partant si le nez est sec quand le cerueau est humide, il arriue des defluxions & des maladies de la teste, & ceux qui sont

fort nets au dehors, ont souuent beaucoup d'ordure au dedans. Au reste, cét excrement tient de la nature du cerueau, & parce qu'il est pituiteux, il demeure d'ordinaire subtil, aqueux, & doux; mais venant à croupir long temps dans les ventricules du cerueau, il acquiert souuent par cette demeure, vne qualité ou salée, ou acre.

Il s'amasse outre cela vne autre sorte d'excrement és parties externes de la teste, & principalement sous la peau du col où aboutissent les veines qui montent à la teste par le visage & par les temples. Car toutes fois & quantes qu'elles sont pleines de beaucoup de serositez, ou d'humeurs, elles laissent échapper sous la peau les restes & superfluités de l'aliment, qui ne peuuent pas facilement transpirer, à cause de l'épaisseur & grossiereté de la peau. Et l'amas s'en fait quelquesfois si grand, par la continuelle affluence, qu'il s'esleue vne tumeur molle, comme de la cire, qui condense la peau, & l'esloigne fort du test. A dire le vray, c'est là la source, c'est la cause de toutes les defluxions externes, & ie m'estonne de ce que pas vn des Anciens n'y a prins garde. C'est de là que la defluxion tombe sur les parties externes du corps, sur les yeux, sur les maschoires, sur les dents, sur le col, sur les espaules, sur les bras, sur les costez, sur le dos, & les lombes, sur les cuisses, sur les iambes, & finalement sur tous les articles; & il se trouue que c'est la cause tant de toutes sortes de gouttes, que presque de toutes les douleurs externes.

Quant à la defluxion qui vient des ventricules du cerueau, ou des lieux qui sont sous le test, elle tombe sur les parties internes du corps, où elle excite diuerses maladies: lors qu'elle tombe sur les origines des nerfs, elle excite l'apoplexie, la pa-

râlyfié, la ftupeur, le tremblement. Sur les organes des fens, l'aveuglement, la furdité, le tintement des oreilles, la priuation de l'odorat : fur les narines, la coryſe ; fur le goſier & fur la trachée artère, l'enroüerure ; fur les poulmons, la toux, l'aſthme & la phthyſie ; fur l'eſtomach, la crudité ; fur les inteſtins, le cours de ventre ; & ſi de là elle s'inſinué dans les veines du foye, en s'eſpaiſſiſſant elle les rempliſt, comme auſſi les viſceres, & y fait des obſtructions. Ainſi la defluxion eſt mere d'un grand nombre de maladies. Et l'homme ſeul, entre tous les animaux eſt ſuiet à ces mauuais accidens, d'autant qu'il a le cerueau grand & eſſeüé, d'où les excremens peuuent facilement decouler preſque par tout le corps, & les couvrir & comme arroſer. Or tant que ceſte ſorte d'excrement demeure dans le cerueau, il eſt preſque aqueux, & tout ſemblable à du laiſt clair, lequel nonobſtant ceſte tenuité ne laiſſe pas d'acquérir quelque viſcoſité par la ſubſtance du cerueau, tel qu'on le void ſouuent diſſiler du nez quand il fait froid. Eſtant donc de ceſte ſorte au commencement, il decoule tout le meſme ſur les poulmons, ou ſur les autres parties internes ; & paſſe ſans changer de conſiſtence depuis le haut de la teſte, iuſques aux extremitez du corps & ſur les articles des pieds. Mais cét excrement ſe va peu à peu eſpaiſſiſſant par la chaleur des parties ſur leſquelles il s'eſt ietté, la portion plus ſubtile en eſtant diſſipée. Car nous auons fait voir en la Phyſiologie que c'eſt ainſi que la pituite ſuperflüe deuiet par la force de la chaleur, d'aqueuſe & claire, mucilagineuſe, puis glaireuſe, & enfin vitrée & plaſtreuſe.

Or quand vne defluxion froide tombe ſur quelque partie, il eſt à propos de diſcerner tant par les ſignes

signes que nous venons de poser, que par ceux qui marquent la difference de la douleur externe de la teste d'auec l'interne, si elle decoule des parties externes ou internes de la teste, car la façon du traitement est differente. Au reste la matiere de la defluxion est engendrée & accruë par le viure intemperé & trop humide, & par la debilité & intemperie froide de la teste. Si l'excrement amassé par ces causes-là, s'arreste & croupist trop, il produit tant les maladies que les symptomes que nous auons rapportez. Or tout ce qui l'esbranle de sa place, le pousse & fait sortir de la teste, comme vne quantité trop pesante, vn froid resserrant, vne chaleur fondante, vn bain relaschant, & le trouble du travail, ou d'une passion d'esprit. Ces choses donc faisant que l'excrement s'espanche sur les parties qui luy sont au dessous, doiuent estre establies pour causes de la defluxion.

La troupe des nouveaux Medecins fondée sur le dire fort peu probable d'Auicenne, tient que toute matiere de defluxion est suscitée par la trop grande chaleur du foye; qu'il s'esleue de là beaucoup de vapeurs en la teste, lesquelles puis apres par la froideur du cerueau se conuertissent en eau & retombent aussi-tost; de mesme que les expirations de la terre qui se condensent en nuës, & se resoluent incontinent en pluye, ou comme vne vapeur exhalée, qui en s'esleuant s'espaissist en liqueur. Mais de ceste façon il ne se peut pas faire vn grand amas d'excremens, & ceux mesme qui ont le foye ou temperé, ou froid, ne laissent pas souuent d'estre suiets à des defluxions, lesquelles aussi bien que presque toutes les autres, viennent de debilité & intemperie froide de la teste, qui en sont les causes les plus frequentes & les plus fortes de toutes.

Le pense auoir parcouru tous les symptomes de la teste, les causes internes desquels sont pour l'ordinaire la simple intemperie, & le vice de l'humeur qui se rencontre ou au dessus ou au dedans du test, & s'attache ou aux meninges, ou à la substance du cerueau, ou se coule és conduits d'iceluy, ou tombe de la sur les parties basses. Et ce sont là les principaux points, d'où l'on doit tirer & dresser toute la methode du traitement.

CHAPITRE V.

Les maladies des yeux, leurs symptomes, & les causes d'iceux.

IL faut par semblable raison distinguer fort soigneusement les maux internes des yeux, d'avec ceux qui sont externes, d'autant que la cure en est differente tant en l'eslection des remedes, qu'en l'usage d'iceux. J'appelle internes ceux qui se font au dedans de la membrane cornée, & qui ont leur origine és parties internes du cerueau, & tiens pour externes ceux qui se rencontrent ou sur la cornée, ou hors d'icelle. Or les internes peruerussent ou la veüe, ou le mouuement de l'œil, & ce tantost avec douleur, tantost sans douleur aucune. Le mouuement est empesché par le Strabisme & par la paralyfie. Le Strabisme est vne conuulsion de l'œil, qui le fait tourner de trauers, en sorte que tous les deux ne peuuent ensemble regarder vne mesme chose. La Paralyfie est vne abolition du mouuement. Les causes de ces maux que nous auons cy-deuant touchées, tombent ou sur les

muscles des yeux, ou sur les nerfs de la seconde coniugaison, lesquels y sont portez, ou bien sur la partie du cerueau de laquelle ils procedent. Et ceux-cy empeschent le mouuement premiere-ment & de soy.

Quant aux maux internes qui nuisent à la veuë, les vns sont en l'esprit visuel, les autres au cerueau, les autres dans le nerf optique, les autres dans l'humeur crystaline. L'esprit pour voir clair & distinctement doit estre abundant & etheré; car si estant abundant il est quant & quant grossiere, il void bien les choses qui sont loing, & celles qui sont pres, mais à peine les discerne il. Et s'il y en a peu quoy qu'il soit etheré, il fait les personnes de courte veuë, qui discernent entierement ce qui est proche, & ne voyent point du tout ce qui est esloigné. S'il est en petite quantité & grossiere, il rend la veuë emoussée en sorte qu'on ne void pas ce qui est esloigné, & qu'on ne discerne pas ce qui est proche: c'est vn mal assez commun aux personnes âgées.

L'aueuglement, l'obscurité, & toute debilité de la veuë dont la cause ne se remarque pas en l'œil, prouient du vice du cerueau, ou du nerf optique, ou de l'humeur crystaline. Or le vice du cerueau est vne intemperie, ou simple, ou attachée à quelque humeur. Le vice du nerf optique est vne obstruction causée par la cheute de quelque humeur grossiere: ou vn restrecissement prouenu de consommation, ou de tumeur non naturelle: Ou bien qu'il s'est rompu par l'effort de quelques causes externes. Le vice particulier du crystalin est le changement de son propre lieu, ou par cheute, ou par coup, dont l'œil ait receu vne fort grande secousse. Il faut venir maintenant aux choses qui

marquent ces differences. Vous serez assuré que le vice & la cause qui blesse la veüe est dans le cerueau; si la debilité ne s'estend pas seulement à l'œil, mais aussi aux autres sens. Mais pour sçauoir si le vice vient d'une simple intemperie, ou de quelque humeur, cela s'apprend clairement par ce qui a esté dit des signes du cerueau mal affecté.

Quand la cause ne se retrouve pas au cerueau, il la faut rechercher dans les nerfs optiques, ou mesmes au dessous d'iceux: & si l'auëglement arrive tout à coup, ou se forme en peu de temps, c'est un signe certain que l'obstruction vient du desbord de quelque humeur; mais s'il se fait peu à peu & avec un long-temps, on le doit attribuer au vice de l'intemperie, ou du restrecissement. Or on pourra coniecturer combien est grande l'obstruction, ou le restrecissement du nerf optique, en ceste sorte. Si le malade fermant l'œil qui se porte bien, s'efforce de voir de l'autre, & qu'alors la prunelle se dilate, il coule encor quelque peu d'esprits par le nerf: mais si la prunelle ne change point de figure ny d'estendue, il ne passe plus aucun esprit, & le passage en est entierement fermé. Or on connoist que le nerf optique est rompu, ou que le crystalin est hors de sa place, quand il y a eu ou coup, ou cheute, ou quelqu'autre cause manifeste qui ait fait de la violence: combien qu'il me soit quelquesfois arrivé de voir le crystalin changer soudain de place, & la prunelle se dilater, sans effort d'aucune cause externe, par la defluxion seulement d'une humeur extrêmement acre, mais il y auoit lors une douleur cruelle & implacable. Et quand le remuement du crystalin se fait en haut ou en bas, il sèble au malade que tout ce qu'il void est double, ce qui n'arrive

pas lors qu'il se fait vers l'un ou l'autre coin de l'œil.

Le Glaucome est vn changement de couleur de l'humeur crystaline ou vitrée, en bleu ou roux. Ceux qui sont empeschez de ce mal pensent voire au tra- uers d'une fumée ou d'un nuage. Le mesme empes- chement arriue, quand la substance de l'une ou de l'autre humeur, vient à s'espaisir par trop. Si d'a- uanture elle contracte quelque autre couleur, on la verra paroistre semblablement sur les obiets. Il est vray que ce mal n'arriue pas souuent, mais il est certes sans remede, parce qu'il change la sub- stance des humeurs.

La Suffusion est vne concretion non naturelle d'humeur ou en la prunelle, ou entre la tunique rhagoide & le crystalin. Or ceste humeur coule du cerueau par le nerf optique, & ce peu à peu, de sorte qu'à peine s'en apperçoit-on du commen- cement; bien que i'aye quelquesfois veu entiere- ment formée en vn iour vne grande suffusion. Car si vne humeur grossiere tombant à coup sur le nerf optique, auieugle soudain, pourquoy ne fera elle pas vne suffusion soudaine & entiere, si elle vient à passer plus outre au deuant de la prunelle? Or toute suffusion couurant la prunelle, empesche que le crystalin, qui est le premier instrument de la veüe, recoiue les especes & simulacres des choses exter- nes, & qu'il ne les voye librement. Au commence- ment, que l'humeur est encor si delicate, qu'elle ne se peut apperceuoir, il semble seulement qu'on ait des fumées & des vapeurs; puis mesme des mousches deuant les yeux. Avec le temps, elle vient à s'espaisir tellement qu'elle oste du tout la veue, si la paupiere en est entierement couuerte; ou bien s'il n'y en a qu'une partie, elle obscurcist

auſſi quelque partie des obiets. Et quelle eſt la figure de la ſuffuſion, telle eſt ſemblablement la variété des ſimulacres des choſes. En toutes ces choſes on remarque deſia manifeſtement vne humeur groſſiere, condenſée & blanche. Quand donc ceſte ſuffuſion commence, l'on void preſque les meſmes choſes qui paroiſſent en celle qui ſe fait lors que l'orifice de l'eſtomach eſt affecté; lesquelles pourtant ſe diſcernent en ceſte maniere. La ſuffuſion propre trompe ſeulement l'un des yeux par de faux ſimulacres des choſes, ou ſi elle les trompe tous deux, ce n'eſt pas neantmoins tout enſemble, ny de meſme façon. La ſuffuſion par communication fait voir des choſes fauſſes à tous les deux également & en meſme temps. En celle-là le rencontre des choſes qu'on penſe voir eſt continuel, ſans ceſſer aucun iour, ny meſme vne heure ſeulement. Mais en ceſte-cy, il ſe relaſchie & reçoit de l'interuaſe, ſi apres auoir auallé quelque peu de viande legere, l'eſtomach la digere bien, ou ſ'il a eſté purgé de quelque medicament composé d'aloës; au contraire il ſe redouble, quand il y a de la crudité, ou que l'orifice de l'eſtomach fait de ſa douleur, ou que l'on eſt trauaillé de nauſées.

Les vices de la prunelle ſont manifeſtes aux ſens: ce ſont dilatation, diminution, diuulſion, & ruptiō. La dilatation tant faite dès la naiſſance, que ſuruenue depuis par maladie, nuist à la veüe, en ce qu'elle laiſſe eſpandre & diſſiper de tous coſtez les eſprits viſuels. La diminution qui eſt telle dès la premiere conformation, rend la veüe tres-subtile, à cauſe qu'elle ramaffe & aſſemble les eſprits; mais celle qui vient de maladie, ayant vne cauſe non naturelle, la fait plus mauuaſe. La diuulſion & la

ruption ne causent point d'aveuglement, & ne nuisent pas beaucoup à la vue. Au reste, la dilatation se fait par vne humeur enfermée dans la tunique vuee, laquelle par son abondance la fait étendre, & en eslargit aussi le trou, qui est la prunelle. C'est pourquoy, la tumeur, le schirre, le phlegmon, & l'abciez de l'œil sont accompagnez de l'eslargissement de la prunelle. Au contraire, la prunelle se diminue & restrecist en la phthisie & atrophie de l'œil, & toutes les fois que l'humeur vitrée vient à se consumer par quelque cause que ce soit: d'autant que pour lors l'vuee estant retirée & ridée, & se rabattant presque sur elle mesme, elle rend le trou plus estroit. La diuulsion & la ruption de la prunelle se font par les mesmes causes, comme aussi par l'injure & violence des externes. Voilà tous les maux internes des yeux. Passons aux externes, qui se rencontrent en la cornee & en la membrane adherente. L'obscurcissement est vne vision tenebreuse, causée par l'épaississement & condensation de la tunique cornée. Ce mal n'arriue gueres de maladie; mais il vient souuent de la vieillesse, en laquelle certainement les membranes se grossissent aussi bien que les ongles.

Le nuage est vne humeur subtile, attachée à la cornee, qui fait que l'on pense voir toutes choses au trauers d'une nuë, ou d'une vapeur, ou d'une fumee. Et cette humeur l'espaissant peu à peu engendre finalement l'albugo. Car l'albugo est vne humeur grossiere & blanche, amassée & épaissie dans l'vuee, ou mesmes au dessus d'icelle, en sorte qu'elle empesche quelquesfois entiere-ment la vue. Ces deux vices prennent leur accroissement peu à peu, & viennent souuent d'ophthalmie, ou d'epiphore. Ils se font aussi quelquesfois

de la propre humeur gluante de l'œil, laquelle s'écoule du deuant de la prunelle, par les espaces qui sont entre la membrane adhérente & l'vuee.

L'Hallucination, que les Grecs nomment *Pararase*, se fait lors que la tunique corneée est infectée de quelque couleur estrangere, qui cause mesme qu'au dehors toutes choses paroissent teintes; comme en la jaunisse, en la sugillation, & en l'inflammation rouge.

La *rhexis*, est vne rupture, ou section, ou erosion de l'œil, d'où sort premièrement l'humeur albugineuse, & l'œil en demeure beaucoup amoindry; puis la tunique rhagoide tombe, & lors se fait cette cheute de l'œil, que les Grecs appellent *Proptose*.

La confusion de l'œil, en laquelle les humeurs sont meslées & confuses par quelque coup receu, sans aucune eruption, est toute differente.

Il s'élève, mais rarement, en cette tunique, des pustules, qu'on nomme *Phlyctaines*, semblables aux pustules qui viennent sur la peau. Ces pustules estans creuées, il s'en fait diuers petits vlcères, dont le plus sale s'appelle *Epicauma*, lesquels enfin viennent à supputer. Cette tunique est encore sujette aux charbons & aux chancres, qui sont les plus mauuais de tous les vlcères, quoy qu'ils n'arriuent que fort rarement. Venons maintenant aux maux de la membrane adhérente.

L'angle est vne petite membrane nerveuse, dure, & blanche, laquelle sort du coin de l'œil, & couvre souuent la prunelle. Elle vient de la membrane adhérente, qui croist peu à peu, & avec vn long tēps, si on la laisse faire.

Or les plus frequentes maladies des yeux sont, l'*Epiphore* & l'*Ophthalmie*, qui excitent certes de

tres grandes douleurs, & produisent souuent d'autres maladies.

L'Epiphore est vn débord d'humeur subtile, qui se jette sur les yeux, en façon de larmes. Or cette humeur est quelquesfois froide & du tout aqueuse, sans douleur, sans ardeur, ou rougeur: quelquesfois elle est acre ou salée, & se rend fascheuse par la douleur qu'elle excite, par l'acrimonie, par l'ardeur & par la rougeur, qui sont aussi suivies de l'ulceration des paupieres. L'origine de cette fluxion est d'ordinaire au deuant & au sommet de la teste, où l'humeur a coustume de s'amasser hors du crâne, & sous la peau, laquelle vient à decouler par le pericrane sur la membrane adherente, & sort finalement dehors par les yeux: de la même façon que nous auons desia dit, que de cét endroit les fluxions tomboient tantost sur les dents, tantost sur les machoires. C'est pourquoy il faut tenir pour causes de ce mal, celles qui le sont de la defluxion.

L'Ophthalmie est vn phlegmon procedant des coins de l'œil, & s'estendant par toute la membrane adherente. En ce mal les petites veines des yeux s'enflent, & celles qui ne paroissent pas dans le blanc de l'œil, se rendent apparentes: bien souuent tout ce qui estoit blanc deuiet rouge. L'on sent vne ardeur & vne douleur tres-grande, qui fait souuent distiller des larmes fort acres, & certes il y a lors vn grand rapport avec l'epiphore. Mais elles different, en ce qu'en l'ophthalmie le blanc de l'œil rougit, & en l'epiphore la rougeur n'est qu'au bord des paupieres. De plus, elles different en matiere & en origine. Quand par l'accroissement de l'ophthalmie le blanc de l'œil deuenu rouge, s'enfle, & augmente si fort, qu'il vienne à sur-

passer le noir, & le couvrir presque tout, cela s'appelle chymose.

L'inflammation est causée de la fluxion d'un sang subtil & bilieux, qui des veines des temples & des angles, se jette sur les veines obscures & cachées des yeux. Ceux qui ont les veines ouvertes par des fluxions fréquentes, sont derechef à la moindre occasion attaquez d'inflammation, & par la repletion, & par l'ardeur du Soleil, & par l'exercice, & par les autres causes externes, qui comme nous avons dit, excitent la defluxion.

Les douleurs des yeux estans ordinairement fort grandes, doiuent aussi estre considérées à part. Or elles viennent de l'acrimonie des humeurs en l'epiphore qui est acre, de l'ardeur en l'ophthalmie, de l'abondance des flatuosités; & des humeurs qui s'y jettent, laquelle en estend les tunique, de charbon, & de chancre: mais des pustules & des petits ulceres qui viennent sur la cornée, il ne se fait que point ou fort peu de douleur.

Toutes les maladies de l'œil que nous avons iusques icy remarquées, n'en attaquent que le globe. Il reste maintenant à parler de celles qui surviennent à l'entour, c'est à dire és paupieres & és angles.

La plus grande & la plus fréquente est l'aigilops, qui est un petit phlegmon entre le grand angle & la racine du nez. La partie s'enfle comme s'il y auoit un fronce, la rougeur vient tout autour, la douleur se fait tres-grande & eslançante, la cause de cela est un sang subtil & bilieux qui se jette là par les veines des temples, du front & de la face, & vient à ronger & corrompre la veine qui paroist en ce lieu là, de sorte que le sang espanché sous la peau dans cet espace, fait le phlegmon, lequel étant creué,

& la peau vlcérée, l'abciez paroist, d'où sort le pus par l'vlcere.

De la mauuaise cure de ces maux s'ensuit vne sinuosité, ou vne fistule de l'œil. Car quand l'egilops n'est pas esté assez tost ouuert, ou que le pus y est trop long temps retenu pour n'auoir pas l'issüe assez facile, il caue, & finalement après auoir mangé les parties voisines, fait vne sinuosité dans laquelle il s'amasse en abondance; de là il penetre iusques à l'os qui est au dessous. & s'ouure le passage dans la narine prochaine, d'où il tombe fort puant. Que si le pus prend son chemin vers le grand angle de l'œil, il fait vne fistule par laquelle se vuide la sinuosité: car il arriue ordinairement que la sinuosité se remplit d'un continuel amas d'ordure, qui sort par la fistule de l'angle quand on vient à le presser; & pour lors la tumeur s'abbaïsse, iusqu'à ce que de rechef elle se remplisse de nouuelle matiere, ce qui en plusieurs arriue d'heure à autre.

A ces accidens succede d'ordinaire le rhyas, qui est vne consommation ou diminution de la caroncule du grand angle de l'œil, qui cause que l'angle deuiant plus large qu'il ne doit. Il y a neantmoins encor quelques autres causes de ce mal, comme sont les humeurs acres, & les medicamens corrosifs.

Au rhyax est opposé l'encanthis, qui est vne eminence excessiue de cette mesme caroncule.

Les defectuositez des paupieres sont, la galle qu'on nomme pforophthalmie, & la demangeaison qui s'appelle xerophthalmie: cette galle vient d'une humeur chaude & acre, qui s'espand particulierement au bord de la paupiere, & la demangeaison est causée d'une humeur salée & nitreuse, le vulgaire luy donne ordinairement le nom de chassie seiche.

L'Ectropion se fait quand la paupiere se renuerse, en sorte que la partie rouge interieure d'icelle paroist; ce qui procede ou de cicatrice, ou de l'excroissance de la chair qui est au dessous, laquelle arriue souuent en suite d'une chymose.

La Grefle est vn petit tubercule dur, qui vient d'ordinaire à la paupiere superieure.

L'Ordeole est vn tubercule chaud, qui se termine ordinairement en absces, lequel sort du bord de la paupiere & entre les poils d'icelle.

Les paupieres & les sourcils sont pareillement sujettes & à la cheute du poil, ce qui s'appelle Madarose, & au renuersement du poil, & à la generation des poulx; & tout cela prouient des mesmes causes qui produisent semblables effets dans les cheveux.

CHAPITRE VI.

Les maladies & symptomes des oreilles, leurs causes & leurs signes.

L'Oreille est souuent attaquée de phlegmon, lequel se forme ordinairement entre la grosse meninge & la membrane qui couure le conduit de l'ouye. Il s'engendre d'un sang acre & fort subtil, qui s'escoulant en ce lieu là hors des veines interieures des meninges, vient finalement à se corrompre. Il se manifeste par vne chaleur & douleur tres facheuse, d'autant que l'acrimonie de l'humeur picque les membranes, & son abondance les fait estendre & separer, ce qui cause que l'on souffre vne douleur battante & grandement eslançante, semblable à

celle de tous les autres phlegmons qui viennent autour des arteres & des membranes. Il survient lors vne petite fièvre accompagnée de ses symptomes. On ne remarque au dehors ny tumeur, ny rougeur, si ce n'est que le mal venant d'avanture à redoubler, se communique aux parties externes. La matière putride se changeant peu à peu en pus par la cuisson fait vn absces, d'où la membrane de l'ouye estant rompuë ou mangée, le pus decoule par les destours de l'oreille avec beaucoup de diminution de la douleur, & allegement du mal. A ceux qui ont le cerueau debile & abondant en excremens, l'oreille fluë long-temps, & la suppuration continue quelquesfois fort longue, par laquelle decoule vn pus blanc, ou vne sanie liquide. Neantmoins il se fait aussi quelquesfois vne autre sorte de suppuration, ou decoulement d'ordures, sans inflammation, par vne grande impureté du cerueau, & à cause de beaucoup de mauvaises humeurs qui se font voye, & cherchent issue par cét endroit.

L'Vlcere sale de l'oreille, vient souvent de ces mesmes causes, quand le pus ou l'humeur qui decoule, a vne tres-grande acrimonie. Et dans l'ulcere humide qui n'a pas esté desséché assez tost, il se fait vne excroissance de chair, laquelle bousche le conduit de l'oreille, & gaste l'ouye. L'oreille se bouche encor tant par l'abondance de la matiere qui s'y amasse, si elle s'espaisist trop, ou s'endurcit, que par des petites pierres, & par quelques autres choses que ce soient qui tombent dans l'oreille sans y penser. Or la longue suppression des ordures & de la sanie, comme aussi l'ulcere impur & sordide, engendre des vers.

Quant à la douleur, au tintement, à la difficulté

d'ouyr, & à tous les autres iymptomes de l'ouye; ils procedent souuent des meſmes cauſes. Car la douleur du phlegmon eſt tres poignante; celle qui vient de quelques eſprits flatueux renfermez ſous les membranes, n'eſt gueres moins fâcheuſe, parce que ne trouuant point où fortir, elle les étend fortement, & les ſepare de l'oſ. Or on diſceme l'vne de l'autre, en ce que celle cy n'eſt accompagnée ny d'ardeur ny d'époiçonnement, ains ſeulement de tenſion, avec tintement ou grand bruit. Mais la douleur qui procede d'vne humeur froide & groſſiere, encloſe au fonds de l'oreille, eſt de beaucoup moindre. Cette cy eſt pareillement fort profonde, ſans ardeur, ſans époiçonnement ny tenſion, & a pour cauſes manifeſtes celles de l'excès d'vne pituite ſuperflüe.

Pour le ſifflement, le tintement, le ſon, le bruit, & toute autre ſorte d'ouye deprauee, cela vient du mouuement & de l'agitation des choſes qui occupent le fond de l'oreille. Et comme ces choſes ſont diuerſes & meües diuerſement, auſſi produiſent elles des ſons diuers. Le ſifflement ſe fait par vn petit ſouffle qui ſ'eſcoule doucement: le tintement vient de l'interruption de ſon cours: le ſon procede d'vne expiration plus groſſiere, qui ſouffle plus fort: le bruit a pour cauſe la force de l'impulſion, & l'agitation de l'humeur fait le flottement. Or l'on n'oit rien de tout cela ſi la cauſe interieure, quelle qu'elle ſoit, eſt en repos. Quand l'vlcere produit par inflammation, ou par abſcès, a beaucoup ſuppuré, ſ'il ne ſe ferme bien, il laiſſe vn ſon ou bruit continuel. Car quoy qu'il n'y ait aucun ſouffle outre la nature, neantmoins les eſprits portez & pouſſez par les arteres, offenſent par leur impetuofité, l'ouye deſia intereſſée.

Voire mesme l'obaudition, c'est à dire l'ouye de-
prauée se fait quelquesfois par la communica-
tion de la teste, sans aucune offense de l'oreille.
Celle qui est telle, ne se rencontre pas comme
l'autre cy dessus, en l'oreille seulement, mais on
la sent esprendre par toutes les arteres de la teste.
Ce qui se fait d'ordinaire au fort de l'ardeur des
fièvres, & mesme sans fièvre: lors que des visceres
inferieures il s'esleue en la teste vne expiration
chaude & copieuse. Car les arteres estans enflées,
tant par la fièvre, que par des esprits flatueux,
battent avec beaucoup de vehemence, & respan-
dent dans le cerueau & dans les oreilles, quantité
d'esprits chauds, qui font que le sens de l'ouye,
quoy que sain d'ailleurs, soit troublé & confus: de
la mesme façon que l'œil void beaucoup de choses
extrauagantes dans la suffusion qui se fait par la
communication du ventricule. l'ay conneu beau-
coup de personnes grandement incommodées de
cela, & sur tout, lors qu'ils auoient les visceres rem-
plis d'impuretez.

Au reste, l'ouye dure, & la surdité, ne different
que de grandeur. Or elles procedent de l'offense,
ou del'empeschement du cerueau, ou du principal
organe de l'ouye, ou de la sinuosité de l'oreille. La
cause qui occupe le cerueau, ou le principal orga-
ne de l'ouye, est ou l'intéperie simple, ou le vice
de l'humour. Hippocrate a remarqué que la surdité
venoit de bile. En ceux, dit-il, qui rendent des de-
jections bilieuses, elles s'arrestent s'ils deuiennent
sourds: ceux qui sont sourds cessent de l'estre par
les euacuations de la bile. Les choses que nous
auons cy dessus rapportées, font voir qu'outre
cela elle prouient ou de phlegmon, ou d'ab-
scès, ou d'vlcere. Sa plus cōmune origine vient aussi

d'une humeur froide, grossière, & pituiteuse, fort profondement enfoncée, & sans mouvement: car c'est principalement cette humeur là, entre toutes les autres, qui a coustume d'assoupir les sens, & en empêcher toutes les fonctions. Et ces causes ne se doiuent point discerner autrement, ny par d'autres signes, que celles de la douleur.

On appelle empêchemens de l'oreille, toutes les choses qui enbouschent le conduit, le pus, les ordures amassez, le tubercule charneux, le cal, le scirrhe, & tout ce qui estant tombé dedans y demeure attaché.

La difficulté de l'ouye, & la surdité qui sont contractées dès la naissance, & depuis le premier iour natal, ne viennent point de ces causes, ains du vice de la conformation, par lequel ou l'instrument de l'ouye manque, ou bien il est d'une mauvaise figure. Vn certain Conseiller auoit ainsi d'une femme fort saine, tous ses enfans sourds & muets, dont la cause semble cachée & grandement difficile à descouurir.

Quant à la Parotide, c'est une inflammation qui survient principalement es glandules qui sont derriere les oreilles, & à la racine d'icelles. C'est al a toutes les marques de phlegmon, la tumeur, la rougeur, la chaleur, la douleur battante, si ce n'est (comme il arriue quelquesfois) qu'il tienne de l'œdeme. Il a d'ordinaire sa source dans la teste, par le vice des humeurs chaudes qui s'y amassent, tantost sans fièvre, tantost avec une fièvre aiguë, en laquelle la teste est sur tout affligée ou de delire, ou de douleur, ou de pesanteur.

CHAPITRE VII.

Les maladies & symptomes des narines, avec leurs causes & leurs signes.

LEs narines estans destinées à l'éuacuation des Excremens du cerueau, deuiennent souuent vlcérées par l'acrimonie des choses qui s'écoulent par là : comme aussi de coup, de cheute, de playe, & d'autres causes euidentes. L'ulcere des narines ne se fait point connoistre, ny par douleur, ny par acrimonie, c'est pourquoy il demeure long temps caché sans qu'on s'en apperçoie, iusqu'à ce qu'il en sorte de la sanie, & qu'il vienne à ronger le plus tendre de l'os. Neantmoins estant encore recent, on le peut descouurir par ces indices, qu'il en sort souuent quelque peu de sang, principalement quand on y touche, ou qu'on l'irrite: & que les narines en sont souuent plus humides: & si on le laisse sans y toucher, il s'y fait vne crouste seche & noire, qui vient quelquesfois à tomber quand on se mouche bien fort. L'ulcere estant enuielly, & desia rendu putride, s'appelle Ozæna, d'où sort vne fort vilaine crouste, & de la morue puante. Le malade mesme s'apperçoit de cette mauuaise odeur qui l'incommode, & est fascheuse à ceux qui en l'approchant recoiuent cette desagreceable expiration. Il arriue souuent que ces vlcères contractez de longue main, s'estendent & courent par là, de sorte qu'ils magent & pourrissent avec beaucoup de difformité, ou les ailles des narines, ou le

cartilage qui les separe, ou les autres os plus tendres de cette partie, & perçent souuent le palais, qui en demeure rongé; & ce principalement s'il tient du chancre, ou s'il vient de verole, ce qui est le plus ordinaire. Les vlceres recens ayans esté negligez, il y suruiuent le plus souuent vne excroissance de chair, qui s'appelle Sarcoma, laquelle estant creüe en telle longueur, qu'elle pende hors de la narine, ou qu'elle tombe sur le gosier, est dite Polype. L'un & l'autre de ces vices bouschent la narine, & empeschent de prendre vent par là; lors principalement qu'on se couche sur le costé qui est incommodé, & gastent le parler, qui n'en est pas si clair. Or ces symptomes sont en quelque façon semblables à la defluxion qui se fait sur le nez, sinon qu'ils durent fort long temps, qu'ils ne cedent point aux Nasipurges, & que les marques de l'ulcere ont depuis long temps precedé.

Quant aux symptomes de l'odorat, ce sont la puanteur continuelle, & la diminution ou abolition du flairer. La puanteur sort seulement des parties qui sont autour des narines, & de l'os ethmoïde: car les choses qui se pourrissent dans le lieu mesme où se fait le sentiment du flairer, ou proche de là entre les meninges, ne touchent point ce sentiment, & le malade n'en sent rien, mais bien conque est proche de luy. Car pour faire que quelque chose frappe l'odorat, il faut qu'il en sorte quelque vapeur, laquelle soit portée par vn certain eipace dans ce sens là, & dans les premiers ventricules du cerueau. L'odorat se pert aussi, ou se diminue lors que le conduit des narines & de l'os ethmoïde, par lequel passe ordinairement l'esprit & l'odeur, vient à estre empesché par vne excroissance de chair, ou par vn polype, ou par vn phleg-

mon, ou par quelque defluxion. Et s'il ne paroist rien de tout cela, la cause de ce mal se doit rapporter ou aux premiers ventricules du cerueau, ou à ces rameaux de nerfs esquels reside le sens de l'odorat; là se rencontre de l'intemperie, ou vne abondance d'humeurs, ou quelque corruption qui gaste le sens & les esprits qui luy seruent.

Il se fait quelquesfois des absces en ces lieux là, sans fièvre, & avec fort peu de douleur, lesquels estans creuez, i'en ay veu sortir à coup par les narines du pus tout formé, de mesmes qu'il en sort des oreilles purulentes, sans que la santé en fust aucunement interressée. Il est aussi arriué à vn certain soldat qui auoit le nez camus, que quelques vilaines humeurs ayans esté trop long tēps retenues en cette partie là, il s'engendra deux vers de la longueur & grosseur du doigt, tout velus, qui le firent en fin deuenir furieux, & enuiron le vingtiesme iour luy causerent la mort, avec vne fièvre qui ne paroissoit pas beaucoup.

Pour la Coryze c'est vne defluxion froide & pituiteuse, qui decoule des parties qui sont autour du cerueau, ou des ventricules d'iceluy, & tombe sur l'os ethmoïde, & sur ses membranes. En suite de cette defluxion la teste deuient pesante, la respiration en est renduë plus difficile, en sorte que l'on ne peut retirer son haleine si l'on n'a la bouche ouuerte, la voix n'est plus claire comme auparavant, & l'on sent couler du nez quelque liqueur qui est au commencement fort subtile, puis elle deuient espaisse.

Finalement il sort du sang des narines, quand les veines qui y aboutissent, sont ouuertes, rompües, ou mangées. Or elles s'ouurent par la subtile, ou par l'abondance du sang : elles se rompent par

quelque playe receüe , par vne contusion de coup , ou par la violence des causes évidentes: elles se mangent par l'acrimonie du sang, ou de quelque autre humeur. Les veines qui s'estendent iusques aux narines, ne viennent pas du fonds du cerueau, ains des parties qui sont vers la bouche & le palais, & sont assez descouuertes & ouuertes, comme estans destinées pour éuacuer & mettre hors le sang qui est superflu: de mesmes que les hemorrhoides, & celles qui vont au col de la matrice. Parce que le sang sort de toutes ces veines là, tantost par vn benefice de nature , tantost outre l'ordre qu'elle prescript.

CHAPITRE VIII.

Les defectuositez du visage & de la bouche, & quelles en sont les causes.

LA peau qui couure la face, estant vne certaine portion plus seche de la chair qui est dessous, est suiette à des maux qui ne sont pas cōmuns aux autres parties. Comme sont en premier lieu des pustules ardantes qui s'esleuent avec beaucoup de difformité, tant au nez, que par tout le reste du visage. La cause de cela est vn sang subtil & bilieux augmenté outre mesure, ou qui ne s'éuacue plus selon qu'il auoit accoustmé; parce que lors il fait de l'effort, & se iette en ces lieux là. A quoy contribuë pareillement la rareté & tendresse de la peau qui s'imbibe promptement de cette humeur enclose sous l'epiderme.

La couleur excessiuement rouge de tout le visa-

ge, sans aucunes pustules, est aussi de ce mesme rang; laquelle venant à continuer de mesme façon & demeurant tousiours en mesme estat, c'est que la peau est imbibée d'un sang trop chaud; mais si elle ne paroist que par interualles, cela procede seulement de quelque vapeur qui s'esleue iusques là, ou de quelque humeur subtile qui n'y est pas encore bien arrestee.

En ce lieu se rapportent semblablement la couleur iaune la liuide, la passe, ou qui enlaidit en quelque autre façon, & la rudesse du cuir; comme il aduiet d'ordinaire en l'Ictere, en la Leucophlegmatie, & en toutes les especes de Cachexies: car elles procedent toutes du vice des humeurs, & de l'impureté des visceres, comme nous le deduirons cy après plus amplement.

Quant au porreau, c'est vne tumeur dure & petite, causée d'une humeur froide & grossiere, & presque reduite en cal. La lentille est vne tache noirâtre, ou rousse du visage, semblable en grandeur & en couleur à vne lentille. Les meurtrisseures sont certaines noirceurs restantes de contusion & de coup, aussi bien que les liuiditez vergetées. Il y a vn grand nombre de semblables difformitez, lesquelles ne causans aucun empeschement aux fonctions du corps, ne doiuent point estre mises au rang des maladies; mais elles peuuent bien estre contées entre les symptomes, à cause qu'elles sont tout à fait contre le dessein de la nature.

Le Spasme cynique, est vn retiremēt ou conuulsio de la bouche, qui la rend toute de trauers. Ce mal paroît d'abord quand il est grand & consommé; mais estant petit, on ne s'en apperçoit que quand on parle, ou quand on rit; car il se fait lors vne contorsion des levres de la bouche, quoy qu'on ne le vueille

pas. La paralyſie des levres cauſe vne ſemblable difformité, avec cette difference neantmoins, qu'en la paralyſie la contorſion de la leure ſe fait du coſté qui eſt ſain, & dans le ſpaſme elle ſe fait du coſté qui eſt affecté. Pour ſçauoir quelles en ſont les cauſes efficientes, il faut voir ce que nous auons cy deſſus dit de la Paralyſie, & de la Conuulſion. Icy ſe rapportent pareillement les fentes des levres, leiſquelles viennent en ſuite de la mauuaife conſtitution du ventricule & des viſceres.

Les dents ſont d'ordinaire affectées en diuerſes façons : car tantost elles ſont trop longues, & paſſent hors de la bouche ; tantost elles s'vſent, ou en mangeant, ou par l'effort des cauſes externes. Elles deuiennent agaffées par vne deſfluxion d'humeur froide, & pour auoir mangé des fruits cruds & verts. Elles ſe noirciſſent & s'enduifent d'une vilaine crasse limonneuſe, par faute de les nettoyer, par l'vſage des choſes chaudes & douces, & par des expirations de crudité & de gourmandiſe. Elles branſlent, & deuiennent mobiles eſtans choquées par quelque choſe externe., & quand leur racine eſt arroſée d'humeur, & que leur trou deuiet trop large. Elles ſont vne douleur extremémēt fâcheuſe, & ce d'ordinaire à cauſe de quelque deſfluxion, tantost ſubtile, tantost froide, qui tombe ou ſur la membrane de la maſchoire, ou ſur le nerf des dents, ou meſmes ſur le corps d'icelles. Or cette deſfluxion vient du ſommet de la teſte, & tombe le long des temples ſur la maſchoire, ou ſuperieure, ou inferieure & s'il y a quelque dent cauée vers laquelle la deſfluxion ſe ſoit deſia fait vn chemin, c'eſt là principalement qu'elle ſe jette. Au reſte, pour diſcerner ſi la deſfluxion eſt ſubtile ou froide, il faut prendre garde aux ſignes qui en

ont esté marqués cy deuant, & noter que la defluxion froide est presque tousiours accompagnée de l'enfleure des ioües; ce qui n'arriue que fort rarement quand la defluxion est subtile; & que la douleur de celle cy est beaucoup plus grande que de celle là. Quand la defluxion est frequente, & reuient souuent, elle caue, mange, & pourrit les dents, & les fait quelquesfois tomber.

Les genciues s'enflent, & croissent quelques fois demesurement. en sorte que les dents en sont presque toutes couuertes: ce qui arriue principalemēt à ceux qui les ont molles & spongieuses, & à ceux qui demeurent en des lieux aquatiques & humides, comme sont les Mariniers. Elles se flaistrissent & se rongent par l'attache de quelque humeur acre & salee, & par des petits vlceres qui descouurent les racines des dents. Elles sont pareillement suiettes à vne sorte de phlegmon manifeste, qu'on nōme *Paroulis*, lequel fait vne si grande tumeur par dedans, ou par dehors à la racine des dents, que les parties voisines mēsmes en deuiennent enflées, rouges, enflammées, & douloureuses. Celuy qui se forme en la maschoire superieure, deriue ordinairement du plus grand angle de l'œil; mais en l'inférieure il vient des temples par les veines qui s'aboutissent en cette partie. De là s'ensuit vn absces dont le pus sort, non point vers la peau du visage, mais par les racines des dents, qui ne sont couuertes que d'une mēbrane fort deliée. L'ulcere ayant esté mal pensé, il s'y fait vne excroissance de chair, qu'on appelle *Epoulis*.

Quant à la maschoire de dessous, elle est quelquesfois attaquée & de conuulsion, & de paralysie; mais elle est beaucoup suiette à la defluxion, qui tombant sur la iointure d'icelle vers la racine

de l'oreille, la rend bien souuent immobile, avec douleur de la partie, & vne tumeur dure & apparente. Cette defluxion, aussi bien que les autres externes, vient ordinairement du sommet de la teste.

Les Aphthes finalement sont certains vlcères qui ne sont gueres profonds, & qui courent par toutes les parties de la bouche, au palais, és genciues, és costez, & à la racine de la langue. Les enfans y sont fort suiets. Ceux qui sont plus aagez en ont aussi quelquesfois, à cause de quelque expiration trop chaude du foye, & de la bile enflammée, qui s'elue par l'œsophage, ou mesmes par des conduits secrets: cela vient encore quelquesfois de la pituite salée qui decoule de la teste. Ces vlcères sont frequents dans les fièvres, & mesmes aucunesfois sans fièvre, on ne laisse pas d'en estre incommodé, comme on void souuent arriuer par la suppression des purgations menstruales. Or ie laisse à parler icy de ceux que la verole, & les octions d'argent vif ont coustume de produire.

CHAPITRE IX.

Les maladies & symptomes de la langue, & du gosier, avec les causes qui les produisent.

EN cette partie molle & lâche de la bouche, qui est au dessous de la langue, & sur laquelle la langue repose & est attachée comme par vn lien, se fait vne tumeur appelée *Ranule*, qui paroist quelquesfois en phlegmō, & le plus souuent en œdeme lâche & mollasse, lequel estant ouuert, il en sort vne

morue fort semblable à du blanc d'œuf. Quant à la langue, elle est quelquesfois attaquée par tout de stupeur, ou de paralyfie, par vn entier empêchemēt des nerfs qui procedent de la septiesme coniugaison du cerueau, proche du commencement de la moëlle de l'espine. Quelquesfois la resolution n'est qu'en l'vne des moitez droite ou gauche de la langue, sans que le goust en soit aucunement interessé. Quand elle est toute entreprise, il y a lors vn grand danger d'apoplexie: combien que j'aye souvent reconneu qu'après vne longue paralyfie de la langue, il ne s'estoit ensuiuy aucune apoplexie. Ceux qui ont vne paralyfie formée, deuiēent tous muets: il y en a aussi quelques vns qui sont muets dès la naissance, par le defaut de la vertu conformatrice. Il s'est pareillemēt veu certaine personne, qui par vne legere cause perdoit la parole pour deux ou trois iours, puis la recouuroit tout à coup, & à l'improuiste; & vne autre, qui par certains interualles & reuolutions, tantost parloit, & tantost deuenoit muette, & cependant se portoit entierement bien de corps. Les begues, & ceux qui ont la lange grasse, ne prononcent pas bien ce qu'ils disent, à cause qu'ils ont la langue ou trop courte, ou trop espaisse, ou vitiée de quelque autre conformation naturelle; quelquesfois aussi par l'abondance de l'humour qui tombe là, tantost pour auoir le cerueau trop humide, tantost pour auoir trop beu de vin: quelquesfois par vne excessiue secheresse.

Quant au goust, il se perd, ou se diminue lorsque les nerfs les plus mols qui sortēt de la troisieme coniugaison du cerueau sont refroidis, ou aucunement bouchés, ou bien quand cette partie du cerueau d'où ils prennent leur origine, est affectée. Pour le goust depraué, qui est la perception d'vne saueur

absurde & estrangere, il vient de ce que le corps de la langue, ou la membrane qui l'envelope, est imbibé d'une humeur mauuaise & corrompue, laquelle ou seule, ou delayée dans la liqueur des choses que l'on boit ou mange, penetre dans le corps de la langue, & dans les nerfs mollasses, & les infecte de ses mauuaises qualitez; & pour lors on sent vne saueur ou salée, ou amere, ou aigre, ou absurde en quelque autre sorte, eomme si elle venoit de la viande ou du breuuage. Or cette humeur vapoureuse monte souuent des parties inferieures, & arrouse l'œsophage & la langue; elle tombe aussi quelquesfois du cerueau.

Les Amygdales s'enflent souuent par defluxion d'humeur froide: & lors la tumeur paroist au doigt & à l'œil, en dedans sous la maschoire, laquelle demeurant attachée au gosier, cōme si c'estoit quelque morceau, l'opresse par la grosseur, & empesche que la mangeaille, le breuuage & la saluie nō se puissent aualler facilement, & ce sans soif & sans ardeur. Mais il arriue quelquesfois que les amygdales sont trauaillées d'une inflammation qui prend aussi sa denomination de cette partie. Elle a les marques de la tumeur, & est outre ce accōpagnée de douleur, de rougeur, d'ardeur, & de soif. La matiere estant digerée, la peau interieure se rompt facilement; & l'absces estant fait, le pus sort dans la bouche & dans le gosier. En suite dequoy il se forme vn vlcere fordide, d'oū il expire vne odeur puante. Il se fait souuent vn vlcere de cette mesme qualite, sans phlegmon, par vne humeur salée ou acre, qui ronge entierement les amygdales qui sont molles, humides, & chaudes; cela arriue aussi quelquesfois assez communement au commencement de la verole, par vne suite contagieuse.

La luette, qui pend à l'extrémité du palais, fait aussi souuent de la peine : car venant à se relascher & allonger par trop, elle tombe dans la gorge, & sur l'entrée de l'œsophage, où elle fait vn chatouillement penible, qui caue que celuy qui en est incommodé tache, mais en vain, de l'aualler, & apprehende que cela ne l'estrange tout à coup. Ce mal vient de ce que la luette est humectée & arrosée d'une humeur abondante qui tombe d'en haut. Il arriue aussi quelquesfois, mais bien rarement, que la luette ou gargueton, soit enflammée & enflée avec rougeur & ardeur. Et tombant lors sur le gosier, avec plus de fâcherie que quand elle est relâchée, elle fait dauantage apprehender la suffocation. Quand estant enflammée le bout d'icelle est gros & rond, & le haut paroist menu, on l'appelle communement, dit Hippocrate, *Straphylé*, c'est à dire raisin.

Quant à la Squinancie, c'est vn mal qui bouche la gorge, c'est à dire, les parties superieures de l'œsophage, & du gosier, par où passent tant les viandes & les breuuages, que les esprits. En cette maladie la respiration deuiet difficile, à peine peut-on aualler, de sorte que le breuuage remonte dans le nez, & on sent par toute la gorge vne fort grande douleur. Or ces choses seruent bien de signes communs à toute sorte de squinancie; mais elles reçoient beaucoup de variété par leurs differences & par leurs causes: car il y a vne espeece de squinancie qui est vraye, & vne autre qui est bastarde. La vraye & legitime est de quatre sortes : l'une, que Hippocrate a estimée la plus dangereuse de toutes, en laquelle il ne paroist rien ny au gosier, ny au col; car l'inflammation en estant du tout cachée, produit des symptomes grandemēt fâcheux.

non sans crainte d'une soudaine suffocation. Nous auons souvent veu le malade en estre emporté dès dixhuit heures, avec le iugement sain, & les sens entiers, L'autre est, quand les muscles interieurs du larynx & de la gorge sont attaquez d'un phlegme manifeste. Celle-cy aussi bien que la precedente, produit de cruels symptomes; mais elle n'est pourtant pas si dangereuse, d'autant qu'elle se manifeste par une tumeur apparente, qui reçoit promptement le remede, & se peut euacuer par la bouche. La troisieme occupe le dedans de la gorge & le col, auquel paroissent en dehors la tumeur & la rougeur, avec chaleur & douleur. Les symptomes n'en sont pas moindres que des autres, mais il y a neantmoins plus d'esperance de sante, à cause que l'inflammation se poussant au dehors peut estre attirée & digerée. C'est de celle cy qu'Hippocrate a escrit. Quand on a la squinance, s'il se fait une tumeur au col, cela va bien; car le mal sort en dehors. La quatrieme est reputée la moindre, & la plus seure de toutes; elle n'attaque point le dedans de la gorge, mais seulement le col & les muscles d'iceluy, la tumeur desquels ne laisse pas neantmoins de presser aussi les muscles internes du larynx, & de retrecir tout le passage. La cause de toutes, est une defluxion bilieuse, ou sanguine, laquelle tombant sur ces parties par les rameaux des veines iugulaires, qui aboutissent là, engendre ou une erysipele, ou un phlegmon. Outre les signes communs des squinances cy deuant remarquez, il y a de plus en icelles de la tumeur, de la rougeur, de la chaleur, & de la fièvre, laquelle ne manque iamais en toute squinance vraye. Pour la squinance qu'on nomme *Bastard*, elle est exempte de fièvre. Or cette cy vient d'une defluxion pituiteuse,

qui tombe sur la gorge, & sur les muscles du col, & lors il y peut auoir de la tumeur; mais sans rougeur, sans ardeur, & sans fièvre; c'est pourquoy elle ne doit pas estre mise au rang des maladies aiguës. De cette espece de squinance approche celle qui se fait, non par aucun mal de gorge, mais quand les vertebres du col estans disloquées en dedans, pressent & serrent trop étroittement la gorge, & l'entrée de l'œsophage & du gosier. On la discerne en ce qu'il ne paroist aucun des signes susdits, qui se remarquent és autres; qu'il y a par le derriere vne cavitè sur le col, & qu'on ne le fléchist qu'à peine & avec douleur: que cela aussi est arriué en suite de quelque cheute ou de quelque coup: ou bien c'est vne humeur outre nature qui a relasché les ligamens des vertebres, ou qui par son abondance les a fait sortir de son propre lieu.

CHAPITRE X.

Les maladies & symptomes des poulmons; leurs causes & leurs signes.

Sous le nom des poulmons, nous entendons parler aussi de tous les vaisseaux qui sont en iceux, & de l'aspre artere mesme. Or les maux qui se rencontrent là, sont la simple intemperie, l'obstruction, la peripneumonie, la vomique ou absces, & la phthisie. Et dans la capacité du Thorax, se font l'amas d'humeur, & la suppuration.

L'intemperie simple, & sur tout la froide, puis la seche pareillement, rendant aspre l'artere du gosier, excite vne toux seche, par laquelle on ne

crache aucune humeur; rend la respiration plus rare, & fait desirer l'air & le breuvage chauds. Quant à l'Intemperie trop chaude, elle requiert de la fraîcheur, tant en l'air, qu'au breuvage, & fait la respiration frequente: Si l'Intemperie est plus excessive, elle causera de la douleur. Or tout cecy se doit entendre de l'Intemperie qui est inégale: car celle qui s'est desia renduë égale, estant passée comme en nature, n'excite aucune douleur.

Il arriue quelquesfois, mais fort rarement, que le vent demeure renfermé dans le poulmon, outre l'ordre de la nature; & lors il fait estendre les parties qui sont à l'entour, & venant à estre agité, il cause de la douleur, & par fois on le sent sortir avec violence.

Quant à l'Obstruction, elle est frequente, & de grande importance. Elle apporte la toux, & l'oppression, & la difficulté de respirer, qui est d'autant plus fâcheuse, que l'obstruction est grande. Il y a diuerfes causes de ce mal: l'abondance des humeurs, leur viscosité & grossiereté, la gresle, la pierre, & le tubercule crud, desquelles choses il faut traiter en particulier, comme estans les causes principales qui affectent les poulmons.

L'abondance des humeurs se rencontrant par defluxion, sur la membrane qui enveloppe le gosier, & l'imbibant, rend la voix obscure, & fait deuenir enrouë. Ce que fait aussi la trop grande aspreté du gosier, ou de l'artere, soit pour auoir esté à la fumée, soit pour auoir trop parlé, ou pour auoir enduré du froid. Mais la defluxion tombe dans le creux & conduit du gosier, elle émeut vne petite toux, avec quelque sentiment d'vne acrimonie qui picote, & si elle tombe dans la poitrine & sur les poulmons, elle cause vne vraye toux qui

vient du fonds de la poitrine. Car la toux se fait lors que la nature tâche en aspirant avec vehemen-
ce, & par l'effort que l'haleine fait en sortant, de
mettre hors tout ce qui l'incommode, ou par acrimo-
nie, ou par obstruction : de mesme que quand
en beuvant il tombe quelque chose dans le gosier.
Neanmoins si ce qui decoule sur les poulmons est
fort subtil, il est bien difficile de le rejeter en
toussant; car estant repoussé & soufleué par vehe-
mence du vent qui vient au rencontre, il se disper-
se aussi tost, & retombe sur les poulmons : mais ce
qui est trop grossier, & trop visqueux, se repousse
& reiette avec beauconp plus de difficulté; car il ne
peut estre par la force de l'haleine, ny destaché, ny
ébranlé, ny esleué. Quand la defluxion est recente,
& que mesme elle tombe encor actuellement, elle
brûle & escorche le gosier par son acrimonie, & ex-
cite vne petite toux frequente, qui ne fait que peu
ou point cracher: mais estant tóbée & arrestée sur
les poulmons, la toux n'est pas si frequente, & en
toussât sans aucune ardeur du gosier, on tire du fôds
de la poitrine quelque chose de plus épais. Lors
finalement que la defluxion est petite & legere,
elle n'est point pareillement accompagnée que de
legers symptomes : & quand elle est grande & for-
te, & qu'elle tombe à coup, on est pressé d'une cer-
taine difficulté de respirer, qui menace de suffoca-
tion, la respiration devient frequente, prompte, &
grande, mais par laquelle on n'attire gueres d'air;
on sent vne certaine pesanteur à la poitrine, & qui
s'estend à l'espine en la partie où les poulmons sont
joins & adherents par les membranes qui les y at-
tachent.

Or pour sçauoir si l'humeur qui decoule est
chaude ou froide, il le faut apprendre de l'acri-

monie, de la soif, & des choses que nous avons remarquées touchant les signes des defluxions. Au reste quand l'humeur qui occupe le poulmon & son artere est grossiere & visqueuse, elle excite vne toux seche, fort vehemente, par laquelle à peine crache-on quelque chose : la respiration en est incommodée, & en respirant il se fait vn certain ronflement ou sifflement, à cause que cette humeur s'attache opiniaistrement aux lobes des poulmons, & referre les conduits par où passe le vent : & avant cela, il a paru des marques de defluxion, ou du cerueau, ou des parties voisines. Cette humeur n'ayât pas esté entierement euacuée par le cracher, le reste demeurant attaché aux lobes, ou aux cauitez des poulmons où il s'est enfoncé, de sorte qu'il n'en a pû estre tiré hors, s'épaissit & desseche de plus en plus par laps de temps, iusques à ce que par la force de la chaleur il se change en pituite vitrée, ou en plaistreuse mesme. Et quand après plusieurs defluxions reïterées, il est resté de chacune quelque chose de cette pituite grossiere & plaistreuse, il se fait en fin vn vray Asthme de la grande abondance qui s'en amasse dans les trous & cauernes des poulmons, à qui sont d'ordinaire suiets ceux qui sont souvent attaquez de defluxions & de-toux, & principalement les personnes fort agées, & celles qui ont les poulmons estroits.

De l'Asthme vient l'Orthopnoée, en laquelle on respire avec plus de peine, & encor faut-il cependant tenir le col droit, comme j'ay dit, que respiroient ceux qui sont grandement presséz de squinance. Le mal venant à s'augmenter, l'humeur visqueuse se coagule en gresse, & finalement en vrais calculs, dont nous auons quelquesfois remarqué par la dissection, que les poulmons étoient
tout

tout pleins; les vns fort durs & solides, les autres de la consistance d'un vieux fromage, & d'autres qui ne faisoient que commencer à durcir, tenans encor de la pituité plastreuse: & chacun d'eux estoit enucloppé de sa propre pellicule. Il s'est aussi depuis peu rencontré un certain personnage, lequel toutes les fois qu'il s'échauffe par l'exercice, pousse hors des poulmons; en toussant, des pierrettes fort dures, & les crache de la grosseur, tantost d'un grain d'orge, tantost d'un pois. Il se porte bien neantmoins, excepté qu'il a un peu de peine à respirer, & sent une certaine pesanteur au milieu de la poëtrine. Or ces choses arriuent aux vns sans Dispnoée, & aux autres avec une Orthopnoée souspireuse, dont ceux qui sont trauaillez estouffent presque par la vehemence de l'oppression, & s'efforcent par une longue & souspirante respiration, d'attirer quantité d'air frais, pour se rafraîchir le cœur, qui en a beaucoup de besoin. Tous ceux qui sont trauaillez de la sorte, nous les appellons vrayement Asthmatiques, qui respirent plus librement quand ils sont à ieun, & en repos, & lors que le Ciel est serein; mais toutes les fois que la cause & matiere qui est cachée au dedans, vient à s'humecter, & comme s'enfler par un air froid ou humide, ou mesme par un excez de crapule, elle s'épand, & lors on est surprins comme d'un nouuel accez de dispnoée. Et ce beaucoup plus si d'auéture il se fait quelque defluxion recente sur les arteres desia empeschées du mal precedent. Voire mesme il arriue souuent que le malade est en peu d'heure estouffé par l'impetuosité forte & subite de l'une & de l'autre cause; & cette defluxion, à raison de l'euénement, s'appelle Catarrhe suffocatif. Galien à creu que personne ne pouuoit estre estranglé su-

bitement, ny par defluxion, ny par Peripneumonie, ny par le tubercule des poulmons, ny par leur suppuration; mais par cette seule squinancée en laquelle il ne paroist chose aucune ny en la gorge, ny au col: mais nous sommes tesmoins que beaucoup de ceux qui auoient desia depuis long temps les poulmons grandement farcis, comme en l'asthme inueteré, ont esté suffoquez par vne abondante & subite defluxion.

Le tubercule engendré és arteres des poulmons, venant à les bouscher, produit les mesmes symptomes que fait l'asthme, on le discerne toutesfois en ce qu'il a peu à peu prins croissiance, sans qu'il ait precedé aucune marque de defluxion, & en ce que la difficulté que l'on a de respirer, se fait sans aucun ralement. Neantmoins toute obstruction vieille & contumace, de quelque cause que ce soit, se descouure en respirant bien fort; car en ce faisant on sent sous la poictrine ce qui cause l'incommodité, dont la toux est aussi tost excitée, quoy que depuis long temps assoupie. Si le tubercule ou quelque autre cause que ce soit, qui face de l'obstruction, penetre desia si auant, qu'elle adhere, non és rudes arteres des poulmons, mais en celles qui sont plus polies, & qui auoisinent le cœur, non seulement la respiration sera difficile, mais aussi le pouls deuiendra tout à fait varié, inégal, & intermittent, ou mesme entrecoupé: & lors, le cœur estant desia oppressé, il suruiendra vne palpitation de cœur, & quelque defaillance d'esprit. Voilà toutes les causes de l'obstruction des poulmons. Or tant les poulmons que les arteres d'iceux sont plus estroits qu'il ne faut, ou de nature, comme en ceux qui dès la premiere conformation ont la poictrine enfoncée, & la capacité d'icelle estroite;

& en ceux qui sont naturellement trop gras, ou qui le sont deuenus pour auoir beaucoup mangé, & faute d'exercice. Ce qui a fait dire à Hippocrate, que ceux qui de nature sont fort replets, ne viuent pas tant que ceux qui sont maigres. Les vns & les autres ont tous les conduits du corps fort estroits & petits, dans lesquels le peu d'esprits qui s'y rencontrent est oppressé à la moindre occasion, & peut tres-facilement estre éteint, quand bien il n'arriueroit aucune d'fluxion d'humeur.

La Peripneumonie, est vne inflammation des poulmons, tantost en forme de phlegmon, tantost en forme d'erysipele. La respiration se fait lors avec beaucoup de peine, les ioües deuiennent excessiuelement rouges, & comme enflammées, les yeux s'enflent. Et si c'est de phlegmon, l'on crache le sang, dit Hippocrate, si ce n'est que le mal soit fort crud, on sent vne oppression des entrailles, & de toute la poitrine: & vne tres-grande pesanteur qui fait retirer le dos & le sternon, l'on n'a pourtant pas de fièvre beaucoup aiguë. Mais en l'erysipele la toux fait sortir vn crachat iaune, qui n'est gueres meslé de sang, l'oppression & le sentiment de pesanteur ne sont pas si grands, mais la fièvre est plus brûlante. Or l'une & l'autre viennent tantost d'elles mesmes, tantost en suite de la squinance, ou de la pleuresie, lors que l'humeur se jette à coup de la gorge ou du costé sur les poulmons. C'est de cette cy qu'Hippocrate a escrit: Quand du mal de côté vient l'inflammation, cela va mal. Celle qui ne succede à aucune autre maladie, mais qui prend sa premiere origine de soy-mesme, vient d'un sang subtil & bilieux, poussé avec vehemence, & en abondance hors de la sinuosité droite du cœur, sur les poulmons, par la veine arteriale, lequel venant

à remplir & estendre outre mesure, non seulement les veines & arteres du poulmon, mais aussi tout le corps d'iceluy se reserre & pourrit, elle allume vne inflammation dans le poulmon, qui n'est pas ramassée à la façon des autres, mais espendue par tout le viscere. Or la vraye peripneumonie arriue fort rarement; mais la defluxion abondante, subtile & acre, faite à coup du cerueau sur les poulmons, s'eschauffe quelquesfois outre nature, & cause de la chaleur & de la fièvre; & plusieurs designent ce mal par le nom de Peripneumonie, auquel le malade affligé de la toux, de la difficulté de respirer, & d'une fièvre lente, se va peu à peu consommant, sans vlcere & sans crachement de sang. Si on veut nommer cela Peripneumonie, il s'y trouuera certes beaucoup de difference d'auec celle qui est exquisite, tant à raison de la cause, que pour la grandeur des symptomes.

La Vomique est vn petit abscez du poulmon, & vne collection de pus amassé en certaine partie d'iceluy, lequel est tellement enduiet de sa petite membrane, & si bien enclos dans sa propre bourse, qu'à peine peut-il expirer rien de malin vers le cœur. Les phthisiques y sont fort subiets; voire mesme il arriue souuent que cela se face sans phthisie; lors qu'il est sorty du sang de quelque veine ouuerte, rompüe, ou rongée, lequel s'estant ietté en quelque petit recoin du poulmon, se pourrit là, & peu à peu se conuertit en pus, qui se dessechant en la surface se fait vne enveloppe. A dire le vray, ce vice est grandement couuert & caché; ny le malade, ny le Medecin n'en connoissent rien bien souuent; le malade ne laisse point pour cela de faire ce qu'il auoit accoustumé, & ne pense pas mesme auoir aucune maladie, de sorte que sans le sçauoir il couue dans

la poictrine la cause de sa mort. Vn certain ieune homme, apres quelque exercice vn peu trop violét, estant surprins d'une toux fort grande qui ne luy donnoit aucun relasche, cracha vne vomique entiere aussi grosse qu'un œuf de pigeon, laquelle estant ouuerte, on y trouua du pus parfaictement blanc & egal; & en suite de cela il cracha le sang durant deux iours entiers, avec vne forte fièvre, & vne grande perturbation du corps. Et neanmoins il fut guerenty & remis en santé. Il est mort inopinément quantité de personnes en l'espace d'un quart d'heure, esquelles par la dissection il ne s'est trouué aucune autre cause mortelle, que la soudaine ouuerture d'une vomique creuée dans les poulmons, le pus de laquelle s'estant ietté sur le cœur, en auoit esteint & estouffé la vertu. Et s'en estant rencontré deux entre les autres, qui estoient très celebres Medecins, ils ne s'apperceurent pas pourtant de leur mort prochaine, n'en ayant eu aucun indice ny par fièvre, ny par dégoüst, ny par aucun autre symptome. Cela m'a souuent remis en la memoire ce passage d'Hippocrate, où il dit, Ceux qui ont quelque suppuration cachée dans le corps, sans la conoistre, ne s'en apperçoient point à cause de la grossiereté ou du pus, ou de la partie. Car l'espaisseur de la membrane qui enuoloppe le pus empesche souuent qu'il n'expire aucune malignité vers le cœur où est la source de la vie. Neanmoins à tous ceux qui ont esté affectez de cette sorte, il est suruenu long-temps deuant que la vomique creuast, vn crachement de sang fort des poulmons, & accompagné de toux: l'haleine estoit facheuse & puante, le corps pesant, la poictrine vn peu oppressée, la respiration difficile, & avec cela deuenoient-ils tabides. Mais ces signes sont communs à d'autres maladies.

Quant à la Phthisie, c'est vne vlcération de poulmon, par laquelle le corps se va consommant peu à peu. Quand elle commence, on touffe souuent, & en touffant on crache quelque chose de sanglant sans aucune douleur; quelquesfois cela s'arreste, & à force de touffer, il sort de la matiere fordide, puis purulente, lors vient vne petite fiéure qui continuë sans intermission; laquelle estant finalement deuenue hectique, s'augmente à la façon des autres, aussi tost qu'on a mangé. L'ulcere croissant de plus en plus, & deuenant fordide, on crache le pus, & se fait ce qu'a dit Hippocrate, Du crachement de sang, vient le crachement de pus. Le pus estant sincere, ne nage point sur l'eau, comme l'autre, quand on l'y jette, mais s'il est pur, il descend & s'arreste au fonds. Et neantmoins toutes les fois que l'ulcere enduit de la viscosité du pus, vient à estre renouuellé, ou par le travail, ou par l'impetuosité de la toux, ou par vn transport de cholere, ou retourne à cracher le sang. Quand le mal est confirmé & desia inueteré, il sort quelquesfois vne portion pourrie du poulmon, & le crachat rend vne odeur puante estant jetté sur les charbons, ou bien de foy mesme, & souuent il infecte par son expiration contagieuse, ceux qui ne s'en donnent pas garde: les cheveux tombent, & ce par faute de nourriture: tout le corps estant desséché, & la fiéure s'augmentant, les ongles des mains se courbent, les jouës deuiennent liuides par la vapeur maligne qui monte là, les extremitéz des costes se reueuent en haut à force de secheresse, iusqu'à ce qu'en fin tout le corps estant consommé se dessèche, & que la chaleur naturelle s'esteigne, n'ayant plus d'humidité qui la fomenté.

C'est vne question fort controuersée entre les

escriuains, si quelqu'un peut deuenir phtifique sans auoir craché le sang. Quelques vns ont commencé à deuenir phtifique, estant surprins d'une fort legere fièvre après le seul crachement d'une humeur liquide & iaunaistre, & ont long temps après jetté quelque peu de sang avec le pus. Mais i'en ay veu aussi plusieurs mourir peu à peu de phtisie, sans qu'il ait paru aucune chose de sanglant pendant tout le cours de la maladie. Nous deduirons tantost la raison de ces choses là.

Il y a deux causes de la phtisie, l'une est la mauuaise constitution du poulmon, & l'autre vne humeur corrosiue. L'appelle mauuaise constitution, non l'intemperie, mais la substance molle, tendre, & corruptible des poulmons, dont i'ay ailleurs amplement discouru. Il y en a beaucoup qui dès la naissance, & par communication hereditaire, sont ainsi entachez d'un mal secret des poulmons, par lequel finalement ils deuiennent tous phtifiques, quoy qu'il ne s'y face que peu ou point de defluxion du cerueau ou d'ailleurs, Ceux qui sont nais d'une race phtifique, sont tous necessairement sujets à la phtisie, comme par droit d'heritage: & souuent nous auons veu que ce mal se communiquoit par ordre à tous ceux aussi qui ont la poitrine estroitte & enfoncée, sont plustost surprins de phtisie, & leur nature, comme dit Hippocrate, panche à la phtisie, non point veritablement à cause qu'ils ont les poulmons estroicts, car cela porteroit seulement à l'asthme, mais parce qu'ils sont d'ordinaire si languides & imbecilles, qu'avec le temps & peu à peu ils fraistrissent & se corrompent d'eux mesmes. Et partant ceux qui dès la naissance ont eu les poulmons mauuais sont morts phtifiques; les vns après auoir craché le sang, & les au-

tres sans cela. L'autre cause de la phtisie est vne defluxion acre & corrosiue qui tombe de la teste: ou quelque humeur acre que le cœur enuoye sur les poulmons, comme celuy qui s'y amasse principalement en Automne, ou bien vn pus renfermé dans la capacité du thorax, touchant lequel Hippocrate a prononcé, Que les Empyes, c'est à dire purulents, qui ne se purgent point par le cracher dedans quarante iours, deuiennent phtisiques. Ces causes donc vlcèrent peu à peu & sans faire douleur aucune les plus robustes poulmons: auxquelles on peut adiouster tout ce qui peut causer vn semblable effect par vne propriété occulte, comme est le lièvre marin.

Pour la veine des poulmons rompue de cheute, de trauail, ou de crieries: ou bien ouuerte par l'eschaufaison, les bains, la boisson du vin, ou les aliments chauds & abondants, ou mesme (ce qui aduiant quelquefois) par le regorgement des fleurs menstruales supprimées, elle a souuent respandu par le cracher vne grande quantité de sang, dõt il ne s'est point ensuiuy de phtisie, & i'en ay veu plusieurs affectez de la sorte, qui ont depuis vescu long-temps sans aucune incommodité. Car personne ne deuiant phtisque par vne simple rupture de veine, pourueu que le reste de la substance du poulmon demeure entiere. Ou si de là il s'ensuit quelque phtisie; cela vient assëurement de ce que le sang coule de quelque vlcere dans la substance des poulmons, & que venant à s'enflammer, & finalement à se pourrir, il l'interesse & la gaste.

CHAPITRE XI.

*Les maladies & Symptomes du
Thorax.*

LA Pleuresie est vn phlegmon de la membra-
ne qui est estendue sous les costes. Or le costé
est attaqué de diuerses douleurs qui different tant
en situation qu'en matiere. En situation, parce
que la cause de l'vne est entre les costes & la mem-
brane succingente; celle de l'autre és muscles in-
tercostaux internes, & celle de l'autre és muscles
qui sont par le dehors couchez sur les costes. Cet-
te derniere douleur n'est pas vne veritable Pleu-
resie, ains vne Pleuresie bastarde: pour celle qui
se fait ou és muscles intercostaux internes, ou bien
entre iceux & la membrane succingente, ou en
tous ces deux endroits, c'est vne vraye & legitime
Pleuresie, à raison de la situation. Ces douleurs
sont pareillement differentes en matiere, parce que
l'vne vient de phlegmon, l'autre de defluxion, &
l'autre de vents. Quant au Phlegmon il se forme
d'un sang qui est rarement grossier, & le plus sou-
uent subtil & bilieux, lequel passe avec vne cer-
taine impetuosité, de la veine caue adherente au
cœur en celle qui s'appelle Azygos, & de là dans
les petites veines des costes, desquelles ouuertes
ou rompues, il sort & se iette ou sur les muscles
intercostaux internes, ou entre les costes & la mé-
brane succingente, & là s'estant amassé il engendre
vn phlegmon & vne veritable Pleuresie. Mais

quand le sang se respand sur les muscles externes du Thorax, par le rameau qui sort de la veine caue & s'estend sur les parties externes du Thorax, aussi-tost qu'il a passé du Thorax en l'aisselle, il fait à raison de la matiere vne vraye Pleuresie, mais au regard de la situation c'est vne Pleuresie bastarde. Or combien que ces phlegmons soient differents de situation, ils ont toutesfois vne grande affinité : & souuent celuy qui est interne deuient externe, ou au contraire ; parce que, comme i'ay enseigné en l'Anatomie, les extremittez des veines interieures passent au dehors, & les orifices de celles qui sont externes s'insinuent au dedans. Au reste, la cause qui excite la fluxion & l'impetuosité du sang, est ou la trop grande abondance d'iceluy, ou sa subtilité, ou son ebullition & agitation procedée d'eschaufaison, des bains, des exercices, de la cholere, d'un coup, de quelque soudain refroidissement, ou pour auoir beu trop frais, ce qui pousse & deiette diuersement le sang eschauffé & agité. A ces causes est adioustée la foiblesse du costé par laquelle la fluxion n'est à la verité pas attirée, mais plus promptement receüe.

Or la douleur pleuritique n'est pas tousiours de mesme sorte, mais selon que le sang qui se jette là, est de diuerse condition, & qu'il varie de situation & d'amplitude du lieu, aussi la vehemence de la douleur change-elle souuent : car elle est plus atroce quand elle vient d'un sang subtil & bilieux, lequel engendre vn phlegmon qui tient de l'erysipele, & est plus douce quand elle vient d'un sang pur ou pituiteux ; car estant tel il ne fait qu'un phlegmon simple, ou bien celuy qu'on nomme cedemateux. La douleur de costé contractée par defluxion, occupe aussi les parties exterieures, & pro-

cede d'une humeur froide qui tombe du haut de la teste, par le col, sur les espauls & omoplates, & finalement sur les muscles externes du costé, tantost anterieurs, tantost posterieurs. Et bien que cette humeur ne soit aucunement Pleuresie, neantmoins venant à persequer, elle amene quelquesfois vne vraye Pleuresie, qui fait mesme cracher le sang; ou parce que penetrant peu à peu plus avant, elle s'insinüe finalement dans les muscles intercostaux internes, & dans la membrane succingente; ou parce que la douleur qu'elle fait attire des veines en ce lieu-là quelque fluxion nouvelle.

Le vent cause pareillement vne douleur de costé fort vehemente, toutes les fois qu'il se met entre les membranes ou externes ou internes, & qu'il les estend & destache des parties voy fines. De plus, ces membranes estans retirées en bas par le poids & gravité des visceres, il s'y fait souvent des douleurs qui durent long-temps, & comme on tient que cela arrive par le vice & pesanteur du foye, aussi avons-nous reconnu qu'il se prolongeoit fort à l'occasion de la ratte. Et ne faut pas oublier à remarquer que des coups, ou des cheutes, il reste souvent des douleurs de costé longues & opiniastres, & beaucoup plus s'il s'en est ensuiuy quelque luxation ou fracture des costes.

Il faut maintenant discerner ces genres par leurs signes. En quelque lieu que soit la douleur de costé, elle retient l'haleine, & ne permet pas de respirer librement & fortement, d'autant que le costé & le Thorax contribuent à la respiration, & sont irritez par le mouvement. Neantmoins il y a ces differences que la douleur qui vient de ventositez est ordinairement vague, & ne persiste pas long-temps en vn mesme endroit, mais elle s'appaise &

se dissipe meſme le plus ſouuent par la chaleur & par les fomentations : elle vient auſſi de froideur, ou d'autres cauſes flatueuſes, & euidentes. La douleur qui eſt venue de deſſixion, a eſté precedée d'une cauſe manifeſte : elle a premierement fait mal au col & en l'eſpaule, puis eſt tombée ſur le coſté, où elle s'augmente en la preſſant & maniant, & ne s'en va point par les fomentations. Et ces douleurs ne ſont accompagnées d'aucune fièvre, ſi ce n'eſt que d'adventure elle vienne d'ailleurs. Maintenant pour les communes marques de la Pleureſie, tant externe que veritable, ce ſont, la fièvre continuë, la reſpiration difficile, frequente & petite, la douleur poignante & eſtendante, la toux du commencement ſeiche, ſans cracher aucunement. Mais l'une eſt beaucoup differente de l'autre, d'autant que la douleur de celle qui eſt externe ſe rengrege en la touchant & preſſant : on a de la peine à ſe tenir couché ſur le coſté qui fait mal, & on y demeure facilement ſur celui qui eſt ſain : le pouls eſt à la verité frequent & inegal, mais il n'eſt ny tendu, ny dur. La fièvre continuë de la Pleureſie interieure & vraye, eſt plus aiguë, à cauſe que la partie affectée eſt fort voyſine du cœur; la reſpiration eſt plus difficile, plus frequente & moindre ; la douleur poignante & eſtendante, qui paſſe iuſques au goſier, ſi la membrane ſuccingente eſt enflammée en la partie ſuperieure, & ſi c'eſt à l'inferieure, elle paſſe iuſques à l'hypochondre; elle ne ſe rengrege point ny en touchant, ny en preſſant le coſté, & on demeure plus facilement couché ſur le coſté malade, que ſur le ſain : car la matiere amassée entre les coſtes & la membrane ſuccingente, demeurant comme ſuspenduë quand on ſe couche ſur le coſté oppoſite, bande & deſtache d'auantage la membrane, ce qui fait que la douleur,

la difficulté de respirer, & la toux en sont plus facheuses. Le pouls fréquent & inégal est dur & têdu, & quand la membrane succingente est enflammée, il est d'auantage, que quand il n'y a que les muscles intercostaux internes. La toux est quelquesfois sèche au commencement, puis elle devient presque aussi-tost humide, dont le crachat est en suite coloré; car il sort premieremēt liquide & blanc, quand il ne vient que de la pituite du poulmon, & qu'il ne sort encore rien du costé qui est affecté: puis il sort jaune, quand il coule quelque subtile sanie: apres il vient rouge & tout sanglant, quand l'ouuerture estāt plus grāde, le sang enaie tout pur: en suite dequoy le phlegmon estant meur, il sort purulent. Or toutes ces choses tōbent du costé malade par la membrane succingente, quand elle est ou percée, ou rongée, ou en quelque facon renduë plus rare, & se respandent dans la capacité du Thorax. Car lors que le Thorax s'abbaisse en expirant, & beaucoup plus lors qu'en toussant il se comprime avec vehemen-
ce, il reserre l'humeur qui est en sa capacité, & la rejette dans les aspres arteres des poulmons, où elle est facilement receuë, à cause que leurs orifices cartilagineux & tousiours ouuerts, aboutissent en l'extremité du poulmon, qui n'est couuert que d'une membrane tres-subtile. Delà elle passe peu à peu dans les plus grādes, iusques à ce qu'enfin à force de tousser, elle vienne en celle qui est l'artere du gossier, & soit finalemēt poussée dehors. Voila les vices du Thorax, desquels il nous a falu faire mention en cēt endroit. Car pour les playes, les cōtusions, les vlcères, les abscez, les erisipeles & tout ce qui paroissāt au dehors cause de la douleur, ou empesche la res-
tion, ce sont choses qui se manifestent d'elles-mesmes, & qui doiuent estre cōsiderées en vn autre lieu.

Les vices du Diaphragme ne produisent point d'autres symptomes que ceux que nous auons dit attaquer le dedans de la poictrine, & se manifestent presque par les mesmes signes, exceptée la situation de la douleur. J'ay quelquesfois remarqué que certaines tumeurs dures du diaphragme attachées à vne racine, ont fait consommer de phthisie, sans aucune apparence de delire; ceux qui en estoient entachez.

La suppuration est vn amas de pus dans la capacité du Thorax, dans l'ordure duquel tout le poulmon est plongé. Or il s'est ietté là ou par squinace, ou par peripneumonie, ou ce qui arrive le plus souuent, par pleuresie. Car ces maux n'ayans pas esté bien purgez en toussant, il s'engendre vn abscez, lequel estant finalement creué, il arrive souuent que tout le pus s'escoule dans la capacité de la poictrine, & que mesme long temps apres l'ulcere sordide continuë d'y faire ses descharges iusques à ce que finalement vn grand amas mette en danger de suffocation. Quelquesfois le pus qui sort de l'abscez se iette en haut dans la bouche, & sort en crachant, & met lors la personne hors du danger de suppuration. Toute suppuration est bien tant la confection que la collection du pus, en quelque partie du corps que ce soit; mais à parler proprement c'est celle qui se fait en l'espace ou du Thorax, ou de l'abdomen. Et en quelque autre partie du corps quelle qu'elle soit; si elle est grande, elle s'appelle abscez, & si elle n'est pas si grande, on la doit nommer vomique. Or voicy les marques pour reconnoistre la suppuration. Quand la squinace a precedé qu la Peripneumonie, ou vne forte pleuresie, le malade ne crache presquer rien. La grauité du poulmon, la

douleur ou de la gorge, ou du costé, & la vehemen-
ce de la fièvre, se relaschent aussi-tost : le malade
estant debout sent vne nouuelle pesanteur au fonds
du Thorax vers le Diaphragme : & quand il est
couché, ou quand il se tourne d'un costé sur l'aut-
re, il sent rouler & flotter quelque chose ; la
toux continuë d'estre forte, mais seiche, & sans
cracher que peu ou point ; la fièvre est petite, con-
tinuë, languide, desordonnée & vrayement he-
ctique : car quand la suppuration perseuere, elle
ameine la phtisie. Or d'autant que la capacité du
Thorax est diuisée par le milieu d'une membrane,
qu'ils appellent *mediastin*, & qu'il n'y a aucune
communication du costé dextre avec le senestre, il
arriue que la suppuration occupe tantost l'un des
costez seulement, tantost tous les deux ensemble,
ce qui est grandement remarquable. En suite de
la squinance & de la Peripneumonie, la suppura-
tion s'escoule d'ordinaire en l'un & l'autre des
costez de la capacité ; & de la Pleuresie elle ne se
iette que d'un costé seulement, sçauoir est en celuy
qui est trauaillé de douleur. Au reste on recon-
noist de quel costé seul est la suppuration, si on
prend garde à celuy qui est le plus pesant & le
plus chaud. Le malade estant conché sur le costé
qui est sain, sent vn fardeau sur la poitrine qui
l'oppresse grandement, & fait renforcer la toux :
mais quand il se tourne sur le costé où est le mal,
tout cela s'adoucit, parce que le pus est lors ap-
puyé sur les costes.

Il arriue quelquesfois vn certain mal, qui appro-
che fort de la suppuration, dans lequel vne grande
partie de la capacité du Thorax est remplie d'une
humeur sereuse, pituiteuse & subtile, qui estant
tout à coup à raison de sa tenneté tombée du cer-

veau par l'aspre artere & par les poulmons, où regorgeante du reste du corps, où mesme de la capacité de l'abdomen (ce qu'on a veu souuent arriuer és hydropiques) a penetré iusques-là par des conduits secrets. Alors, il survient des signes & des symptomes de suppuration, excepté qu'il n'y a point de fièvre, & que les causes efficientes de la suppuration n'ont point precedé. Et partant ce mal n'est point vne suppuration, mais bien quelque chose qui en approche. Iusques icy j'ay touché toutes les maladies qui ont coustume de trauailler les poulmons, le Thorax, & toutes les parties de la respiration. Passons maintenant à leurs symptomes principaux.

Les symptomes des parties qui seruent à la respiration, desquels principalement les malades desirent d'estre deliurez, sont ceux-cy : l'offense de la voix, la difficulté de respirer, la toux & le crachement de sang. Les instruments de la voix sont, le gosier, le larynx, les muscles & les nerfs qui y sont inferez : de mesme que les organes de la parole sont la langue, les levres, les dents, le palais, le gargueton & les narines. Lors donc que les muscles qui ferment & ouurent le larynx, sont affectez : ou que ce sont les nerfs recurrents de la sixiesme coniugaison : ou que cette partie du cerueau dont ils prouiennent est offusquée, l'animal deuiet muet, ou bien il ne pousse qu'une voix obscure ou graille. La voix s'enrouë quand la membrane succingente interieure du gosier est humectée d'une humeur abondante, ainsi qu'il arriue dans les grandes defluxions, & quand elle est escorchée à force de crier. Les affections des parties voyssines, comme de la gorge, de l'oesophage, du col, & de l'espine disloquée, nuisent semblablement à

à la voix. Ce que font encore toutes les affections dont la respiration est incommodée, parce que la voix ne se peut faire librement sans respirer.

La difficulté de respirer est diuerse : Elle est grande, quand en respirant on attire beaucoup d'air, cette-cy montre qu'il y a vne chaleur grande sans obstruction, laquelle est, ou dans le cœur, comme lors qu'on a la fièvre, ou dans le poulmon, comme en la peripneumonie : elle est ensemble fréquente, & l'haleine fort chaude & feruente par la bouche & par les narines. La respiration est encore grande en vne autre façon, quand le thorax & les espaules s'esleuent fort en respirant, & lors elle marque vn empeschement des conduits, causé ou de squinance, ou d'une grande defluxion qui remplit les arteres du poulmon, ou de quelque tubercule dur qui se rencontre en iceluy, ou bien de suppuration. La respiration petite & fréquente est vn indice ou de la debilité des forces, ou de quelque douleur & empeschement qui est ou es poulmons, comme en la peripneumonie ; ou au thorax, comme en la pleuresie ; ou au diaphragme, comme quand il est pressé par la pesanteur du ventricule, du foye, ou de la ratte ; ou és muscles de l'abdomen, lesquels seruent tous à la respiration.

La toux est vne forte expiration, par laquelle la nature s'efforce de mettre hors tout ce qui l'incomode dans les instruments de la respiration. Or ces instruments sont le gosier, l'aspre artere, les poulmons, & le dedans du thorax. Ces parties sont quelquesfois incommodées par des humeurs qui y découlent outre l'ordre de la nature, lesquels excitent d'ordinaire vne toux humide. Quelquesfois aussi c'est par d'autres affections, com-

ine par vne refrigeration , par vne vlceration , par vn tubercule , desquelles choses la matiere ne peut aucunement estre expulsée, & de là vient vne toux seiche. On connoist par la façon de tousser , en quelle partie est le mal. Tout ce qui incommode dans le palais & dans la gorge se tire par le cracher: dans l'artere il excite vne legere toux , & là on sent vn chatoüillement , & souuent vne ardeur ; & dans les poulmons il fait tousser fortement. Au reste la toux dont on est trauaillé par certains interuales, comme deux ou trois fois l'année, pro- uient du cours de quelque defluxion ; mais celle qui continuë sans peu ou point d'intermission, vient de la mauuaise disposition des poulmons, ou de quelque vieille obstruction, ou d'une autre cause interne qui est stable.

Après ces maux s'ensuit le crachement de sang, par lequel le sang sort de beaucoup de lieux fort diuers , qui doiuent neantmoins estre discernés par des marques particulieres. Car le sang qui sort par la bouche , venant de la gorge ou de l'estomach, se crache en vomissant : s'il vient des gencives, de la langue & du palais, il sort en crachant simplement ; si du fonds de la bouche & du gargueton, en poussant de la gorge ; si du gosier, en toussant vn peu ; si du poulmon & du thorax, en toussant tout à fait. Et celuy qui sort en toussant , s'il est subtil, vermeil & escumeux, & s'il sort sans faire douleur, il vient du poulmon: mais s'il est grossier, caillé & noir, & qu'avec cela il y ait quelque partie du thorax qui fasse mal , il vient du thorax. Or en tous les crachements de sang, il faut particulièrement prendre garde, si peu auparauant il est point coulé de sang des narines : car souuent il retombe de là sur la gorge , & quelquesfois sur les

poumons ou dans l'estomach, où puis apres il s'engrumele & se caille.

CHAPITRE XII.

Les maux de cœur.

LE cœur est subiet à toutes sortes de maladies; & est principalement trauaillé de simple intemperie, de phlegmon, d'erysipele & de toutes tumeurs outre nature, comme aussi d'ulcere & de playe : mais à la verité ces derniers arriuent plus rarement. Or il est le plus souuent & plus particulièrement attaqué d'une humeur veneneuse, qui de toute sa substance est ennemie de la force vitale.

Toute intemperie dissipe les forces, & rend le corps languissant, d'autant qu'en icelle la chaleur vitale & les esprits sont trauaillez, dont le mal & l'offense redondent par tout le corps. Les signes de l'intemperie chaude sont, le pouls frequent & vif, & quelquesfois grand; la respiration est aussi demesme; la fièvre ne manque pas le plus souuent, & la chaleur de l'haleine. Tout le contraire arriue en l'intemperie froide. En l'humide, le pouls est plein, mol & languide. Et en la seiche, il est petit, tendu & dur. Or l'intemperie du cœur estant desia fort accreuë, se communique aussi manifestement aux parties similaires, lesquelles s'accordans avec la principale, s'eschauffent outre mesure, ou se desseichent, ou se refroidissent, ou s'abreuuent de beaucoup d'humeur, iusques à ce

que la mort arriue peu à peu.

Quant aux autres maladies du cœur , il est tres-difficile de les connoistre quand elles ne font que commencer ; ce qui est ayse lors qu'elles s'augmentent : & auant que paroistre elles causent des syncopes grandes & frequentes , en suite desquelles vient ordinairement la mort subite, & arriue cequ'Hippocrate a laissé par escrit; (Ceux qui tombent en defaillance frequente & grande sans cause manifeste, meurent subitement.) Les playes du cœur , qui ne penetrent gueres auant dans les ventricules, ne font pas mourir aussi-tost : & vn certain personnage qui s'en alloit peu à peu consommant & se fondant , ayant enfin franchy le pas de la mort, ie luy trouuay dans le cœur trois vlcères non gueres profonds & fordides , lesquels estoient dès long temps auparauant contractez.

Les symptomes qui naissent de là principalement , sont la syncope & la palpitation de cœur. La syncope est vne soudaine defaillance des forces. En icelle le poulx est ou nul, ou extrêmement rare & obscur , la surface du corps deuiet froide ; les temples, le chignon du col & le thorax deuiennent moites par vne sueur froide , le visage pallist , & tout le corps gisl comme enerué ; l'on perd tout iugement & sentiment. Or toutes les maladies du cœur , excepté l'interperie simple; les fortes passions de l'ame, comme sont vne grande peur , vn plaisir excessif , & quelquesfois mesmes vne forte tristesse ; la douleur atroce , le travail, le ieusne, l'euacuation immodérée, & toute ce qui dissipe & destruit la chaleur naturelle & les esprits, causent la syncope. Pour les maux notables qui se rencontrent en l'orifice du ventricule , qui est d'vn sentiment fort delicat, & voyfin du cœur

avec lequel il a vne fort grande correspondance, ils causent cette sorte de syncope qu'on appelle stomachique. Ce que font aussi l'inflammation, l'erysipele, la composition de bile, & l'humeur veneneuse ou adherate en celieu lamesme, ou renfermée dans la cuisse, ou dans vn bubon, ou en la matrice, ou és intestins, ou en quelque autre viscere, d'où il expire vne vapeur maligne en l'orifice du ventricule, ou sur le cœur.

La Palpitation du cœur est vne concussion immodérée, qui se rend fascheuse par la vehemence du diastolé & systolé. La violence en est telle que souuent on l'a veüe rompre les costes voyfines du thorax; & mesme faire quelquesfois sortir de leur place celles qui sont au dessus de la māmelle: quelquesfois aussi dilater l'artere en dehors, & en faire vn aneurisme aussi gros que le poing, où le battement paroïssoit au doigt & à l'œil. Et de faict le cœur estant affecté de la sorte, toutes les arteres battent plus fort, & souuent se dilatent, principalement celles qui sont sur la gorge. Ce symptome se relasche quelquesfois, & sur tout quand on est en repos: mais il s'irrite grandement par l'exercice immodéré, par le chaud, par les bains, par les actiōs veneriennes, par le crapule, par l'vsage du vin trop fort, & par la fascherie. Les Anciens en ont rapporté toute la cause ou à l'abondance du sang, ou à vne humeur fort copieuse enclose sous le pericarde. Au reste, en ceux que i'ay tantost citez pour exemples; la palpitation vint d'vne bile bruslée, laquelle ayant autresfois accoustumé d'estre euacuée, se respendit dans les arteres. Nous la remarquasmes en deux qui moururent subitement, apres auoir beaucoup ioué à la paulme, coagulée comme vn tophe noir. Et en tous

les autres nous auons reconneu que cette cause estoit vne bile grandement bruslée, quelquefois amassée dans les entrailles, & le plus souuent dans la ratte. C'est pourquoy ceux qui sont trauaillez de melancholie hypochondriaque, & ceux qui ont la ratte enflée par vne abondance de bile noire, sont fort sujets à ce symptome. On remarque aussi en eux autour de la ratte & du pancreas vne palpitation de l'artere manifeste & fascheuse: & de là par les arteres dont la ratte est fort parsemée, il s'esleue promptement vers le cœur, qui n'en est pas esloigné, vne vapeur maligne & noire, de la violence & malignité de laquelle estant irrité, il s'efforce par vn battement plus vehement de repousser ce qui l'incommode, de mesme que fait le cerueau en l'epilepsie

Or afin que l'estendüe des choses trop longue & mal distincte n'engendre point d'obscurité confuse, ie renfermeray dans ce Liure les maladies des parties qui sont au dessus du diaphragme, reseruant celles qui se rencontrent au dessous pour le liure suiuant.

Fin du cinquiesme Liure, touchant les maladies & symptomes des parties.



LIVRE SIXIÈME.

DES MALADIES DES
PARTIES QUI SONT SOUS
le Diaphragme.

CHAPITRE PREMIER.

*Les maux de l'œsophage, & de l'orifice
du ventricule ;*

Leurs causes & leurs signes.



L'ŒSOPHAGE qui sert de chemin pour le passage de la viande & de la boisson, est rarement attaqué de maladie, parce que rien de ce qui passe par iceluy ne s'y arreste ou retarde pas long temps. Il est pourtant quelquesfois mal affecté, ou d'intemperie, ou de quelque humeur, laquelle y fait de l'obstruction outre l'ordre de la natu-

re , & est tantost froide , tantost accompagnée d'inflammation ; quelquesfois aussi d'un ulcere. Toutes ces choses empeschent l'action d'aualer, mais avec quelque difference. Quand l'intempérie est simple, les viandes & les breuuages sont long temps à passer, tout l'œsophage estant esgalement affecté , sans aucun sentiment d'oppression ou de douleur : ce qui est pareillement commun à ceux qui par nausée ou par degoust de viande ont de la peine à aualer. Mais si c'est un scirrhe ou quelque autre tumeur outre nature, dure & froide qui bousche le cōduit de l'œsophage, soit qu'elle pousse dans l'œsophage, ou dans le chignon du col, le passage en deuient semblablement difficile & tardif, mais avec oppression d'une certaine partie. Et quād il se forme quelque phlegmon proche de là , outre la tardiueté d'aualer, & l'oppression de la partie, on est aussi tourmenté d'une douleur eslançante, avec chaleur, grande soif & fièvre. De là, par le temps, le pus sort ou en crachant, ou en vomissant. Apres vient finalement l'ulcere , qui fait que la douleur deuient plus fascheuse en la partie affectée, laquelle augmente merueilleusement quand on aualle quelque chose ou acre, ou salée, ou aigre, ou aspre. Au reste, toute douleur de l'œsophage tire vers l'espine du dos, où l'œsophage s'encline & adhère pareillement.

L'orifice du ventricule est aussi attaqué de semblables incommoditez , lesquelles on peut reconnoistre par les mesmes marques ; comme encor de plus par l'alienation de l'esprit, à cause des nerfs de la sixiesme coniugaison du cerueau qui s'y rencontrent. J'ay veu une femme grosse d'enfant , laquelle auoit l'orifice du ventricule tellement bouché d'un grand tubercule dur , que tout ce qu'elle

ualloit, remōtoit & resortoit aussi-tost qu'il auoit atteint l'orifice du ventricule. Elle passa ainsi deux mois, au rapport de ceux qui estoient presens, sans rien retenir de la viande & du breuuage qu'elle aualloit, quoy qu'elle en fit vn tres-grand effort: estant finalement consommée de maladie, de resuerie & de fièvre, elle deceda apres estre accouchée d'un enfant qui suruescut.

CHAPITRE II.

Les maladies du ventricule, leurs causes & leurs signes.

ON conte entre les maladies du ventricule l'intemperie, tant la simple, que celle qui tient de l'humeur: il n'est gueres souuēt trauaillé d'inflammation, plus rarement d'abscez, & pourtant quelques fois d'vlcere. Quand l'intemperie est chaude, la soif dure long-temps sans pouuoir estre appaisée: on appete les viandes & les breuuages froids, & les digere-on facilement: l'estomach est soulagé & recreé par les choses froides, tant prises qu'appliquées; & offensé par le vin pur, & par tous breuuages & viandes qui causent de la chaleur, en suite dequoy il s'eschauffe fort & pousse des rots fumeux. Que si outre cela il redode quelque humeur chaude & bilieuse, à ces signes suruiennent encor la nausée, l'amertume de la bouche, le dégout des viandes, & le sentiment d'une certaine erosion. La froide intemperie du ventricule se remarque, quand on n'a point de soif, quand on appete les

viandes & les breuuages chauds, par la digestion tardiuë par l'offense qu'on reçoit des choses froides, tant prises qu'appliquées, par le frisson, par le refroidissement, & par le rottement acide. Et si l'humeur attachée est grossiere & froide, telle qu'est la pituiteuse, le ventricule est pressé d'une certaine pesanteur, sans mordication, sans amertume de bouche; mais avec nausée, langueur & dissolution. Le ventricule humide se delecte & fortifie par l'usage des viandes solides & seiches; mais le breuuage excessif & l'abondance des viandes trop humides l'incommodent tellement, qu'il en deuient comme tout relasché; & s'il y a pareillement beaucoup d'humeur aqueuse contenuë dans sa capacité, ou imbibée dans ses tuniques, il vient quantité de saluë à la bouche, qui fait souuent cracher sans aucune toux. La seicheresse du ventricule est accompagnée de l'appetit des breuuages & viandes humides, dont l'usage est lors facile & agreable; & de l'auersion & difficile digestion des viandes solides & seiches; mais il n'y a aucune erosion, aucune pesanteur, finalement aucune nausée ou vomissement.

Quant à l'inflammation qui attaque la substance du ventricule, & prend son origine du sang desmesurement espendu entre les membranes d'celuy par les veines qui seruent à sa nourriture, deriuées des portes du foye: Il s'excite par le destachement des parties vne douleur fort grande, & se fait vne tumeur qui est apparente, principalement au toucher, & quelquesfois à la veüe. Le sang venant à se pourrir il s'y fait vn grand essancement, à cause que la partie affectée est d'un sentiment fort delicat: la fièvre est extrêmement ardente, l'agitation du corps & l'inquietude grande; la soif inextingui-

ble, le vomissement continuel, ou la dejection de ce que l'on a prins, si ce n'est que d'adventure son orifice ou le pylore soient empeschez, parce que des parties estans bouchées, rien ne peut sortir: la defaillance d'esprit frequente, les veilles, & souvent les delires.

A celle cy se rapporte fort cette inflammation, laquelle occupe ou le bout de ce lobe du foye qui couure le ventricule, ou la region voisine de l'abdomen. Car il y a lors vne tumeur esleuée & circonscripte, avec douleur, en la situation du ventricule; & la fièvre, & la soif, & plusieurs des autres marques: de sorte que les plus experts Medecins y sont mesme quelquesfois trompez. Elle se distingue par la seule vehemence & malice des symptomes, parce que ceux du ventricule sont les plus cruels. Si d'adventure il se fait en suite vn abscez, le pus en sort, non point au dehors, comme il fait de celuy qui est en l'abdomen; mais ou dás l'espace mesme de l'abdomen, ou dans la cauité du ventricule; ou bien il se manifeste par le vomissement, ou par les selles.

L'ulcere, soit qu'il reste d'un abscez, soit qu'il prouienne de quelque medicament caustique ou septique qu'on ait auallé, ou d'une humeur de semblable faculté qui se soit attachée là, est reputé absolument mortel: aussi bien que toute corruption & infection contractée par poison, ou par quelque potion veneneuse. Souuent il y suruient de la douleur; quelquesfois neantmoins le mal ne laisse pas de courir secretement sans douleur aucune. L'on est trauaillé de cours de ventre & de vomissement, lors principalement qu'il vient de quelque qualité estrangere. La fièvre lente & continuë va consommant le malade, avec un pouls vi-

ste & frequent : l'appetit se perd , la digestion & toutes les fonctions du ventricule se debilitent ; le corps se nourrist mal & va fondant peu à peu, iusques à ce que n'ayant plus de chaleur naturelle & de nourriture , il soit enfin priué de vie. Voila quelles sont les maladies du ventricule.

CHAPITRE III.

Les symptomes du ventricule, & quelles en sont les causes.

L'Orifice du ventricule principalement est attaqué de plusieurs symptomes. Dont les vns se font entant que cette partie estant douée d'un sentiment fort delicat , est conjointe par vne grande affinité aux parties principales le cœur & le cerueau : car elle leur fait aussi part de ses maux, & les incommode en diuerses façons par vne certaine communication qui est entr'elles ; sçauoir est le cœur par defaillance d'esprit, par syncope, & par cette sorte de douleur qu'ils appellent Cardialgie : & le cerueau par un profond assoupissement , par catalepsie, incube, mal-caduc, melancholie, delire, de toutes lesquelles choses les raisons & les causes ont esté cy-dessus assez expliquées. Les autres symptomes trauaillent cét orifice , entant que c'est le siege de l'appetit , comme sont la diminution & perte de l'appetit , le boulimie , la faim canine , l'appetit deregulé & la soif.

L'appetit se diminuë ou se perd entierement, & l'on a du degoust des viandes quand tout le corps regorge de la quantité de l'aliment, & que les au-

tres parties n'en attirent plus rien du ventricule: car iceluy estant plein de beaucoup d'humeur vtile, refuse d'en recevoir d'autre. Le mesme arriue aussi lors que l'orifice du ventricule se trouue enduit de force-graisse, ou de quelque humeur visqueuse, ou autrement mauuaise, qui s'y est amassée pendant les maladies. Il se rencontre souuent que quand on a de l'auerfion aux viandes, le goust, qui consiste particulierement en la langue, ne laisse pas de demeurer entier, & de iuger sainement.

Quant au Boulimé, qui est vne faim excessiue, il vient en suite de quelque grande inanition, & de faute d'aliment pour auoir trop ieusné: d'autant que l'aliment estant espuisé, l'orifice du ventricule extrêmement sensible demande ce qui luy est necessaire; car la faim n'est autre chose qu'une enuie de manger, causée par un sentiment de disette. Semblablement la faim qu'on appelle canine, procedantost des mesmes causes, tantost d'une humeur froide & acide attachée à l'entrée du ventre, laquelle poussant par son adstriction les aliments au fonds du ventricule, excite la faim. Pour la Pie & la Malacie, qui font auoir enuie de manger des choses mauuaises & estrangeres, comme de la terre, de la chair crüe, des charbons, des fruiçts aigres & verds, elles arriuent souuent aux femmes enceintes, & mesme quelquesfois aux hommes. La Malacie a tant de force, qu'un certain Gentilhomme estant depuis long-temps pressé du desir de manger de la chaux viue, en aualla finalement aussi gros que le poing, & fut du tout recreé, sans aucune incommodité ny de l'estomach, ny des visceres. Or elle se fait toutesfois & quantes que les tuniques du ventricule sont enduites de certaine humeur ou excrement, par la longue accoustu-

mance duquel on appete aussi semblables choses vicieuses ; combien que quand le vice est grand & du tout maladif, l'on aye appetit de choses contraires,

La soif finalement est vn appetit de breuuage froid & humide. Elle n'est point du tout, lors que l'orifice du ventricule est arrosé d'humeur douce, froide & copieuse ; elle est excessiue quand cette mesme partie vient à estre comme toute espuisée d'humeur, & ce ou par faute de boire, ou en suite de quelque grande dissolution du corps pour auoir eu trop de chaud, & pour s'estre baigné ; ou bien lors que ses tuniques sont imbuës de quelque humeur salée, ou chaude & acre, comme pour auoir mangé des viandes salées & espicées, pour auoir beu du vin trop fort, & sur tout pendant les fieures ardentes.

Le ventricule estant au reste le receptacle des viandes, & la boutique où se fait la premiere coction, est derechef attaqué d'autres symptomes, qui sont pour l'ordinaire ceux-cy : sçauoir est, crudité, bardypepsie, mauuaise digestion, rots, rugissemens, inflation, sanglot, nausée, vomissement tant simple, que sanglant, cholere, douleur.

La crudité est quand la digestion ne se fait pas, & la bardypepsie se fait lors que la digestion est tardiuë & difficile. Leurs causes different seulement en force & en grandeur. Or ces causes sont, toute intemperie, tantost simple, tantost prouenant du vice des humeurs : vne tumeur outre nature, toute sorte de maladie qui peruertit necessairement la concoction du ventricule. Souuent aussi les vices du foye, de la ratte, ou du mesentere empeschent la digestion de l'estomach par vne certaine sympathie & communication, lors mesme

qu'il se porte bien. C'est ainsi qu'aux Hepatiques & à ceux qui ont le foye eschauffé par vne abondance de bile, le ventricule deuient delicat au toucher, sans estre pourtant aussi-tost rendu plus froid, comme plusieurs disent; parce que toute débilité d'iceluy ne procede pas d'intemperie froide. C'est aussi de cette sorte, que le ventricule des melancholiques, des hypochondriaques, & de tous ceux qui ont quelque abscez, ou quelque facheux mal causé par le vice des humeurs, en la region du ventre inferieur, ne fait pas bien la digestion s'il est atteint de cette mauuaise qualité. Il y a encor d'autres causes effectrices de la crudité, cōme l'excez du manger & du boire, que la chaleur naturelle ne peut moderer: ou leur mauuaise qualité qui ne peut estre ny surmontée, ny adoucie: ou bien leur vsage desreiglé, quand on boit ou mange de nouueau deuant que ce que l'on auoit prins auparavant soit digeré: ou le sommeil trop court, ou les veilles trop longues, ou les bains, ou les exercices faits incontinent apres le repas, lesquels font haster la descente de la mangeaille. Quant à la corruption des viandes en l'estomach, elle procede ou de leur qualité estrangere; ou du meslange de quelque humeur vicieuse; ou de l'ordre desreiglé de les prendre, comme quand on mange des pesches, des pommes, des fraises, & autres fruiets qui se corrompent facilement, apres auoir mangé des coins & autres viandes plus solides.

Les rots & les vents, tant ceux qui sortent par la bouche, que ceux qui restent enfermez avec bruit & rugissement, & finalement toute distension flatueuse du ventricule, sont des suites de crudité, & prouiennent de mesmes causes, & principalement de viandes flatueuses, & de breuuage immodéré

& flottant en l'estomach : sur tout quand il se rencontre de la bile iaune ou noire au dessous du ventricule, comme en la melancholie hypochondriacque ; car lors la plus grande partie de l'aliment liquide & flatueux se tourne en ventositez par la concoction & par la force de la chaleur. Quant à la cause principale tant des vents que de la crudité, elle se reconnoist aux mesmes marques qui demonstrent les maux dont le ventricule est affecté.

Le sanglot est vn mouuement conuulsif du ventricule, par lequel il s'efforce de secoïer les choses qui se sont attachées à son propre corps. Or il reuient souuent par interuales comme la toux, iusques à ce qu'il ait reietté ce qui l'incommode. Hippocrate a estimé qu'il venoit ou d'inanition, ou de repletion, aussi bien que la conuulsion. D'inanition, comme par vne effusion de sang immodérée, ou par quelque purgation excessiue. De repletion, comme il arriue aux enfans, & à ceux qui sont addonnez à la crapule ; ou bien quand on a auallé du poyure, ou qu'il s'est fiché de la bile ou quelque autre chose acre & mordicante dans les tuniques du ventricule ; parce que le ventricule tasche de la mettre hors quelquesfois par le sanglot, quelquesfois mesme en esternuant, ce qui fait souuent passer le sanglot. Voila les causes du sanglot que l'on assigne communement, outre lesquelles toutesfois il s'en trouue d'autres plus facheuses. Car souuent vne vapeur maligne attaquant l'orifice de l'estomach, a causé vn sanglot pire que ne fait aucune humeur, pour acre & mordicante qu'elle soit, comme l'auons veu plusieurs fois arriuer és fieures malignes & pestilentes, pareillement en l'inflammation du foye, & principale-
ment

ment quand il n'y a plus gueres d'esperance, & que le cœeur est accablé par la malignité de la maladie. Les choses mesmes qui par le dehors pressent l'orifice du ventricule, causent aussi le sanglot. Vn certain personnage ayant esté tourmenté du sanglot durant trois mois continuels, ne peût estre guery par aucuns remedes accoustumez, iusques à ce qu'on luy eust doucement releué le bout d'une coste, que l'on auoit lors premierement apperceu se courber en dedans, & se fourrer bien auant dans le ventricule sans faire aucune douleur. Car tout aussi-tost le sanglot cessa, lequel neantmoins reprenoit toutes les fois que la coste retournoit à se courber. J'ay depuis souuent remarqué en beaucoup d'autres la mesme cause du sanglot.

La Nausée est vne vaine enuie de vomir, sans rien reietter : il coule neantmoins souuent de la bouche vne eau claire qui sort de soy-mesme sans aucun effort. Quant au vomissement, c'est vn reiettement par le haut des choses qui sont dans l'espace du ventricule. Car ce qui est contenu dans la capacité du ventricule se purge en vomissant, & ce qui est attaché à ses tuniques s'éuacué par le sanglot. Ces symptomes ont vne semblable & mesme cause, mais elle est moindre en la Nausée, & plus forte au vomissement. Cette cause, à dire le vray, reçoit de la multiplicité, l'une est la debilité du ventricule, & vne dissolution telle qu'il ne puisse ny embrasser, ny contenir la viande. Ce qui se reconnoist en ce qu'on rend la viande toute pure, sans meslange d'aucune humeur vicieuse. Au reste, la debilité vient ou d'intemperie, principalement humide, de laquelle aussi s'ensuit la dissolution; ou d'une polisseure glissante & grasse, qui fait que les choses demeurent toutes telles qu'on les a

prinſes ; ou de quelque qualité eſtrangere, comme eſt principalement celle qui tient du venin & de la peſte, dont ceux qui ſont infectez vomiffent continuellement. L'autre cauſe de la Nauſée & du vomiffement, eſt tout ce qui trauaille & irrite l'eſtomach outre l'ordre de la nature ; ce que cette cauſe fait tantotſt par ſon abondance, comme la trop grande quantité de la mangeaille dont la Nature eſt ſurchargée ; tâtotſt par ſon acrimonie, comme la bile ; tantotſt par ſa lenteur, comme la pituite ; tantotſt par ſa qualité eſtrangere & externe, cōme fait la viande corrompue & pourrie. Ces mauuiſes conditions de la ſuſdite cauſe, prennent auſſi quelquesfois naiſſance dans le ventricule, comme quand la viande demeurant trop cruë ſe tourne en pituite, ou qu'eſtant bruſlée elle ſe change en bile, ou que venant à ſe corrompre elle paſſe en vne ſubſtance externe & eſtrangere. Quelquesfois le vice vient d'ailleurs en ce lieu-là, comme du foye, de la ratte, du meſentere, des inteſtins, du cerueau, & finalement de tout le corps par les veines du foye. Maintenant pour ſçauoir quelle humeur c'eſt qui cauſe le vomiffement, combien qu'elle ne ſorte pas encor, on la peut neantmoins diſcerner par beaucoup de marques ; premierement par les Rots & par la ſauueur qu'elle a, qui eſt ou aigre, ou de gouſt de fumée, ou amere, ou acre : puis par la propriété de la douleur, qui eſt maintenant poignante, maintenant preſſante, & ce avec quelque ſentiment ou de chaleur, ou de froidure : finalement par la qualité & ſubſtance des choſes que l'on vomift, & principalement quand il y a du meſlange de quelque humeur nuifiſſable ; car elle irrite quelquesfois le ventricule, & le contraint de vomir les viandes, ſans qu'elle-meſme s'eſbranle, ains per-

liste ferme & demeure au dedans. Or on connoist si l'humeur qui cause le vomissement s'est engendrée dans le ventricule, où si elle y est venuë d'ailleurs, en ce que celle qui s'est engendrée dans le ventricule, y a dès auparavant fait du mal & de la douleur, & qu'on a depuis peu commis quelque desordre au regime de viure. Pour celle qui est venuë là du foye, ou de la ratte, ou d'ailleurs, elle donne des signes de la partie qui est comme le seminaire & la source du mal.

L'on vomist aussi quelquesfois du sang, mais par vn effort grandement different de celuy que l'on crache en toussant, & en beaucoup plus grande quantité, quoy qu'ils s'en soit veu rendre à coup en toussant des plains bassins, par la soudaine rupture de quelque grand vaisseau. Celuy que l'on vomist a du meslange ou de viande, ou de breu-uage, ou de pituite, & est d'ordinaire amassé en grumeaux, n'estant pas subtil & rouge, ains grossier & desia noircissant par la concretion. Ce vomissement de sang est souuent aussi accompagné d'une dejection noire. lors qu'en sortant il s'en escoule quelque portion dans les boyaux, laquelle par la longueur du passage dans leurs destours deuient si noire qu'elle ressemble ou à de la poix, ou à de la moüelle de casse. De plus on tombe souuent en palmoison, à cause que le sang amassé hors des veines commençant à se pourrir acquiert vne qualité pernicieuse & veneneuse que le cœur ne peut supporter. Or tout celuy que l'on vomist vient du ventricule, où il s'estoit ietté en sortant ou du foye, ou de la ratte, ou bien des parties voy fines, hors de quelque veine ouuerte, ou rōpuë, ou rongée; ce qui se peut reconnoistre par la considerations des causes qui ont precedé. Je ne

pense point certainement qu'il y ait aucun vomissement de sang qui soit naturel, & que la Nature prenne jamais ce chemin pour s'en descharger, ny en la Plethore, ny en la suppression des purgations menstruales.

La Cholere est vne eruption de bile, tant par haut que par bas : car on en rend & par le vomissement & par les selles premierement de fort liquide, puis de plus espaisse & plus colorée ; étant du commencement passe & citrine, puis iaune, verte, bleüe, ou mesme noire. Ce mal est acré, furieux, & grandement aigu, dans lequel l'estomach & les intestins sont merueilleusement tourmentez, & bandent fort par l'abondance des vents : la soif presse, le pouls est viste, frequent, & d'ordinaire petit ; & avec cela il suruient quelquesfois des defaillances de cœur. La cause donc de ce mal est la bile, laquelle avec le temps s'arnasse ou en la vessie du fiel, ou au foye, ou en la ratte, ou bien autour du pancreas, ou enuiron les intestins & l'estomach, & venant à incommoder la nature par sa trop grande quantité, elle se iette & respand çà & là, de sorte mesme que ceux qui en sont attaquez pensent auoir auallé quelque poison.

Le ventricule est finalement trauaillé de douleur quelquesfois cruelle, dont la cause est, ou vn vent enclos en sa capacité, qui le fait estendre par trop, de mesme qu'il fait les boyaux quand on a la colique ; ou bien quelque humeur ou quelque viande acré & mordicante attachée à ses tuniques ; ou vne tumeur outre nature, ou vn vlcere. Quant à la simple intemperie, à peine seule fait-elle de la douleur. Le ventricule souffre aussi quelquesfois de la douleur par la tumeur des viscères qui le pressent, ou par l'abondance des humeurs qui

combent dedans , & cette douleur s'augmente en le touchant & pressant. Les causes en doiuent estre discernées par les mesmes marques que i'ay desia souuent rapportées en parlant des autres.

CHAPITRE IV.

*Les maladies du foye , leurs causes
& leurs signes.*

LE foye est sujet à beaucoup de diuers maux, qui font l'intemperie tant simple que procedante du vice des humeurs , la corruption de la substance, l'obstruction, le scirrhe, l'inflammation, l'abscez & l'ulcere.

Quand c'est vne simple intemperie chaude , contractée par quelque cause que ce soit, on perd l'appetit de manger & principalement de la chair, & neantmoins le ieusne incommode grandement: la soif est pareillement vehemente, tout le corps s'eschauffe & sur tout les paulmes des mains, & les plantes des pieds ; & si cette chaleur est accompagnée de seicheresse, ces parties deuiennent arides; & s'il y a de l'humidité conioinctement excessiue, elles deuiennent moites. Quand l'intemperie est froide, on a plus d'appetit de manger , & point d'enue de boire, si principalement elle est quant & quant humide. Or il n'y a point de simple intemperie qui puisse long temps persister toute seule, sans estre bien-tost accompagnée de quelque vice d'humeur. Car toute vertu soit de l'aliment, soit de l'air , soit de quelque autre cause, qui altere la temperature du foye , en change aussi

beaucoup plus facilement celle des humeurs, & les rend semblables à foy. Voire mesme encore que le foye soit intemperé dès la naissance, parce que c'est l'officine principale où s'engendrent les humeurs, quelque constitution qu'il aye, les humeurs en tiennent aussi : & celui qui est excessivement chaud, multipliera les humeurs chaudes & bilieuses; comme celui qui excède en froideur, en fera de froides pituiteuses. Et partant l'intemperie chaude brulera tant les humeurs qui passent par les veines du mesentere, que celles qui sont dans le foye, & qui de là sont distribuées par tout le corps : au lieu que la froide les rend grossières, gluantes, crues & pituiteuses : la seiche, épaisse, seiche & terrestres; l'humide, claires & aqueuses. Voila comme le foye est souvent attaqué & trauaillé par le vice, & par l'excez des humeurs. Les signes qui marquent la predomination de l'humeur chaude sont, la bile, que l'on rend on par le vomissement, ou par les selles, laquelle sort premierement subtile & passe; puis grossiere, toute iaune & puante : l'amertume de la bouche, le dégoust des viandes, la soif vehemente, & souvent la fièvre qui deuiant ou tierce intermittente, ou erratique, ou bien lente, dont le corps tombe tout en langueur, & se va peu à peu desseichant. Les marques de la trop grande froideur tant du foye, que de l'humeur laquelle y predomine, sont, les dejections du ventre, qui ne sont ny frequentes, ny abondantes, ny beaucoup colorées, ny trop puantes; puis l'appetit des viandes, sans auoir ny de soif, ny de fièvre, ny finalement aucune extenuation de corps.

La corruption de la substance arriue d'ordinaire aussi bien au foye qu'au poulmon, & celui qui

en'est atteint tombe peu à peu en langueur & consommation. Ce mal vient de toute sorte d'humeur, & le plus souuent d'une sanie bilieuse espandue par la substance du foye, laquelle venant peu à peu & lentement à se pourrir, gaste & corrompt semblablement la substance du foye; & cette sanie se contracte par le vice des alimens, qui sont corrompus, ou qui sont douez d'une vertu putrefactive. Les vins mesmes excellents & trop forts par l'usage excessif & long-temps continué, disposent à ce mal, non seulement en ce qu'ils eschauffent & desserchent ce viscere-là, (car de cette sorte ils ne causent que le scirrhe,) mais d'autant qu'ils y amassent une certaine sanie & viscosité putride. Ceux qui sont entachez de cela persistent long-temps sans perdre leurs forces; de façon mesme qu'ils peuvent continuer leurs exercices ordinaires, parce qu'il se forme peu à peu & imperceptiblement. On n'a du commencement point de fièvre, & mesme dans le progrez du mal elle n'est que fort lente: l'on n'est pas aussi beaucoup pressé de soif, à cause que l'excez de la chaleur est desia rabattu, & d'ordinaire il ne se remarque aucune tumeur en l'hypochondre. Neantmoins le mal se reconnoist par ce que l'on a une extreme enuie de boire du vin puissant & fort, de mesme que l'ont ceux à qui les poulmons se pourrissent. Et ainsi l'on est souuent amuse des flatteux allechemens d'un ennemy tres-dangereux, qui donne secrettement la mort à ceux qui le cherissent. L'on est grandement dégousté des viandes & principalement de chair, tellement que la vapeur & l'odeur en desplaist quand elle est chaude, & font soufleuer le cœur. Il s'esleue de cette pourriture une exhalaison fort mauuaise & puante; l'on tombe en foiblesse & defaillance de cœur,

beaucoup plus souvent que quand on est phthisique, & cette defaillance est petite au commencement, puis elle devient plus grande & plus dangereuse avec vne sueur froide, dont le malade estant souvent & fortement travaillé, succombe finalement.

Ces maladies du foye sont de bien pres suivies d'une imbecillité, de laquelle ceux qui sont atteints s'appellent ordinairement hepaticques. Car comme l'integrité & temperature de chaque partie conserve la force tant d'icelle que de la faculté, de mesme l'intemperie & la corruption de la substance leur apportent de la foiblesse. C'est pourquoy si la faculté attirante du foye est imbecille, les dejections du ventre deviennent liquides comme de la crème, bien que l'estomach ne soit point offensé, & qu'il n'y ait aucune obstruction au mesentere. Si la vertu de retenir est débile, le ventre rend quelquesfois, mais fort rarement, des matieres liquides & pleines de sanie, comme si c'estoit de la laueur de chair fraichement tuée. Le plus souvent aussi, quand cette debilité est devenue plus grande, le sang de soy-mesme eschape des veines, & sort ou par les narines, ou par la matrice, ou par les hemorrhoides, ou par la bouche. Je me suis mesme quelquesfois apperceu que le sang s'escoulant par les extremités des veines qui aboutissent en la peau, se respendoit en divers endroits, lesquels deuenoient liquides sans qu'il y eust aucune ardeur. Si c'est la vertu sanguifique qui soit foible, il se fait des cruditez, qui font enfler premierement les pieds, & en suite les autres parties; comme il arrive à ceux qui sortent de quelque grande maladie, & aux hydropiques, scirrheux, icteriques & autres hepaticques. Car les

veines compatissent & se ressentent de l'incommode-
té du foye où elles prennent leur source, de mes-
me que les nerfs participent des infirmités du cer-
veau.

L'obstruction est vn mal fort ordinaire au foye,
& n'y a point de viscere qui en soit si souuent atta-
qué, parce que la veine porte se diuise en rameaux
si deliez, qu'elle se va perdant en la substance du
foye; & que la veine caue y en respand d'autres
non moins subtils, par lesquels il faut que tout
l'aliment passe & soit porté çà & là. Cette maladie
se fait connoistre par des marques euidentés; car il
ya en l'hypochondre droit de la pesanteur & disten-
sion avec vne douleur obtuse, qui se manifeste
quand on fait exercice apres le repas. Toutesfois
c'est sans tumeur & sans fièvre. Les causes de l'ob-
struction sont, vne humeur pechante en grossiere-
té, ou en viscosité, ou en quantité, laquelle tombe
quelquesfois du cerueau dans l'estomach, puis de
là passant insensiblement dans les petites veines du
foye, les bousche & y fait de l'obstruction. Neant-
moins elle vient plus ordinairement des aliments
grossiers, visqueux & abondants, lors qu'ils sont
attirez ou poussez dans les veines plus deliées par
vne esmotion trop vehemete faite incontinent apres
le repas. Il arriue aussi quelquesfois que la bile
jaune estant outre nature trop long-temps rete-
nue dans le foye, sans estre pugée quand il faut,
s'épaissist merueilleusement, & produit des ob-
structions tres-grandes & fort dangereuses, veu
mesme que (comme nous dirons tantost) el-
le se petrifie quelques-fois dans la vessie du
fiel.

Le Scirrhe est vne tumeur outre nature dure &
resistante, sans faire aucune douleur, si ce n'est

d'aduanture quand on presse trop fort la partie affectée. Ce mal se descouvre par le toucher, principalement si l'abdomen est graille & exempt de graille; & ce plus facilement lors que le malade est debout, ou panché sur le costé droict, que quand il est couché sur le dos; car alors on ne le peut appercevoir qu'en le pressant. Il est circonscript par la situation & figure du foye: c'est pourquoy il est aisé au malade de demeurer couché sur le costé droict, & fascheux de se tenir sur le gauche, parce que le ventricule & les entrailles en sont oppressez, comme d'une masse suffocante. Il prouient presque ordinairement d'une obstruction conturnace & inueterée, & rarement, ou plustost iamais d'inflammation, d'autant qu'en ce viscere naturellement chaud & humide toute inflammation se tourne en pernicious abscez. L'humour donc qui cause l'obstruction, emplist & farcist premierement les petites veines du foye, puis venant à s'augmenter il regorge de là semblablement dans toute la substance de ce viscere, & y fait de l'obstruction aussi bien que dans les veines: que si derechef il s'amasse en beaucoup plus grande quantité, il amplifie la masse du foye; & alors ce viscere paroist gros & enflé. Avec le temps cette humeur se desseiche, & la chaleur en ayant dissipé le plus subtil, tout le reste s'endurcist: qui demeurant là gaste la substance du foye, & enfin fait vn vray Scirrhe, lequel differe de la tumeur simple, en ce qu'il faut plusieurs iours pour le faire, & la simple tumeur s'engendre mesme en peu de temps. Or comme l'humour qui peche & cause ce mal, est tantost pituiteuse, tantost bilieuse: aussi les scirrhes qui en procedent sont-ils de diuerses sortes, desquels il est besoin de faire vn

discernement plus exact: d'autant qu'ils sont grandement dissemblables & en vehemence, & au peril qui en peut arriuer. L'vn est precedé par des causes qui font amas d'un suc grossier & pituiteux; & l'autre par celles qui produisent de la bile: il paroist en celuy-là des signes de pituite predominante & de froideur de foye, & en cestuy cy d'excès de bile & du foye eschauffé: cestuy-cy succede d'ordinaire à la iaunisse, & est accompagné d'une fièvre lente, & celuy-là non: de cestuy-cy l'on tombe en cette sorte d'hydropisie qui s'appelle Ascites, & celuy-là persiste long-temps sans estre suivy d'aucune autre incommodité, ou bien il conduit seulement à la Cachexie, ou Leucophlegmatie.

Il aduient souuent aussi sans scirrhe vne grande tumeur au foye, laquelle se manifeste semblablement par les mesmes signes que le scirrhe, sinon qu'elle resiste moins, & qu'elle se fait en moins de temps. Elle se rencontre & s'estend d'ordinaire par les membranes qui enuironnent le foye. On la remarque au toucher; car elle paroist quelquesfois si grosse, qu'elle remplist tout l'hypochondre, tellement qu'on ne peut plus apperceuoir les extremités des costes, ny ficher les doigts dessous, & ne void-on plus aucune figure ou circonscription du foye. Elle vient quelquesfois de vent, ou de crudité subtile engendrée ou par la boisson excessive d'eau froide, ou par l'usage desordonné des fruits, ou par la gourmandise & trop grande satieté: Elle produit un sentiment non de pesanteur, ains de tension, & se contracte en moins de temps. Quelquesfois elle procede aussi d'une humeur grossiere & lente, tantost bilieuse, tantost pituiteuse, que la vigueur du foye repousse vers les mem-

branes qui l'environnent. Et celle qui est de cette sorte, résiste davantage à l'attouchement, & pèse plus fort, & est même plus long-temps à se former, & ne se peut si tost resoudre. Il se rencontre de plus vne autre tumeur en l'hypochondre, inserée és muscles de l'abdomen. Elle ne se fait à la verité que fort rarement, & n'est besoin de la presser pour la reconnoistre, mais bien d'y toucher fort legerement & doucement, & souvent même d'y regarder, car elle s'aduanee en dehors. Elle est aussi d'une figure oblongue, comme celle du muscle droit qui est en l'abdomen.

L'hepatite est vne inflammation du foye, par laquelle le sang amassé outre nature en quelque partie d'iceluy, vient à s'enflammer. Or elle se fait lors que le sang sortant trop immoderément des veines, ou par son abondance, ou par la subtilité, ou par sa ferueur & acrimonie, ou bien par l'impetuosité des causes externes, se respand en trop grande quantité par le corps de ce viscere. Alors il se pourrist & s'enflamme hors de ses propres vaisseaux, & quant & quant gaste & corrompt la substance charneuse de la partie qui en est imbuë: d'où s'ensuit souvent vne cavité sinuëuse. Premièrement donc le sang se tourne en sanie putride, & lors se fait l'inflammation: puis la sanie se forme en pus par le benefice de la chaleur naturelle, & cét amas de pus se nomme abscez. Le pus venant finalement à sortir, il reste vn ulcere caue & fordide. Par cette entresuite de changement, il deriue beaucoup de maux d'une même source, lesquels se guerissent en autant de diverses manieres, que les noms qu'on leur donne

sont diuers. Or voicy comme chacun d'eux se reconnoist par ses propres signes. Les marques de l'inflammation sont, vne pesanteur en la partie droïte des entrailles, vne douleur qui s'estend depuis le gosier iusques aux costes bastardes, (lors principalement que cét endroit est atteint,) à cause de l'amas de la matiere enfermée, qui fait tirer la membrane succingente du Thorax. Il suruient aussi par la mesme raison vne difficulté de respirer, & vne petite toux seiche, sans rien cracher. Par ces marques donc, & par la situation de la douleur elle differe de la Pleuresie. En l'inflammation la fièvre est ardente & aiguë, la soif inextinguible, la langue deuient rude & couuëte d'une humeur gluante premierement iaune, puis tirant sur le noir: l'on a des souleuemens d'estomach, & du dégoust des viandes: quelquesfois vn sanglot presque suffocant: la couleur du corps gastée de iau-nisse: les vrines grossieres, rouges & troubles; vn vomissement de bile toute pure, tantost vitelline, crugineuse, & souuent des deiections du ventre pareilles, qui sont quelquesfois vne Diarrhée, ou vne Dysenterie. Si l'inflammation tient de l'erysipele, la fièvre, l'ardeur, le vomissement & les autres signes se rendront plus fascheux, & conduiront finalement à la consomption. Voila les marques communes de l'inflammation en general; mais en particulier, si l'inflammation decline plus vers la cauité du foye, le dégoust des viandes, les nausées, la soif, le vomissement bilieux, ou les deiections de mesme, ptes-sent plus fort; & de plus il est fascheux & grandement penible de se tenir couché sur le costé gauche, & la tumeur du foye enflammé ne s'apperçoit pas d'abord quand on la touche: mais si l'inflammation tend dauantage vers la gibbo-

sité, la difficulté de respirer, la toux, la douleur facheuse qui retire le gosier, donne plus de peine; & outre cela il est plus difficile de se coucher sur le costé droit, parce qu'en cette posture la partie malade est pressée: la douleur s'irrite en la touchant & pressant; la tumeur s'apperoit aussi-tost, & quelquesfois mesmes elle paroist esleuée, & se manifeste à la veüe. Et toutes ces marques se rendent manifestes & vehementes, lors que l'inflammation est grande; mais quand elle est petite, elles sont obscures & foibles, & cette inflammation continuë quelquesfois durant plusieurs mois: pendant laquelle la douleur & pesanteur de l'hypochondre se font plustost sentir en respirant bien fort. que par le toucher. Or quand il n'y a que le muscle droit de l'abdomen estendu sur le foye, qui soit enflammé, il ne se rencontre aucune des marques susdites, si ce n'est peut estre la fièvre; la douleur eslance dauantage, la tumeur paroist oblongue en dehors, & est manifeste au doigt & à l'œil, car la peau qui est autour deuiant rouge & chaude. Lors que l'abscez commence à se former, & que la sanie putride se tourne en pus, les douleurs & les fievres, dit Hippocrate, & les autres symptomes se rengregent: les frissons viennent souuent sans ordre & sans raison, en suite desquels la chaleur s'irrite. Le pus estant desia formé, toutes choses s'addoucissent, & l'ardeur mesme se rabbat; neantmoins les forces restent beaucoup plus debiles, le pouls deuiant frequent, petit & languide, & le cœur tombe souuent en defaillance. Quand le pus vient à sortir par l'ouuerture de l'abscez, le cœur est offusqué de la mauuaise vapeur qui en sort, laquelle souuent faisant tomber le malade en syncope le priue de

vie ; car à peine en peut-il reschaper aucun. Mais quand l'abscez n'est gueres grand, si les forces sont assez bastantes, le pus sort quelquesfois par le vomissement, ou par les selles, ou par les vrines. Quelquesfois aussi mesme la substance du foye estant creuassée où rongée, il tombe en la capacité de l'abdomen, où s'escoule pareillement l'eau des hydropiques. L'ulcere qui reste de l'abscez estant continuellement abreuvé de l'aliment qui passe par là, est tousiours remply de beaucoup d'ordure, & ne se peut iamais consolider ; car la substance solide du foye estant spermatique ne se peut reparer, non plus que celle des poulmons. Et partant le sang qui se fait lors est mauuais, le corps ne se nourrist pas, ains deuient veritablement tabide ; les deiections du ventre sont putrides, pleines de sanie, & quelquesfois sanglantes, & souvent elles paroissent comme la liqueur qui decoule d'un cadaure. L'urine est pareillement meslée de sanie ; ou bien si elle penetre dans l'espace de l'abdomen, il se fait vne hydropisie plus dangereuse que toutes les autres, laquelle se manifeste par la grauité & tumeur apparente des aignes & des parties honteuses, si tant est que les forces soient assez grandes pour en venir iusques là, ce qu'à dire le vray on n'a point encore obserué en qui que ce soit.

CHAPITRE V.

*Quelles sont les maladies de la vessie
du fiel.*

LA vessie du fiel est sujette à l'obstruction, au calcul, à la repletion, & à l' inanition.

L'obstruction se fait ou dans le conduit par lequel la bile est attirée hors du foye, ou dans celui par lequel elle se décharge dans les intestins. En l'une & en l'autre le ventre est dur & constipé, les matieres fécales deviennent blanches, les urines sont tellement jaunes & grossieres, que souvent elles en paroissent toutes obscures; la bile se meslant avec le sang s'expand à la surface du corps, & rend la peau infectée de jaunisse. Toutesfois en la premiere sorte d'obstruction la vessie du fiel demeure vuide, au lieu qu'en l'autre elle regorge de bile & est travaillée des divers symptomes de repletion.

Le calcul s'engendre souvent dans la vessie du fiel, de couleur noire, mais neantmoins léger, & qui nage sur l'eau quand on le jette dedans, sans aller au fonds comme fait celui qui se tire des reins ou de la vessie. Il prouient d'une bile jaune, laquelle estant long-temps retenuë en son propre reservoir, & n'estant pas euacuée quand il est de besoin, ny renouvelée par le mélange d'une autre plus recente, s'endurcist d'une façon merueilleuse. Ce qui arrive principalement lors que tous
les

les deux conduits de la vessie sont bouschez. Ce mal n'a point de marques euidentés, ny desymptomes fascheux, par lesquels on le puisse asseurement & facilement descouurir. Mais on en peut soupçonner ceux qui ont vne grande & longue iau-
nissé. Vn certain Vieillard decrepit, fort prompt à se mettre en cholere, fut trouué apres la mort sans fiel & sans vessie, & au lieu de cela il s'estoit fait vn grand calcul. Voie mesme apres vne iau-
nissé de longue durée, estant suruenu vn benefice de ventre à plusieurs personnes, nous leur auons veu rendre des calculs de cette nature gros comme des poix, ou des grains d'orge.

Au reste, la bile abonde quelques fois si fort en la propre vessie, qu'elle la rend extrêmement tendue & grosse. Et lors elle incommode fort par la pesanteur, par oppression, suffocation, rots, ardeur, soif, cholere, & si d'auanture elle vient à se pour-
rir, par des fieures intermittentes. De là donc pro-
uiennent de tres-grands maux, & à la verité il n'en resulte pas de moindres quand elle desborde tout à coup. Car quand la vessie se vuide entierement, & qu'elle iette hors toute sa bile, elle excite ou des vomissemens biliéux, ou vne diarrhée, ou bien vne dysenterie, ou quelques autres symptomes qui en approchent. Il en est mort vn bon nombre, es-
quels il n'a paru aucune autre cause de leur tres-
pas, sinon parce que la vessie du fiel estoit totale-
ment espuisée de bile.

CHAPITRE VI.

Les maladies de la ratte, leurs causes & leurs signes.

LE s plus fascheuses maladies de la ratte sont, la tumeur, l'obstruction, le scirrhe & l'inflammation.

La Ratte estant de substance rare & lasche, s'enfle à la moindre occasion : & parce qu'elle est destinée pour recevoir la lie qui se séparé du sang, le se remplist facilement & de cela & de toutes sortes d'ordures : dont estant imbuë, elle s'enfle, beaucoup plus frequemment que ne fait le foye, & le plus souvent sans scirrhe. Alors on sent en l'hypochondre gauche vne tumeur lasche, laquelle ne resiste pas beaucoup au toucher, & retient quelquesfois la situation & la figure de la ratte, quelquesfois aussi elle remplist tout l'hypochondre : voire mesme quelquesfois elle s'aduançe iusques sous le nombril, quand la matiere regorgeant hors de ce viscere se respand dans l'omentum. Or cette matiere est diuerse, & de plusieurs sortes. Il s'y iette quelquesfois vne humeur cruë & pituiteuse, particulièrement en ceux qui habitent en des lieux marecageux & humides, & en ceux qui boient beaucoup d'eau, & qui vivent d'herbages humides : comme aussi és valetudinaires qui sortent de quelques maladies froides, humides & longues. Neantmoins c'est le plus souvent vne humeur melancholique & terrestre, & comme la

lye du sang , laquelle passe dans la Ratte, & s'y amasse en grande quantité , ou parce qu'il y en auoit beaucoup dans le sang , ou bien à cause que l'euacuation qui a coustume de s'en faire naturellement par le dégorgement de la Ratte dans l'estomach ou dans le ventre , est supprimée. Or cette humeur s'estant ainsi amassée-là , y engendre du commencement vne tumeur lasche, dont les signes sont que la respiration est frequente & difficile sur tout quand on court ou qu'on trauaille, ou mesme quand on se couche sur le costé droit, d'autant que l'enfleure de ce viscere presse le diaphragme , particulièrement quand l'estomach est remply de viâdes. On n'en perd pas d'ordinaire l'appetit, mais la digestion du ventricule en est interessée, ce qui fait que la pluspart en ont le ventricule plein d'un chyle crud & aqueux , qui rend souuent la bouche humide , & fait beaucoup cracher. Il sort force vents par haut & par bas, ou bien on en oit bruire & rouler dans l'hypochondre gauche ; & toutes ces flatuositez s'amassent ordinairement ou dans le ventricule , ou dans cette partie de l'intestin colon, laquelle est proche de la ratte : car il ne faut pas croire ceux qui assurent temerairement que ces vents sont enfermez dans la ratte. Cette humeur venant à expirer attaque le cœur , & tout le corps en deuient pesant, paresseux, & languide, l'on a mesme quelquesfois de petites defaillances. Il suruient outre cela vne pesanteur de teste, & vn extraordinaire assoupissement turbulent & fascheux ; plus vne lascheté, timidité , negligence & mespris des choses. La couleur du corps , & principalement celle du visage est rendue passe, liuide, ou du tout vilaine. Et tout cela se fait quand la ratte est trop pleine de cette melancholie simple & naturel-

le, laquelle estant la lye du sang, ne laisse pas neantmoins d'estre encore fluente & liquide, autrement elle ne couleroit point là par les petites veines.

Or cette melancholie liquide ainsi amassée, n'estant pas euacuée quand il faut, se va espaisissant; & lors elle cause de l'obstruction dans les veines, & dans les arteres. C'est qu'estant, on sent seulement vne pesanteur en l'hypochondre, ou bien quelquesfois vne douleur de ratte. Mais quand elle vient à remplir & faire enfler non seulement les veines, mais aussi tout le corps de la ratte, & que la portion plus subtile en estant dissipée, la plus grossiere demeure là, il y a lors obstruction de toute la ratte.

Cette matiere s'espaisissant là de plus en plus par la chaleur, il se forme peu à peu vn scirrhe dans la ratte. Ce qui arriue d'ordinaire quand on a negligé la cure de la tumeur, ou qu'on y a mal procédé par des remedes qui dès le commencement digerent & dissipent avec vehemence. Ce Scirrhe de la ratte occupe tantost la seule substance d'icelle, & demeure circonscript par la situation & figure de ce viscere: tantost il s'estend aussi vers les parties voy fines; de sorte que souuent il remplit le costé gauche du ventre. Il luy faut plus de temps pour s'engendrer, qu'à la tumeur simple & molle; il resiste dauantage quand on le presse de la main, & tous les symptomes qui suruiennent sont plus fascheux & plus manifestes que ceux de la simple tumeur, parce que l'humeur melancholique de celle-cy est plus pure, & en la formation de celuy-là, tout ce qu'il y auoit de subtil & de benin, s'est par laps de temps dissipé.

Pour l'inflammation, la ratte n'en est pas souvent attaqué, d'autant que le pur sang qui cause le phlegmon, penetre rarement iusques dans ce viscere. Si neantmoins elle en est quelquesfois atteinte, cela luy vient de la mesme sorte, & par les mesmes causes que celle qui se fait au foye. La fièvre est lors continuë & ardente, la langue noire & chargée, la soif inextinguible, avec dégoust des viandes, & vne enflure & tumeur de l'hypochondre gauche: on sent vne douleur qui bat, on a de la peine à se tenir couché sur le costé droit, & mesme quelquesfois sur le gauche, bref tous les autres symptomes qui se remarquent au costé droit quand le foye est enflammé, suruiennent au costé gauche. Et bien que cette inflammation soit pure, elle retient neantmoins quelque chose des symptomes melancholiques, à cause de la nature du lieu où elle se fait. S'il se forme en suite vn abscez ou vn vlcere, les causes & les marques n'en sont autres que celles que nous auons deduites en traitant des accidens semblables du foye.

La bile noire, d'où prouiennent des symptomes tres-fascheux, s'amasse d'ordinaire en la Ratte, qui est son propre reseruoir, & és lieux circonuoisins. Or elle se fait tantost de bile jaune, laquelle deuenant brusler & acquerant vne qualité maligne, est où attirée par la Ratte, où poussée par la force du foye dans la Ratte mesme, & quelquesfois dans le Pancreas & dans le Mesentere. Tantost elle vient d'vne melancholie naturelle, laquelle ayant desia long-temps croupy dans la Ratte, s'eschauffe outre mesure, se brusle, & contracte la maligne nature de bile noire, par les alimens trop chauds, par l'air eschauffé, par les exercices, ou pour auoir trop demeuré en cette partie, & deuiet telle que nous

remarquons qu'elle se forme en suite d'une tumeur de la ratte, toutesfois & quantes qu'elles s'irrite par trop. Cette bile noire excède le plus souvent sans faire aucune tumeur, & rarement en fait elle; car à peine la nature en peut-elle souffrir un amas suffisant pour cet effect. C'est pourquoy il n'y a point de tumeur en l'hypochondre gauche, point ou peu de douleur, point d'enfleure ny d'oppression. Au reste, on sent une grande chaleur dans les entrailles, principalement quand on boit du vin, ou qu'on mange quelques viandes qui eschauffent. La digestion ne se fait pas bien, les rots & les vents sortent en abondance, comme la vapeur de l'eau d'un chauderon quand on met le feu dessous; car il n'y a point de pituite, ny aucune autre humeur quelle qu'elle soit qui tire tant de ventositez des viandes. Les arteres se dilatent & battent fort dans les entrailles, & au dessus du nombril: La palpitation du cœur est grande & frequente, particulièrement quand on s'agit ou le corps, ou l'esprit: il survient quelquesfois une défaillance qui altere le pouls. Or quand il s'est élevé quelque vapeur à la teste, comme il arrive souvent le visage devient tout rouge & enflammé, l'esprit se trouble, & est agité de terreur, de crainte & de tristesse, comme si l'on estoit prest de trespasser, & qu'il n'y eust plus d'esperance de vie. Toutes choses approchent de la fureur, en laquelle le malade apprehende souvent de tomber. Les autres signes de la melancholie hypochondriaque dont nous avons parlé cy-dessus, se rencontrent souvent avec ceux-cy, quelquesfois aussi ils ne s'y rencontrent pas.

CHAPITRE VII.

*Les maladies du mesentere, & de ce
qu'on nomme Pancreas, leurs cau-
ses, & leurs signes.*

IL se fait souuent vn si grand amas d'humeurs superflües, que les parties que la Nature a destinées pour les recevoir ne peuuent tout contenir. Et lors il en regorge vne grande portion sur les parties voisines, particulièrement dans le Pancreas & dans le mesentere, qui seruent comme de sentine à tout le corps. En ceux donc qui par vn excez continuel de manger & de boire amassent beaucoup de l'vne & de l'autre bile avec quantité de pituite, dont l'euacuation ne se fait pas quand il est besoin, la Nature forte & vigoureuse s'en descharge le plus souuent sur les parties moins nobles, qui sont le Pancreas & le Mesentere, & ce d'ordinaire en dégorgeant le foye & la rattede par les rameaux de la veine-porte qui aboutissent, & se vont perdant non dans les intestins, mais dans le Mesentere & dans le Pancreas. Il s'amasse avec le temps en ces parties & glandules diuerses humeurs, lesquelles engendrent premierement vne tumeur lasche & molle; puis venant à se desseicher, elles en produisent vne dure & vrayement scirrheuse. On en a quelquesfois remarqué de si dure, qu'il sembloit que ce fust vn os ou vne pierre, qui se fust ainsi formée dans l'interieur des parties qui sont au dessous du nombril. C'est pourquoy quand le

ventre paroist gros & enflé par tout, plus qu'il ne doit estre naturellement, & ce sans fluctuation, sans vne trop longue suppression du ventre, & sans aucune apparence d'hydropisie, il faut en touchant & maniant prendre garde d'où cela vient, & quelle en est la cause.

Quand le ventre est enflé de trop de graisse, on la peut toute empoigner de la main, & la separer des muscles de l'abdomen, d'autant qu'elle adhère à la peau; outre cela le reste du corps est d'une habitude fort grasse. Lors que la tumeur est inserée dans les muscles de l'abdomen, on la sent d'abord toucher, & en la pressant, & souuent mesme sans la presser elle cause de la douleur, d'autant que cette partie est douée de sentimēt; elle ne restrecit point les boyaux, & n'empesche aucunement les dejections du ventre. Quant à la tumeur du Mesentere, on ne la remarque qu'en pressant de la main, parce qu'elle est enfoncée fort avant; elle ne fait point de douleur, d'autant que cette partie est insensible. Mais à cause que sa pesanteur presse & referre les boyaux, elle rend souuent le ventre constipé, & empesche la descente des matieres fecales. Il faut aussi de plus discerner par l'atouchement, si la tumeur occupe tout le Mesentere, ou seulement vne partie, & laquelle c'est, si elle est molle ou dure. Au reste, pour reconnoistre quelle humeur excède dans le Mesentere, il n'est pas besoin d'y porter la main, mais il faut prendre garde aux marques que nous auons rapportées touchant les tumeurs du foye, & de la ratte, mais qui pourtant sont icy & plus obscures & plus legeres. Or cette obscurité a esté cause de l'ignorance de plusieurs, & a fait que les maladies de ces parties là n'ont point esté remarquées, & que

les Anciens n'en ont rien laissé par-escrit. Neant-moins ie peux asseurer & protester que i'ay souvent descouvert dans ces parties là ces causes de la cholere, de la melancholie, de la diarrhée, de la dysenterie, de la cachexie, de l'atrophie consomptive, des fievres lentes & erratiques, & enfin des maladies cachées, lesquelles causes estant ostées de là ces malades déplorez reuenoient en santé.

Le Mesentere est pareillement sujet à vne vraye inflammation, quand par l'erosion ou rupture de ses veines le sang sort & s'estant outre nature amassée en quelque endroit se pourrist, puis venant à suppurer fait finalement vn abscez. Cette inflammation ne cause aucune douleur manifeste, on sent seulement vne pesanteur, si c'est que d'aduanture on la pressast trop fort. La fièvre qu'elle excite est fort petite & lente, sans soif, sans grands symptomes, de sorte que le malade n'en est gueres abbattu, & n'en quitte point ses exercices ordinaires. On rend au commencement vne certaine sanie rouge, puis l'abscez estant creué il coule vn pus blanc par les selles, & ces choses sont tantost meslées avec les matieres fecales, tantost pures & synceres, comme quand l'inflammation se rencontre és derniers intestins, parce que lors le pus coule dans la capacité de l'intestin droict ou du colon par la veine plus proche, & sort quelquesfois tout pur en grande quantité, sans faire aucune douleur, ce qui a donné autres-fois matiere d'estonnement & de dispute à des Medecins fort celebres. Mais il estoit ay-sé de reconnoistre que cela ne prouenoit d'ailleurs que du Mesentere affecté; car il ne scauroit prouenir ny des boyaux enflammez, ny du

ventricule sans vne douleur vehemente. Et dans l'inflammation du foye & de la ratte, la fièvre est plus violente, & tous les symptomes plus grâds; & la sanie ne sort pas pure & separée, à cause de la longueur du chemin qu'il faut qu'elle face. Pour les reins, quand ils sont affectez, ils ne se purgent point par là, mais par les vrines. Et partant il ne reste dans la capacité de l'abdomen que le seul Mesentere, qui sous ces marques-là soit attaqué d'inflammation.

CHAPITRE VIII.

Les Symptomes du Foye & de la Ratte, & quelles en sont les causes.

IL y a veritablement grand nombre de symptomes qui deriuent du foye & de la ratte; parce que ces visceres sont fort employez à la procreation & separation des humeurs. Ces symptomes sont l'ictere, la Melancholie, l'Atrophie, la Cachexie, l'Hydropisie avec ses especes.

L'ictere est vn espanchement de l'humeur bilieuse en la surface du corps. Et lors le blanc des yeux, & les parties qui sont autour des temples, & quelquesfois mesme toute la peau, sont infectez d'une couleur ou palle, ou iaunastre, ou citrine; d'où vient que ce mal a receu le nom de iaunisse. Le corps de celuy qui a la iaunisse ne suë gueres ordinairement, ains est souuent trauaillé de demangeaison, & deuiet lasche & pesant comme s'il c'e-

loit chargé de quelque fardeau ; l'esprit & les sens s'affoiblissent, & sont inquietez de diuerses images. L'Ictere prouient de plusieurs causes, l'une est, la morsure des bestes veneneuses, comme celle d'un vipere, ou bien quelque poison prins par la bouche ; dont la malignité altere tout le sang, & luy fait perdre sa premiere pureté, de sorte qu'il se corrompt & se tourne en vne humeur citrine & bilieuse, laquelle venant à se respendre par tout, infecte & gaste le cuir. Or en ce cas il y a eu des causes euidentes qui ont précédé, & la couleur s'est changé tout à coup & en peu de temps, sans qu'il soit suruenue de fièvre. L'Ictere se fait encore d'une façon, sçauoir est, par la crise des fièvres bilieuses, par laquelle la nature pousse du dedans du corps à la surface & au dehors les matieres qui l'incommodent. Cette sorte de iaunisse vient subitement, termine la fièvre, & neantmoins elle ne se perd pas avec la fièvre, mais quelquesfois elle continuë long-temps : les vrines & les excréments du ventre sont comme ils doiuent estre naturellement. Il suruiuent aussi de la iaunisse par vne inflammation du foye, laquelle bruslant la plus grande partie du sang le fait tourner en bile qui se respend çà & là par tout le corps. En ce rencontre il y a de la fièvre forte & ardente, on sent de la pesanteur & de la douleur en l'hypochondre droit, les deiections & les vrines sont bilieuses, & en suite on y remarque les signes de l'inflammation du foye. Or ces especes de iaunisse n'arriuent pas souuent, & ne sont pas entierement simples. Mais l'Ictere simple & qui suruiuent plus ordinairement se fait par le vice du foye, ou de la vessie du fiel. Car quand par l'intemperie trop chaude du foye il s'engendre beaucoup plus de bile, qu'il ne s'en

peut euacuer par la vessie du fiel, ce qui reste se iette ou respand de costé & d'autre, & se mestant avec le sang, ou avec les serositez d'iceluy est porté vers la surface du corps, & en tache le cuir. Voire mesme estant amassé dans le foye, elle en fait enfler la substance, & y fait vne tumeur qui se manifeste au toucher; puis venant à s'espaisir & endurcir avec le temps, elle engendre non seulement vne obstruction, mais aussi vn scirrhe du foye resistant & fort dur, lequel est ordinairement suivy d'hydropisie. En cette sorte d'Ictere on n'a point ou fort peu de fièvre, & quoy que les vrines soient troubles, grossieres & safranées, neantmoins les deiections du ventre ne blanchissent pas, d'autant qu'il tombe de la vessie du fiel; & mesme du foye quantité de bile dans les boyaux. Quant à l'Ictere qui prouient de l'obstruction des conduits de la vessie du fiel, il surprend la personne tout à coup, sans fièvre, sans beaucoup incommoder ny affoiblir le corps, les deiections deuiennent blanches, à cause que la bile ne peut couler dans les intestins: les vrines deuiennent grossieres & tellement rouges qu'elles en sont presque toutes noires; on sent en l'hypochondre droit vne certaine pesanteur, sans qu'il y paroisse de tumeur. Plusieurs s'imaginent d'autres causes de la iaunisse, comme l'imbécilité de la vessie du fiel, & l'intemperie trop chaude des parties qui sont en l'habitude du corps: lesquelles choses neantmoins se rencontrans tres-rarement, on les doit mettre au nombre de celles qui se remarquent plustost par la pensée, que par l'usage & par les euenemens.

L'Ictere noire est vne effusion de l'humeur melancholique vers la surface du corps, & sous le cuir. Ce symptome efface la viuacité du teint,

lequel deuient premierement obscur, puis aucunement liuide & noiraistre, sans qu'il en paroisse aucune occasion manifeste. Le corps est à la verité moins lasche & pesant qu'en l'autre sorte de iaunisse, neantmoins l'esprit est beaucoup plus troublé d'imaginacions remplies de crainte & de tristesse. Les deiections ny les vrines ne s'éloignent pas manifestement de ce que naturellement elles doiuent estre. La cause prochaine & contenant de cefymptome est vne humeur melancolique espanduë avec le sang partout le corps; ou parce qu'elle abonde par trop dans le sang, & dans le foye, & que la Ratte ne la peut toute attirer & separer; ou bien à cause que la Ratte en estant desia toute pleine, n'en peut receuoir de nouuelle; ou qu'en estant trop remplie, elle en dégorge vne portion dans les veines, & la Ratte est pesante, & enflée; ou parce qu'il y a quelque obstruction au rameau de la veine-porte, qui va du foye à la Ratte, & par où la lye du sang passe & s'éuacüe.

L'affection hypochondriaque est vne suite du mal de l'un & de l'autre viscere, & particulièrement de la ratte. Car il y en a de deux especes, l'une plus douce, & l'autre plus maligne. Celle-là prouient d'une humeur melancolique terrestre, & qui est comme la lye du sang, laquelle estant amassée en quantité excessiue dans la ratte, & es parties voy fines, engendre vne tumeur, d'où il s'eleue vne vapeur maligne. La tumeur de la Ratte est quelques fois apparente & grosse, sans iaunisse, sans cachexie; & ce quand l'humeur est benigne, & reserrée estroittement. Mais quand elle vient à sortir de sa place, & se respandre dans les veines, elle cause ou de

de la iaunisse, ou de la cachexie. Or quand elle s'eschauffe outre nature, ou qu'elle acquiert quelque qualité mauuaise, elle exhale vne vapeur noire, laquelle troublant en diuerfes sortes le sens & la raison cause la melancholie hypochondriaque. Les marques de ce mal sont d'estre souuent & longtemps pensif, s'imaginer & soupçonner choses mauuaises, auoir vne honte ou pudeur rustique, estre solitaire, triste, timide & lache; la bassesse de courage ou le desespoir; l'obscurcissement des sens & de l'esprit, le sommeil turbulent, la peruerse estimation des choses, & souuent le iugement desreiglé. Voila les moins facheux des symptomes melancholiques. L'autre affection est plus feroce. Elle vient de la bile noire, engendrée ou de la lye terrestre du sang, laquelle a esté desmesurément eschauffée & bruslée, ou bien de bile iaune. Elle s'amasse quelquesfois dans la Ratte, le plus souuent elle se iette sur le Pancreas & dans le Mesentere, sans qu'il paroisse aucune tumeur. Et parce que cette humeur est acree & pernicieuse, il n'en faut pas beaucoup pour causer de tres-cruels symptomes. C'est pourquoy la melancholie qui en procede a bien toutes les marques de l'autre, mais elles sont plus facheuses. Outre cela les entrailles sont souuent grandement eschauffées, & le battement des arteres qui y sont est fort grand. Quand la vapeur excitée par quelque cause que ce soit, vient à monter, le cœur palpite ou est oppressé, l'esprit tombe en defaillance, le visage deuiant rouge & enflammé, les yeux s'obscurcissent comme s'ils estoient couuerts de quelque taye, & finalement la raison se trouble, & est quelquesfois si fort atteinte, que sans se donner la patience d'attendre vn meilleur succez, le malade desespere

entièrement de sa vie , & ne peut pour chose qu'on luy dise reprendre aucun espoir de guerir. Ce qui donne beaucoup de peine aux Medecins, qui ne souhaitent rien plus au patient que la constance & la prudence. Mais quand la vapeur est esteinte & dissipée , les symptomes s'adoucissent pour neantmoins se rengreger aussi. Si ce mal penetre dans le cerueau & s'y attache , il causera de la fureur, & enfin vne fièvre approchante de l'hectique, & qui fera tomber le malade en langueur. La bile simple amassée autour du foye en trop grande quantité , estant enflammée, produit des incommoditez qui sont aucunement semblables aux precedentes ; car il y a lors de la chaleur manifeste, de la defaillance d'esprit , de la suffusion & de la rougeur ; & si desia les forces ne succombent au mal, l'esprit attaqué s'irrite, se met souuēt en cholere, & s'emporte du desir de se venger. Cela fait aussi finalement consommer & fondre le corps, si ce n'est que le mal se tourne en melancholie.

L'Atrophie est vn manquemēt de la nutrition qui fait peu à peu consommer & desseicher le corps, Si le corps emmaigrift, ou faute d'aliment, ou par quelque euacuation immoderée, ou par quelques autres causes euidentes, ou par vne maladie aiguë, cela ne s'appelle pas Atrophie ; mais seulement quand peu à peu & imperceptiblemēt sans qu'aucune cause ait precedé, il ne se nourrist pas, quoy qu'il prenne de l'aliment. L'Atrophie qui attaque vne certaine partie , est causée par quelque vice particulier qui se rencontre là mesme ; & celle qui est par tout le corps a sa cause dans quelque viscere principal , laquelle rabat ou esteint la vigueur, ou naturelle, ou vitale de la chaleur & des esprits.

C'est pourquoy les maux du cœur, & principalement la fièvre hectique, & l'ulceration du poulmon, conduisent à l'Atrophie, d'autant que leur esprit vital & celuy de toutes les parties en sont infectez. Voire mesme les maladies plus facheuses du ventricule portent à cela, comme fait aussi l'intemperie chaude & seiche de la ratte & du foye, & l'espanchement de la bile surabondante tant iaune que noire. Car ie n'ay gueres veu de vraye Atrophie, en laquelle les viscères outre l'intemperie, ne fussent farcis de quantité d'humeurs, particulièrement bilieuses, & que l'abondance d'icelles ne les fist enfler bien souuent. C'est donc cela qui cause l'Atrophie, puis qu'il accable tellement les esprits naturels, & la chaleur, qu'à peine peuent-ils engendrer aucun sang qui soit vtile. Durant ces maux, quoy que l'on prenne beaucoup d'alimens, & qu'il ait quantité d'humeur dans les veines, le corps n'est poultant pas nourry, parce que cette humeur estant priuée du benefice de la chaleur, & de la bonté de la substance, & souuent mesme des fièvres qui luy donnent la consistence, elle ne peut s'attacher aux parties, ny leur estre assimilée. Or il n'en va pas de mesme de la Cachexie, de laquelle il nous faut parler maintenant.

La Cachexie est vne mauuaise & vicieuse habitude du corps, en laquelle la masse du corps est assez pleine & grosse, mais vitiée tant en la substance qu'en la couleur. Le corps n'est pas prompt & aligre, comme celuy qui est d'une habitude athletique, ains pesant & paresseux; de couleur non viue & fleurissante, mais mauuaise & passe, ou liuide, ou iaune. Ce mal se contracte d'ordinaire par les alimens impurs & corrompus; ou, si les alimens ne sont pas mauuais, il en faut accuser l'imbe-

cillité ou l'impureté du ventricule , ou des visceres. L'imbecillité engendre de l'indigestion & de la crudité , qui passant dans les veines & dans l'habitude du corps , au lieu de quelque aliment plus vile, est attirée dans chacune des parties , & y est mesme retenuë , mais elle n'y est pas assimilée parfaitement ; & de là vient que la nutrition qui se fait est vicieuse , & non vraie & parfaite. L'impureté des visceres causée ou de scirrhe , ou de quelque humeur corrompuë qui se iette là , ou bien de la corruption de leur substance, produit vn sang vicieux & corrompu, lequel estant enfin distribué dans toutes les parties, & s'y espaisissant fait aussi vne mauuaise nutrition, sçauoir est, en remplissant d'vne substance vitiée la place de la bonne qui s'est dissipée. De là vient que la Cachexie est de diuerses sortes , selon la qualité du sang ; l'vne crüe & pituiteuse , l'autre melancholique , & l'autre corrompuë d'vne autre façon , par la condition de l'aliment, & par la mauuaise constitution des visceres. La Cachexie pituiteuse, dont les filles sont ordinairement ternies , & qui leur efface la viuacité du teint , deuant la Leucophlegmatie , & en marque la suite ; de mesme que l'on est menacé de ladrerie par la Cachexie melancholique. La Cachexie est donc fort differente de l'Atrophie : en cette-cy le corps extenué se va peu à peu diminuant ; en celle-là il deuiet plus gros. En l'Atrophie ; ce qui est donc les veines ne se coagule ny ne s'attache aux parties , & à peine merite le nom de sang : au lieu qu'en la Cachexie il se coagule & s'attache aux parties pour les nourrir ; & bien qu'il soit pituiteux, melancholique, ou autrement vicié, ou luy donne neantmoins la denomination de sang. En l'vne & en l'autre le corps s'affoiblit

& ses forces diminuent, mais en l'Atrophie parce que la nutrition ne se fait point, & en la Cachexie parce qu'elle se fait mal.

L'Hydropisie approche de la Cachexie, & particulièrement celle qu'on nomme Ascites. Caron en remarque trois especes, l'Anasarque, l'Ascites, & la Tympanie : desquelles les raisons & les causes sont fort diuerfes.

L'Anasarque, c'est à dire, qui vient sous la peau, & que les Grecs appellent Leucophlegmatie, est vn accroissement outre nature de la masse du corps. Au commencement de ce mal les pieds s'enflent, & principalement sur le soir, & apres auoir marché, ou quand on les a long-temps tenus baïssés, & si l'humeur est vn peu grossiere, la marque du doigt y demeure imprimée lors qu'on y touche; mais le matin, & pendant le repos, la tumeur se dissipe souuent & disparoist. En suite de cela ny le visage, ny les bras, ny les autres parties, ny mesme le ventre ne deuiennent pas plus enflés que tout le reste du corps : mais il est par tout esgalement mol, lasche & passe; le moindre trauail l'abbat & le lasse, & toutes ses fonctions s'allentissent & diminuent; la fièvre suruient d'ordinaire, mais lente, avec vn pouls petit, frequent & inegal: les vrines sont blanches, claires & toutes crûes. Or ces choses viennent de ce que tout le corps est plein de crudité, & d'vn sang pituiteux & blanchastre, ou pour mieux dire, d'vne eau gluante & espaisie: d'où ce mal est fort à propos nommé eau entre cuir & chair, de l'abondance de laquelle la chaleur naturelle est accablée. La seule grosseur fait differer cette espee d'hydropisie d'avec la cachexie phlegmatique, parce qu'elle rend le corps plus gros & plus enflé. La cause

de l'une & de l'autre est toute pareille, sçavoir est, vn trop grand refroidissement du foye & des veines, lequel est ou primitif, ou contracté par le vice du cœur, de la ratte, du ventricule, du mesentere, ou des autres parties qui seruent à la digestion; & vne trop grande dissipation de la chaleur naturelle, & des esprits. Or entre les causes euidentes qui refroidissent les viscères & rabattent la chaleur naturelle, sont, le boire excessif d'eau froide & mauuaise, l'usage desordonné des laiçues & des fruiçts, principalement quand on est eschauffé ou par la chaleur de l'air, ou par l'exercice, & que les conduits du corps sont ouuerts pour donner entrée aux choses externes. Quant à la dissipation de la chaleur naturelle & des esprits, elle arriue par vne maladie aiguë & vehemente, & par vne perte de sang immoderée, ou du nez, ou de la matrice, ou des veines hemorrhoides, & finalement par tout ce qui espuise la force des viscères qui seruent à la nutrition. Ces causes produisent de grands effects quand elles agissent à coup & avec violence: mais si elles viennent peu à peu & lentement, elles n'incommodent pas beaucoup, bien qu'elles perseuerent, comme quand il coule du sang de la matrice ou du nez peu à peu, & par vn long-temps. Pour la suppression des mois & des hemorrhoides qui ont accoustumé de couler, & toute quantité excessiue du sang, cela estouffe & accable la chaleur naturelle & les esprits.

L'Ascites est vne enflure de l'abdomen causée par vne humeur aqueuse, & sereuse. Le ventre s'emplist peu à peu, tant que la peau estant separée ou relaschée vienne à s'enfler desmesurément. Cependant le reste du corps s'enamaigrift & se consume. Le Diaphragme estant pressé par la tu-

mœur , rend la respiration difficile. Quand on frappe l'abdomen , ou que l'on tourne le corps d'un costé sur l'autre, on oit le bruit d'une humeur qui flotte. L'urine est en fort petite quantité, & ordinairement grossiere & rubiconde , principalement si le commencement de la maladie vient du foye. L'humeur sereuse est quelquesfois toute enfermée sous l'abdomen, quelquesfois elle s'escoule & se fait voye par des conduits extraordinaires dans les cuisses & dans les pieds , principalement apres avoir marché , & quelquesfois dans la bourse des testicules. Elle se iette aussi quelquesfois dans l'espace du thorax , & cause les symptomes que nous auons remarquez arriuer aux pulmoniques; quelquesfois aussi dans la matrice, comme à cette femme, laquelle sur le poinct de ses purgations menstruales, vuidoit de soy-mesme par la matrice toute l'humeur qu'elle auoit auparauant amassée sous l'abdomen , de sorte qu'en deux iours toute l'enfleure du ventre s'en alloit: puis durant le mois suiuant il commençoit de s'en amasser peu à peu d'autre humeur nouuelle , qui s'escouloit par apres toute quand le temps estoit venu. Cette espece d'hydropisie ne vient pas du refroidissement des parties qui seruent à la nutrition , comme fait la Leucophlegmatie , ny de la seule crudité , mais principalement de la solution de continuité des parties , ou des vaisseaux qui seruent coustumierement à contenir les humeurs. C'est pourquoy en la Leucophlegmatie , n'y ayant point de solution de continuité , la crudité est portée des viscères par les veines dans tout le corps : mais en l'ascites l'humeur sereuse estant subtile, passe seule sans estre accompagnée de sang , de mesme qu'elle a coustume de sortir par les reins , & s'escoule en la ca-

pacité de l'abdomen, parce qu'il y a quelque chose de rouge, ouuert, rompu ou fendu. Comme le pus de la pleuresie, qui tombe à coup dans la capacité du thorax, quand la membrane qui environne les costes est percée, ou deschirée. Car autrement il ne se peut faire en ce lieu-là vn si grād amas de serositez outre l'ordre de la nature. Ceux-là se trompent lourdement, qui pensent que l'humeur sereuse passe dans la capacité de l'abdomen par des pores estroits & cachez. Car par cette raison toutes sortes de personnes seroient esgalement sujettes à cette sorte d'hydropisie, & sembleroit que la nature eut inutilement destiné tant de passages & de conduits pour la distribution des humeurs. De plus en ceux que nous auons veu mourir d'vne suppression d'vrine, qui les auoit trauaillez durant vingt iours, on n'a point trouué qu'il se fust escoulé vne seule goutte d'eau par ces conduits cachez dans l'espace de l'abdomen, car ils auoient les vaisseaux qui seruent à contenir le sang & les serositez entiers & non percez. D'où vient que l'ascites arriue d'ordinaire à ceux qui sont sujets à rendre le sang par le vomissement, ou par les selles, pour auoir quelque veine rompüe ou rongée dans les viscères. Car encore que le sang soit arresté, neantmoins l'humeur sereuse ne laisse pas de couler par la fente qui est restée, & tombe de cette façon dans l'espace de l'abdomen. Elle arriue aussi à ceux qui depuis long-temps sont entachez de iaunisse par le manquement des viscères, & à ceux qui ont la ratte, ou le foye, ou le mesentere endurcis de quelque scirrhe inueteré : parce que la substance des viscères se fend & creuasse de seicheresse & faute

d'humeur, & la membrane qui les enuoloppe eſt ainſi deſchirée, ne peut plus retenir les ſerofitez plus ſubtiles, ains les laiſſe eſcouler de meſme que font les reins, & comme d'un pot qui ſeroit fendu degoutter peu à peu dans l'eſpace vuidé du ventre. Hippocrate a remarqué cette cauſe quand il a dit, Qu'à ceux qui ont le foye plein d'eau, le ventre deuient plein d'eau, quand la foye vient à creuer. Que ſi la ſeule ſubſtance du viſcere eſt creuaſſée, & que la membrane qui l'environne & enuoloppe demeure entiere, l'eau ne tombe pas, mais il ſ'y fait de petites veſſies pleines d'eau, que les Grecs nomment Ydatides, deſquelles on void ſouuent le foye tout couuert aux moutons, & aux bœufs que l'on tuë. Car ce viſcere eſtant plus terreſtre & plus ſec que les autres, ameine l'hydropiſie, & pluſtoſt à ceux qui ſont aduancez en aage, qu'aux enfans. Toutes les cauſes donc qui deſſeichent trop le foye, comme les fieures ardentes, comme l'vſage abondant des viandes trop eſchauffantes, & particulièrement du vin trop fort, produiſent l'hydropiſie; parce que le foye en eſtant deuenu tout aride ſ'entr'ouure & ſe fend comme vne terre deſſeichée. L'Ascites peut outre plus prouenir de quelque petite playe faite au foye, ou à la ratte, qui ne ſoit pas beaucoup profonde (car autrement on en mourroit) mais qui en ait ſeulement ataint le deſſus, & la ſurface. Elle ſ'engendre pareillement de l'vlcere, qui demeure ordinairement apres la ſupuration & vuidange du phlegmon de ces viſceres.

L'hydropiſie Tympanite eſt vne enſleure de l'abdomen, par vne abondance de vents enfermez en la capacité d'iceluy. L'enſleure eſt lors moins

grande, & moins facheuse qu'en l'Ascites ; on ne loit pas beaucoup flotter, mais elle fait seulement vn bruiet de vent enfermé ; le dessus du ventre estant frappé du bout du doigt, résonne comme vn tambour, & se rencontrent beaucoup d'indices de flatuositez. La matiere donc de cette hydropisie, est vn vent engendré d'indigestion & de crudité, lequel estant retenu en abondance dans le ventricule, ou dans les boyaux, comme quand on a la colique, & ne trouuant point d'issue naturelle, fait vn effort pour sortir, & se glisse avec de grandes trenchées par des conduits estroits & cachez entre les membranes de l'abdomen, & venant finalement à estre diuersement agité, penetre & se coule dans le vuide du ventre. Hippocrate dit à ce propos : A ceux qui sont trauaillez de trenchées autour du nombril, & qui ont de la douleur & de la peine aux lombes, que ny les remedes, ny aucune autre chose n'a pû guerir, cela passe en vne hydropisie seiche. A dire le vray, cette hydropisie n'arriue pas souuent, & à peine a-t'on iamais remarqué de flatuositez toutes pures sous l'abdomen, sans meslange de quelque humeur.

CHAPITRE IX.

Les maladies des Intestins, avec leurs causes & leurs signes.

LEs Intestins ne sont pas ordinairement beaucoup trauaillez d'intemperie : Or leurs mala-

dies plus fascheuses sont l'obstruction, l'astriktion, l'inflammation, l'abscez, & l'ulcere.

L'obstruction empesche ou le passage des alimens, ou la deiection des matieres fecales, qui sont les fonctions principales des intestins. Or elle prouient quelquesfois, mais fort rarement d'une tumeur outre nature, engendrée dans la substance de l'intestin, laquelle croist quelquesfois tellement, qu'elle en remplit le conduit & bousche le passage. On la reconnoitra par les marques que nous deduiron, tantost. Quelquesfois elle se fait par les matieres fecales desseichées & endurcies, lesquelles estans reserrées dans les destours des boyaux, peuuent à peine sortir : Or elles se desseichent quand elles demeurent trop à descendre, ou quand elles remontent lors que les affaires que l'on a, ou les autres occupations obligent de les retenir. Ces causes ont esté deuançées de quelque autre manifeste : on ne sent aucune douleur, & n'ya point de tumeur apparente. Cette sorte d'obstruction n'est pas malaisée à guerir. D'autresfois il se forme vne obstruction par vne pituite grossiere, gluante, & vrayement plastreuse, laquelle s'estant peu à peu amassée en grande quantité, & s'attachât fortement aux boyaux, remplit & occupe toute leur capacité. La pituite superflüe s'engendre d'ordinaire au cerueau, en l'estomach, & es intestins : mais celle du cerueau est subtile & aqueuse, & l'autre est grossiere & lente ; car c'est le propre excrement du ventricule & des boyaux, & non pas les matieres fecales du ventre, qui sont le commun excrement des viandes. D'autant que la substance de ces parties-là estant froide & membraneuse, elle produit vn excrement grossier & visqueux, tel qu'est la pituite lente. Cette pi-

uite donc s'engendre & s'amasse dans les boyaux, d'où on la void tantost descendre de soy-mesme parmy les matieres fecales ; tantost estre manifestement attirée par vn clystere : tantost se destacher par la violence d'une dyssenterie. Or quand il n'en fait pas vne euacuation suffisante, la chaleur s'augmentant la recuist en fin peu à peu, & l'espaisist de sorte, qu'elle enduist & bousche presque les boyaux, & cause des maladies cachées & difficiles. Vn certain Ambassadeur de l'Empereur Charles cinquiesme estoit tourmenté d'une douleur, & auoit vne tumeur qui s'estendoit de l'hypochondre droit par le bas du ventricule, vers l'hypochondre gauche. Apres que durant six années entieres on luy eut appliqué toutes sortes de remedes, comme pour ramollir vn scirrhe, on luy donna finalement vn clystere fort acré, qui destacha & fist sortir vne certaine chose dure & ferme, percée par le milieu, de la longueur d'un pied, que le malade croyoit estre vne partie de l'intestin. Mais comme on vid qu'il en auoit soudain receu de l'allegement, apres en auoir consulté, on luy donna vn second & troisieme lauement, & ayant tiré derechef vne matiere semblable, il fust aussitost remis en sa premiere santé.

Vn autre Personnage fut atteint d'un mal pareil, mais plus fascheux, qui luy arresta le ventre entierement ; lequel finalement trespassa ayant le ventre desmesurement enflé : on luy trouua l'intestin colon tellement farcy de pituite coagulée, qu'il sembloit estre tout solide, & ne permettoit qu'il passast aucune matiere fecale dans le fondement.

Nous asseurons que ces choses sont vrayes,

lesquelles neantmoins Galien n'estime gueres probables. Au reste, cette pituite grossiere estant long-temps retenuë dans les cellulës de l'intestin aueugle ou du colon, s'endurcist quelquesfois en pierres, telles que nous en auons veu souuent rendre de quatre en quatre, ou de six en six iours, de la grosseur d'une noix¹, & à une autre de la grosseur d'une chastaigne, sans faire aucune douleur. Voila les maux que produit la pituite coagulée, par l'excez de laquelle l'esprit & les forces languissent, l'estomach fait des cruditez, le ventre deuiant paresseux, les vents courent par le corps, les boyaux se refroidissent, & sont quelquesfois trouuaillez de colique.

A l'obstruction se rapporte l'astriiction & restrecissement des intestins. Or elle se fait par la vertu des choses qui sont prinſes dans le corps, soit viandes, comme sont les pommes de coin; soit clystères astringens, voire mesme par quelque tumeur du mesentere, ou des viscères qui presse les intestins, ce qui arriue fort souuent. Elle vient aussi d'enterocele, lors que le boyau descend dans la bourse des testicules, & qu'il y demeure reserré, comme s'il estoit lié. Chacune desquelles causes se doit remarquer par soy-mesme, & non point par d'autres signes.

Quant à l'inflammation, elle n'arriue pas souuent aux intestins graisses, mais elle est plus frequente aux gros boyaux, qui ont plus de sang & plus de chair, & particulièrement à celuy qu'on nomme Droict. La douleur est tres-aspre & eslançante, & non pas raclante, ou vague, ou intermittente comme en la dyssenterie; mais fixe & permanente sans changer de place. La fièvre est plus ardente qu'en la dyssenterie, & quand le pus

vient à se former, elle s'augmente, & cause vn frisson inégal. L'on a vne vaine enuie d'aller à la selle, & parce que la tumeur estant grande bousche l'intestin, on ne fait rien ou fort peu : au lieu qu'en la dysenterie on fait quelque chose, & fort souvent. La douleur se rengrege merueilleusement par les clysteres, bien qu'ils soient anodins, parce qu'ils pressent la tumeur ; & en la dysenterie la douleur s'adoucit & s'appaise, d'autant qu'ils emportent les humeurs acres.

L'abscez estât fait & creué, le pus sort par le fondement, premierement comme de la sanie, puis blanc & loüable ; & ce ou à part & tout pur, ou vn peu deuant les matieres fecales, qui le detergent & le pouffent. Alors la douleur, la fievre, & les autres symptomes se mitigent, & le ventre n'estant plus arresté reprend librement son cours ordinaire.

L'vlcere vient en suite tant de l'abscez, que de la Dysenterie, ou du Tenasme. La douleur en est fixe, & le mal qu'elle fait debilitant les intestins les fait souvent descharger, & rendre de la sanie tantost sanglante, tantost purulente. Si cét vlcere est caue, il demeure long-temps sordide, à cause qu'il se rencontre en vne partie humide, & exposée au passage des excremens, & à peine se peut-il enfin cicatrifer, & si on n'y prend soigneusement garde, il se termine, ou en fistule, ou en cancer.

CHAPITRE X.

Les Symptomes des Intestins, leurs causes, & leurs signes.

LEs Intestins sont d'ordinaire affligez de plusieurs Symptomes cruels : comme sont communément la douleur, tant colique qu'iliaque, la constipation, l'Ileon, le flux de ventre, qui est ou lienterie, ou colliquation, ou diarrhée, ou dysenterie, ou tenasme. De plus la deiection sanglante, ou purulente, les vers & les Ascarides.

L'intestin colon estant ample, lasche, sinueux & plein de destours, reçoit à la verité diuerses matieres, dont l'abondance le trauaille, & y fait vne douleur que nous appellons colique, à cause du lieu où elle est. Or ces matieres sont vn vent grossier, vne humeur ou lente & pituiteuse, ou acre, mordicante & du tout bilieuse, qui s'enflamme aussi quelquesfois. Les vents s'engendrent & s'amassent ordinairement en grande quantité dans le colon, où souuent on l'entend bruire & murmurer; car la nature n'a point d'autre receptacle pour contenir les vents, qui neantmoins s'engendrent principalement par la premiere digestion du ventricule. Les vents donc estans amassez en abondance dans ce boyau, & ne pouuant sortir à cause de l'obstruction que font les matieres fecales trop seiches, ou pour quelque autre empeschement, enfle & fait bander l'intestin, avec vne forte & cruelle trenchée

qui fait vne douleur extreme. Nous auons remarqué par la dissection des corps de plusieurs personnes que par l'accoustumance qu'ils auoient de retenir leur vent, l'intestin colon s'estoit dilaté & deuenu aussi gros que le bras : nous en auons veu d'autres, à qui les vents neantmoins par tous les replis depuis le bas du ventre, iusques dans l'estomach, sortoient en rottant, & qui rottoient au lieu de peter : & d'autres aussi qui par autres causes estoient continuellement affligés de ce Symptome, desorte qu'ils pouissoient plus de rots que de paroles. La douleur flatueuse de la colique fait bader le ventre, est vague & mobile, & court en diuers lieux du ventre: on l'entend souuent bruire, & estant estroittement renfermée, elle ne sort ny par la bouche, ny par le fondement : & faut qu'il y ait eu auparavant des causes effectrices de ventositez. La colique viét aussi d'une pituite grossiere & visqueuse, & particulièrement de la pituite vitrée, laquelle ne s'attache pas seulement à cet intestin, ains le racle, deschire, & s'y fiche souuent, à la façon des vers qui perçent le bois. Cette douleur est souuent arrestée & tourmente bien-fort, elle excite vne nausée & vn vomissement de pituite, & ne s'apaise ny en rottant, ny en petant: & l'origine en est venue de crapule & d'oisiueté, lesquelles engendrent des humeurs crues & grossieres. Quant à la colique qui vient d'humeur acre & corrosiue, ou mesme d'inflammation, elle est pareillement fixe, mais avec vn peu de fièvre, avec ardeur, soif & veilles : elle s'irrite par le manger & boire de choses qui eschauffent trop, d'où aussi elle a prins son origine. Or toutes ces sortes de vraye colique s'apaisent facilement, & cedent aux remedes conuenables.

Les douleurs nephritiques dans lesquelles on ne

rend ny sable ny pierre , passent souuent pour des coliques. On donne encor le nom de colique à d'autres trenchées , lesquelles y ont du rapport & en ressemblance & en vehemence, dont neantmoins le siege n'est pas dans l'intestin colon , mais ou au Peritoine , ou és membranes qui couurent l'abdomen , & les parties du ventre. Ces maux sont à la verité tres-fascheux, & grandement longs , & ne cedent ny aux clysteres, ny aux medecines, ny aux fomentations, ny à ces remedes qui appaisent ordinairement les veritables coliques. Leur matiere est ou vn vent subtil , ou vne humeur tres-acre & erugineuse , enclose sous les membranes , d'où il n'est pas facile de la tirer. Ils viennent ordinairement en suite des fieures de l'ogue durée, & des autres maladies bilieuses, qui sont de difficile solutiō. D'autant que la Nature taschant par vne crise de se descharger dans les boyaux de l'humeur qui l'incommode, & ne trouuant point de passage libre & facile pour en faire l'euacuation , la destourne souuent des veines & des visceres sur les membranes, où il se fait des douleurs plus fascheuses que la premiere maladie. J'ay veu des fieures continuës, & des fieures tierces , & le plus souuent des fieures quartes mesmes se terminer par ces douleurs-là, lesquelles durant vn long-temps s'augmentoient par certaines reuolutions , & retenoient le mesme des accez.

La constipation du ventre est quand les matieres fecales, & les restes des alimens ne descendent que rarement, & non à proportion des choses que l'on a prises. Les matieres fecales s'endurcissent lors necessairement , parce qu'estans trop retenues la chaleur les va sans cesse desseichant, & que les veines du mesentere qui sont respandues non

seulement dans les menus boyaux , mais aussi dans les plus gros , en attirent tousiours quelque suc. La constipation est bien vn symptome des intestins , mais qui produit en suite d'autres maladies , c'est pourquoy on la met au rang des causes efficientes des maladies. Quand on est constipé, il s'esleue des vapeurs à la teste, le corps s'appelantist , l'estomach se debilité , & les autres fonctions s'en font plus mal. Cela arriue bien souuent par vn mauuais regime de viure , comme par des alimens trop secs , aspres & astringens, particulièrement si on les prend dès l'entrée du repas: De plus par vne trop grande quantité de man-gaille, que la nature ne peut si promptement, ny surmonter, ny distribuer : finalement par oyssiue-té, pour demeurer trop long temps couché, & pour trop dormir. Mais sans nous arrester à cette sorte de constipation, nous traiçons icy de celle qui prouient de maladie. On en establit trois causes; la diminution du sentiment, comme il arriue en l'affoupissement, en l'apoplexie, & en la paralysie : le defaut d'excitation , comme quand la bile iaune, qui sert à irriter par interualles la faculté expultrice des intestins, est arresté, ce qui arriue souuent en la iaunisse. La troisiésme cause plus frequente que les autres, est l'obstruction ou l'astriktion des intestins. L'astriktion vient de quelque tumeur du mesentere ou des visceres, laquelle presse & reserre les intestins; quelques-fois aussi d'une hernie intestiuale. Et l'obstruction procede ou des matieres fecales endurcies & des-seichées, ou d'une pituite grossiere & visqueuse, ou bien de quelque calcul. En ceux donc qui ont le ventre fort paresseux & tardif, comme en vn personnage que i'ay veu, lequel n'alloit à la selle

que de douze en douze iours, & mesme passoit quelquesfois quarante iours entiers sans rendre aucune chose par le fondement, & sans aucun detri-
ment manifeste du corps & des fonctions: il en faut rapporter la cause, non à l'accoustumance, ny à la nature, mais aux choses que nous venons de remarquer. Il arriue aussi que s'estant fait vne tumeur outre nature dans l'intestin, elle le bousche entierement, & empesche le passage des matieres fecales.

Ces causes estans desmesurément accruës, & ayant totalement fermé l'yssuë aux excremens, font vn miserable Ileon, auquel les matieres fecales ne peuuent passer. Le plus souuent ce mal prouient de l'intestin tombé avec la matiere fecale seiche dans la bourse des testicules, ou dans le nombril par la rupture de la membrane, en sorte qu'on ne le puisse remettre: Il procede aussi quelquesfois de l'endurcissement des matieres, ou d'une tumeur outre naturelle de l'intestin: les autres causes sont moins frequentes. Quand on en est surprins, les viandes ne peuuent descendre en aucune façon, & les clysteres que l'on prend ne peuuent monter. Il se fait vn bruit à l'entrée des intestins, de la douleur là autour, des rots, des nau-
sées, & des humiditez excessiues de l'estomach. Apres cela vient vn vomissement de pituite & de bile; tout ce que l'on mange ou boit, bien qu'il passe dans les intestins, remonte neantmoins apres avec vne odeur stercorale: & finalement, chose horrible à voir, quand on est prest de mourir, le corps se refroidissant desia, & la sueur froide estant suruenüe, la matiere fecale sort par la bouche en vomissant.

Le flux de ventre se fait par des causes toutes
con-

contraires, ſçauoir eſt, quand la viande eſt trop liquide, trop coulante, ou trop graiſſe; quand elle ſurcharge trop l'eſtomach & les inteſtins par le poids de ſon exceſſiue quantité; quand ces parties ſont irritées & eſpoinçonées par l'acrimonie de quelque med. camét, où par quelque viande corrompue, ou par quelque excrement bilieux & acre du corps, qui ſe iette là, ou qui ſ'y eſt engendrée. Car ces choſes eſmeuent le ventre, le font couler & ſe deſcharger plus que de couſtume. Or il faut eſtablir les différences des flux de ventre, par la diuerſité des matieres qui en ſortent. Quand ſans ceſſe il ſort du ventre des matieres crües, c'eſt à dire aqueuſes, liquides, humides, blanchaſtres, ou griles, & tres puantes, & ce ſeulement avec rugiſſement & murmure du ventre, ſans manifeſtes trêchées ny douleur, c'eſt lienterie ou cœliaque; car ſi les matieres ſont vnies, eſgales; ſemblables par tout, & comme du chyle où de la crème, c'eſt cœliaque; mais ſi elles ſont inégales & diſſemblables, & que la ſubſtance de la viande ſ'y remarque encore entiere ſans eſtre digerée, c'eſt lienterie.

L'affection cœliaque n'eſt point cauſée de crudité, ny de débilité d'indigeſtion de l'eſtomach; mais de l'imperfection & mauuiſe diſtribution du chyle; prouenant de l'obſtruction du meſentere, de la ratte, où du foye, ou de l'imbecilité de la vertu attraiſtiue; ou de l'abondance exceſſiue des alimens, & particulièrement des fruitz de peu de durée & du breuuage immodéré. Car ce chyle ne ſe peut tout diſtribuer, mais la plus grande partie demeure dans le ventre. Il ſe fait enſuite de ces cauſes là vn grand amas d'ordures, leſquelles ſ'augmentent peu à peu dans les menus boyaux, ou dans le ventricule, ou dans le meſentere, ou

bien autour des viscères, se corrompent avec le temps. Et leur quantité venant à surcharger la nature, il s'en fait vne euacuation par les selles & quelquesfois par le vomissement, ou de leur mouvement propre, ou par l'effort de la nature qui ne les peut plus souffrir : quelquesfois elles sortent par la moindre esmotion d'un lauement ou d'une medecine. Le pouls est lors frequent & vifte, comme s'il y auoit de la fièvre, & en allant à la selle il suruient de legeres defaillances de cœur. Deuant que le fondement s'ouure, l'abdomen s'estend & le ventre s'enfle : & le trouble qui suit apres de soy-mesme est l'affection cœliaque. L'humeur superfluë estant toute euacuée, le cours du ventre s'arreste de soy-mesme, quelquesfois dès le mesme iour qu'il auoit commencé, quelquesfois au secôd ou troisieme.

On appelle lienterie la lubricité des intestins, en laquelle ce qui coule par le fondement est semblable tant en substance qu'en couleur, aux alimens que l'on a prins. La cause de cela est, non l'empeschement de la distribution, mais l'imbecilité de la premiere digestion, qui fait que les viandes estans encore cruës sortent sans estre changées, soit parce que l'estomach n'ait pas assez de chaleur pour les digerer, soit qu'estant trop relasché il ne les retienne pas assez long-temps pour les bien digerer. Or l'estomach se debilité par la dissolution de ses propres forces, & ce en deux façons, ou par son vice particulier, ou par la sympathie & le vice externe des autres parties. Ses vices propres sont, le refroidissement, comme celuy qui se fait pour auoir trop beu d'eau froide, particulierement quâd le corps est eschauffé : la relaxatiô ou ramolissement, comme celle que causent l'eau tiède, l'huyle, le

beurre, la graisse, les prunes, les mauues, & choses semblables quand on en vse par excez : l'introduction d'une qualité estrangere , comme est celle que produit l'usage desordonné des champignons, des concombres, des melons, & des fruicts qui en se pourrissant acquierent vne qualité maligne, & beaucoup plus quelque breuvage empoisonné, comme aussi celle qui prouient d'une mauuaise constitution de l'air, laquelle engendre souuent des lienteries populaires. Or la lienterie se fait par la communication des autres parties, quand il en résulte quelque vice dans l'estomach. C'est de cette sorte que la pituite qui tombe du cerueau, raffraichissant & ramollissant le ventricule, & la bile qui vient du foye l'irritant par son acrimonie, font descendre dans le ventre les viandes encore crues, auant qu'elles soient bien digerées. Nous auons ainsi souuent remarqué que par vn grand abscez de l'abdomen, par vne vomique des poulmons, par vne suppuration de la poictrine & des reins, qui exproient vne vapeur noire & maligne vers le cœur & le ventricule, il sensuiuoit vne forte & dāgereuse lienterie, semblable à celle que nous voyōs pareillement en ceux, lesquels estans extenués d'une longue maladie, sont desia proches de la mort.

La Diarrhée, bien qu'on puisse appliquer ce mot à toute sorte de flux de ventre, est proprement celuy par lequel s'escoulent les humeurs plus synceres, sans faire beaucoup de douleur : car tantost la pituite, tantost la bile jaune, tantost la melancholie, paroissent separément toutes pures. La pituite crasse & morueuse se destache ordinairement des plus grōs boyaux, où elle a coustume de s'amasser & s'espaisir. Elle vient aussi bien souuent

du mesentere, où estant amassée en grande abondance, elle engendre des ordures & des scirrhes, & de là vient d'ordinaire tous les flux pituiteux. Neantmoins Hippocrate a estimé que la pituite subtile & escumeuse descendoit de la teste dans l'estomach, & de là dans les intestins, & que celle qui est douce & claire prouenoit de toute l'habitude du corps. En suite dequoy il assure que la Leucophlegmatie se guerit par la Diarrhée, & que les begues sont ordinairement sujets à cette sorte de flux de ventre. La Diarrhée bilieuse est celle en laquelle la bile iaune ou citrine sort ardente, & souuent escumante, sans causer beaucoup de trenchées au ventre, parce qu'elle trouue le passage libre & ouuert. Cette bile dégorge souuent du foye trop eschauffé, ou de la vessie du fiel dans les intestins; quelquesfois aussi du mesentere, où la nature estant oppressée se décharge d'ordinaire des humeurs superflus: & quelquesfois, mais plus rarement, des plus grandes veines, & mesmes de l'habitude du corps: car c'est ainsi qu'Hippocrate veut que la surdité & les autres maladies qui viennent de bile, se guerissent par la Diarrhée. La Diarrhée melancholique procede de la ratte ou du mesentere, lors que la nature oppressée pousse & reiette dans le ventre la melancholie naturelle, ou la bile noire. Or cette-cy arriue moins souuent que toutes les autres. Les deiections paroissent lors quelquesfois tellement noires, qu'on les pourroit comparer ou à de la poix fondue, ou à de la moëlle de casse, en laquelle plusieurs ont esté trompez par la ressemblance qu'elle a avec la melancholie. Cela vient assurément du sang, lequel tombant dans les intestins quand il y a quelque veine des entrailles ouuerte,

rompue, ou mangée, se brule & noircit tellement dans les longues sinuositez & destours de ces parties, qu'il ressemble entierement à de la poix. Or on le discerne en ce que les linges qui en sont mouillez deuiennent rouges, & qu'il suruient deuant ou apres vn vomissement de sang. La colliquation des intestins se peut aussi rapporter à la Diarrhée; en laquelle colliquation ce qui sort par le fondement semble meslé de graisse ou d'huyle. Ce qui vient de ce que la substance fraichement coagulée de la graisse, ou de la chair, ou mesme (par la continuë du mal) des parties solides, se liquefie, & en fondant s'escoule dans le ventre. Cette sorte de flux arriue ordinaiement dans les fieures pestilentes, dās la fieure chaude liquefiante, dans l'hectique, dans la phthisie, dans l'atrophie, & quelques fois dans l'inflammation des visceres.

La Dysenterie est vne deiection sanglante du ventre avec douleur & trenchées: d'où vient que les Latins luy ont donné le nom de Tormina. Il sort au commencement vne morue des boyaux, puis de cette graisse, qui sert à les enduire par le dedans, meslée d'un peu de sang: & c'est icy la premiere espece de Dysenterie. L'autre se fait lors que la tunique interieure des boyaux est emportée, de laquelle on void des pellicules & des fibres meslées parmy les deiections. La troisieme est, quand l'ulcere penetrant & rongant plus auant, la chair mesme & la propre substance de l'intestin, tombe pourrie ou mangée. Or on connoist en quel intestin est particulierement cét ulcere, en premier lieu par la situation de la douleur, puis à raison du meslange des matieres: car si le sang, & toutes les racleures sont exactement meslez parmy les matieres fecales, c'est signe

quel'ulcere est dans les intestins superieurs : & si ces choses sortent toutes pures & sans estre melées, & que les matieres fecales descendent separément, les intestins d'embas & plus gros sont ulcererez.

Le Ténasme est de ce genre, c'est vn ulcere de l'intestin droit. Ceux qui en sont incommodez ont tousiours enuie d'aller à la selle, sans faire presque rien, qu'un peu de glaire aucunement sanglante. La cause de la Dysenterie & du Ténasme, est vne humeur poignante & acre, laquelle tombant avec quelque impetuosité, non pas tout droit, mais obliquement & par certains destours, & s'insinuant dans les intestins, les ulcere & les ronge par son acrimonie. Or, cette humeur est ou vne bile iaune, ou vne bile noire, ou vne pituite salée. Cela vient aussi quelquesfois des medicamens corrosifs, comme des coloquintes & de la poudre de diamant : quelquesfois aussi les alimens que l'on prend estans mauuais & acres se fichent fort auant dans les intestins & causent la dysenterie. Au reste l'humeur acre qui se iette dans l'intestin, vient quelquesfois du mesentere, où elle s'estoit amassée de longue-main, comme il arriue souuent à ceux qui ont le ventre fort gros : quelquesfois elle vient du foye ou de la ratte, ou des parties voisines : quelquesfois des grands vaisseaux, & de l'habitude mesme du corps. Il faut discerner tout cela par les signes propres, afin d'en entreprendre plus asseurément la cure. La dysenterie n'est pas tousiours accompagnée de fièvre, mais seulement quand l'humeur est tres-acre, & qu'elle vient des visceres ou des veines avec vne grande perturbation du corps.

Le flux de sang qui se fait sans dysenterie & sans

tenasme, & vient rarement de l'imbecillité du foye, & souuēt de l'ouuerture des hemorrhoides internes. Celuy qui prouient de la debilité du foye, n'est pas vn vray sang, mais vn sang clair, & semblable à de la laueur de chair fraische. La raison pourquoy cela n'arriue gueres, est parce que cette sanie tombe fort rarement du foye dans les intestins, par les veines du mesentere. Quant à celuy qui sort à part, pur & vermeil, il vient des hemorrhoides, où il s'estoit deschargé de la veine caue prochaine, & sort tantost au commencement de la deiection, tantost à la fin, tantost dans l'effort mesme que l'on fait estant à la selle. Il tombe aussi quelques-fois du fondement vn grumeau rouge, du sang que les hemorrhoides auoient distillé dans la capacité de l'intestin droict, où il s'estoit entierement cail-
lé. Ce n'est donc pas de l'ouuerture des veines du mesentere que vient le sang que l'on rend en quantité par les selles; & celuy qui coule des parties superieures, n'est pas liquide & vermeil, ains semblable à de la poix, brulé & noir, comme i'ay dit-cy-deuant.

L'excretion purulente qui se fait en petite quantité & avec douleur, vient d'un vlcere des intestins ou de fondement, resté de dysenterie, ou du tenasme, ou de phlegmon. Ce qui se reconnoist par l'espece du mal qui a precedé. Et celle qui est abondante & sans douleur, vient de quelque abscez du mesentere, d'où elle découle dans les prochains boyaux; & non iamais, ou certes fort rarement, de l'abscez du foye, ou de la ratte, & beaucoup plus rarement le pus passe-il pur & sincere des poulmōs pourris dans le ventre, quoy qu'en vueille dire Galien, qui le fait passer des poulmons dans le ventricule gauche du cœur, & de la dans l'aorte,

puis de l'aorte dans les petites veines du mesentere, d'où il tombe finalement dans les boyaux. Aui-
cenne luy a trouué vn autre passage, (çauoir est,
des poulmons dans la finuosité droicte du cœur,
de là dans la veine caue, puis dans le foye & dans la
veine-porte, en suite dans les veines du mesente-
re, & enfin dans les boyaux. Au reste, il ne se peut
aucunement faire qu'en ces passages imaginaires
le pus qui estoit coloré par le meslange du sang,
viennederechef en faisant vn si long chemin, à re-
prendre sa blancheur, & sorte tout pur & syn-
cere.

Les vers s'engendrent ordinairement plustost
dans les intestins, que dans toutes les autres par-
ties du corps; combien que i'en aye quelquesfois
veu sortir de petits par les vrines, qui s'estoient
formez dans les reins, & qu'il s'en trouue dans les
poulmons, dans les oreilles, & aux dents, & bien
souuent dans les abscezz mal pensez, & dans les vl-
ceres fordides. Ils naissent & prennent vie d'une
pituite groſſiere & visqueuse amassée, corrompue,
& disposée dans les intestins par vne abondance de
chaleur naturelle, à la façon de ces insectes qui
s'engendrent de matiere putride par le moyen de
la chaleur celeste. Or selon que la matiere qui
se pourrit est de figure diuerſe, les vers se rencon-
trent de différentes especes. Les vns sont longs &
ronds, lesquels s'engendrent d'ordinaire dans les
intestins superieurs & grasſes, d'où refilans à la
mangeaille qui descend par là. ils remontent sou-
uent dans l'estomach qu'ils trauaillent de sympto-
mes fort cruels. De là ils passent par l'œſophage
iusqu's dans la bouche, par laquelle mesme ils
sortent quand elle est ouuerte: & quand elle est fer-

mée pendant que l'on est endormy, ils se glissent par la cavit   du palais & sortent par les narines. Les autres sont fort courts & larges, de la forme d'une graine de courge, desquels la procreation se fait ou dans l'intestin aveugle, ou dans les cellules du colon, & souvent ils s'attachent les vns aux autres par vne file merueilleuse. Il y en a d'autres fort petits, menus, & ronds, qu'on nomme Ascari  s, qui se logent ordinai  ment en l'intestin droit, & dans le fondement: on en void quelquesfois fourmiller les matieres fecales des personnes adultes. Je les ay aussi quelquesfois veus sortir du fondement avec vne certaine demangeaison, & de l   courir de cost   & d'autre par les cuisses & par les fesses.

La crudit   & la gourmandise fournissent de matiere    toute cette vermine; comme fait encore l'usage des choses qui se corrompent facilement, comme du lait, du fromage, & des fruits doux & de peu de dur  e. C'est pourquoy les enfans en sont beaucoup plus souvent travaill  z que les adultes,    cause que leur chaleur est plus humide, & qu'ils ont davantage de vapeurs. Les signes qu'on a des vers, sont, vne enflure du ventre avec murmure & trench  e, vn flux lienterique, vne debilit   de membres, la couleur passe du visage, les yeux chargez & battus, la demangeaison du nez. Lors que les vers montent, & qu'ils viennent    s'irriter, principalement quand on est longtemps sans manger, & qu'ils ont faute de viande, ils mordent & succent les boyaux excitent vne toux seiche; & s'attachans    l'orifice du ventricule & aux entrailles, causent des defaillances d'esprit, des syncopes, des epilepsies: & continuans

de monter, donnent des tremblemens, des difficultez d'aualer, & des apprehensions d'estouffer, desquels accidens beaucoup d'enfans sont morts.

CHAPITRE XI.

Les maladies & Symptomes du fondement.

LEs maux qui suruiennent au fondement sont, Phlegmon, Abscez, Fistule, Fissure, Condylome, & Hemorroïde, dont le symptome est vn flux de sang.

Le Phlegmon se fait de l'abondance du sang qui tombe de la veine caue par les hemorroïdes dans les espaces vuides qui sont autour du fondement. Cela vient tant d'autres causes que principalement pour auoir cheuaché longuement & durement. La douleur est fort aspre & espointonnante, & s'augmente quand on y touche. Le fondement sort quelquesfois, & le ventre ne se descharge que difficilement, & avec vn tourment insupportable, & quelquesfois il demeure plusieurs iours arresté, mesme avec fièvre. De ce phlegmon vient vn abscez, lequel se dégorge plustost dans la cauité de l'intestin droict, que sous la peau; parce que le pus rongean la partie plus molle auëc dauantage de facilité, se fait voye plus promptement par là. L'abscez estant vuidé il demeure vn vlcere purulent & fordide, comme il en reste aussi quelquesfois du Teuisme negligé. Or en peu de temps cët vlcere degenerate en fistule; car il ne se peut pas fa-

ilement consolider dans vne partie si humide, & par où il faut que passent les excremens, & les ordures amassées, y ayant fait vn crouste calleuse, il continuë fort long-temps à couler, apres mesme que la douleur est appaisée. Le pus de cét vlcere ou seul & à part, ou au commencement de la deiection, est tout au contraire de celuy qui coule d'un vlcere du mesentere, ou des parties superieures. Voire mesme on l'a veu quelquesfois penetrer iusques dans la vessie; lors quand on vouloit pisser il sortoit du vent par le conduit de l'vrine, de mesme qu'il en sort par le fondement, puis l'vrine couloit meslée de pus, avec quelque peu de matiere fecale.

Les Rhagades, c'est à dire les fissures du fondement, sont de petits vlceres longs, dont le sphincter est creuassé, de mesme qu'il s'en fait à la levre inferieure, aux mains & aux pieds. Tous les autres petits vlceres du siege se rapportent à ces creuasses. La douleur est lors tres-acre, avec ardeur, sans indice de phlegmon, & souuent quand on presse le siege, l'extremité de l'vlcere paroist. Or ces vlceres se font ou par l'aspreté des matieres fecales trop endurcies, ou par la mordication de quelque humeur acre, salée & dessleichante.

Le Condylome est vn tubercule dur engendré sur le bord du fondement, de la forme d'une verrue, ou d'un grain de raisin, ou d'une meure. Il se fait d'un sang melancholique & noir, & incommodé plus par l'ennuy qu'il cause, que par la douleur qu'on en souffre.

Quant à l'hemorrhoide externe, & qui paroist au dehors, elles'esleue pareillement sur le siege, & est causée d'un sang noir & melancholique, dont l'extremité de cette veine est remplie par vne des-

charge de la veine caue, & la dureté de cette partie l'empeschant de sortir, il la fait enfler de la figure d'une figue. Or elle differe du Condylome en ce qu'elle le fait en moins de temps, qu'elle cause beaucoup de douleur, & qu'elle n'est point encore si fort endurcie. Et cette sorte d'hémorroïde est dite aveugle, quand il n'en sort point de sang. Pour celle qui est desia ouverte, elle iette du sang, quelquesfois de soy-mesme, & tousiours quand on s'efforce d'aller à la selle, & la tumeur n'en est pas si grosse que de l'autre. Quand les veines du corps sont pleines d'un sang trop abondant, ou acre, le sang superflu sort par les hémorrhoides internes, presque sans tumeur & sans douleur, & ce lors seulement qu'on est à la selle, & ce sang paroist separé sans estre aucunement meslé parmy les matieres fecales. Les symptomes des hémorrhoides sont le flux de sang immodéré, & la non accoustumée suppression d'iceluy: car l'un & l'autre c'est outre l'ordre naturel, & produit des maladies fascheuses. Dautant que l'on ne reputé naturelle que cette euacuation seulement qui sert à descharger le corps de ce qui le fasche & luy est nuisible, comme d'un inutile fardeau, sans l'incommoder ny l'affoiblir. La cause contenant du flux des hémorrhoides est dans le sang, lequel estant abondant, subtil, ou acre, sort avec violence; ou bien elle est dans les veines qui sont ouvertes, mangées ou rompues. Quant à la suppression, elle a des causes toutes contraires.

Le fondement tombe tantost de soy-mesme, tantost par l'effort qu'on a en deschargeant le ventre, & le sphincter paroist quelquesfois tout renuersé & rourné, ce qui vient de la debilité ou relaxation du muscle par trop d'humidité. C'est pour-

quoy on void plus souvent arriuer ce mal aux enfans, qu'aux personnes aagées.

CHAPITRE XII.

Les maladies des Reins, leurs causes & leurs signes.

LEs Reins ne sont pas subiects à beaucoup de Maladies ; ils sont seulement attaquez d'inflammation, d'obstruction, d'abscez, & d'ulcere.

L'inflammation qui s'appelle proprement Nephritique, ne se fait gueres dans les reins, à cause que la chair d'iceux estant ferme & fort dure, ne reçoit pas aisément de fluxion. Néantmoins elle y suruient quelquesfois en suite de quelque coup ou cheute par la contusion des reins, lesquels estans froissez, attirent la fluxion par les veines emulgentes. Les signes qui la font remarquer sont vne grande chaleur, vne douleur fascheuse & battante dans cet espace, qui est entre la dernière coste & la hanche, laquelle fait enfler les parties voisines qui sont autour des entrailles, autour des lombes, autour de hanches, des aignes, & des parties honteuses ; vn refroidissement des extrémitéz, & vn engoudissemēt de la cuisse qui est du mesme costé : Il prend souvent enuié de pisser, l'vrine sort avec ardeur & peine, & est au commencement subtile & crüe, puis grossiere & glaireuse : le ventre deulēt constipé & paresseux ; d'où s'ensuit vne enflure de ventre, vne fièvre continuë, des nausées, des rots & des vomissemens frequents.

L'obstruction des reins vient de diuerses causes: de sable, de pierre, de phlegmes grossiers & visqueux. Il ne s'est gueres ou presque iamais rencontré queles seuls phlegmes grossiers ou visqueux bouschassent entierement le rein; mais cela se fait fort souuent par le sable, ou par quelque pierre; desquelles choses seulement l'vrine est aussi supprimée. Or le sable s'amasse non pas dans la cavité interieure des reins, mais dans leur propre substance, d'où vient qu'il est dur & rouge, & qu'il participe de la substance & couleur des reins. L'vrine le pousse en passant de là dans la cavité, & l'emporte par les vretères dans la vessie, d'où il sort avec l'vrine & la rend graueleuse. Si on en neglige la cure, ce grauiier s'elpaissist, ou s'attachant l'un à l'autre s'amasse & compose vne pierre, laquelle se destachant puis apres de la substance du rein, s'aduanee dans la cavité d'iceluy, & venant à s'arracher de là, elle deschire & emporte sans faire aucune douleur, cette partie du rein qui la tenoit attachée, d'où il coule vne sanie laquelle sort avec l'vrine, & la rend espaisse, trouble & noirastre. Or si la pierre qui se rencontre dans la capacité du rein, n'est encore gueres grosse, elle se fourre bientôt à l'entrée de l'vretère, d'où elle tombe dans la vessie, par vn grand effort, & avec vne tres-cruelle douleur nephritique. Si elle est vn peu grosse, ou rabotteuse & rude, elle demeure plus long-temps à passer, & deschire cruellement l'vretère. Quelquesfois aussi quand elle est trop grosse, elle reste & s'arreste dans la capacité du rein, l'vretère n'estant pas assez large pour luy donner passage; où estant repoussée & agitée, elle cause souuent vne douleur fort fascheuse, & sur tout lors qu'elle se iette à l'emboucheure de l'vretère: mais cette douleur

s'appaise quand la pierre se remet dans la cavité du rein. Si avec le temps elle ne tombe point, le sable continuant de s'y attacher, elle s'accroist tantost plus, tantost moins, & acquiert diuerse figure & couleur. Estant confirmée, elle occupe presque toute la cavité du rein, & empesche que le sable ne passe comme il auoit de coustume: ce qui fait que l'on préd le mal de la pierre des reins pour de vieilles douleurs nephritiques. Les signes que la pierre est toute formée dans le rein, sont, vne pesanteur de la partie affectée telle qu'à peine peut on fleschir l'espine du dos, dont toutesfois la douleur ne se manifeste gueres, quand on vient à presser ces parties par le dehors, comme fait celle qui est causée de defluxion. L'on sent vne certaine douleur sourde, sans qu'il paroisse aucune tumeur, lors principalement que le rein est pressé par quelque vent ou matiere fecale retenüe dans les boyaux par la constipation du ventre, ou quand on se couche sur le costé opposé, ou bien quand on fait quelque exercice trop violent. La douleur nephritique reuiet par interualles sans qu'il sorte aucune pierre: en trauaillant ou allant à cheual sur vne monture de pas trop dur, l'on rend du sang parmy l'vrine, à cause que la pesanteur de la pierre froisse le rein, & souuent le deschire & lcere sans douleur, tellement que le sang en sort & se mesle avec les vrines qui coulent par là. L'on sent de plus vn fascheux engourdissement en la cuisse du mesme costé qui est malade. La matiere de la pierre est vne humeur grossiere & visqueuse, qui se iette sur le rein avec le sang, & avec les scrofitez d'iceluy; laquelle prouient tantost de crudité, tantost d'un sang brulé & terrestre. Quant à la cause efficiente, tous disent

que c'est la chaleur excessive des reins, laquelle brulant, desseichant & endurcissant les humeurs, les coagule en pierre. Mais à dire le vray, il en faut establir vne autre cause plus efficace, & beaucoup plus frequente, qui est la graueleuse & pierreuse constitution naturelle des reins. Et quiconque a les reins de cette sorte dès la premiere conformation, à peine pourra-il iamais eschaper le mal de la pierre; veu mesme que cette maladie entre les autres est tellement hereditaire, qu'il s'en trouue plusieurs à qui la pierre s'engédre avec le rein. Finalement entre les causes qui contribuent, les principales sont l'oyssiueté & le trop dormir estant couché sur le dos.

L'abscez des reins, par lequel il s'y fait vn amas de matiere purulente, vient rarement de phlegmon, & le plus souuent de quelque vlcere fardide, qui n'a point esté nettoyé, ce qui se fait de la sorte que ie diray tantost. Neantmoins quand c'est de phlegmon, la cuisson engendre du pus, & produit vn abscez quelquesfois si grand, que le rein en estant tout enflé, il paroist en dehors de la tumeur autour des lombes & des flancs. La fièvre survient avec frisson; on sent vne pesanteur laquelle incômode plus qu'elle ne faisoit au parauât. Or l'abscez estât ouuert le pus est emporté avec l'vrine, & quelquesfois il en sort des ordures ou de la chair corrompue qui se destache de la substâce putride des reins. L'abscez estant vuidé & purgé, il reste vn vlcere, qui dure fort long temps, & ne guerit presque iamais. Car ce qui est ou pourry ou mangé de la substance, ne se peut iamais ny reprendre ny re-stablir; dautant que ce viscere, aussi bien que les autres, est vne partie spermatique, & que les vrines qui

es qui passent continuellement par là, ne permettent pas que l'ulcere se consolide. C'est pourquoy il demeure tousiours fardide, & coule perpetuellement comme vne fistule. La marque de cela est, qu'il sort avec l'vrine tantost du pus, tantost des glaires, qui rendent l'vrine blanche, trouble & semblable à du petit lait, dans laquelle estât reposée il se fait finalement vne hypostase purulente ou glaireuse.

L'ulcere qui se fait és reins en suite d'un abscez causé de quelque phlegmon, n'arriue que fort rarement. On ne doit pas estimer aussi que celui-là soit gueres plus frequent que l'on dit, qui se fait ou par l'acrimonie de quelque matiere corrosiue, laquelle passant dans le rein en ait rongé la substance, ou en suite de quelque coup, ou de quelque cheute qui ait rompu les veines de ce viscere. Mais il vient souuent & presque tousiours de quelque pierre enfermée dans le rein, laquelle par sa pesanteur y fait de la confusion, ou le caue & le mange par son froissement. Nous auons veu bien souuent que la chair & substance du rein estât de cette façon toute mangée, il n'y restoit que quantité de pierres & du pus enveloppez dans la membrane du rein, comme s'ils eussent esté referrez dans vne bourse.

Or on connoist que l'ulcere vient de ces causes-là, quand l'vrine a esté souuent meslée de sang, auant que d'estre purulente, & principalement apres l'exercice & le travail; & en ce qu'il n'ayt point ou fort peu souuent de fievre. S'il arriue quelquesfois que le pus soit retenu par l'obstruction de l'emboucheure de l'vretere, il regorge peu à peu par l'emulgente dans les plus grandes veines, & gaste le sang & l'habitude du corps,

d'où vient que ceux qui ont la pierre, selon que j'ay remarqué, deuenient souuent boursoufflez & passes, comme s'ils estoient atteints de Leucophlegmatie; ou bien s'en estant fait vn grand amas en ce mesme lieu, il fait enfler les flancs & les lombes, d'où mesme, ayant fait ouuerture en la peau, il sort en abondance, & continuë longtemps à couler par là. Quelquesfois aussi l'on a veu de grosses pierres tantost sortir d'elles mesmes avec le pus, tantost estre arrachées de force par cet endroit. Quand ces choses arriuent, la substance du rein est desia presque toute consommée de pourriture, & le pus qui en regorge va flottant entre les membranes du Peritoine, où il s'en iette quelquesfois vne si grande quantité, que nous auons veu toute la region du ventre & des lombes en deuenir enflée, d'où le pus sortoit après tant par les selles que par le vomissement.

La douleur nephritique est vn tres-cruel mal de reins, ou plustost de l'vretère, le sentiment duquel est extrêmement delicat. Cette douleur estant fixe dans le rein, demeure stable en l'vn ou en l'autre des costez, sinon que quelquesfois elle s'estend le long de l'vretère, ou vers la hanche, ou vers le testicule, qui est de ce mesme costé. Elle ne court point çà & là, avec vn certain murmure, dans le milieu du ventre, ou par tout le ventre, comme fait la colique; & ne s'appaise pas tousiours quand le ventre se descharge des matieres fecales, ou que les vents en sortent: mais elle traualle cruellement le peritoire: en suite dequoy les visceres & le ventricule se renuersent, d'où procede vn vomissement premierement pituiteux, puis de matieres bilieuses. L'vrine est au commencement du mal, en petite quantité, subtile & comme

de l'eau; & quelquesfois est arrestée: puis elle sort en abondance, grossiere & pleine de sable; & lardeur qu'elle cause fait souvent enuie de pisser. Quand on se couche sur le costé qui fait mal, la douleur se diminue, & s'augmente lors qu'on se met sur le costé opposé. Cette sorte de douleur est fort frequente, & beaucoup de personnes y sont grandement sujettes; au lieu que celle de la colique n'arrive pas souvent. Quant à la cause d'un tourment si fâcheux, on ne peut dire que c'est, ny une inflammation, ny un grumeau de sang, ny quelque humeur grossiere, parce qu'estant molle & coulante, elle obeyt facilement, & que nous voyons sortir des reins aisément, & sans douleur des glaires fort espais, & même du pus amassé & endurcy. La seule Pierre est cause de cette douleur, laquelle estant trop grosse, cornue & raboteuse, & venant à passer par l'uretere, l'estend & le deschire avec beaucoup de violence, & excite par ce moyen une tres-cruelle douleur. Nous avons quelquesfois observé en certaines personnes qui avoient esté depuis long-temps grandement sujettes à ces douleurs nephritiques, que l'uretere s'estoit si fort eslargy, qu'on y pouvoit fourrer le plus gros des doigts de la main. Et les pierres de grosseur mediocre, lesquelles n'eussent pu autresfois passer par là sans causer des douleurs tres-cruelles, y passaient sans faire mal. Mais ceux qui commencent encore d'estre atteints de ces douleurs nephritiques, ou qui n'en ont eu autresfois qu'erarement & bien peu, sont grandement tourmentez de la moindre pierre. Or il est sur tout difficile de discerner ce mal d'avec la colique, d'autant qu'on n'apperçoit rien qui excède manifestement. Apres que la douleur est apaisée &

assoupie, il faut soigneusement prendre garde si la cause de la douleur a passé dans la vessie, ou si elle est retournée dans la cavité du rein. Si elle a passé jusques à la vessie, il faut faire en sorte qu'elle n'y demeure pas, crainte que par addition de matière il ne s'en forme là vne plus grosse pierre. Maintenant si la pierre vient à sortir avec l'vrine, il faut voir si elle est solide, ou composée d'un assemblage de grauiers. Car ces choses donnent lumiere pour proceder de bonne sorte en la cure de ce mal. Et ne se faut pas arrester à ceux qui veulent que les pierres qui sont blanches, s'engendrent seulement dans la vessie, & que les rouges viennent des reins; car quand les reins sont pleins de pus ils en produisent aussi de blanches.

CHAPITRE XIII.

Les maladies de la vessie, leurs causes, signes & symptomes.

LA vessie est souuent affligée de pierre, fort rarement atteinte d'inflammation & d'abscez, & est quelquesfois vlcérée.

Les pierres de la vessie different souuent en grandeur, substance, couleur, figure & situation, & ne se rencontrent point de mesme sorte en chaque personne; ce qui cause diuers symptomes en ceux qui en sont trauaillez. C'est vne opinion toute commune, que ce mal viét d'un suc grossier & crud, qui passe avec l'vrine par les veines dans la capacité de la vessie, où s'arrestant vers le fonds, comme vne

lie, il se desseiche par la chaleur de cette partie là, & peu à peu se cōuertit en pierre. Mais ie ne comprends pas bien, comme il se puisse faire que ce limon croupisse là si long-temps sans en sortir, si ce n'est que peut-estre le col de la vessie fût desmesurément estroit, ou entierement bouché, veu que le sang caillé, & le pus, & les phlegmes espais & visqueux, & d'autres choses beaucoup plus grossieres, passent aisément par là, & coulent avec les vrines. Ces raisonnemens pressants mon esprit, j'ay commencé d'en rechercher vne autre cause, & enfin j'ay reconnu que toutes les pierres de la vessie auoient prins auparauant leur origine dans les reins, d'où estans tombées pendant leurs douleurs nephritiques, & la grosseur les empeschant de sortir aisément de la vessie, elles y demeurent quelque temps, & s'accroissent par l'addition des ordures qui s'amassent en ce lieu là, tant qu'il s'en soit faict vne pierre veritable & confirmée. C'est pourquoy ie n'ay encore veu personne iusques à present auoir la pierre dans la vessie, qui n'eust auparauant senty quelques douleurs nephritiques. Et dans le milieu de toutes les pierres que j'ay autres fois cassées, apres auoir esté tirées hors de la vessie, ce que j'ay fait plusieurs fois pour espreuve, j'ay trouué comme vn noyau, qui estoit vn commencement de pierre ainsi tombé des reins, différent en couleur & en substance du reste de l'enveloppe qui s'estoit amassée autour. Les signes propres du calcul de la vessie sont d'ordinaire vn certain chatouillement vague & mobile autour de l'os pubis, & du perinée, pourueu que la pierre ne soit point encore gueres grosse: & quand elle vient aussi à croistre, on sent vne pesanteur

qui presse & incommode fort, de sorte qu'il est penible & douloureux de marcher par des lieux raboteux & rudes, & beaucoup plus de sauter. Il prend souvent enuie de pisser, tellement qu'enfin l'on ne fait presque autre chose, & à peine peut-on retenir son vrine. Quand il faut pisser, le cours de l'vrine s'arreste tout à coup par le rencontre de la pierre qui se met au deuant de l'vrine, laquelle à cause de cela ne peut couler d'une suite continuée, mais par reprises. Et lors la douleur se fait sentir, tantost tout le long du conduit de la verge, tantost seulement en la glande, & cette douleur est extrêmement sensible quand on acheue de pisser, lors que la pierre agitée par le cours de l'vrine, presse le sphincter avec plus de violence, comme si elle vouloit sortir. Avec l'enuie de pisser, il vient aussi enuie d'aller à la selle, d'autant que la grosseur de la pierre pressant le Perinée, excite l'intestin droit aussi bien que le col de la vessie. Il arriue néanmoins quelquesfois que la pierre est attachée au haut de la vessie & comme suspendue, à peine fait-elle paroistre aucun de ces signes: & on a veu des personnes qui en ont ainsi long-temps porté sans aucune douleur: toutesfois ces signes sont en tous, tantost plus benignes & obscurs, tantost beaucoup plus cruels. L'vrine fort blanchastre, grossiere & trouble, au fonds de laquelle il se fait une hypostase purulente, ou semblable à la morue des narines. La plupart de ces signes paroissent semblablement quand il y a quelque vlcere sale & profond au col de la vessie, comme il s'en fait dans les chaude-pisces. Ce qu'il faut discerner par les causes qui ont précédé. Si c'est un vlcere fardide, il y a eu auparavant de la chaude-pisse: Si c'est une pierre, la personne qui en est travaillée a esté au-

tresfois subiette à de fascheuses douleurs nephriques, & n'a pas toujours rendu la pierre qui luy causoit le mal. Finalement en mettant le doigt dans le fondement, ou pour le mieux en passant la sonde dans la vessie, le sens esprouuera & s'assemblera de ce que la coniecture rendoit douteux & incertain.

L'inflammation, s'il en arrive, ne se fait pas dans la vessie, qui est mince & destituée de sang; mais bien au sphincter ou muscle du col. Ce mal est accompagné d'une fièvre ardente & aiguë; d'une douleur aspre & eslançante dans le Perinée, avec de la rougeur & de l'ardeur: l'urine s'arreste & ne peut sortir, bien qu'on ait lors une extrême enuie de pisser, & qu'on s'y efforce beaucoup: le ventre devient plus reserré que de coustume, à cause que l'intestin droit se restrecit par la grandeur de l'inflammation: le Penil & l'hypogastre s'enflent jusques vers le nombril, par la quantité trop grande de l'urine retenuë. Le conduit devient si estroit qu'on n'y peut mettre la sonde, mesme il est tres-dangereux d'irriter cette partie, parce que la Gangrene s'y met assez facilement quand bien on n'y toucheroit pas, dont à peine en est-il iamais relchappé aucun. Lors que l'abscez se fait, & que le pus se forme, tous les symptomes se rengregent: & s'addoucissent quand l'abscez est creuë: car le pus sortant, la tumeur s'en va, & l'urine coule en abondance.

Si le malade ne meurt pas de cet abscez, il luy reste un ulcere creux & fordide dans le sphincter, d'où il sort parmy les urines qui lors sont grossieres, tantost de la sanie, tantost du pus copieux & puant, lequel finalement tombe au fonds des urines. Cét

abscez a esté veu s'ouurir par le Périnée, d'où les vrines sortoient, & quelquesfois penetrer iusques dans le fondement, par où toute l'vrine prenoit son cours. Le corps de la vessie & les vretères mesmes sont aussi quelques fois subiets à vne legere escorcheure, qui en vlcere seulement la membrane interne. Elle prouient tantost de l'agitation & frottement d'une pierre; tantost de l'acrimonie des vrines alterées par l'usage du vin pur, & des viandes eschauffantes, ou par le meslange de quelque humeur acre & salée. L'une & l'autre de ces causes rendent les vrines aucunement plus espais-ses, & meslées tantost de sang, tantost d'un peu de pus: il sort avec l'vrine de petites peaux, ou escailles, ou certaines choses comme du son. Au reste quand l'escorcheure est dans l'yretere, on sent de la douleur entre le rein & pénil, & parmy les vrines on void du pus delié, qui surnage en forme de cheueux: mais quand elle se rencontre dans la vessie, on ne peut tenir son vrine, on est pressé sans cesse d'enuie de pisser, & le malade a de la peine à se tenir debout: on sent vne grande & continuelle douleur en la vessie, en la verge, & au Périnée, laquelle s'augmente extrêmement quand on pisse.

Il se fait aussi en suite des mesmes causes vne legere vlcération dans le conduit de la verge, par l'escorcheure de sa tunique interieure. Et lors toutes les choses que ie viens de dire passent avec les vrines qui en deuiennent troubles; ce n'est pas toutesfois, comme cy-dessus, quand on acheue de pisser; mais ou deuant que l'vrine sorte, ou de soy-mesme lors qu'on ne pisse pas. En pissant l'vrine fait vne douleur acre dans la

verge , particulièrement lors qu'elle commence à fortir , ou acheue de couler ; au lieu qu'en l'eschorcheure de la vessie , dans laquelle il y a toujours de l'vrine fort acré , la douleur continue sans relasche. Le canal de l'vrine est encore quelquesfois gasté d'ulceres sales & profonds , beaucoup plus mauuais que les precedens , tels que les maladies veneriennes de ce siecle en produisent souuent , desquels nous parlerons ailleurs.

Le Priapisme est vne erection & enfleure de la verge , qui demeure bandée outre l'ordre de la nature , sans aucun desir venerien. Ce mal est quelquesfois accompagné d'inflammation , & quelquesfois il se fait sans inflammation , lors que la verge enflée bande par vne certaine extension conuulsive. La cause du Priapisme est vn esprit flatueux , qui remplist à coup les arteres & le nerf cauerneux de la verge , lequel esprit procede , ou d'une humeur grossiere & visqueuse , par le manquement de la chaleur ; ou d'une excessiue redondance de la semence genitale. Ce genre de mal est grandement rare , duquel toutesfois on rapporte qu'un certain personnage estant mort , auoit la verge encore dure & tendue deux iours apres son trespas.

Maintenant , quant aux symptomes principaux des parties honteuses , ce sont , l'impuissance en l'acte venerien , & l'escoulement de la semence,

L'impuissance vient , ou de ce que la force virile estant esteinte , il ne s'engendre plus de sperme dans corps ; ou bien s'il y en a , c'est qu'en ne le peut entierement descharger. La force

virile s'affoiblit & se perd par vieillesse, par maladie, par toutes les causes qui dissipent les esprits, & ruinent la vigueur naturelle, par les malefices des sortileges, qu'on ne doit pas tenir pour fable & par les medicamens qui ont vne propriété, ou vne vertu manifeste d'esteindre la semence genitale. Le sperme ne sort pas, quand il se rencontre vne grande obstruction dans les vaisseaux, & quand les parties honteuses sont atteintes de Paralyfie. Ceux qui ont cette derniere incommodité sont bien touchez des desirs de Venus, mais la debilité des membres qui seruent à cét exercice, ne leur en permet pas l'execution: & les autres n'en ont ny la disposition, ny l'enuie.

La Gonorrhée est vn escoulement de semence excessif & non volontaire, hors de l'acte venerien, sans estre prouqué par des songes lascifs, sans erection de la verge, & avec peu ou point de plaisir & de chatouillement. Il y a mesme vne certaine espee de Gonorrhée, qu'à la moindre occasion le sperme se respand, comme il arriuoit à celuy qui deschargeoit sa semence d'abord qu'on luy donnoit vn clystere. J'ay veu encor vn certain personnage, lequel estant fort sujet à ce flux de semence, iettant le pur sang en resuant pendant le sommeil, ou en y pensant seulement quand il estoit éveillé, avec non moins de plaisir que si c'eust esté de la semence. Or la Gonorrhée est vn mal aussi commun aux femmes qu'aux hommes. La semence est lors crüe, aqueuse, liquide, & claire, non du tout blanche. La cause de ce flux est la debilité des parties spermatiques, qui fait que la semence ne se peut cuire, ou ne peut estre retenue iusques à ce qu'elle soit suffisamment cuite & espaisie. C'est pourquoy ceux qui n'estans pas encor en

22ge de puberté, se sont effrenement portez aux actions veneriennes, y sont d'ordinaire fort sujets: car les parties s'affoiblissent, & les humeurs par vne longue habitude s'y iettent en abondance. Quand la semence sort à coup par quelque songe lascif, ou par quelque forte imagination venerienne, elle n'est pas crüe & aqueuse, comme en la vraye Gonorrhée, & ne coule pas insensiblement, ains est ejaculée avec beaucoup de plaisir. Et la cause de cette descharge est, ou l'abondance de la semence, ou vne chaleur & acrimonie dont la nature est irritée, ou bien vne grande vigueur des parties spermatiques, laquelle se remarque en ce que lors la semence sort tousiours avec vne agreable volupté.

Ils'est glissé en ce siecle parmy les hommes vn certain eschantillon de verole approchant de la Gonorrhée, aussi l'appelle-on pour ce sujet Gonorrhée sale & virulente. Il sort au commencement vne certaine matiere virulente blanche ou iaunastre, qui coule insensiblement des vaisseaux spermatiques, tant en veillant qu'en dormant. Ce qui vient d'vne imbecillité des vaisseaux spermatiques & des testicules, non simple, mais contractée d'infection verolique, laquelle fait que tout ce qui s'amasse dans ces vaisseaux, se tourne en vne matiere virulente sale & maligne, qui infecte & gaste le reste, & deuient contagieux. Avec le temps ce venin se corrompt, & acquiert vne acrimonie qui en passant escorche & vlcere le conduit de la verge. Et l'on connoist que l'ulcere est desia formé par la douleur qui suruient & se fait sentir quand on bande, comme vne corde tendüe sous la verge, & en pissant on sent vne acrimonie qui pique aussi fortement que si on estoit trauaillé de

dysurie, tellement que beaucoup de gens là ont esté soupçonnez d'auoir vne pierre dans la vessie. Mais il n'est pas neantmoins tant mal-aisé d'en connoistre la difference par les signes propres de ces maux. L'vlcere deuient quelquesfois si profond, qu'il paise iusques à la derniere peau de la verge. Ce flux virulent estant arresté mal à propos, il se forme souuent vn abscez au dedans, tantost autour du testicule en l'epididyme, tantost au Perinée, d'où la matiere sort quand la peau vient à se rompre, ou à s'ouvrir. L'vlcere de la verge continue d'ordinaire fort long-temps, & à peine guerit-il iamais de soy-mesme. C'est pourquoy quand on en neglige la cure, il s'y fait vn excroissance de chair, de la forme d'une verrue, ou bien les ordures qui s'y amassent s'endurcissent en cal; & ce, non en vn seul endroit du conduit, mais en deux, & souuent en trois lieux. Les marques qu'il y a vne excroissance de chair, ou vn cal, sont, la suppression de l'vrine, ou la difficulté de pisser, quand l'vrine ne coule pas à plein cours & librement, mais comme vn petit filet. En maniant la verge on sent la dureté de l'excroissance, & en mettant la sonde elle se rencontre & l'arreste.

Au reste, les symptomes de pisser sont; le Diabete, l'incontinence d'vrine, l'Ischurie, la Dysurie, la Strangurie, le pissement de sang & de pus.

Le Diabete est vn escoulement immodéré de l'vrine, par lequel on rend le breuuage tel qu'on l'a prins, sans estre aucunement changé. Ceux qui ont le ventre ou l'habitude du corps remplie d'une grande quantité d'humeurs aqueuses, pissent quelquesfois avec grande impetuosité beaucoup plus qu'ils ne boient; comme i'ay veu autres-

fois vn certain personnage replet & boursoufflé, lequel pissa tant dans l'espace d'environ huit iours, qu'il en deuint extrêmement maigre & extenué. Ceux qui boient beaucoup, pissent aussi beaucoup, comme faisoit quelqu'un que j'ay conneu, lequel aualloit tous les iours en l'espace d'une heure seize liures d'une eau medicinale tiède; car il la rendoit aussi-tost en urinant, toute telle qu'il l'auoit beüe. Mais ny l'une ny l'autre de ces excessiues profusions d'urine, ne doit estre tenue pour Diabete: mais bien quand on boit outre mesure sans se desalterer, & que l'on pisse incontinent tout ce que l'on venoit de boire, sans qu'il y ait presque aucun changement. Ce mal est proprement vn symptome des reins, lesquels estans fort eschauffez, ou chargez de quelque humeur tres-ardente, attirent puissamment les serofitez, lesquelles toutesfois ne pouans estre retenues par la debilité de ces parties, coulent continuellement dans la vessie. C'est pourquoy tout le corps estant de cette sorte espuisé & desseiché de soif, & de chaleur excessiue, se consomme entierement. Mais ce symptome est extrêmement rare, & à peine s'est-il rencontré vne seule personne qui n'eust au dedans quelque autre cause de cette abondance d'urine.

On appelle incontinence d'urine, quand elle coule manifestement sans aucun sentiment d'acrimonie, ny de douleur, quoy qu'on ne le vueille pas; & ces conditions là font beaucoup differer de la Dysurie. Or elle est causée par la resolution du sphincter, qui ferme le col de la vessie, ou bien quand les nerfs des lombes qui s'enserrent dans ce muscle sont atteints de Paralytie. Ce qui

vient tantost de coup ou de cheute, tantost de refroidissement ou de defluxion. Ceux qui pissent en dormant, comme le enfans font d'ordinaire, ce n'est point par aucune paralysie du sphincter, mais seulement par la relaxation & ramolissement de ce muscle, lequel ne peut résister ny à la quantité, ny à l'acrimonie de l'urine, lors principalement que les forces animales estans assoupies par le sommeil, ne font gueres de fonction.

L'Ischurie est contraire aux symptômes precedens, parce qu'en icelle l'urine est entierement supprimée, & ne sort point du tout. Galien en rapporte souuent la cause au sentiment emoussé de la vessie, la diminution duquel fait qu'elle ne sent pas quand elle est pleine, & ainsi n'est pas sollicitée de se descharger. Mais à dire le vray, tant que l'urine trouue vn passage ouuert & libre, comme en ceux qu'on taille pour leur tirer la pierre, elle coule d'elle-mesme, & sort sans estre ny pressée ny poussée. Et partant il faut que la suppression de l'urine vienne d'adstriction ou d'obstruction, laquelle ferme ou les emboucheures des deux vretères, ou le col de la vessie. Or pour discerner lequel c'est des deux, il en faut chercher des signes certains: Si le conduit de l'un des vretères seulement est bousché, l'urine n'est pas pour cela supprimée, car elle ne laisse de couler par celui de l'autre; mais quand tous les deux sont bouschez ou referrez, la suppression se fait, laquelle se remarque en ce que le malade a esté suiet à vne douleur de l'un & de l'autre rein; on sent lors vne tres-grande pesanteur aux lombes, & quelquesfois on est tourmenté tant d'un costé que d'autre d'une douleur vehemente; on n'est point ou fort peu pressé d'enuie de pisser; on n'apperçoit au peni

ny douleur ny tumeur, non pas mesmes en pressant de la main : la vessie est flaque & vuide, tellement qu'en y mettant mesmes la sonde, il n'en sort pas vne seule goutte d'urine. Mais quand l'urine est arrestée par l'obstruction du col de la vessie, on a continuellement enuie de pisser, & on en fait de grands efforts, mais en vain; le penil deuient enflé & douloureux par l'abondance de l'urine amassée, & si on passe la sonde dans la vessie, l'urine en sort abondamment & avec impetuosité, & cause du soulagement. L'obstruction qui se fait à l'embouchure des vretères, vient d'ordinaire des pierres qui sont vn peu grosses, lesquelles se sont là fourrées, & rarement d'vne humeur crasse, ou de quelque grumeau de sang : mais beaucoup plus rarement d'inflammation, ou de pus. Dans le col de la vessie, elle procede souuent, ou d'vne pierre qui y est passée & demeurée, ou d'vn tubercule charnu & calleux, comme il s'en fait par la gonorrhée virulente; & rarement d'humeur grossiere, ou de pus, ou de sang caillé: Car ces choses ne s'arrestent pas long-temps dans le passage, mais sont facilement poussées dehors par le cours & impetuosité de l'urine. Vn certain Personnage de l'aage de trente ans, ayant le col de la vessie bousché, rendit durant plusieurs mois l'urine par le nombril, de mesme que s'il eust pissé; sans que pour cela il se fist aucune tumeur, ny aucun amas d'eau dans l'abdomen, & sans preiudice de sa santé. Plusieurs s'esmerueillans de cela, i'apprins que quand ce Personnage vint au monde, le nombril ne luy ayant pas esté bien lié, ne se ferma pas, & que tousiours depuis il en estoit decoulé quelque chose, ce qui me fist iuger que l'ourachos n'estoit pas encore desseiché, & que l'urine se desgorgeoit lors de la

vesſie dans le nombril, comme quand il eſtoit au ventre de ſa mere.

On appelle Strangurie, c'eſt à dire, diſtillation d'vrine, quand l'vrine diſtille goutte à goutte : ce qui arriue tantost avec quelque effort, mais ſans douleur, tantost avec beaucoup de douleur, & par vn mouuement d'irritation. Celle qui ſe fait ſans douleur, vient des meſmes cauſes qui produiſent l'Iſchurie, mais qui à la verité ſont icy moindres, ce mal eſtant vn diminutif de l'Iſchurie. Quāt à celle qui eſt accompagné d'une douleur acre, elle a des cauſes meſlées, qui tiennent tant de l'Iſchurie que de la Dyſurie ; car en ce que l'vrine ſort goutte à goutte, ce mal participe de l'Iſchurie, & à raiſon de l'ardeur & ſtimulation, il approche de la Dyſurie.

La Dyſurie eſt vne difficulté du Penil & de la veſſie, comme la dyſenterie l'eſt des boyaux, parce que l'on piſſe avec beaucoup de tourment & de douleur, quelquesfois abondamment, quelquesfois goutte à goutte. La cauſe de cela eſt, ou en l'vrine, ou au col de la veſſie. En l'vrine eſtant deuenue fort acre, ou par vn regime de viure trop eſchauffant, ou par vn meſlange de bile, ou par l'acrimonie d'une matiere purulente ſortie de quelque abſcez creué. Au col de la veſſie, c'eſt ou vlcération, ou inflammation que l'vrine irrite en paſſant. Ces cauſes ſe diſcerneront par les ſignes qui ont eſté cy-deuant aſſignez à chacune de ces incommoditez.

Le piſſement de ſang eſt quand il ſort du ſang en piſſant. Quand il ſort du ſang pur & ſyncere par le conduit interieur du Penil, cela ne ſe doit pas dire piſſer du ſang, parce que cela vient ſans vriner, & ſans qu'on le vueille, de quelque veine ouverte,

uerte, rompuë ou mangée. Or quand le sang sort avec l'vrine, s'il est en grande quantité, il provient ou des reins, ou du muscle sphincter qui est au col de la vessie. car il n'en peut gueres sortir, ny de l'vretère, ny du corps de la vessie. Celuy qui tóbe des reins, est exactemēt meslé par toute l'vrine, de sorte que c'est cōme vn sang delayé & clair, lequel prend aussi tost le dessous, & paroist rouge, liquide & non caillé. Si cela ne procede point ny de cheute, ny de coup, il en faut rapporter toute la cause à quelque pierre, laquelle venant à froisser contre le rein par l'agitation du corps, & principalement par quelque exercice violent, en ouvre les veines, & fait sortir le sang. On a souvent descouvert par ce seul symptome de pisser du sang, qu'il y auoit yne pierre dans le rein, laquelle ne se manifestoit par aucun autre indice que celuy-là, tellement qu'on ne pensoit point qu'il y en eust. On peut de cette sorte rendre long-téps du sang par les vrines, sans que les forces en soient manifestement interessées. Toutes les autres choses qu'on assigne ordinairement pour caules de ce mal, comme la debilité des reins, leur simple ouuerture, l'infirmité du foye; la repletion, la suppression des mois ou des hemorrhoides, sont tellement rares & arriuent si peu souuent, qu'à peine ont elles iamais toutes seules fait pisser le sang.

Au reste, quant au sang lequel tombant du muscle sphincter dās la capacité de la vessie, rend l'vrine sanglante, il ne se mesle pas esgalement par toute l'vrine, & venant à s'amasser au fonds il se caille, & se prend en grumeaux; il en sort aussi quelques-fois vn grumeau, ou morceau caillé sans vriner: on sent lors souuent yne pressante douleur en pis-

sant, laquelle semble brusler la racine du Penil, & est accompagnée d'autres signes, qui marquent ou vn vlcere, ou quelque veine rompuë.

Quand il sort du pus en pissant, cela vient quelquesfois des reins, & quelquesfois du conduit du Penil. Au premier, le pus n'est pas exactement meslé, ou s'il s'en rencontre quelque portion plus espaisse, elle ne sort que sur la fin. En l'autre, le pus sort le premier tout pur, s'estant destaché ou du col du Penil, ou des Parastates vlceréz, ou des vaisseaux spermatiques; en suite duquel vient l'urine pure. Les urines qui sortent noires & troubles, sans faire douleur, si elles ne sont telles ou de jaunisse, ou par vne crise, viennent ainsi de l'esbranlement d'une pierre qui s'arrache du rein, & qui en doit apres sortir, non sans causer beaucoup de peine. Si l'on rend des glaires en urinant, elles procedent ou d'un vlcere, ou de quelque pierre qui est dans la vessie. Lors qu'il se rencontre des filaments, ou des cheveux sortis parmy les urines, c'est ou de quelque pituite visqueuse qui se forme ainsi dans les ureteres, ou d'un excremēt de semēce, qui s'est allongé de cette sorte dans les vaisseaux spermatiques. Mais tout cecy, & les autres choses qui peuvent broüiller les urines, sont plus amplement expliquées es lieux où nous auons parlé des choses qui se rencontrent dans les urines.

CHAPITRE XIV.

*Les maladies de la bourse des testicules,
leurs causes, & leurs signes.*

LA bourse des testicules, & les testicules qui sont dedans, sont attaquez tant d'inflammation, que de tumeur dure & scirrheuse, & de toutes sortes d'hernies.

L'inflammation vient d'un sang subtil & chaud, qui se iette outre l'ordre de la nature dans la bourse & sur les testicules. La bourse s'enfle & devient dure, avec rougeur, chaleur & douleur eslançante, laquelle s'augmente pour peu qu'on y touche, à quoy il survient souvent de la fièvre. Que si l'inflammation attaque seulement l'un des testicules, ces choses sont plus avant enfoncées, & se discernent mieux par le toucher que par la veüe; mais si elle s'estend iusques sur la bourse, le tout paroist à l'œil par le dehors. L'inflammation ayant esté mal pensée, laisse souvent en cette partie une tumeur fort dure, à cause que la chaleur y a esté trop soudainement esteinte. Alors il ne s'y remarque ny rougeur, ny chaleur, ny douleur, il y reste seulement une dureté, qui bien souvent ne cede pas entierement aux remedes.

L'hernie, ou descente, se fait tantost en l'aine, & s'appelle Bubonocèle, laquelle est commune tant aux femmes qu'aux hommes; tantost en la bourse, ce qui arriue aux hommes seulement. Or elles viennent quand il descend quelque chose sur l'une

ou sur l'autre de ces parties qui y fait de la tumeur. La cause de cette descente est la rupture ou dilatation du Peritoine, l'office duquel est d'envelopper & de retenir tout ce qui est au ventre. Quand il n'y a que la membrane interne rompüe, (car le Peritoine est double) la tumeur est seulement en l'aine; mais quand avec cela il se fait vne dilatation de la membrane qui s'estend dans la bourse, la bourse deuient pareillement enflée. Or il y a diuerfes choses qui descendent là, desquelles se prennent ordinairement les differences des hernies. De la cheute du boyau vient l'enterocele; l'epiplocele de l'omentum; l'hydrocele de l'eau, & la sarcoccele d'vne excroissance de chair. En l'enterocele & en l'epiplocele la tumeur n'est pas permanente: car estant couché sur le dos, le boyau & l'omentum se remettent ou deux mesmes, ou en les poussant doucement avec le bout du doigt; & quand c'est le boyau qui remonte il fait vn certain bruit & murmure flatueux, au lieu que l'omentum retourne sans faire bruit, & avec plus de peine. La tumeur de l'hydrocele & de la sarcoccele demeure tousiours, & ne retourne point vers la capacité du ventre, quoy qu'on la presse, & qu'on la pousse. Entre ces deux il y a cette difference, que la tumeur de l'hydrocele est plus molle, qu'elle resonance lors qu'on la frappe, qu'elle ne pese gueres, & qu'on void le iour au trauers: mais la tumeur de la sarcoccele est dure, pesante & opaque, & s'est avec le temps engendrée & accretüe peu à peu. Or comme les hommes ont des descentes dans la bourse, les femmes en ont aussi dans les parties honteuses, lesquelles il se fait pareillement des cheutes des boyaux, de l'omentum, & d'humeurs aqueuses, d'où ces choses semblent pendre comme d'vn

fac. La rupture du nombril peut semblablement estre comptée pour vne espece d'hernie, par laquelle le nombril paroist souuent merueilleusement esleué, à cause que les boyaux sortent par là sous la peau. Il ne sera hors de propos de rapporter encor icy l'accident de ce Personnage, auquel il sort vn des menus boyaux, par le trou d'une playe qu'il a receüe dans le ventre, avec incision de ce boyau, d'où les excréments du ventre n'estans pas encor solides ny liez, coulent continuellement depuis quinze ans, sans rien rendre par le bas. Passons maintenant aux maladies qui sont particulieres aux femmes.

CHAPITRE XV.

Les maux de la Matrice, leurs causes & leurs signes.

LA Matrice est sujette à diuerses maladies, qui sont, Phlegmon, abscez, vlcere, cancer, scirrhe, mole, enfleure, hydropisie, pierre : & dans le col, Rhagades, Condylomes, Hemorrhoides.

Le Phlegmon procede d'un sang subtil & chaud respandu de la yeine caüe, par les petites veines, dans la substance de la matrice, & non dans sa capacité : lequel venant à se prendre, enflammer & pourrir, produit vn Phlegmon. Ce mal est à la verité plus frequent au col de la matrice, que dans la matrice mesme. Lors que l'inflammation attaque toute la matrice, on est tourmenté d'une douleur acre &

battante, & si l'inflammation tire davantage sur la partie de devant, la douleur panche aussi vers la motte, & l'urine sort avec peine : mais si'elle tend plus sur le derriere, la douleur se fait sentir vers les lombes, & le ventre s'arreste. On a del'ardeur, de la tumeur, de la tension, & de la pesanteur, à la motte, au bas du ventre & es lombes; la fièvre est continuë, avec les symptomes qui en ensuiuent : mettant le doigt dans le col, on ne scauroit presser aucune partie de la matrice qui ne fasse vne vehemente douleur. Le sang pourry venant à se former en pus, il se fait vn abscez. Et lors tous les signes que nous venons de rapporter, se r'enforcent; on est souuent saisi de frissons fievreux, qui redoublent sans ordre: neantmoins tout cela se diminuë quand le pus est formé. Mais lorsque le pus acre & corrosif commence à aboutir pour se faire passage, on est derechef tourmenté de tres-aspres douleurs, de fiebres tres-fortes; & d'autres symptomes grandement fascheux. L'abscez estant ouuert & vuidé, il demeure vn vlcere sordide. Or le pus qui découle du corps de la matrice, tombe dans la capacité d'icelle, d'où on le void sortir tout pur; ou penetre au dehors dans l'espace du ventre, & s'arreste entre les boyaux, tellement que son abondance rend le bas du ventre tendu, & la pesanteur y cause de l'oppression. L'abscez creué dans le col de la matrice se descouure au toucher, & le pus qui en sort se respand quelquesfois seulement dans le col, d'où finalement il coule dehors; quelquesfois dans la vessie, & lors l'urine distille continuellement par le col de la matrice, en suite dequoy nous auons veu souuent la façon naturelle de visser estre entierement abolie; quelquesfois l'abscez penetre iusques dans l'intestin droit, &

lorsil sort quelque portion des matieres fecales par le col de la matrice.

Il se fait quelquesfois vne legere vlceration en la matrice & au col d'icelle, qui en escorche la pellicule interieure, ou la caue quelque peu. Ce qui prouient ou d'un accouchement difficile, quand l'enfant est trop grand, ou que venant de trauers, ou estant desia corrompu, il le faut miserablement tirer par force. Cela peut aussi proceder de la violence de l'acte venerien effrenement exercée, & d'un long flux d'humeurs acres & corrosiues. En toute vlceration, il y a de la douleur assez forte, il coule vne sanie & ordure poignante & corrosiue, diuerse en quantité, en substance, & en couleur, quelquesfois puante, quelquesfois sans odeur, & qui se peut à peine discerner des simples fleurs. Or la propre connoissance de l'vlceration se prend des causes antecedentes, & du sentiment de la douleur, laquelle se renouuelle ou en y mettant le doigt, ou en y faisant iniection de quelque chose acre, comme de vin, ou d'hydromel.

Les vlceres malins de la matrice degenerent souvent ou en Nomes, c'est à dire, vlceres rongeurs & cruels, ou en cancers. Les Nomes paroissent inégales, corrosiues, & vont tous les iours mangeant de plus en plus, de sorte que ces vlceres sont les plus puants, sales & fâcheux de tous les autres, & ne prouiennent point des seules causes euidentes, mais aussi d'une humeur acre & corrosiue insinuée dans cette partie. Le Cancer vient d'une humeur atrabilaire qui s'estant là amassée s'irrite & s'enflamme par la chaleur. Quand il n'est point encor vlceré, on apperçoit vne masse pesante, & vne tumeur dure de couleur aucunement liuide. Il paroist different de l'inflammation, en ce qu'il est de

longue durée, que la douleur est moins eslançante, & que la fièvre n'est pas si forte. Du scirrhe, en ce qu'il est accompagné de chaleur & de douleur. Le Cancer estant vlcéré est plus malin que les Nomes, aussi outre les autres marques, a-il les bords fort enflés & durs, releuez d'un amas d'ordure sale & liuide : il iette pareillement vne sanie puante, subtile, & noire, ou mesme tirant sur le iaine.

Quant au Scirrhe, la matrice en est quelques fois entièrement & par tout endurcie, & quelques fois il n'y en a qu'une certaine portion. La tumeur est lors dure & resiste au toucher; elle ne fait point ou peu de douleur; on sent un grand fardeau quand on est debout, (ce qui arriue pareillement és autres tumeurs) lequel pese, comme s'il deuoit tomber sur les parties honteuses : & quand on est assis ou couché, il presse l'intestin droit par sa pesanteur : on a de la peine à marcher, les iambes deuiennent faillies, & tout le corps est rendu lasche & paresseux. Il prouient d'une humeur grossiere & terrestre, respandue par la substance de la matrice, en laquelle il se prend & endurecist : ou bien d'inflammation, laquelle ne s'est ny resoute, ny tournée en abscez.

La Mole est vne tumeur charnue engendrée, non dans la substance, mais dans la capacité de la matrice. Elle a quelques fois certain commencement de forme, souuent ce n'est qu'une masse sans forme, couuerte de peau, ou de membranes, au dedans de laquelle il y a vne chair molle & confuse, parsemée de quantité de veines, sans os, sans intestins, sans viscères. Elle attire de l'aliment par les veines, & se nourrist à la façon des plantes, & croist de sorte que quelques fois elle rend le ventre

aussi gros que si c'estoit vn enfant de huit mois. Elle est quelquesfois si fort adherente aux acetabules, qu'il s'est trouué des femmes qui en ont porté dans leur ventre durant quatre ou cinq années, & quelquesfois toute leur vie. Mais le plus souuent celle qui ne tient pas si fort, tombe au trois ou quatriesme mois, auant que d'auoir atteint vne iuste grandeur. A cela se rapportent fort les faux & inutiles germes, dont l'euenement est assez frequent. On en porte & met hors quelquesfois plusieurs ensemble, & quelquesfois ils sortent avec le vray foetus. La cause efficiente de la mole n'est pas le seul sang menstrual, & la seule semence de la femme ne la peut non plus produire, comme les œufs que les poules font sans germe, puis qu'on n'a iamais veu de femme conceuoir vne mole, sans auoir eu connoissance d'homme: mais la mole vient de la semence de l'homme, laquelle est, ou corrompüe, ou en quelque sorte impuissante, & peut bien prendre aliment, mais non pas former quelque chose. En la mole aussi bien qu'en la conception les mois s'arrestent, les mammelles s'enflent, le dégoust suruient, le ventre se leue peu à peu, tellement qu'il y a grand sujet de croire que ce soit vne conception & grossesse d'enfant. Et ces signes marquent la difference d'avec le scirrhe.

Il differe aussi du vray & legitime foetus, en ce que le foetus se meut doucement & benigne-ment; au lieu que la mole ou est arrestée par son poids, ou se roule avec certaine impetuosité de quelque costé que la femme se tourne. En la mole, la femme deuient plus pesante à marcher, & elle a comme vn poids qui luy pend en la matrice; les membres luy deuiennent graisses.

& souuent elle sent vne douleur qui luy pique dans le ventre ; aucune desquelles choses n'arriue quand c'est vn vray & legitime foetus, principalement si la femme se porte bien.

La matrice deuient outre cela quelquesfois enflée & tendue par vne quantité de vents qui en accouchant se sont coulez dans la capacité d'icelle, apres que l'enfant en a esté sorty, ou qui s'y estas engendrez par quelque autre cause, y sont demeurez enfermez. Le dessus de la motte & le bas du ventre s'enflent & sont attaquez d'une douleur qui s'estend quelquesfois iusques au diaphragme, & aux aisnes ; le corps estant agité l'on entend quelquesfois vn bruit, & en frappant des doigts sur le ventre il resonne comme vn tambour, & le vent sort manifestement par le col de la matrice.

La matrice est aussi quelquesfois enflée par vne abondance d'eau, ce qui est à dire le vray vne hydropisie vterine. Les signes de l'enfleure sont lors assez remarquables ; mais la pesanteur est plus grande, & le son est comme le bruit d'une eau flot-tante. La cause efficiente de cette hydropisie, aussi bien que celle de l'ascites est le vice du foye ou de la ratte, toutesfois l'eau se fait vn chemin secret & inusité pour passer de la capacité du ventre dans la matrice. Quelquesfois mesme la veine caue distille en ce lieu-là les serositez du sang. Vne certaine femme estant surprise de cette hydropisie, respandoit, au temps de ses purgations menstruales, tout cet amas d'eau, qui luy sortoit de la matrice par le col d'icelle, & remplissoit six ou huit bassins d'une eau citrine tres-chaude, tant que le ventre luy deuenoit tout plat. Aussi-tost apres ses mois venoient selon l'ordre de la nature. Le mois suiuant il s'amassoit derechef vne pareille quantité

d'eau , qui s'escouloit en fuitte au temps ordonné de ses purgations. Enfin cette femme ayant esté bien guerie, deuint grosse, & accoucha d'un enfant plein de vie.

Les Rhagades, les Condylomâtes, & les Hemorrhoides suruiennent au col de la matrice, & à l'emboucheure d'icelle, tout ainsi qu'au fondement. On les remarque par la douleur qu'elles font, ou par le sang qui en sort, & principalement par le frottement du coït; comme aussi, avec l'instrument vterin, qu'on nomme Dioptrisme, si ce n'est qu'elles paroissent en dehors.

CHAPITRE XVI.

Les Symptomes de la Matrice, & les causes d'iceux.

LEs propres symptomes de la Matrice sont, la suppression des mois, l'excez des purgations menstruales, & le flux de la matrice, les fleurs blanches, les deux sortes de gonorrhées, la suffocation, ascension, descente, cheute & conuulsion de la matrice, puis la fureur & douleur vterine; à quoy on peut adiouster aussi la sterilité & l'auortement, avec les autres incommoditez des femmes grosses.

Les purgations menstruales commencent à paroistre, selon l'ordre de la nature à l'age de quatorze ans, & cessent à cinquante. Elles durent à quelques-vnes depuis douze iusques à soixante ans. A plusieurs autres elles commencent plus

tard & cessent plustost. La cause de cela est la diuersité tant de la constitution naturelle, que du regime de viure,, qui fait que les vnes ont leurs purgations plus abondantes, & les autres moindres. C'est pourquoy la plus propre & conuenable reigle des purgations, est celle qui est conforme à la nature & au genre de vie, ce qui se reconnoist par cette seule marque, que quand elles cessent les forces n'en restent pas dauantage accablées ny affoiblies.

La suppression des mois en vn aage meur, sans grossesse, est iugée entierement contre l'ordre de la nature: ne plus ne moins que leur euacuation, laquelle se fait plus rarement que tous les mois, & en beaucoup moindre quantité que ne requiert la condition de la nature, & le regime de viure. De là s'ensuiuent les symptomes de nausée, de degoust, de pesanteur és lombes, és espaules, à la teste, & par tout le corps, & de douleur comme d'une lassitude tenfue: les vrines sont espaisies, troubles, rouges, & le plus souuent noiraistres: en suite dequoy Hippocrate remarque, qu'il se faict enfin des maladies fascheuses & longues. Les causes euidentes & effectrices de ces choses sont, la trop petite quantité du manger & du boire, le travail vehement, la sueur abondante, l'espanchement excessif de sang, ou par les narines, ou par les hemorrhoides, ou la section de la veine, le vomissement ou le cours de ventre immodéré, l'extenuation du corps contractée de quelque maladie que ce soit. Voire mesme les soins, les fascheries & la peur ont souuent supprimé les mois. Quant aux causes internes, les vnes sont és parties principales, ou en tout le corps; les autres sont seulement en la matrice. Es parties principales,

comme au foye , en la ratte , au ventricule, ou és poulmons. S'il s'est contracté en ces lieux là, quelque intemperie froide; ou vne forte obstruction, ou vne dureté scirrheuse, comme en la jaunisse, en la Cachexie, en l'hydropisie, en l'asthme, & en d'autres incommoditez , par le vice desquelles le sang des veines vient à estre alteré , il n'est pas certes possible que les mois ayent leur cours comme il faut, & selon l'ordre que la nature prescrit: non plus que quand le sang est devenu froid , visqueux & grossier par l'usage des alimens grossiers & visqueux , ou pour auoir trop beu d'eau froide, ou bien par vne grande oyfuieté. En la matrice, ce qui empesche la suppression des mois, est le refroidissement, l'obstruction tant simple, que celle qui vient de quelque tumeur , comme de scirrhe, & d'inflammation; comme aussi le renuement de la matrice, & tout ce qui en bousche l'orifice par le dedans, comme du sang caillé, vne excroissance de chair, vne abondance de graisse, & vne pellicule engendrée en cette partie, ou quelque mauuaise cicatrice restée d'un vlcere: ou bien c'est vn vice naturel de la conformation, par lequel j'ay veu vne femme, à laquelle il n'estoit iamais coulé de la matrice ny mois, ny aucune autre chose, & neantmoins a vescu saine & sauue iusques à l'age d'environ soixante ans.

Quant à l'excessive purgation des mois, elle est outre la condition de la nature & de la vie; en icelle le sang sort ou plus abondamment qu'il ne faut, pour la quantité qu'on en a, ou plus long-temps qu'il ne conuient, ou bien recommence à sortir, ou par trop souvent, ou bien hors de saison. La marque que

toute euacuation est trop grande & excessiue , est la debilité & diminution des forces , avec la suite des symptomes qui viennent de la trop grande effusion de sang ; tels que sont, la perte de l'appetit, la crudité, la mauuaise couleur du visage, la tumeur œdemateuse des pieds, puis du reste du corps. Or l'excez de cette euacuation vient de toutes les causes qui eschauffent, subtilient, ou agitent tellement le sang en quelque façon que ce soit, qu'il ouure promptement les bouches des veines , & sort avec tant d'impetuosité, qu'à peine la nature soit assez vigoureuse pour le retenir. Il vient aussi de repletion, laquelle est bien souuent si grande, qu'elle fait non seulement ouurir les bouches des veines, mais en rompt mesme quelquesfois les plus petites, ce qui arriue d'ordinaire à celles ausquelles les mois ayans esté long. temps supprimez, viennent apres à sortir tout à coup & avec impetuosité : & à celles, qui par quelque cause que ce soit, ont auorté d'un vray foetus, ou d'un faux germe. Il se fait encor en suite d'un accouchement laborieux & difficile, quand le foetus est trop grand, ou passe de trauers, ou sort par un effort trop violent, qui fait rompre les veines, ou qui les ouure trop, en sorte que le sang en coule trop abondamment, ne plus ne moins que par quelques autres causes euidentes que ce soit. La trop frequente purgation menstruale, soit qu'elle reuienne deux ou trois fois le mois, procede pareillement des mesmes causes. Car la nature n'en peut reigler ny l'ordre, ny la mesure. Or ces eruptions immoderées se font tout à la fois & à coup, outre lesquelles il se fait aussi quelquesfois vne distillation ou longue fluxion de matrice, par laquelle le sang découle en petite quantité & peu à peu, sans aucune reigle.

quelquesfois pur, quelquesfois fereux & comme de la sanie; & ce tantost par vn flux continué, tantost par petits interuales. La cause de cela est, l'ouuerture de quelque veine, qui est ou seulement rongée, ou vlcérée, quelquesfois au dedans de la matrice, & bien souuent dans le col d'icelle. Quand la veine est rongée simplement, il n'y a point ou fort peu de douleur: mais si elle s'est ouuerte par vn vlcere, la douleur est manifeste & vehemente, laquelle se fait souuent remarquer en y mettant le doigt.

Le flux, qu'on nomme feminin ou vterin, differe de l'escoulement des mois, en ce qu'il sort non du sang pur, mais quelque chose de corrompu, & ce continuellement, ou sans ordre & sans reuolution. Or cette matiere corrompue est tantost liquide & blanchastre, comme du petit lait, ou de l'eau d'orge mondé: tantost iaune ou passe, tellement acre & presque bruslante, qu'elle escorche ou vlcere legerement toutes les parties qui en sont atteintes: & est de plus tâtost infecte & puante, tâtost sans aucune mauuaise odeur. L'odeur, la couleur, & la substance de ce qui coule, démontre quelle est l'espece du flux. Or la cause qui engendre sans cesse cette humeur corrompue, est tantost dans la matrice, tantost és parties principales. C'est pourquoy ceux-là se trompent bien fort, qui veulent que toutes les choses qui sortent de la matrice, ayent leurs causes dans la matrice seulement, aussi bien que toutes les suppressions des purgations menstruales. Car és femmes qui sont de mauuaise habitude, & incommodées de Leucophlegmatie, par vn refroidissement de viscères, ou par quelque obstruction ou dureté scirrheuse, l'humeur corrompue espanchée en diuerses parties, se

iette souvent dans la matrice, & descharge le corps par là; ce qui se fait en quelques-vnes par les urines, ou par les deiections. Ce deffaut est commun à quantité de femmes, & arriuoit particulièrement à celle qui, comme i'ay dit, respandoit par la matrice, tous les mois, les eaux qui la faisoient paroistre hydropique. Et ce mal n'attaque pas seulement celles qui sont aduancées en aage, mais aussi les ieunes filles qui ont les passes couleures, dont ie me souuiens d'en auoir veu vne atteinte dès l'aage de huit ans, laquelle en fut depuis longuement & bien fort incommodée. Cette cause du flux vterin est grandement frequente. L'autre qui se rencontre en la matrice mesme, arriue fort peu souvent, & est ou vne intemperie, le plus souvent froide, ou vne debilité prouenuë de grossesse d'enfant, d'accouchement, de contusion, ou par la violence de quelques autres causes externes: ou bien quelque escorcheure, ou vlceration, restée d'inflammation ou d'abscez. La matrice estant donc offensée par ces causes là, & ne digerant pas comme il faut l'aliment qui luy est propre, fait vn grand amas d'excremens, dont apres elle se descharge. La difference des causes susdites se remarque en ce que, quand le mal vient de la seule matrice, le flux est moins abondant, & ce mal a ses marques particulieres: mais quand il procedé des visceres & de tout le corps, le flux est plus grand, & ne marque point d'estre accompagné de signes qui donnent indication de la mauuaise disposition des visceres.

La Gonorrhée approche du flux vterin, & les femmes y sont aussi bien sujettes que les hommes, & en sont mesme incommodées, à cause que leur seméce éstât plus crüe & plus claire, s'arreste moins.

Or elle coule sans aucune esmotion venerienne, non pas continuellement, ny tous les iours, comme le flux vterin, mais par certains interualles; non du dedans de la matrice, ains des vaisseaux spermatiques dans le col de la matrice; & ce qui sort est blanc, sereux, exempt de toute puanteur & acrimonie, & en fort petite quantité. La cause de cette Gonorrhée est la mesme que de celle qui vient aux hommes. Quant à la Gonorrhée virulente, elle est beaucoup plus frequente que cellecy, & prouient d'impuretez veneriennes, de la mesme façon qu'il a esté cy-deuant déclaré, en traitant de la chaude-pisse des hommes. La matiere de ce flux virulent coule continuellement & sans cesse, de mesme que celle du flux vterin: elle est neantmoins beaucoup plus espaisse, & tantost blâche, tantost iaune ou verdastre, de fascheuse odeur, acre & corrosiue; & partant ne se rencontre gueres sans faire bien-tost quelque vlcere au dedans des parties honteuses. Mais neantmoins ces marques ne suffisent pas pour discerner asseurement ce flux de l'vterin: la principale indication se prend particulierement de ce qu'il ne procede pas de la matrice, comme fait le flux vterin, mais des vaisseaux spermatiques: & qu'il ne s'arreste point quand les mois suruiennent, ains continuë cependant & apres: au lieu que le flux vterin cesse lors que les mois coulent, & ne reuient pas si-tost apres qu'ils sont arrestez. Il paroist mesme aussi des marques d'infection venerienne, sans qu'on apperçoie aucun indice de flux vterin, ny primitif, ny contracté par le defect des visceres.

Au reste, entre les symptomes de la matrice, le plus fascheux est la suffocation. La cause du mal n'estant encore gueres grande, il s'eleue au com-

mencement vne vapeur de la matrice, qui frappe les viscères & le ventricule, & excite vne certaine nausée, en suite de laquelle on ne vomist toutes-fois que bien rarement, mais il s'ensuit vn certain chagrin, & vn dégoût des viandes, & ce quelques-fois avec vn murmure, & vn bruit qui se fait dans le ventre, & quelquesfois sans cela. Quand la vapeur monte iusques au diaphragme, & és parties du thorax, elle rend la respiration courte & frequente, comme si on auoit la poitrine oppressée. Et venant à attaquer aussi le cœur, elle cause quelquesfois vne legere defaillance, de laquelle neantmoins le pouls est à peine changé. La malade est en suite agitée de crainte & de desespoir, & ce bien souuent de telle sorte, qu'elle pense deuoir mourir aussi-tost, sans pouuoir pour quelque chose qu'on luy die se remettre ny consoler. Le mal montant plus haut, attaque le gosier, & semble le serrer comme avec vn lien, ou comme si on le pressoit avec la main, & empeschant entierement la respiration, met la personne en grand danger d'estre suffoquée. Quand cette vapeur est paruenue iusques au ceruau, tantost elle fait ce qu'on appelle fureur vterine, avec caquet, colere & inquietude, ou excite quelques autres sortes de folie, remplies de crainte & d'horreur : tantost elle cause comme vn profond assoupissement, qui fait tomber la personne comme si elle estoit frappée d'apoplexie, & demeurer sans mouuement, sans aucun sentiment, & avec si peu de respiration, que quelquesfois on n'en remarque point du tout, comme si la femme estoit desia morte & passée. Mais neantmoins le pouls ne laisse pas de persister quelquesfois assez fort, quelquesfois obscur & tellement petit qu'on ne le sent pas. Voila les diuers

ordres, & les diuërses formes des accez hysteriques, lesquels reuiennent par certaines reuolutiōs, de mesme que l'epilepsie, aux vnes plus souuent, aux autres plus rarement, iusques à ce que la cause en soit dissipée. Sur la fin de l'accez, il coule des parties honteuses vne certaine humeur, les boyaux murmurent, puis les yeux se leuent, les iouës deuïennent rouges, le iugement, le sentiment & le mouuent reuiennent, & le corps commence à se raffermir. On a toutesfois souuent remarqué qu'il tomboit vn cerraïn froid de la teste, le long du col, sur les espaules & sur les bras, où il causoit vn certain engourdissement & difficulté de mouuement, & faisoit comme vne espee de Paralyfie, mais qui estoit peu apres dissipée. Quant à la cause de l'accez hysterique, c'est vne vapeur qui s'eslève de la matrice, non seulement par les veines, ou par les arteres, mais aussi par des conduits secrets & cachez; laquelle est assurement veneneuse, tellement maligne & pernicieuse, qu'elle infecte les facultez des parties qui en sont atteintes, & en interrompt les fonctions. Si on considere la nature de cette vapeur, on trouuera qu'elle est de la condition de la pluspart des venins, c'est à sçauoir, est froide & melancholique. Le lieu d'où elle sort & qui la foment, est la matrice, dans laquelle le sang menstrual, ou la semence encluse, ou bien quelque autre humeur, venant à se corrompre, acquiert cette qualité maligne & veneneuse. C'est pourquoy, comme on a souuent reconnu que l'epilepsie, es femmes enceintes, prouenoit de la matrice, d'où quelque humeur veneneuse expiroit au cerueau vne vapeur maligne, & que ce mal prenoit fin par l'accouchement; aussi faut-il croire le mesme des symptomes hysteriques. Or ie ne pense

pasque ces symptomes procedent seulement ou du sang menstrual, ou de la semence, veu mesme que celles qui ont bien leurs purgations, & qui sont grosses d'enfant, & qui ont la compagnie des hommes, en sont souuent trauaillées : & que nous en voyons quelquesfois plus de cinq cens dans vn mesme Monastere ; qui ont esté fort long-temps sans aucun exercice de l'acte venerien, qu'elles auoient auparauant practiqué, sans estre atteintes d'aucun symptome hysterique. Quelque humeur que ce soit, estant de cette façon corrompuë dans la matricé, expire des vapeurs de ce genre, dont le venin tient de la nature du lieu d'où elles procedent ; & d'où vient le mal, de là vient aussi le plus mauuais du venin. Cè qui fait qu'encore que les hommes ayent vne longue supression des hemorrhoides, ou qu'ils ayent esté long-temps sans l'usage du coït, ils n'ont pourtant aucuns symptomes semblables aux suffocations des femmes. Toutes les fois que ces symptomes sont grands, ils sont fort aysez à connoistre, & malaisez quand ils sont petits, d'autant qu'ils ne different pas beaucoup des melancholiques ou des cardiaques. Or il les faut discerner par l'observation de toutes les parties qui sont affectées, & par le rapport & conuenance de tous les signes.

Quant à la montée, descente, cheute & conuulsion de la matrice, les femmes en sont souuent trauaillées. L'autorité de Galien m'a autresfois porté à croire que la matrice ne sortoit point ou fort peu de sa place ; mais estant sollicité tantost par les plaintes, tantost par les prieres des femmes incommodées de cette sorte, d'y porter la main, j'ay souuent senty en y touchant qu'elle s'esleuoit vers l'estomach en forme d'vne boule, &

qu'elle l'oppressoit bien fort; & qu'estant plusieurs fois repoussée avec la main, elle retournoit manifestement en sa place. Et veritablement cela ne doit pas sembler plus estrange, que quand on la void descendre si bas qu'elle tombe presque toute. Lors que la matrice monte, les symptomes ne sont pas de mesme que dans la suffocation; mais la femme est seulement oppressée d'une certaine douleur des entrailles, d'une difficulté de respirer, ou de quelque defaillance d'esprit, mais sans apprehension, sans delire, ou autre plus fascheux symptome.

On appelle descente de matrice, quand elle se iette en bas. Les sages femmes qui y prennent garde, la rencontrent à l'entrée des parties honreuses: mais estant assise, ou couchée sur le dos, ou allant à la selle, elle sent un poids qui luy oppresse l'intestin droit: que si elle se couche sur le deuant, il luy vient une difficulté d'urine, de sorte mesme qu'elle apprehende les approches du congrez.

La cheute est plus fascheuse que la descente, d'autant que la matrice se renuerse en sortant dehors, tellement qu'on en void le fonds, & qu'on la manie de grosseur d'un œuf d'oye pour le moins. Quant à la Conuulsion, elle se fait lors que la matrice se iette à costé vers l'une ou l'autre des aines. On sent lors une grande douleur en l'aine, & bien souvent en la hanche, laquelle venant à se rendre plus forte, s'appelle fureur vterine; toute la cuisse & principalement la hanche deuient engourdie & froide. Ces mouuemens si diuers, & ces courses de la matrice arriuent seulement à celles qui ont les ligamens de la matrice trop relaschez, ou par quelque mauuaise & fascheuse

grossesse, ou par quelque coup ou contusion, ou pour estre humectez d'une trop grande abondance d'humeur. Pour la cheute, elle ne prouient pas de causes si legeres, ains seulement d'un trop grand effort fait en accouchant, par lequel la matrice sort avec le fœtus & l'arrierefaix, & se precipite en se renuersant; il arriue aussi quelquesfois que la Sage-femme maladuisée renuerse & attire hors la matrice en tirant le fœtus, ou en arrachant l'arrierefaix. A celles donc qui ont les ligamens trop lasches, la matrice se iette en haut ou en bas, de costé ou d'autre toutes les fois qu'elle vient à estre irritée. Or elle s'irrite, quand elle sent quelque chose fascheuse & contraire qui l'incommode ou au dedans de soy, ou par le dehors: Car estant lors irritée & comme mise en cholere, elle se retire de son lieu propre, & se iette d'un autre costé pour fuir ce qui luy est contraire & ennemy, & suiure ce qui est agreable & doux. Cecy est tellement manifeste au sens, que ie m'estonne fort comment Galien, contre l'aduis de Platon, s'est imaginé que la matrice ne se remuoit point ou si peu que rien, & non encore de soy mesme, ains seulement à cause des ligamens & appendices qui la soustiennent, lors que venans à estre bandez par la plénitude, ils se retirent & deuiennent plus courts. Mais cōbien que la matrice estre çà & là, & se meue de soy-mesme, il ne faut pourtant pas penser que ce soit vn animal. Car le ventricule mesme, qui est aussi vne partie du tout naturelle, se meut pareillement, sans que nous y pensions, & sans que nous le voulions, quand estant incommodé par quelque chose estrangere, il la vomist en se soufleuant: ou bien lors que trauaillé de la faim, il s'aduançe comme tout ioyeux au deuant de la viande qui luy

aggrée, & l'attire de la bouche auant qu'elle soit à
 peine machée, & l'ayant prise la retient si au-
 demment, & l'embrasse si estroittement, qu'il sem-
 ble estre tout retiré pour s'attacher apres. Si ces
 choses se remarquent au ventricule, & beaucoup
 plus au cœur, pourquoy ne s'en fera-il pas de
 mesme en la matrice, laquelle, comme nous sca-
 uons, au commencement de la conception du fœ-
 tus, attire la semence, & retient le fœtus qu'elle a
 conceu, par l'espace de neuf mois, puis estant
 meur & parfait, elle le met dehors, comme si elle
 estoit douée de quelque connoissance.

CHAPITRE XVII.

*Les causes de la sterilité ; les signes de
 la grossesse, ses symptomes
 & leurs causes.*

LA sterilité, aussi bien que beaucoup d'autres
 symptomes, procedé tantost du vice de la ma-
 trice, & des parties honteuses ; tantost de l'indis-
 position des visceres, & ce tant aux hommes com-
 me aux femmes. Car ceux qui ne sont pas en aage
 de puberté, & ceux qui sont desia cassez de vieil-
 lesse, sont steriles & infeconds, à cause que leur se-
 mence est claire, aqueuse & languide : & ceux les-
 quels, quoy que d'aage meur & capable, sont atte-
 nuez de quelque maladie aiguë, ou mesme lente &
 de longue durée, qui corrompt les humeurs, ou
 offense les esprits principaux. De la condition de

ceux-cy approchent ceux pareillement desquels les parties principales, comme l'estomach, le foye, la ratte, & les poulmons, sont affectées de quelque secreté defectuosité, d'intemperie, d'obstruction, ou de scirrhe, sans que le corps & les actions de la vie en soient manifestement intéressées ; & principalement s'il s'en est ensuiuy de la cachexie, ou Leucophlegmatie, ou de la iaunisse, ou de la phthisie & extenuation du corps, ou vne fièvre lente, ou bien quelque autre production de cacochymie. Car les hommes qui ont ces incommoditez, ne font point de semence, ou en ont de mauuaise & infeconde, parce qu'elle n'est pas faite d'une matière propre, ny empreinte de la benignité des esprits. Et les femmes qui sont affectées de cette sorte, ne conçoient point en leur matrice la semence de l'homme, ou l'ayant conceüe la destruisent par le mélange de leur semence propre, & laissent incontinent couler le tout : ou si elles le retiennent, il s'esteint aussi-tost, ou peu apres, estant infecté du vice des parties principales. Ces causes ne font pas seulement la sterilité : mais produisent aussi des moles, des faux germes, des fœtus languides & des auortons, & ce beaucoup plus frequemment, que ne fait l'indisposition particulière de la matrice. Quant aux deffauts des parties honteuses, lesquels contribuent à la sterilité, ceux des hommes sont, la paralyfie & mollesse de la verge, le flux de semence, l'obstruction, resserrissement & contusion des vaisseaux spermaticques : la petitesse, & toute autre mauuaise conformation des testicules, & du membre viril. Les deffauts des femmes sont, les vices des testicules, & des vaisseaux spermaticques, semblables à ceux des hommes : & la trop grande amplitude ou petitesse, l'ob-

struction, obliquité, peruersion de l'orifice & du col de la matrice, & la suppression des mois qui en procede: toutes lesquelles choses n'ont pas besoin de signes qui les fassent remarquer, parce qu'ils sont assez manifestes d'eux-mesmes. La trop grande intemperie de la matrice qui doit recevoir la semence, est aussi cause de sterilité. Cette intemperie est chaude, quand les parties honteuses demangent, & sont chatouillées d'une trop grande esmotion venerienne, comme il arriue à ces femmes hommasses, & que les mois ne coulent gueres, & avec peine, & font vlcere par leur ardeur excessiue. Elle est froide, quand on sent peu d'emotion venerienne, que les mois sont supprimez, ou viennent en fort petite quantité & deschargez de couleur: que l'on a les lombes, le penil, & les cuisses moins sensibles. Et trop humide, lors que le sang menstrual que l'on rend, est clair, aqueux & abondant, & souuent en ce rencontre il suruient vn flux vterin, & l'on sent vne pesanteur frequente des lombes & du penil. Le trop grand restrecissement causé par la graisse de l'omentum, & l'enfleur de la matrice, & finalement toutes les indispositions plus notables, apportent aussi de l'empeschement. Toute femme donc qui estant d'aage meur, n'a aucun de ces deffauts, & est d'une bonne constitution, ayant le corps bien formé, ny trop maigre, ny trop gras, les hanches larges, & le ventre grand, doit estre reputée fecode. Hippocrate a estimé que pour bien connoistre cela, il falloit enveloper la femme, & mettre de la fumée sous elle, & si l'odeur trauerfant par d'as son corps, se porte iusques à la bouche & au nez, qu'elle est fecode, & qu'on la peut croire sterile, quand l'odeur se perdant par le chemin, ne monte pas iusques là. Voire mesme

si l'on met vne teste d'ail-pelé dans le col de la matrice en forme de pessaire, lors que la femme se va coucher pour dormir, & que l'odeur ou le goust passe iusques à la bouche, c'est signe qu'elle est féconde, sinon qu'elle est stérile. Si de plus on met tremper de l'orge dans l'urine de la femme ou de l'homme, & que l'ayant apres semé dans la terre, il vienne à germer dans le dixiesme iour, il marque de la fécondité; & s'il ne germe point, la personne est stérile. Si l'on iette aussi du soulfre vif en de l'urine, & qu'il s'y engendre des vers, c'est fécondité, sinon c'est stérilité. Lors donc qu'il ne s'ensuit point de conception du congrez de l'homme & de la femme, on reconnoistra par ces choses auquel des deux il tient que cela ne se fasse. Neantmoins il arriue souuent qu'ils ne sont stériles ny l'un, ny l'autre, mais c'est qu'ils sont de contraire nature, & qu'en suite de cette antipathie, ils ne peuuent engendrer ensemble, & le peuuent bien avec vn autre. C'est ainsi que deux personnes grandement chaudes, ne s'accommodent pas facilement, non plus que deux froides: & que celles qui sont tempérées esgalement, ou mesme d'une temperature opposée, s'accordent bien pour engendrer. Et partant la femme qui a vn mary comme il faut, & de bonne sorte, laquelle n'a aucun deffaut ny naturel, ny estranger qui la rende stérile, & n'est point trop tardiue à se mettre en humeur, elle est propre & capable pour concevoir.

Or on coniecture que la femme a conceu, si elle descharge la semence avec beaucoup de plaisir, en mesme temps que l'homme descharge la sienne, ou bien incontinent apres. Si ayant receu la semence de l'homme, elle la retient, sans la laisser es-

couler; & que les parties honteuses ne soient point mouillées apres le coït. Ce iour là mesme aussi, la femme frissonne legerement, ou sent que sa matrice se reserre avec vn certain chatoüillement, pour embrasser plus estroittement la semence qu'elle a receüe; ou bien il luy suruient quelque petite douleur au bas du ventre. L'orifice interieur de la matrice se ferme si iuste, qu'on n'y feroit pas entrer le bout d'un poinçon. Puis le ventre deuenant plus gros & plus tendu, cét orifice interieur qui s'aduançoit en forme aucunement longue, s'accourcist & se retire, & remonte de sorte, que la Sage-femme y mettant le doigt, ne le sçauroit atteindre. Les esmotions veneriennes se refroidissent, & la femme estant grosse n'est pas du tout si fort portée à cela. Les purgations menstruales s'arrestent contre leur coustume, & ne reuiennent pas au temps qui leur estoit determiné: car les acetabules de la matrice estans bouschez par les secundines qui s'y attachent, & l'orifice interieur d'icelle estant bien fermé, il ne coule point de sang du dedans de la matrice. Mais à celles qui d'auenture ont quelque escoulement de sang pendant les premiers mois de la grossesse, ou mesme sur les derniers, cela sort des veines qui aboutissent dans le col de la matrice; de mesme qu'à celles qui sont pucelles, sans que le fœtus en recoiue aucune incommodité. Au second mois, combien qu'il coule quelque chose des menstrües, les veines de la poitrine commencent à se remplir, & les mamelles s'enflent & s'endurcissent, d'autant que la nature prouide & soigneuse met en reserue quelque portion de ce sang dans le sein, & es parties superieures. Le fœtus commençant à deuenir

grand, les costez & les lombes s'estendent & s'elargissent, & le ventres'enfle, sans pesanteur manifeste. Il vient lors à certaines femmes des taches iaunes ou liuides au visage, ou des lentilles; ou bié les yeux leur paroissent noirs & battus tout autour, avec vn regard languissant : où il suruient d'autres symptomes, dont nous parlerons cy-apres. Les vrines sont de couleur citriné ou aucunement liuides, espaisées & troubles, lesquelles estans legerement agitées enuoyent des bulles ou de petits grains à la surface; quand elles sont reposées ce qui va au fonds, ou ce qui nage par dessus, est grossier & mal lié, & ne ressemble pas mal à de la laine cordée. Si l'on meste du vin blanc parmy ces vrines, elles deuiennent semblables au broüet des febues bouïllies. Si la femme boit le soir en couchant du melicrat fait avec du miel crud, & de l'eau de pluye, & qu'apres cela luy donne des trenchées, elle est grosse; sinon, elle ne l'est pas. Le dernier indice & le moins trompeur, est lors que le fœtus commence desia à se mouuoir, ce qui arriue pour le plus tard sur le milieu de la grossesse. Or il commence à se mouuoir, non pas comme fait la mole, en façon d'vn fardeau pesant & fascheux, ny comme quelque vent qui bruit & court çà & là, mais par vn treffaillement doux, benin & ordonné, ou comme vne mousche qui vole, ce que l'on sent facilement en y appliquant la main vn peu chaudement. Quand les mois s'arrestent, sans que l'on voye les signes que nous venons de marquer, & que le ventre s'enfle desmesurément sans estre atteint d'hydropisie, il y a dans la matrice quelque chose qui est contre l'ordre de la nature, ou quelque faux germe, ou vne mole, ou vne enflure.

Pour ſçauoir ſi l'enfant qui eſt dans la matrice eſt maſle ou femelle, il faut prendre garde à cecy, que la femme eſtant groſſe d'un garçon, a le teint viſ & le viſage gay : & quand c'eſt vne fille, elle a la couleur mauuiſe, & l'humeur triſte. Les garçons ſe portent plus vers le coſté droit de la matrice, & les filles vers le coſté gauché. Et quand c'eſt vn garçon, la mammelle droite eſt plus groſſe & plus enflée, & le bout d'icelle deuient noire, ferme & droict, & rend le laiët pluſtoſt que l'autre.

La femme groſſe ſe leuant de ſon ſiege pour marcher, porte le pied droict le premier. Et pour lors toutes les veines & toutes les arteres du coſté droict ſont plus pleines & plus groſſes que celles du coſté gauche, & particulierement ſous la langue : & le pouls eſt plus plein, plus grand & plus fort au bras droict qu'à l'autre. Mais quand c'eſt vne fille, tout eſt plus ferme & plus apparant du coſté gauche, & les bouts des mammelles ſont plus flasques. Voire meſme ſi le laiët qui en ſort eſt ietté dans de l'eau froide, il ſe diſſipe incontinent, à cauſe qu'il eſt clair & liquide : au lieu qu'il demeure lié, & ſe tient plus long-temps ſur l'eau, ſi l'enfant eſt maſle.

La femme qui a conceu bien à propos, vn fœtus plein de vie, ſe portant bien d'ailleurs, ne reſſent point de facherie, ny d'incômodité pendant toute ſa groſſeſſe : d'autant que la nature diſpoſe legitiment chaque choſe à des vſages conuenables. Mais ſi elle eſt maladiue, elle ſent ſur le ſecond ou troiſieſme mois, lors que les purgations menſtruales ont eſté deſia depuis long-temps ſupprimées, & que ce ſang n'eſt point encores employé

pour la nourriture du fœtus , des attaques de la maladie à laquelle elle est plus sujette ; & tout ce qu'il y a de mal dans le corps , se descouvre en ce temps-là : de même qu'il arriue aussi aux femmes qui ne sont pas enceintes , lors qu'elles sont sur le point d'auoir leurs purgations. Quant à celle qui est incommodée ou de cacochymie , ou de repletion, elle sent des lassitudes comme si elle auoit le corps rompu, les lombes, les aines, les hanches s'appesantissent & luy font mal : & deuient quelques-fois fort assoupie. Apres cela s'ensuiuent le dégoust des viandes, la perte de l'appetit, la nausée, & parfois le vomissement tantost pituiteux, tantost bilieux, selon l'humeur superflue qui abonde dans les entrailles. Celles qui ne vomissent pas cette humeur ainsi amassée, ont des difficultez de respirer, des tournoiements de teste, des défaillances de cœur, & des anxietez d'esprit. Et quand ces humeurs s'attachent aux tuniques de l'estomach, elles sont trauaillées vers le quatre ou cinquiesme mois de Pie, & de malacie, & ont des appetits deprauéz de manger des choses estranges, comme de la terre, des morceaux de tuille, des charbons, des saulées salées & vinaigrées.

Quant à l'auortement, les causes en sont ou euidentes, ou interieures. De celles qui sont euidentes, les vnes estouffent le fœtus, comme la syncope, la peur, & la tristesse; & les choses qui de leur nature sont contraires à la vie, comme celles qui sont veneneuses par leur fumée, par leur odeur, ou par leur substance. Les autres luy ostent l'aliment, comme le ieüne, la purgation immodérée, l'euacuation du sang par le nez, ou par les hemorrhoides, ou par ailleurs. Car la femme accouche auant terme, quand elle fait perte de son

sang, & ce plustost si le fœtus est desia grandelet. Les autres dissoluent les acetabules de la matrice, par où le fœtus prenoit nourriture; comme l'exercice violent, la dance, le trot du cheual, ou le brâsse du carosse, la charge de quelque fardeau difficile à porter, la secousse d'une cheute vehemente, ou la contusion d'un coup receu au ventre, à l'endroit de la matrice. Pour les causes interieures, ce sont le trop manger, & la repletion qui suffoque ou estouffe le fœtus: une humeur visqueuse qui remplisse les acetabules, & qui ramollisse & dissolue les ligamens, de sorte qu'ils ne puisse plus soustenir le fœtus: les viandes qui sont d'une mauuaise nourriture, & la cacochymie qui en prouient, en suite de laquelle le fœtus estant destitué de la benignité de l'aliment, va peu à peu languissant, & se meurt. Les maladies aiguës, qui mettent souuent le fœtus en plus grand danger que la mere: Puis les mauuaises affections tant des parties principales, que de la matrice, lesquelles ont esté cy-deûsus rapportées. Toute femme donc qui a de coustume d'auoir de mauuaises couches, sans qu'il se rencontre aucune cause euidente, est trauaillée de quelque mal ou de tout le corps, ou de la matrice seule. Au reste, par l'auortement le fœtus sort auant que d'estre meür, tantost vif, tantost mort & estouffé. Il sort vif quand les acetabules sont dissous par quelque violence; & mort, quand le fœtus perist, quoy que les acetabules soient fermes & entiers. Les marques de l'auortement futur sont, l'escoulement du lait & que les mammelles rendent d'elles-mesmes, particulierement de celuy qui est est aqueux: Car cela, dit Hippocrate, tesmoigne que le fœtus est debile. L'extenuation des

mammelles qui s'abattent d'elles-mesmes : Car à celle qui est grosse de deux enfans, si la mamelle droicte diminuë, elle perdra le masle; si c'est la gauche, elle perdra la femelle. Le restrecissement des costez, & de la partie superieure du ventre. La pesanteur & paresse à se mouuoir des lombes & des cuisses. Si le fœtus a desia commencé à se mouuoir, le mouuement deuient plus rare & plus foible; & sur le poinct que l'auortement se doit faire, il coule premierement vne eau rougeastre, semblable à des laueures de chair cruë; puis meslée de sang, en suite le sang pur, apres cela des grumeaux, & finalement le fœtus sort, ou formé, ou sans forme. Mais quand le fœtus estant desia mort, demeure encor long-temps dans la matrice, tous les symptomes cy dessus marquez se renforcent, avec des mordications d'estomach, des douleurs de la teste & des yeux, de frequents frissons de fièvre; l'haleine deuient forte & puante, le ventre pesant, & qui tombe presque, & en y portant la main, on le sent refroidy; comme aussi le col de la matrice, que la Sage-femme trouue froid, quand elle y fourre les doigts: quelquesfois il survient des conuulsions qui approchent des accèz epileptiques.

La difficulté de l'accouchement vient ou de la mere, ou de l'enfant. Ce qui empesche de la part de la mere, c'est la mauuaise conformation, la petitesse de la taille racourcie, la debilité des forces du corps, comme en vne trop ieune, ou en vne trop vieille, la pusillanimité & la crainte: quand la matrice & le col d'icelle sont mal formez, que le passage est trop estroit, que l'os pubis est trop ferme, qu'il se fait vne compression ou restrecissement

par quelque tumeur & dureté des parties voisines, par vne pierre qui se rencontre en la vessie, par vn excrement endurcy dans l'intestin droict, & que les lombes sont trop larges. Les empeschemens de la part de l'enfant sont, quand la membrane qui l'enveloppe est trop forte & difficile à rompre; quand l'enfant est trop foible, & qu'il ne fait aucun effort pour aider à la mere: quand il est trop grand, ou monstrueux, ou accôpagné d'vn gêmeau, ou bien quand il ne presente pas la teste la premiere, ny les mains serrées contre les costez, mais aduance premierement ou les deux pieds, ou l'vn des pieds seulement, ce qui donne beaucoup plus de peine, ou passe les mains deuant, ou se redouble & montre le cul le premier, ou se met de trauers, ou presente le ventre, qui est la plus mauuaise disposition de toutes les autres, pour sortir. Les signes presents que l'accouchement va estre difficile, sont quand l'humeur qui estoit renfermée dans la membrane allantoïde s'escoule toute deuant que d'accoucher, ou qu'il se vuide beaucoup de sang fort long temps deuant que le foetus sorte: car le passage demeure sec & priué de l'humeur qui le rend plus glissant, & plus facile pour la sortie de l'enfant: les douleurs retournent par des interualles plus longs, d'autant que les acetabules ont plus de peine à se rompre, & que l'arriere faix ne se separe pas aysement de la matrice,

CHAPITRE XVIII.

Les differences des Gouttes, leurs causes & leurs signes.

LA Goutte est vne douleur des ioinctures, qui surprend ordinairement par certains intervalles. Les mēbres du corps sont attaquez de diuerses douleurs: car les vnes se font és membranes des os, ou és muscles, ou és nerfs, ou és parties du milieu, comme celles qui viennent ou de verole, ou de simple defluxion. Les autres se font seulement és ioinctures, où elles se tiennent comme attachées, & ce sont celles-cy seules qui composent la Goutte. Quant aux differences de la goutte, elles se prennent du nombre des ioinctures: mais on n'a coustume d'en nommer que trois, qui sont la Chiragre, la Sciatique, & la Podagre. Toutes celles qui se rencontrent és autres ioinctures s'appellent du nom general de Goutte simplement.

La Chiragre se prend aux mains, ou vers le dedans du poignet, ou en dehors, ou és ioinctures & ligamens des doigts. La douleur est par-fois accompagnée de battement, & bien souvent avec de la tumeur, de la rougeur, & de la chaleur, & les veines paroissent pleines & enflées. La Podagre attaque ou les cheuilles des pieds, ou le dessus d'iceux, & principalement la ioincture du gros orteil. Il s'y fait de la tumeur, comme en la Chiragre, avec rougeur, chaleur & douleur pulsative,

tant de la partie que des veines qui sont au cou.
 La Sciatique, qui est la plus fâcheuse de toutes, est
 située, non point dans cet article où la teste de la
 cuisse est emboissée dans la hanche, mais plus avant
 vers l'extremité de la fesse, par où les nerfs qui
 sortent des lombes & de l'os sacré, passent dans les
 cuisses. La douleur en est cruelle, non seulement
 dans la hanche, mais aussi dans la cuisse, & dans
 la jambe, & s'estend iusques au bout du pied, sça-
 uoir est, par tout où va le nerf, qui part de la han-
 che. On n'y remarque gueres de tumeur manife-
 ste, & encore moins de chaleur, ou de rougeur, à
 cause que le dessus de la chair qui est en cette par-
 tie, n'est point parsemée de veines. La goutte de
 l'espaule fait beaucoup de douleur, & neantmoins
 il n'y paroist ny tumeur, ny rougeur, ny chaleur,
 non plus qu'en la sciatique. Mais celle qui vient
 aux coudés & aux genoux, est accompagnée de
 beaucoup de douleur & de tumeur, & a fort peu
 de rougeur & de chaleur.

La cause prochaine & conioincte de toutes les
 sortes de gouttes & douleurs des ioinctures, n'est
 point aucune intemperie simple; mais vne certai-
 ne humeur fichée & attachée en ces parties là con-
 tre l'ordre naturel, laquelle se rend bien souuent
 apparente par vne tumeur manifeste. Et cōbien que
 quelquesfois on en sente la douleur, sans aucune
 remarquable tumeur, comme il arriue à ceux qui
 ne font que commencer d'auoir les gouttes, il ne
 laisse pas neantmoins d'y auoir quelque peu d'hu-
 meur subtile. Or cette humeur, qui est la cause
 conioincte de ces douleurs, ne penetre iamais, ou
 fort rarement dans le creux ou espace qui est entre
 les extremitez des os, ce que j'assure volontiers
 contre la pensée de plusieurs autres, mais dans les

seuls ligamens, & dans les membranes qui lient & environnent par le dehors les extremités des os, & mesme dans les tendons qui se rencontrent là : ce qui se reconnoist manifestement, parce qu'en la podagre & en la chiragre noüée, l'humeur qui s'est desia conuertie en pierre, se tire bien souuent par l'ouuerture ou rupture de la peau, hors des ioinctures des doigts, sans que le ligament en soit interessé ny offensé. Et en la sciatique, si l'humeur nuisible estoit enfermée dans la boïste de l'Ischion, elle ne feroit pas vne douleur, ny si vehemente, ny qui se portast si loing, à cause que le ligament n'est pas beaucoup sensible. Au reste, cette humeur qui sert de cause coniointe à la goutte, n'est pas si diuerse, comme l'on dit : car elle n'est aucunement ny sanguine, ny bilieuse, ny melancholique, mais ou toute pituiteuse, ou toute sereuse : & c'est mal à propos que l'on establisse ordinairement les differences de la goutte par le genre des humeurs : en sorte que l'une soit chaude, & l'autre froide : car toutes les gouttes sont froides, & procedent d'humeur froide. Que s'il paroist quelquesfois de la rougeur, ou de la chaleur, principalement en la Chiragre, ou en la Podagre, cela ne vient pas de l'essence de la maladie, mais de la force de la douleur, qui cause la rougeur & la chaleur, & quelquesfois la fièvre ; ce qui arriue principalement à ceux qui sont d'une constitution grandement chaude & plethorique, & que la fièvre saisit à la moindre occasion. C'est donc cette humeur froide & subtile, laquelle venant à remplir, enfler, ou blesser les ligamens, les membranes, ou les tendons des ioinctures, cause la douleur de la goutte ; & si le corps y est desia préparé, cette douleur produit la rougeur, la chaleur & la fièvre, qui

sont les symptomes de l'humeur qui incommode en faisant bander, ou en blessant les parties. Cette opiniõ de la cause cõjointe de la goutte est appuyée sur le raisonnement & confirmée par l'usage de l'art.

Quant à la cause antecedente, tous conviennent bien que c'est vne humeur qui tombe d'ailleurs, ou doit tomber, sur les ioinctures debilitées: mais personne n'a, ce semble, encore trouué precisément d'où elle vient, & par où elle passe. Cette ignorance a fait que la goutte a esté iusques à present tenuë pour incurable, & qu'on la nomme la honte des Medecins. A n'en point mentir ceux-là se trompent, qui pensent que cette humeur vienne des parties internes pour se ietter sur les ioinctures. Car comment se peut-il faire que quelque humeur sorte des visceres, & des parties plus enfoncées, & passe toute pure par les veines? ou que celle qui estoit n'agueres meslée dans la masse du sang, coule de là sans meslange par les orifices des veines sur les ioinctures? ou s'il passe aussi du sang avec cette humeur, pourquoy estant amassé dans la ioincture, n'y fait-il point de phlegmon? mesme les humeurs cruës qui sont portées de là sur les ioinctures par d'autres conduits que par les veines, ne font la goutte: car la crudité qui vient de cachexie, & qui part des visceres, pour se ietter sur les pieds, n'y cause point la Podagre. Il faut donc que l'origine de la goutte soit ailleurs, que dans les parties internes. Or elle se trouue en la teste, d'où certainement il coule vne humeur pituiteuse & subtile qui tombe sur les ioinctures; laquelle toutesfois ne viët pas du cerueau, ny des ventricules internes d'icelui, où ils s'amasse d'ordinaire vn excrement pituiteux: car cet excrement tõe ou dehors par le nez, ou par le palais de la bouche dás la trachée

artere, & sur les poulmons, ou bien dans l'estomach & sur les parties internes: mais elle vient des parties externes de la teste, & du dessus du crane, où est la vraye source de la goutte, & d'où l'humeur superfluë coule en bas & passe entre cuir & chair. Car il se rencontre là vne grande quantité de veines qui partent des iugulaires externes, lesquelles s'y deschargent de leurs excremens subtils & se-reux. Et dautant que la peau de la teste, sur laquelle croissent les cheueux, est grosse & espaisse, l'humeur qui est dessous ne transpire pas facilement, comme elle fait par l'autre peau qui est au reste du corps. Il s'en amasse donc avec le temps vne grande abondance, particulièrement en ceux lesquels y sont disposez par les causes euidentes que nous deduirons tantost. Les signes qui montrent que l'humeur est desia accumulée, sont vne pesanteur de teste & vn assoupissement, vne douleur externe, qui s'augmente quand on la presse, & sur tout lors qu'on renuerse les cheueux; vne tumeur œdemateuse, quelquesfois molle comme de la cire, laquelle se fait sous la peau principalement vers le derriere de la teste; & la peau paroist espaisse & esloigné e du crane. C'est donc cette grosse & mollasse congestion d'humeur, qui est la source & l'origine de la goutte. L'humeur s'estant ainsi excessiuelement amaisée, s'escoule de sa place à la moindre occasion, ou de chaud, ou de froid, ou de friction, & quelquesfois de soy-mesme, & tombe sur les parties qui sont au dessous. Et cette humeur estant claire & sereuse comme de l'eau, & semblable aux roupies qui coulent du cerueau par le nez quand il fait froid, coule sur les parties externes du corps, non par la mouëlle de l'espine, car elle feroit

de la Paralyfie , non par les nerfs & par les muscles, mais bien par sous la peau , où les passages sont plus faciles & plus amples. Or comme elle est subtile , en coulant elle ne s'arreste & ne demeure que sur les ioinctures, lesquelles sont compactes & espaisſes , & non és parties du milieu qui sont amples & lâches. Finalement elle prend son cours du costé particulierement sur lequel on est plus souuent couché ; tellement que quand l'humeur est excitée, si l'on se couche sur le costé droit, la douleur saisit l'espaule droite, ou le bras droit; si sur le gauche, le gauche: si sur le dos, le col, les espaulles, les hanches ou les cuisses. Ceux qui commencent d'estre atteints de la goutte, sentent d'ordinaire premierement vne legere Chiragre ou Podagre , dont à peine croiroit-on que l'humeur vint de la teste, si l'experience n'en faisoit foy , ou que de là elle peust si tost couler secrettement & insensiblement iusques au bout des pieds; mais parce qu'elle est au commencement subtile, & en ceux principalement qui habitent en des pays chauds, la defluxion de cette humeur est facile & soudaine. Or quand par laps de temps elle est desia aucunement espaisſe; sur tout és pays froids, & en ceux qui sont aagez, elle ne prouient pas d'abord iusques aux extremittez , mais elle s'arreste à my-chemin : & lors on remarque aysément tant l'origine du mal, que le cours de l'humeur : car on sent vne douleur qui peu à peu descend du col, ou par les espaulles sur les coudes & sur les mains : ou bien par le dos, sur les hanches, sur les genoux, & sur les pieds : & cependant quelquesfois on sent vn froid, qui fait frissonner tout le corps. La douleur coule souuent de haut en bas: mais elle ne re-

monte iamais, & ne passe point du costé droit au costé gauche, ny du gauche au droit : car s'il suruient de la douleur au costé gauche apres en auoir senty de l'autre costé, cela ne vient pas de ce que la douleur ait changé de place, mais d'une nouvelle defluxion. De plus, lors que toute cette humeur coule, elle est aucunement subtile, autrement elle ne couleroit pas : mais estant desia arrestée sur la ioincture, elle s'épaissist par la force de nostre chaleur, & des medicamenstrop forts, & le plus subtil estant dissipé, il demeure vne certaine feculence terrestre, laquelle s'augmentant par les fluxions reïterées, compose vn nœud manifeste, & vne pierre dans les doigts, & particulièrement en leurs ioinctures. C'est là la goutte nouée, laquelle fait entr'ouuir les ioinctures, tordre & courber les doigts avec perte de leur mouuement.

Pour ce qui est des causes euidentes de la goutte, ce sont les mesmes que celles de la fluxion : sçauoir est la redondance de l'humeur qui s'amasse en la teste, pour l'une, & pour l'autre, la debilité des ioinctures. Aucune de ces deux ne fait separément la goutte, mais il faut qu'elles se rencontrent ensemble. La debilité doit estre considerée, tant par quelques autres deffauts, que principalement par la lascheté des ligamens & des membranes, & par l'amplitude des passages. Or ces deffauts viennent ou de naissance, par l'imbecillité de la semence des parens, & lors la goutte est hereditaire : ou de quelques causes euidentes, qui relaschent & ramollissent, & qui blessent les membranes : comme l'usage trop frequent de Venus & des bains, & les choses qui froissent les ioinctures par vn rencontre extérieur. Quant aux causes internes de la redondan-

ce de l'humeur, ce sont, la debilité du cerueau, & de toute la teste, & leur intemperie froide & humide. Car l'humeur qui se porte à la teste, comme pour luy seruir d'aliment, ne se peut tout digerer, quand ces deffauts s'y rencontrent, & faut qu'en suite avec le temps il s'en fasse & amasse beaucoup d'excrement. Or cette matiere de fluxion viendra à se multiplier, si outre cela il se fait vn rencontre de causes euidentes qui contribuent à son augmentation; comme sont principalement le trop manger, le trop boire, & sur tout l'excez du vin, car cela remplit la teste & blesse les nerfs & les membranes; le trop dormir, particulièrement aussi-tost apres le repas: l'oyfuieté, l'intermission des exercices, la suppression ou diminution des euacuations ordinaires, & sur tout de celles qui se font par les vrines & par les sueurs.

CHAPITRE XIX.

De la Ladrerie.

LA Ladrerie est vne maladie veneneuse dans vne substance terrestre, laquelle peruertist la nature de tout le corps. Lors que l'humeur terrestre & melancholique vient à contracter quelque qualité veneneuse, elle la communique aussi-tost tant aux viscères, qu'à tout le reste des parties, lesquelles estans infectées, engendrent vn suc terrestre & melancholique, meisme des plus purs alimens qui participe de ce venin; duquel les parties estans imbuës & nourries, elles acquierēt avec le tēps vne semblable nature, & la ladrerie s'y forme cōme vne maladie de toute la substance. Et cela n'attaque

pas seulement la peau, ny la surface du corps, comme plusieurs ont pensé, mais aussi le plus profond des parties, & les os mesmes, d'autant que tout cela est farcy de cette impureté. Or combien que ce mal soit espandu par tout le corps, neantmoins sa principale force reside au foye & en la ratte, d'où il disperse puis apres ses vices par tout le corps.

Les vns sont ladres de naissance: les autres le deuiennent par contagion: les autres contractent cela d'eux-mesmes, & par leur propre indisposition. Ceux-là sont ladres de naissance, lesquels ont esté engendrez d'une semence infectée de ladrerie; & si le pere ou la mere estoient ladres lors qu'ils ont engendré, l'enfant qu'ils feront sera pareillement ladre; tant est grande l'energie de cette diuine faculté procreatrice, laquelle se rencontrant dans vne semence intemperée, & du tout impure, ne laisse pas d'en former toutes les parties du corps, quoy que la matrice soit mauuaise. Si les parens n'estoient pas encore ladres quand ils ont engendré, mais y auoient seulement de la disposition, l'enfant deuiendra ladre au mesme aage que ses parens le sont deuenus. Quelques-vns ont mesme escrit, que la femme qui conçoit sur le poinct qu'elle doit auoir ses mois, ou bien quand elle les a, fait vn enfant sujet à la ladrerie. Par contagion ce mal se communique, ou en couchant avec quelqu'un qui soit ladre, ou en se tenant pres de luy, ou en conuersant d'ordinaire avec luy, parce qu'il sort de la personne infectée vne certaine qualité pernicieuse, laquelle passe avec l'heumeur dans le corps de l'autre, & se glisse peu à peu dans toutes les parties.

Il se contracte aussi par le propre vice du corps;

lors qu'il abonde grandement en bile noire, laquelle acquiert peu à peu, & par laps de temps vne condition veneneuse. Car nous auons fait voir ailleurs qu'il se peut engendrer de soy-mesme en nous quelque espee de venin. Or cette humeur abonde quand le sang, ou la melancholie, ou la bile iaune sont desmesurément bruslez. C'est pourquoy cette maladie attaque d'ordinaire les personnes, ou qui n'ont pas leurs mois, ou qui ont des varices, ou qui ont eu long-temps les hemorrhoides; ceux qui yiuent de chair de bœuf, de cerf, ou d'asne, & d'autres viandes gluantes & grossieres: & enfin ceux qui ont amassé beaucoup de bile iaune, par vne intemperie chaude du foye, ou par vn regime de viure trop eschauffant, laquelle ayant esté long-temps retenue ait degeneré en bile noire. Et ces deffauts ne se rencontrans qu'en des personnes d'aage constant, ou mesme declinant, les enfans ny les adolefcens ne sont pas subiets d'eux-mesmes à deuenir ladres.

Au commencement de cette maladie, la viuacité du teint se perd, la peau paroist decolorée, & tire aux vns sur le noir, aux autres sur le iaune, & à d'autres sur le blanc; à raison dequoy quelques vns ont estably trois differences de ladrerie, seloncette diuersité de couleurs: en suite de cela le cuir deuiant plus espais, plus dur & plus rude, sçauoir est lors qu'il est desia remply de beaucoup d'humeur. Ce qui se remarque principalement au visage, ou aux mains, ou aux pieds, d'autant que la nature pousse tant qu'elle peut ce qui luy est nuisible vers les extremittez du corps. Le sentiment se diminue en ces parties-là, lesquelles sont tousiours froides, & particulièrement les pieds. Car bien qu'au commencement, le mouuement ne se perde

pas, ils'y trouue neantmoins de l'estourdissement & de la froideur. Il s'esleue lors quantité de verrues non seulement aux mains, mais au visage mesme, & par tout le corps, & principalement sous la langue, à la racine de laquelle il s'en void de toutes particulieres. Les pieds, les mains & le visage s'enflent, avec diuers tubercules qui y boutonnent; & surtout és iouës, où il s'esleue quantité de bourgeons liuides: les levres se renuersent, le nez s'aplatist & se bousche par l'espaisissement de ses ailles, & les narines se creuassent & s'enduisent de croustes noires & sanglantes, qui tombent apres delà: le blanc des yeux deuient faune, & se couure d'une merueilleuse espaisseur, comme en forme d'ongle: les sourcils se rendent fort durs & presque calleux, & mesme se pelent: car le poil estant imbu d'une qualité veneneuse, tombe de là, aussi bien que des paupieres & du menton, tellement qu'en fin toutes les parties deuiennent horriblement difformes. Les doigts des mains & des pieds s'entr'ouurent & creuassent de seicheresse; & les ongles se fendent & se rompent. La peau de tout le corps se desseiche pareillement, & se couure d'une galle vilaine & seiche, laquelle est quelquesfois accompagnée de demangeaison. La chair des muscles se consomme & liquefie peu à peu. Or quand le mal vient à s'augmenter, au lieu que la peau n'estoit qu'estourdie; elle perd du tout le sentiment, sans perdre neantmoins le mouuement, de sorte qu'en y fichant vne espingle, on n'en sent point de douleur, non plus que quand on y verse de l'eau chaude: la voix s'enrouë dans le gosier, la respiration deuient plus difficile, l'exhalaison de l'haleine & de tout le corps sent mauuais, il

vient des vlcères sordides & virulens aux mains, aux pieds, & en beaucoup d'autres endroits, & tout est entaché d'une fâcheuse pourriture. Quant aux marques qui se prennent ordinairement ou du sang, ou des urines, elles sont entièrement incertaines & trompeuses. Or la ladrerie est d'autant plus cruelle, que les signes qui en paroissent sont mauvais; & sur tout lors qu'ils sont fortement attachez, non seulement en la surface du corps, mais dans les viscères mesmes, dâs les os, & dâs les autres parties internes. Neantmoins tous ces signes ne se rencontrent pas en tous les malades, mais les vns paroissent d'ordinaire aux vns, & les autres aux autres.

CHAPITRE XX.

De la Verole.

LA Verole est un mal contagieux, qui sort & s'esleue souvent en diuers endroits, avec vlcere, ou douleur fort grande. La cause qui la produit est une qualité maligne, & un venin pernicieux, qui infecte quelque partie du corps que ce soit, à laquelle il s'attache premierement, & de là se respand partout le corps, & procedant de peu & comme d'une estincelle, va croissant & gagnant peu à peu, tant qu'elle ayt atteint & infecté non seulement les esprits & les humeurs, mais aussi la chair & toutes les parties solides, dôt elle ne peruertit pas seulement le temperamēt, mais aussi toute la substance, de sorte qu'à peine y en a-il aucune qui iouisse puis apres

d'un aliment bon & pur. Il se fait en suite de cela un grand amas d'excremens, & en resulte diverses sortes de vices, tels que ie diray tantost. Au reste cette qualité n'est pas simple & solitaire, ains se rencontre dans les humeurs dont elle se sert comme de sujet & de vehicule. Et celuy qui en est desia entaché, n'en infecte point les autres par son haleine seule, mais par quelque liqueur qu'il respand de soy sur vne partie du corps d'autrui, laquelle soit desnuée de l'epiderme, d'où le mal prend tout son commencement. Et partant la verole est vne maladie contagieuse, laquelle ne s'engendre pas de soy-mesme, & par le vice interne du corps, ains se prend par le seul attouchement: car celle que quelques-uns apportent du ventre de leur mere, est auparauant prouenuë par la contagion des Parens. Or elle se contracte principalement par l'acte venerien, d'où aussi elle a prins le nom de maladie venerienne: c'est par le frequent exercice d'iceluy qu'elle se va semant parmy les hommes, & que par l'impureté & infection d'un seul eile s'est peu à peu respandue par tout le monde, comme un miserable supplice des paillards. Ce mal commence le plus souuent par les parties honteuses, combien qu'il se produise aussi quelquesfois en plusieurs autres endroits où le venin aura esté contagieusement espanché. Or cette communication se fait ou à quelqu'un qui ne l'auoit pas, par un qui en est entaché, ou bien à un qui l'auoit desia par quelque autre qui en est beaucoup plus gasté: & ne se prend iamais d'un qui est esgalement verolé, ou qui ne l'est pas tant. Ceux qui sont en mesme degré de cette maladie, peuvent coucher ensemble sans danger, & neant-

moins tous les deux la peuuent donner par le congrez à d'autres moins malades. On gaigne aussi quelquesfois cela en couchant avec vne Garle qui n'est pas encore gastée, quand on affaire à elle incontinent apres quelque verolé. L'impureté ne se reconnoist pas sur le cuir, d'autant que le mal estant bien souuent fort inueteré, cache & couue son leuain au dedans. Voila pour ce qui est des causes & de l'origine de la verole.

Quant à ses differences & à ses especes, quelques-vns s'arrestans plus aux symptomes, qu'à l'essence, en ont estably plusieurs & diuerses sortes. Elles n'ont toutes neantmoins qu'une seule & mesme essence, mais distinguée en diuers ordres & degrez, ellement que l'une est moins grande, & l'autre plus forte. Les corps où elle se rencontre ont pareillement vne grande variété: & en suite de ces deux causes, il arrive que l'une produit des symptomes plus legers, & l'autre en a de plus facheux. La moindre espece de toutes est celle qui fait seulement tomber peu à peu les cheveux & la barbe, sans que le corps en recoiue aucun autre dommage: d'autant que son venin consiste en vne certaine vapeur subtile, laquelle se iette vers la surface du corps à racine du poil: & cette espece differe des autres, comme la fièvre Ephemere differe de la putride. L'autre est vn peu plus mauuaise, en laquelle tout le cuir deuient moucheté de force macules: qui ne sont point esleuées, & qui ne sont pas plus grosses que des lentilles, tantost rouges, tantost iaunes, lesquelles ne se peuuant effacer ny esteindre, que la racine du mal ne soit arraché. Le venin de cette-cy est dans vn sang fort subtil, qui ne fait point d'autres symptomes fas-

cheux. La troisieme espece est plus mauuaise, & commence d'estre vraye verole : elle pousse premierement des pustules rouges ou jaunes, autour du front, aux temples & derriere les oreilles; puis il en vient à la teste, & mesme par tout le corps, qui sont rondes, seiches & sans pus, sur lesquelles il se fait vne crouste seiche; & si on les neglige, elles s'estendent tout autour, & creusent la peau, tant que de pustules elles passent en vrayes vlcères, qui sont d'ordinaire virulents & sordides. Les parties qui sont vers le fondement, vers les narines & au fonds de la bouche, estans plus tendres se trouuent ordinairement vlcérées toutes les premieres. Or ces accidens se produisent lors que le foye & la masse du sang & des humeurs viennent à estre infectez, en suite dequoy les parties charnuës & molles sont aussi tost endommagées. Apres cela succede la quatrieme espece, quand le mal gagnant plus auant, attaque les parties solides, les os, les ligamens, les membranes & les nerfs. Ces parties là estans desia vitiées, il s'y amasse par congestion quantité d'excremens, grossiers & visqueux selon la condition de la partie, mais qui ont neantmoins de la malignité, lesquels se iettent quelques-fois sur les tendons, & le plus souuent entre les os & les membranes periostes. Lors que ces excremens separent la membrane d'auec l'os, ou qu'ils la blessent par leur acrimonie maligne, ils font des douleurs implacables, lesquelles s'augmentent ordinairement la nuict. Ces excremens estans puis apres coagulés & endurcis, il s'en forme des nœuds fort durs, qui causent beaucoup plus de mal : & ces nœuds venans à s'attacher à l'os, l'amplifient, l'estendent, & mesme le rongent, de sorte qu'on le

void

void souuent prendre vne figure monstrueuse. En fin le corps estant attenué de veilles & de douleurs cruelles, tombe en atrophie, & la vie s'en separe.

Ces douleurs sont fort differentes de celles des gouttes, d'autant que celles des gouttes viennent promptement & en peu de temps, & ce de quelque defluxion, qui tombe soudainement sur les ioinctures : mais les douleurs de la verole viennent peu à peu, & par vne grande longueur de temps, & procedent des excremens qui se sont amassez à la longue, dans la partie mal affectée. De plus, la goutte est ou dans la ioincture, ou autour d'icelle, & demeure fixe, & les douleurs de la verole n'attaquent pas les ioinctures, mais le milieu des membres, où il se fait aussi bien souuent des nœuds, & principalement au front & à la teste, aux clavicules, au milieu de l'os de l'espaule, au milieu du rayon du coude, au deuant de la iambe, & quelquesfois mesmes dans les autres os. On peut donc par ces signes là discerner & reconnoistre chaque espee de verole. Or quand l'incertitude des signes fait douter de la verole, il en faut rechercher l'origine de plus loing, & voir de quelle partie elle a prins son commencement; car ce mal ne se pouuant contracter que par attouchement, il faut qu'il paroisse quelque marque de son infection, premierement en la partie par où est entré le venin. Car si cela vient pour auoir couché avec quelque autre personne, les premiers signes se produisent és parties honteuses; & si c'est de simple attouchement, ils paroissent en la surface de la peau; comme ils sont és mammelles des nourrices, quand les enfans qu'elles allaitent sont infectez, ou en la bouche & en la gorge de l'enfant, si la nourrice est gastée. Or

il vient aux parties honteuses des pustules, des vlcères malins, des gonorrhées virulentes, & des bubons aux aines. Mais si ces choses ne penetrent point dauantage au dedans, elles ne font pas encore la verole, ce sont seulement comme des avant-coureurs de sa venue, & des principes qui la doiuent bientoſt produire.

Toutes les autres maladies tant veneneuſes que contagieuſes, & celles qui viennent des bleſſeures faites par des beſtes enuenimées, ſemblent deuoir ſuiure en celieu, à raiſon de l'affinité de leurs cauſes. Mais parce que leur principale connoiſſance ſe prend de la remarque des cauſes qui les produiſent, i'ay iugé qu'il n'en falloit point traicter, qu'on n'y adiouſtaſt auſſi la maniere de les guerir.

Je penſe auoir maintenant acheué de deſcrire en abrégé tout ce qui concerne la connoiſſance des affectionſ interieures, laquelle ſera neantmoins confirmée par la frequente inſpection & contemplation des choſes. Je croy pareillemēt auoir pourſuiuy chaque choſe par le menu, & qu'il n'arriuera rien de nouueau, qui ne puiſſe eſtre reconnu par l'oſeruation & imitation de ce que i'ay dit.



LIVRE
SEPTIESME.
DES MALADIES EX-
TERNES DV CORPS.
AVANT-DISCOVERS.



A Chirurgie a esté du commencement tenuë pour vne partie de la Medecine, & toutes les deux ont vne mesme origine, & doiuent leur naissance aux mesmes Autheurs: aussi la Chirurgie ne reconnoist-elle point d'autres preceptes que ceux de la Medecine, & ne fonde point ses demonstrations sur d'autres Principes. Mais depuis, pour releuer dauantage l'excellence & la dignité de la medecine par dessus le reste, les Docteurs en cette faculté se reseruans

pour le raisonnement & pour le conseil, cōme chose plus noble & liberale, & s'attribuans ce droit, comme y ayans vne pretēfion en quelque sorte plus legitime, laifserent en partage aux Chirurgiens & aux Apoticairez qui leur seruoient de valets en la pratique de cēt Art, tout ce qui se fait ordinairement par le secours de la main. Le premier employ de ceux-cy fut de remettre les os desboitez & disloquez : redresser ceux qui estoient rompus, & les faire tenir en estat : comme aussi d'vser quelques fois de ferremens pour ouurir, couper, arracher, brusler. Apres on leur laissa le soin de penser les playes & les vlcerez, puis enfin les tumeurs suppurantes, où il est besoin de faire application de charpies & de linges enduits d'onguens. Les autres maux externes se peuuent bien guerir sans l'entremise de la Chirurgie, à la cure desquels neantmoins elle ne laisse pas souvent de pretendre. Toutesfois l'origine de tous ces maux vient d'ordinaire de quelque cause interieure, dont la connoissance & le traitement est absolument du faict de la Medecine : & comme c'est au medecin de rendre raison de tout ce qui suruient & se passe au dehors, aussi est-ce à luy de contrōller & conduire

l'opération du Chirurgien : tellement que le medecin doit auoir la science , & le Chirurgien doit exceller en l'adresse & application de la main.

CHAPITRE PREMIER.

*Les differences des Tumeurs qui sont
outre l'ordre de la nature.*

LEs maladies qui suruiennent aux parties externes par le vice de quelque humeur , se font tantost avec de la tumeur , & tantost sans tumeur aucune : & de toutes ces deux sortes , les vnes prouiennent du sang , les autres de la bile jaune , les autres de la noire , les autres de pituite , les autres de serositez , les autres de vents & les autres d'un meslange de ces choses. L'humeur au reste , est de qualité ou acre & corrosiue , ou douce & benigne. Pour la situation de l'humeur , elle est ou en la peau seulement , ou bien avec la peau elle occupe pareillement la chair qui est au dessous , ou vn tendon , ou vne glande. Celle qui se rencontre en la peau , est ou en la premiere peau , qu'on appelle Epiderme , ou mesme en la vraye peau de dessous.

De plus , l'humeur ou conuertist en sa nature la partie en laquelle elle est , comme en la ladrerie & au vitilige ; ou bien estant seulement

espanduë par la substance d'icelle l'affecte de sa qualité. Voila quelles sont les propres différences des maladies externes, selon qu'elles peuvent servir pour en procurer la guérison.

La cause donc propre & contenant de chacun de ces maux, est vne certaine humeur peccante amassée outre nature; dont l'amas se fait ou par Congestion, ou par Fluxion. La Congestion outre nature vient peu à peu des humeurs qui se distribuent pour aliment en la partie. Car quand la partie est, ou si debile, qu'elle ne peut mesme convertir en sa propre substance l'aliment qui y aborde; ou tellement vitiée, qu'elle le corrompt, & ne peut expulser hors de soy les excremens qui s'y sont engendrez, il se fait necessairement outre l'ordre de la nature vne certaine congestion. Quant à la Fluxion, c'est vn abord d'humeur plus fort & plus grand, qu'il n'est de besoin pour la nourriture de la partie. Les causes internes de cela sont, l'abondance, l'acrimonie, ou la subtilité de la matiere qui doit couler: la vigueur de la partie qui l'envoie, la lascheté des conduits, & la foiblesse, ou la situation plus basse de la partie qui reçoit. Mais les causes euidentes sont: contusion, rupture, playe, luxation, & tout ce qui attire la fluxion par vne violence de douleur, ou de chaleur.

Finalement les maux qui attaquent les dehors du corps, ou sont esleuez sur la peau, ou la creusent, ou la tachent. Au dessus de la peau paroissent esleuez la Tumeur, le Tubercule, & la Pustule. La Tumeur est plus grosse que le Tubercule, & la Pustule est moindre que tous les deux. Les Tumeurs sont, le Phlegmon, le Phygethlon, le Bubon, le Phyma, l'Erysipele, (car on le met aussi d'ordinaire au rang des tumeurs) l'oedeme, l'Hydrace-

phalon, l'Hydrocele, la Tumeur flatueuse, le Scirrhe, le Ganglion, la Bronchocele, la Parotide, l'Escroüelle & le Cancer. Les Tubercules sont : le Charbon, le Froncle, le Terminthe, la Glandule, & le Nodus. Les Pustules sont : l'Epinyctis, les Phlyctaines, les Ecthymates, les Ephelides, les Hidroes, les Dartres, la Galle, la demangeaison, le Lichen, la Psore, la Lepre, & toutes les sortes de verruës, le cloud, & le cal. Il faut donc traiter en particulier de chacune de ces choses, mais par vn autre ordre, & selon l'affinité de leurs causes, la consideration desquelles tient le premier lieu en la methode curatoire.

CHAPITRE II.

Les Tumeurs, Tubercules & Pustules qui viennent du sang.

LE Phlegmon est vne tumeur chaude, amassée loutre nature, esleuée & bornée à l'entour, de la grosseur au moins d'vn œuf de poule. Il est rouge comme si on l'auoit tenu deuant le feu, ou mis dans le bain : la chaleur de l'inflammation en est pareillement tres-grande, comme si le feu y estoit : l'enfleure est dure par la quantité de la matiere : le battement profond & fascheux, dautant que le diastole des arteres frappe la partie enflammée : la douleur qui s'ensuit de la chaleur, du battement & de la tension, est fort aspre, principalement quād c'est en vne partie dont le sentiment est delicat. La cause contenante est vn sang enfermé non seu-

lement dans la peau , mais aussi dans la chair qui est dessous , lequel s'est enfin coulé là par les veines. Car les plus grandes veines & arteres estans remplies d'une abondance immodérée de sang , viennent à s'en descharger , comme d'un fardeau qui les oppresse , sur celles qui sont moindres , & celles-cy le reiettent dans les autres plus petites. Et lors le sang ne pouvant estre retenu , s'eschape par leurs orifices , & par les trous des tuniques , & se iette dans les espaces vuides qui sont entre les fibres des premiers corps , & principalement des muscles, des veines , des arteres, des nerfs , & des membranes. Ces parties là estans ainsi occupées & remplies par la fluxion , s'enflent & viennent comme à se separer par l'abondance , s'eschauffent par l'ardeur de ce sang bouillant , & font de la douleur. D'autant que le sang estant amassé hors des vaisseaux , & ne prenant pas air librement , se pourrist & s'enflamme par necessité. Et de cette sorte , si le sang estoit pur , il se fait vn vray Phlegmon, les especes duquel sont , l'Ophthalmie, la Parotide , l'Esquinance , la Paroulis és genciues , & autres qui prennent leurs noms des parties. Il y en a encor vne autre moins exquis , dont le sang n'est pas pur , mais tient aussi du melange des autres humeurs. D'où viennent le Phlegmon erysipeleux, l'oedemateux & le scirrheux.

Le Phygethlon est vn Phlegmon qui vient és parties glanduleuses , & particulierement au col, és aisselles & és aines : les Latins le nomment Panus. Quant à celuy qui vient en l'aine , on l'appelle particulierement Babon. Ses causes & son origine sont semblables à celles du Phlegmon , & se reconnoist par les mesmes signes. Or il survient d'ordinaire, ou en suite des fievers , ou apres des

douleurs de quelque partie, lesquelles excitent de la fluxion sur les glandes.

Le Phyma est pareillement vne tumeur des parties glanduleuses, aucunement moindre & plus platte que le simple Phlegmon, & que le Phygethlon, & avec moins de rougeur & de douleur. Car il ne procede pas d'un sang pur, ains de celui qui a quelque meſlange de pituite, de sorte que c'est vn Phlegmon qui participe de l'oedeme.

Le Charbon prouient du sang, non de celui qui est subtil & loüable, mais d'un sang grossier & noir, neantmoins chaud, bouillant & corrompu. En quelque partie qu'il suruienne, il la bruste aussi-toſt, y excite autour de ſoy des puſtules tres-ardentes & tres-acres, & finalement par la violence de l'ardeur, il s'y fait vne crouſte de couleur noire, ou cendrée. Les parties voisines s'en ressentent iusques fort loing de là, & en deuiennent enflammées & douloureuses; il s'en ensuit pareillement vne grosse fièvre. La partie qui est enflammée ne ſuppure iamais; mais estant brulée par l'excez de l'ardeur, il s'en ſepare finalement vn lopin de chair corrompue, apres la cheute duquel il reste vn vlcere creux & sale, par lequel ſeul principalement on le diſcerne d'avec les autres puſtules. Entre les especes de Charbons, l'un est ſimple, lequel s'engendre d'ardeur ſeulement & de ſimple pourriture; l'autre malin, qui ioinct avec cela vne qualité veneneuse: comme celui qui ſe fait en temps de peste, dont nous auons plus amplement diſcours en ſon propre lieu.

Le Froncle, que les Grecs nomment Dorthien, est vn Tubercule aigu, accompagné d'inflammation

& de douleur, n'excedant point la grosseur d'un œuf de pigeon. Il est par consequent moindre que le Phyma, mais plus poinctu, plus rouge & plus douloureux. En apparence il semble un vray Phlegmon, mais petit, & qui à peine passe plus auant que la peau, & ne prend que fort peu de la chair qui est au dessous. Le Froncle vient à suppuration de mesme que le Phlegmon, & est par là distingué du simple charbon. Or il procede, non point comme le Phlegmon d'un sang qui se soit ietté par force sur cette partie: mais d'un sang grossier & vicieux, non toutesfois brulé, comme celui qui cause le charbon, lequel la nature a separé d'avec l'autre plus pur, & l'a poussé vers la surface du corps, comme nuisible & non necessaire. C'est pourquoy tout ainsi que le Phlegmon est un effect de l'abondance, de mesme le Froncle est vne production de la cacochymie: & rarement arriue-il tout seul; mais il s'en esleue d'ordinaire plusieurs à la fois par le corps.

L'Epinyctis, au iugement de Celse, est vne sorte de pustule tres-mauuaise, rougeastre & aucunement liuide, de laquelle on est incommodé la nuit particulièrement. Elle s'ulcere d'elle-mesme, & rend vne sanie, qui est un peu sanglante. Par où on connoist qu'elle a rapport au charbon, & que la cause en est semblable, mais ne tenant rien de la peste, elle n'est pas si dangereuse, & la pustule n'est pas si grosse que le charbon.

Le Terminthe est aussi de ce genre, pource qu'il prouient d'un sang bouillant & brulé. Il est bien aussi gros que l'Epinyctis, mais il a vne pustule noire, & ronde, laquelle s'en va en escaille par la violence de l'ardeur.

Les Ecthymates, quoy qu'ils ayent quelque cho-

se de pestilent, procedent neantmoins de la chaleur du sang, qui les fait esleuer, sans qu'on y remarque du meslange de pituite. Avec le temps ils se digerent & blanchissent, par la suppuration de leur matiere, laquelle enfin se desseiche en escailles.

CHAPITRE III.

*Les tumeurs, tubercules & pustules qui
prouiennent de pituite.*

Comme il y a diuerses sortes de pituite, l'une subtile, aqueuse ou morueuse; l'autre grossiere & gluante, telle qu'est la vitree, ou la gypsée: aussi est-il necessaire que de l'amas d'icelle il s'engendre diuerses sortes de tumeurs.

En premier lieu l'oedeme est vne tumeur froide, lasche & molle, sans douleur. Il ne s'y remarque ny chaleur, ny rougeur, mais vne couleur ou naturelle, ou palle: la tumeur est souuent fort grosse, & obeyt sous le doigt, avec peu, ou point de douleur. Or il y en a de deux sortes: l'un ramassé & borné à l'entour, qui s'appelle proprement & simplement œdeme: l'autre diffus & estendu, qui est, pour mieux dire, vne tumeur œdemateuse. Ce dernier s'engendre d'un sang trop crud & pituiteux, par le vice ou du foye, ou des choses que l'on a prises, lequel se jettant sur les parties qui doiuent estre nourries, & ne se conuertissant pas en leur substance, s'y amasse peu à peu, & par son abondance cause de l'enfleure, qui retient ordinairement

la marque du doigt quand on la presse en y touchant. Et c'est de cette sorte qu'en la Phtisie, en la Cachexie, & en la Leucophlegmatie, tantost les pieds s'enflent, tantost tout le reste du corps. Mais l'œdeme vray & exquis, ne se fait pas de sang pituiteux, ains de pituite superfluë, qui est seulement ou aqueuse, ou morueuse, de quelque part qu'elle vienne sur la partie affectée. Elle procede neantmoins ordinairement d'une destuxion de la teste, qui tombe souuent sur les genoux, & quelquesfois sur les espaules, & sur les autres parties.

On doit icy rapporter les tumeurs aqueuses, d'as lesquelles il se rencontre, ou de l'eau citrine, ou de serositez du sang: comme sont, l'hydropisie ascites, l'hydrocephalon, l'hydrocele, & toutes les autres qui en approchent, & qui causent de l'enfleure sous la peau. Les Tumeurs flatueuses es- quelles il y a quelque vapeur, ou quelque vent enfermé outre l'ordre naturel, sont pareillement de ce genre: comme sont, l'hydropisie tympanite, l'hernie flatueuse, & toutes celles qui s'esleuent par vn amas de vapeurs, ou sous la peau, ou sous les membranes des os, ou dans les muscles. Celles- cy sont grandement rares, & à peine se peut-il jamais amasser des vents sans le meslange de quelque humeur. L'enfleure ne fait point alors de douleur, sinon quand elle separe & fait bander les membranes avec beaucoup de violence: elle est plus molle que l'œdeme, & obeyt dauantage, & lors qu'on la presse du doigt, la marque n'y demeure point.

Le Scirrhe est vne tumeur outre nature, dure & resistente, de mesme couleur que le reste de la

peau, & sans douleur aucune. Il y en a de deux especes, l'un comme commençant, & non confirmé, ny legitime, lequel fait de la douleur en le pressant : l'autre confirmé & véritablement tel, qui est priué de toute douleur, & de tout sentiment. La matiere de l'un & de l'autre, est vne humeur crasse & visqueuse, laquelle s'estant attachée à quelque partie, & r'enfermée dans sa capacité, s'est endurcie de sorte qu'elle ne peut que difficilement estre resoute & dissipée. Or cette humeur a esté telle dès le commencement de la tumeur : comme lors qu'il s'est fait par fluxion ou congestion, en quelque partie vn amas, ou de pituite vitrée & gypsée, ou de melancholie naturelle, qui est la lye du sang. Ou bien elle est devenue telle par la mauuaise cure d'un erysipele, ou d'un phlegmon, comme quand la matiere de ces maux se refroidist, ou se reserre par trop ; ou que le plus subtil estant dissipé par des remedes sudorifiques, le plus espais y reste & demeure. Car comme presquetous les scirrhes qui se font au foye, en suite de la iaunisse, s'engendrent peu à peu par l'espaisissement de la bile ; ainsi ont-ils quelquesfois leur origine de mesme sorte dans les parties externes.

Le Ganglion est vne tumeur de mesme couleur, dure, resistente & sans douleur, si ce n'est qu'en la pressant bien fort on la sent comme engourdie. Ce mal vient autour des nerfs & des ioinctures, & souuent au poignet, d'une pituite grossiere & visqueuse ; ou d'une melancholie naturelle qui s'est ainsi endurcie. Celuy qui se forme çà & là loing des ioinctures & des nerfs, & hors des parties glanduleuses, est

par quelques-vns appellé Nodus, pour le distinguer des autres. De ce genre est la Bronchocele, que les nostres nomment hernie du gosier, engendré entre l'aspre artere & la peau, non point selon l'opinion de plusieurs à force de crier, ou pour auoir beu de l'eau de neiges fonduës, comme l'on fait és Alpes, & autres pays de montagnes: mais bien d'une pituite grossiere & visqueuse, qui se jette là peu à peu de la teste, & des parties externes d'icelle, par le derriere de l'oreille.

La Glande est vne tumeur de l'adene, dure, & differente du nœud ou Ganglion par la seule situation. Car celle-là vient és adenes seulement, & celuy-cy és ioinctures. Et les adenes estans esparses diuersement par tout le corps, & principalement és endroits où les veines & les arteres s'elargissent, il suruient aussi des glandes en plusieurs parties: dont nous auons veu quelquesfois le corps tout farcy, par vn excez de pituite surabondante. On peut aussi rapporter à ce genre la Parotide froide, & le Bubon froid. Entre les Glandes, les vnes se resoluent, l'humour desquelles n'estant gueres crasse se peut digerer & dissiper peu à peu. Les autres viennent à suppuration, & se terminent en abscez par la sortie du pus; & celles-cy participent du sang & de la chaleur. Les autres demeurent tousiours dures, & tiennent entierement de la nature du scirrhe, l'origine desquelles vient d'une pituite gypsée: les autres estans inueterées, & ayans finalement contracté de la malignité, se tournent en vlceres: celles-là sont simples escroüelles, & celles-cy sont escroüelles vlcerées.

Les Escroüelles sont à la verité grandement dures, & ont toutes des enveloppes membraneuses, à

la façon des glandules : mais leur matiere deuenant en fin fort acree, rongel l'adene meſme, avec la chair d'alentour & la peau, & fait vnylcere malin, qui va ſerpentant & mangeant les parties voiſines. Elles ſ'engendrent ſouuent au col, où on les void ordinairement arrangées par vne longue ſuite comme des Glandes. De là auſſi quelquesfois elles ſ'eſtendent iuſques ſur la poiſtrine, ou aux aiſſelles, & aux mammelles. Or la matiere qui ſert à leur production coule du derriere de la teſte le long des tendons, & des adenes du col; & ce peu à peu, & ſi lentement, qu'à peine en peut-on bien ſouuent reconnoiſtre l'origine. Et cette matiere n'eſt point vne pituite ſimple, mais qui a deſia contracté del'acrimonie par la force de la chaleur, & par la putrefaction. Que ſi cette humeur pituiteuſe deuiet plus maligne par le meſlange de la bile noire, l'eſcroüelle tiendra du Cancer, & ſera nommée eſcroüelle chancreuſe.

Le Cancer eſt vne tumeur dure, ronde, ineſgale, quelquesfois enuironnée de veines enflées, de couleur liuide ou noire, fort douloureuſe & quelquesfois enflammée. Il vient ordinairement en toutes les parties du corps, en la bouche, és yeux, en la matrice, à la verge, au fondement : mais principalement és mammelles des femmes, leſquelles eſtans ſpongiieuſes & moins pleines, ſont plus ſuſceptibles de cette matiere, de laquelle meſme il ſe fait vne facile deſcharge ſur ces parties, tant de la teſte que de la matrice. Le commencement de ce mal n'eſt gueres apparent, & quand la tumeur commence à ſ'eſleuer, elle ne ſe montre pas bien ſouuent plus groſſe qu'un pois chiche, avec vne douleur & chaleur ſemblable à celle que feroit la

piqueure d'une esguille toute rouge de feu ; quelquesfois aussi on n'y sent aucune douleur. De là en avant elle devient grosse comme une fève, puis comme une noix, & en suite comme un œuf, continuant à s'esleuer & accroistre de plus en plus. La matiere de cette tumeur commençant desja à s'eschauffer, ou par laps de temps, ou par un mauvais regime de viure, ou par application de quelques medicamens, la douleur & la chaleur s'augmentent fort, mais sans inflammation ; la partie se rend euidemment liuide ou noire, & les veines qui sont à l'entour paroissent enflées & pleines d'un sang gros & noir. La cause coniointe de ce mal est la bile noire, ou bien un sang chaud & recuit, lequel s'est ainsi souuent amassé par la suppression des mois ou des hemorrhoides, & quelquesfois en suite d'une fièvre quarte. Plus l'humour est paresseuse & lente, d'autant produit-elle un Cancer plus benin : & de tant plus mauvais, qu'elle sera chaude & acre. Le premier persiste long-temps, sans estre autrement dangereux, si ce n'est qu'estant irrité il vint à s'enflammer : au lieu que l'autre peut à peine estre retenu, sans se faire bien-tost paroistre par l'ouuerture du cuir, qu'il ronge, & devient Cancer ulceré. La tumeur se montre lors comme une chair corrompue, puante, sale, horrible à voir, ayant les bords calleux & renuersez. Elle iette une sanie subtile, noirestre ou rousse, & enuoye au cœur, à la bouche & au cerueau une vapeur maligne ; est accompagnée d'une fièvre continuë & lente, avec des frequentes de faillances d'esprit ; sur tout quand le Cancer se prend aux mammelles : le sang en sort souuent par les endroits qui sont rongées, & si l'on n'en meurt

meurt pas si-tost, le mal par sa malignité s'advance tousiours & se porte plus loing.

La Phagedaine approche fort du Cancer, c'est vn vlcere qui mange & consomme non seulement le cuir, mais aussi ce qui se rencontre dessous. Il s'engendre pareillement d'une bile noire maligne, ou de l'erugineuse, dont il sera parlé en traictant des vlceres.

Le Sarcoma est vne excroissance de chair, en façon de tubercule, ou de tumeur. Il ne prouient point d'aucune humeur qui se soit lctée là, mais du seul aliment de la partie. Car cette partie estant vlcerée ou dedans ou dehors, s'augmente & s'estend, par l'abord continuel de l'aliment, si dauanture on ne vient à la reprimer; & se fait mesme souuent des conduits en guise de veines & d'arteres, pour par là prendre nourriture. C'est de cette sorte que la chair croist souuent és vlceres qui ne sont pas bien pensez; que se forme le Polipe dans les narines par la contusion du nez; que l'Epoulis croist és gencines à la racine des dents; que le fic vient au fondement, & comme il s'esleue peu à peu de grosses tumeurs à l'occasion de la chair contuse & froissée, sans aucune ouuerture de la peau qui est dessus, lesquelles prennent nourriture à la façon des autres parties, sans aucune atteinte de douleur, mais avec vn sentiment fort vif, & de couleur naturelle. Encore que toute partie soit susceptible des tumeurs de cette nature, elles se rencontrent neantmoins plus souuent és emontoires du col, des aisselles & des aines, dont la chair qui est à l'entour ne se peut pas facilement enfler ny estendre. Cette excroissance a presque mesme origine que le Phlegmon, mais il y a cette difference, que le sang ne s'y iette pas tout à coup,

ains y coule peu à peu, & passe en nourriture, qui sert à l'amplification de la partie, à mesure qu'il y aborde.

La varice & l'anevrisme pourront estre placées en ce rang, à raison de l'affinité des causes qui les produisent. La varice est vne excessiue dilatation de veine, laquelle se rencontre plus ordinairement és iambes, qu'és autres parties. Et la veine estant pleine d'un sang copieux & grossier, la partie paroist liuide ou noire, & deuient mesmement enflée, mais sans faire aucune douleur: la tumeur s'abbaisse aussi-tost sous le doigt, lors qu'on la presse, puis se releue incontinent. Or elle prouient de quelque coup, de contusion, d'un trop grand effort, de trauail, & de voyage: aucunes-fois de repletion, comme en beaucoup de femmes enceintes.

L'Anevrisme est vne dilatation de l'artere, qui se fait lors qu'elle est rempli d'un sang spiritueux. Il suruient quelquesfois és parties externes, aux mains, aux pieds, és enuirs du gosier & de la poictrine: & est different de la varice, en ce qu'il est accompagné d'un battement de pouls grand, esleué, & qui donne souuent de la peine. Quand on presse la tumeur, la matiere qui est dedans se retire promptement. Il se rencontre aussi quelquesfois dans les arteres, principalement deffous la poictrine, autour de la ratte & du mesentere, où l'on sent bien souuent vn grand battement. Il n'est gueres croyable que ces accidens puissent rompre, ou faire ouurir la veine ou l'artere, comme quelques-vns se sont imaginez. Car si le sang sortoit de la veine, ou de l'artere, & qu'il n'y fust plus contenu, il se corromproit & pourriroit aussi-tost, & feroit vne autre sorte de tumeur.

CHAPITRE IV.

*Les affections & eruptions bilieuses,
qui paroissent au dehors.*

L'Erysipele est vne ardeur vehemente espandue en la surface du corps. Il ne s'y fait point de tumeur manifeste, la partiè n'en est ny plus esleuée, ny plustendue, & le mal ne penetre pas iusques à la chair qui est dessous, ains s'estend au long & au large, sans aucun amas qui soit borné. Il picque & brulle asprement toutes les parties qui en sont atteintes : sa couleur est d'un rouge tirant sur le iaune, qui disparoist quand on la touche, puis reuiert aussi-tost. La douleur qu'il cause n'est point accompagnée de battement, ny beaucoup vehemente. Lors que la fluxion se fait, le patient est surprins de frisson, & en suite attaqué de fièvre : & bien souuent quand elle se iette sur les cuisses, elle commence par vne tumeur de l'aîne. Cela se traîne comme vne dartre viue, & quittant sa premiere place va gagnant peu à peu les parties voisines. Or il y en a de deux sortes, l'un que Celse nomme Erysipele simple, lequel n'a que de la rougeur & de l'ardeur, sans aucune vlceration ; l'autre que ce mesme Auteur appelle feu sacré : & c'est l'Erysipele vlceré, dont il se trouue deux especes, en l'une desquelles la peau est entamée & vlcerée superficiellement, sans penetrer plus outre, & se desseiche en petites croustes qui tombent comme du son de farine : l'vlceration de l'autre passe plus

auant dans la peau, d'où apres que les pustules sont creuées, il sort vne sanie purulente. L'Erysipele simple procede d'un sang chaud & subtil, qu'on appelle bilieux; & celuy qui est vlcéré vient d'un sang meslé de quelque portion de bile superflue & enflammée. Ce sang s'eschappant hors des plus petites veines, ne s'arreste & ne s'attache point à la chair, à raison de sa subtilité, il coule & passe iusques au cuir, lequel estant plus espais & plus ferré, le retient & l'empesche de passer outre. Et d'autant que cette humeur est subtile, elle s'espanche facilement, & ne fait point de tumeur apparente. Tous ceux qui sont de cette sorte, meritent le nom de veritable Erysipele: mais celuy qu'on appelle Phlegmoneux, est à la verité plus enflé, mais il n'est pas si ardent; l'oedemateux l'est encore beaucoup moins.

De ce rang sont les Phlyctaines & les Phlyctides, ainsi nommées par les Grecs. Elles s'esleuent soudainement, & sont toutes pleines d'une humeur iaunastre, claires & semblables à ces vescies qui suruiennent aux brusleures d'eau bouillante, ou de feu; elles ne font pas pourtant de manifeste douleur. Quand elles sont percées l'humeur en sort, & la partie se couure de certaines croustes, qui s'endurcissent & demeurent là iusques à ce que le mal soit guery. Il est certain qu'elles nes'engendrent que d'une bile tres-ardente, qui brusle aussi fort que c'estoit du feu, tellement que ce n'est pas sans raison, que le vulgaire leur a donné le nom de feu sauuage.

La Dartre est fort approchante de ce que dessus. C'est vne ardeur qui ronge le cuir, & le rend inegal & rude, avec force petits bourgeons qui

s'esleuent çà & là. Les Grecs l'appellent herpes. Ils'en trouue de deux sortes, l'une est simple, & s'appelle dartre miliaire; l'autre maligne qu'on nomme dartre viue. Quand les pustules de la dartre viue sont creuées, elle vlcere le vray cuir, le ronge & le mange, & s'estend en largeur & en profondeur, & les vlcères qu'elle fait demeurent secs.

La dartre simple & plus benigne apporte au cuir vne rudesse & inégalité superficielle, & ne passe pas l'epiderme, où elle fait leuer de petits boutons, qui ne s'aduancent pas beaucoup; & ne paroissent gueres plus gros que des grains de mil. Ces deux especes de dartres courent & s'estendent de costé & d'autre, comme en rond, sur les parties qui leur sont proches, & souuent le milieu se guerist, que les extremittez continuent de marcher plus auant. La dartre vlcérée approche grandement de l'erysipele, de sorte que plusieurs les prennent pour estre de mesme genre: neantmoins il y a cette difference entr'elles, que l'erysipele vient subitement en suite d'une fluxion manifeste; au lieu que la dartre, ou Papule boutonne peu à peu, & se forme par laps de temps, sans qu'il y ait eu aucune apparence de fluxion. Les pustules de la dartre sont seiches, & quand elles sont entamées, il n'en sort ny pus, ny sanie: Mais celles de l'erysipele sont grandes, vlcérées & humides, d'où il sort vn pus meslé de sanie. Ce qui est de fascheux en la dartre, & qui donne de la peine, c'est la demangeaison, & en l'erysipele on est tourmenté de douleur & d'ardeur. Toutes les dartres sont de durée, ne causent aucune fièvre, & ne se guerissent qu'avec le tēps. &

l'erysipele est d'ordinaire accompagné de fièvre, vient soudain & se resout promptement de soy-mesme. La matiere & cause coniointe des deux sortes de dartres, est vne pure bile excrementeuë & tresardëte, telle qu'est la porracée ou l'erugineuse, de laquelle les veines se deschargeant peu à peu, & sans aucune impetuosité de fluxion, elle se iette par sa subtilité au de là de toutes les parties, & sur tout de celles qui sont charnuës, iusques à ce qu'elle ait atteint le cuir qui est plus espais. Et parce qu'elle est plus grossiere & plus visqueuse qu'en l'erysipele, aussi demeure elle plus long-temps & fortement attachée au cuir. C'est pourquoy celle qui est plus gluante, & quant-&-quant plus acre, s'arreste toute dans le cuir, & fait leuer force pustules, lesquelles estans creuées, & le cuir vlcéré, produisent vne dartre viue. Mais la plus subtile passe outre la peau, & est seulement retenue dans l'epiderme, au delà duquel ne pouuant transpirer en forme de sueur, elle le ronge, & le consume par vne quantité de pustules qui s'y esleuent.

L'Impetige est vne rudesse du cuir, dure & seiche, avec vne grande demangeaison. Elle differe de la Galle, en ce qu'elle est seiche, sans aucune humeur ny sanie. Car elle se fait de pustules seiches; & la Galle est composée de pustules humides. Or il y en a de quatre sortes; l'une fort simple qui rend le cuir rouge, dur & rude, & le ronge avec vne demangeaison importune; & cette espee est comprise sous le simple nom de demangeaison. Elle prouient de bile, ou d'une pituite subtile, qui toutesfois est pourrie ou salée, & enclose sous le seul epiderme, qu'elle va rongeant. L'autre est la vraye impetige, que les Grecs appellent Lichen, laquelle ayant de plus grosses pustules, rend le cuir plus ra-

boteux, le ronge dauantage & s'estend plus loing. Elle prouient bien souuent de quelque dartre negligée, & plus ordinairement de celle qu'on n'ome dartre viue, laquelle se tourne en Lichen, si on n'y remedie de bonne heure, puis se change en Pfore, & de Pfore deuient Lepre.

La matiere du Lichen est vne bile tres-ardente, ou vne pituite pourrie & salée, non point de celle qui est claire & subtile, mais de celle qui s'est espaisie ou de soy-mesme, ou par le meslange des autres humeurs. La troisieme espee est le Pfora des Grecs (car ce mal est fort different de la Galle) en laquelle le cuir s'est rendu espais, plus sec, plus dur, plus esleué & plus couuert de pustules corrosiues, qui le rongent asprement, le mangent, & y font çà & là des creuasses, d'où il tombe certaines escailles farineuses & noires. Elle vient d'une bile noire, qui s'est iettée sur le cuir, où à peine se peut-elle digerer, car ce mal ne se guerist pas facilement. La quatrieme espee est, ce que les Grecs appellent Lepre, qui est, à dire le vray, la plus mauuaise de toutes. Elle ronge fortement le cuir, le mange & le creuasse iusques bien auant : d'où il tombe non seulement des ordures farineuses, mais aussi des croustes tantost passes, tantost noiraistres. Elle ne cede à aucuns remedes, & pour en guerir, la populace implore ordinairement le secours des Saints. Elle s'engendre de bile noire, parmy laquelle il se rencontre aussi quelque meslange de pituite salée, grossiere & visqueuse. D'où vient qu'elle attaque & infecte non seulement l'epiderme, mais aussi toute la peau. Le corps, quel qu'il soit, entaché de Pfore ou de Lepre, se va peu à peu desseichant & consommant.

CHAPITRE V.

Des Pustules.

LA Pustule est vn vice du cuir assez frequent, sous le nom de laquelle on comprend tout ce qui paroist vn peu esleué en rond sur la peau. Elle se diuise en deux especes, dont l'vne est humide, laquelle estant creuée rend de l'humeur, de la sanie, ou du pus : l'autre seiche qui ne iette aucune humidité. Au rang des humides sont celles qu'on nomme Hidroa, Ephelides, Phlyctaines ou Phlyctides, Epinyctides ; avec toutes les sortes de gallees qui en viennent ; quand ces pustules sont creuées. Entre les seiches on conte certaines rougeôles, les démangeaisons, les poyreaux, & toutes sortes de veruës.

Les Hydroes, c'est à dire vessies aqueuses, sont de fort petites pustules pleines d'eau, qui s'esleuent soudainement çà & là par tout le corps, mais le plus souvent aux mains & aux pieds, grosses comme des grains de mil, remplies d'vne liqueur claire, sans rougeur, ny douleur aucune. Car elles viennent de sueurs retenues sous l'epiderme, par les pores duquel elles n'ont peu transpirer ; à raison dequoy quelques vns les ont nommées bubbles de sueurs. Les Ephelides sont aucunement plus grosses ; ces sortes de pustules sont rouges à l'entour & ardentes, avec quelque legere douleur, du milieu desquelles lors que l'ampoule ou vessie est creuée, il sort vne humeur blanche comme du lait, & apres il s'en fait vne galle. Or elles

prouiennent d'un sang chaud & impur , qui s'est respandu sous la peau.

La Galle est vne aspreté du cuir, ou bien vne legere vlceration demangeante, & quelques fois corrosiue. Elle s'engendre de toute sorte de pustule plus humide, soit passe, soit liuide, soit noire : laquelle estant percée, produit en la peau vn petit vlcere humide, ou mesme quelques fois sec, quand la sanie en est dehors, & ce tantost avec de la demangeaison seulement, tantost avec vn peu de rougeur à l'entour, & avec de la chaleur & de la douleur. Quand la sanie vient à se desseicher, elle s'enducist & fait vne crouste. Or il se trouue plusieurs sortes de galles, aussi bien que de pustules, & sont causées de quantité d'humeurs différentes, dont la distinction se prend de la douleur, de la couleur, & de l'espece de la sanie qui en sort. Les galles viennent ordinairement par tout le corps, mais celles de la teste sont les plus mauuaises, c'est pourquoy on leur a donné des noms tout particuliers, comme sont Pfydracion, Fauus & teigne.

Le Fauus, qui est le Cerion des Grecs, iette par des trous assez amples vne sanie espaisse comme du miel. La Teigne, que les Grecs nomment Achor, a ses trous plus petits, qui rendent vne sanie gluante. Ces sortes de galles sont différentes de la simple galle de la teste, qui ne vient qu'à la surface du cuir. Or le Cerion & l'Achor se discernent, en ce que quand on arrache les cheveux, leur racine principalement se trouue fort grosse, & enduite d'une humeur visqueuse & grossiere. La cause est vne pituite nitreuse & salée, ou vne melancholie, laquelle se pourrissant sous le cuir, acquiert vne qualité

maligne ; & parce qu'il adhère quantité de cette matiere à la racine des cheueux , & que la peau de la teste est plus épaisse que celle des autres parties, il est malaisé de la tirer toute, & de l'arracher entierement de là. C'est pourquoy l'ulcere qu'elle fait ne se guerist qu'à peine, & est particulièrement contagieux aux enfans, à raison de la malignité de l'humeur.

Combien que les verruës ne soient gueres grosses, neantmoins parce qu'elles sont vilaines, & apportent souuent de l'incommodité, on les doit tenir pour maladies. La verruë pendante, que les Grecs nomment *Acrochordon*, est large par le bout, & gresse en bas vers la peau, par où elle est attachée comme à vne petite queue. Elle est grandement dure & rude, & de mesme couleur que le cuir. L'autre qu'on appelle *thymion*, laquelle ressemble en couleur à la fleur du thym, est pareillement deliée du costé de la peau, large par le haut, dure & raboteuse, & moindre que la pendante. Ces sortes de verruës se trouuent rarement seules: il en vient souuent plusieurs à la fois, & principalement aux mains & aux pieds des enfans. Elles paroissent souuent à l'impourueu, & disparoissent aussi quelquesfois subitement. La verruë sessile, que les Grecs appellent *Myrmecia*, est plus platte que le *Thymion*, & n'est iamais gueres plus grosse qu'un *Lupin*, dure, ferme, large vers sa racine, fort enfoncée & douloureuse. Le *Cor* paroist esléué sur la peau, comme vne verruë sessile, blanc, rond, calleux, & fait par le haut comme vne teste de clou, mais ses racines sont fort dures & solides, & penetrent fort auant, comme si elles sortoient des membranes des os. Il s'engendre ordinairement aux orteils & aux plantes des pieds par la fou-

leure du soulier, ou par le frottement de la chausseure. Il cause quelquesfois de soy-mesme vne douleur fort poignante, & incommode tousiours en marchant. Le Cal ressemble au Cor en couleur & en substance, c'est vne dureté de la surface du cuir, contractée par le trauail, és paulmes des mains, ou en la plante des pieds. Il ne pousse toutesfois point de racines, & ne fait en suite aucune douleur.

CHAPITRE VI.

Des taches qui paroissent sur le cuir.

IL se se rencontre pareillement sur le cuir certaines deffectuositez, qui ne sont point esleuées, ains demeurent esgales, & sans aucune aspreté; de cette sorte sont toutes les taches qui rendent le cuir difforme par l'impression de quelque couleur estrangere: comme sont les especes de vitilige, les lentilles, les noirceurs, les meurtrisseures, les flétrisseures, & les marques de coups de fouët.

Il y a trois especes de vitiliges, Alphos, Melas, & Leucé. Elles gastent le cuir de taches dispersées & non continuées, ny coniointes, mais qui changent de place, & se vont estendant. En ces defedations le sentiment, ou perist entierement, ou deuiet plus stupide, tellement qu'en escorchant la peau, & quelquesfois mesme en la perçant legèrement avec vne esguille, on ne sent rien de cela. La

tache de l'Alphos est blanche, celle du Melas est noire, & paroît comme vn ombrage; & toutes les deux sont seulement en la surface du cuir. La Leucé fait pareillement vne tache blanche, comme l'Alphos, mais elle penetre plus auant, & infecte toute la peau. Ce mal fait tomber les cheueux, en la place desquels il en vient d'autres blancs & deliez, comme du poil folet. Quand la Leucé est confirmée, elle ne deuiënt iamais rouge en la frottant, & si on la pique d'une esguille, il n'en sortira point de sang, ains seulement vne sanie aqueuse. Il se void aussi quelquesfois outre vne certaine sorte de vitiligo de couleur rouge, brune ou liuide de couleur rouge, brune ou liuide, en laquelle le sentiment est esteint, ou du moins fort debilité. Les modernes l'appellent en general du nom de Mal-mort. Ces defecations là sont particulieres à ceux qui ont la constitution des humeurs mauuaises: parce que tout cela vient de l'impureté des humeurs; sçauoir l'Alphos & la Leucé, d'une pituite espaisse & gluante; le Melas, de bile noire, & les autres d'une autre humeur conforme à leur vilaine couleur.

La Lentille vient particulièrement au visage, & aux mains, & quelquesfois sur la poitrine, grosse comme vn grain de lentille, de couleur rousse, & esparse çà & là comme certaines gouttes; ceux qui ont le poil roux, en sont ordinairement mouchez. Quelquesfois elle s'efface d'elle-mesme, principalement en hyuer; l'Esté elle reuerdist & se multiplie. Il suruient pareillement es autres parties des taches plus grandes, quelquesfois aussi larges que la main, de couleur semblablement rousse, & qui en certains temps se manifestent & s'esuanouissent, lesquelles estant de mes-

me nature , se doiuent aussi rapporter à ce genre. Or il est certain qu'elles viennent d'un suc melancholique, dont les visceres se sont deschargez sur la peau , où il s'est espendu. Elles se contractent aussi quelquesfois par le vice & affection particuliere du cuir, laquelle en corrompt l'aliment, quelque pur qu'il soit, & luy fait prendre vne couleur estrangere : Car la peau estant infectée par le dehors , change pareillement sa nourriture. On ne les peut aucunement effacer, non plus que les marques que nous portons imprimées , comme certains signes, dès la naissance & premiere conformation; & si quelquesfois il arriue qu'elles s'obscurcissent, neantmoins avec le temps elles reuerdissent, les vnes lors que les fraises & les cerises viennent à meurir, les autres en la saison des vendanges, d'autres en un autre temps, ou sous vne autre constitution de l'air. Il se rencontre mesme encor quelques autres macules, comme les rougeolles, de qualité maligne & contagieuse , qui viennent sans pustules , & paroissent diuerses en couleur & en figure , & quelquesfois telles , qu'on n'a point ouy dire qu'il s'en soit veu de semblables : ce qui aduient ou par la corruption de l'air , ou pour auoir auallé quelque poison, ou par la morsure d'une beste veneneuse; & ces macules ne se peuvent oster , qu'auparauant la qualité veneneuse qui y est, ne soit esteinte.

Le cuir deuiant semblablement taché par la noirceur de l'ecchymose , car ce n'est autre chose qu'une effusion & concretion de sang parmi le cuir. Or il se respand là par les veines menuës & deliées , qui sont dispersées dans le cuir, lesquelles s'ouurent par Anastomose, ou par

Diapedese, à cause ou de l'abondance du sang, ou de sa subtilité, ou de son acrimonie: & le plus souvent se rompent par vn trauail excessif, ou par quelque contusion prouenüe de coup, ou de cheute. Le sang estant donc sorty hors de ces veines là, se respand & s'amasse par le cuir, tantost avec quelque peu de tumeur & de douleur, tantost sans cela, & le cuir en prend la couleur, lequel deuiant premierement liuide, & lors cette affection s'appelle en Grec, Pelioma; puis quelquesfois il noircist, & se nomme Melasma: nous appellons l'vn & l'autre, meurtrisseure. Les flestrisseures ne sont pas si grandes, & les vergeteures, comme les marques des coups de fouet, sont encore plus petites.

CHAPITRE VII.

De la Gangrene & de l'Abscez.

LEs Phlegmons & les autres tumeurs ont bien souvent force grands maux à leur suite, entre lesquels il n'y en a point de pire que la Gangrene. Car c'est vn commencement de corruption de la partie; laquelle passant iusques à l'entiere corruption & mortification de la partie, se nomme Sphacele, c'est à dire, Syderation. En l'os elle s'appelle Carie; en la chair & es autres parties elle retient le nom du genre. Premierement donc la beauté & le lustre de la couleur se pert & amortist, & quand la partie est desia mortifiée, elle deuiant liuide, ou noire, enflée, mollasse, & entiere-

ment cadauereuse : il ne s'y fait plus de battement d'arteres , ny de douleur , non pas mesme de sentiment, de façon qu'on y peut fourrer bien auant la lancette , sans qu'on en sente rien. Or elle se fait lors que la partie affectée vient à estre destituée de la chaleur vitale & des esprits : ou parce que le cœur n'en peut enuoyer iusques là par les arteres , qui se trouuent pressées de quelque ligature qui les serre trop, ou de contusion , ou d'obstruction : ou bien à cause que la chaleur naturelle de la partie est estouffée & esteinte , ou par vne trop grande quantité d'humeurs , comme il arriue dans les grandes inflammations , ou par quelque forte obstruction qui empesche la transpiration, ou par vn froid penetrant , ou par quelque qualité veneneuse & maligne.

LA'bscez, que les Grecs nomment Aposteme, est vne conuersion de quelque matiere amassée, en pus, ou en substance estrangere. La matiere du Phlegmon , qui est du sang, se pourrist hors des veines , & quand la putrefaction est telle & si grande, que la chaleur naturelle ne la puisse surmonter, elle passe souuent en Gangrene : mais si elle vient à estre surmontée, elle se tourne en pus, par la digestion qui s'en fait , & cet amas de pus est absolument vn abscez. Quand il se fait, le lieu paroist plus enflé qu'auparauant, plus rouge, plus dur, & plus ardent , la douleur se rend plus vehemente, avec des poincts & esclancemens : & si c'est en quelque endroit considerable, il suruient, la nuit & principalement, vn peu de fievre, avec vn frisson qui n'est point reiglé. Apres que l'abscez est fait, tout se modere, la tumeur deuient plus pointüe, & la peau commence à demanger. Car le pus ressem-

ble à la cendre, dont la chaleur est passée. Au reste, il se rencontre aussi des tumeurs froides, dures & inueterées qui font d'autres abscezz, dont la matiere ne s'enflamme pas, & ne vient point à suppuration. Il se tire de là, non du pus, mais vne certaine substance estrangere engendrée d'vne humeur froide par le moyen de la digestion. Car en les ouurant, lors particulièrement qu'ils sont inueterez, nous y trouuons vne substance semblable ou à vn grumeau, ou à vn os, ou à vn ongle, ou à du poil, ou à vne pierre, ou à vne glande, ou à du bois, ou à du charbon, ou à de la terre fangeuse. Elle se trouue en vne partie charnue, sans estre enuelpée d'aucune membrane. Il se forme encore d'autres abscezz, qui ont leur matiere enclose d'vne pellicule ou tunique: & la diuersité de leur matiere les diuise en deux especes differentes, qui sont le steatome, l'atherome, & le melicere. La matiere qui se tire du steatome est comme du suif, celle de l'atherome est pareille à de la bouillie, & celle du melicere ressemble entierement à du miel, autour de laquelle matiere il s'endurcist avec le temps vne peau qui luy sert de couuerture. Ces trois sortes d'abscezz s'engendrent fort rarement es autres parties du corps, mais ils viennent souuent à la teste, parce que le cuir en estant fort espais la matiere y est longuement retenue, tant qu'elle se change en vne substance estrangere & externe. Les tumeurs de la teste, que les modernes appellent la Tortue & la Taupe, sont pareillement de ce genre, & ne different que de grandeur: & ces abscezz estant tardifs, & ne s'engendrans que peu à peu, & par laps de temps, ou sont sans douleur, ou ne font gueres de mal, si ce n'est
peut-

peut-estre quand leur suppuration se fait avec vne trop grande acrimonie.

Le Sinus est vn creux & vne capacité couuerte & cachée, qui demeure apres l'euacuation de l'abscez. Lors que le sang le pourrist dans le Phlegmon, ou que quelque autre matiere se tourne en abscez, elle corrompt & mange par sa qualité contagieuse la chair mesme voisine, & quelquesfois les fibres des nerfs & des veines, lesquelles viennent pareillement à prendre la nature du pus, & s'écoulent avec le pus. C'est pourquoy le pus venant à sortir tout à coup, il reste necessairement vne finuosité au dedans, en la capacité de laquelle il estoit contenu. Car le pus n'ayant aucune yssue, demeure long-temps retenu, & croupissant ainsi là dedans, il va rongant & cauant tout ce qui est à l'entour, & fait par ce moyen vn Sinus spacieux, lequel s'estendant en long, & le pus en sortant comme d'un long-tuyau, se nomme Fistule, qui n'est autre chose qu'un sinus estroit & long. Or la fistule à raison de sa figure est tantost simple, & vne, tantost branchüe & diuisée comme en petits rameaux, quelquesfois droicte, quelquesfois tortuë & pleine de destours. Le Sinus & la fistule sont au commencement enuironnez de la chair qui est à l'entour, dont finalement les costez s'endurcissent avec le temps, à cause que le pus qui y demeure attaché, & vient à s'y espaisir, pour n'auoir pas esté assez-tost tiré de là, les fait deuenir calleux, & ce cal enuironne le sinus ou la fistule, comme vn paroy ou couverture, qui luy fait meriter le nom de calleuse.

CHAPITRE VIII.

Des Playes.

LA solution de continuité arriue aux parties tant similaires qu'organiques, & est vne maladie commune à toutes les deux. Celle qui vient de l'interieur, & du vice du corps, ou qui a contracté du pus ou de la pourriture, s'appelle vlcere. Car le Phlegmon ouuert, & la playe, qui pour n'auoir pas esté pensée comme il faut, est deuenue sale & putride, changent d'espece, & se tournent en vlcere. Mais celle qui prouient de cause externe, si elle est faite en coupant, c'est playe; si en perçant avec quelque ferremēt pointu, c'est punction; si en froissant par le rencontre violent de chose pesante, & que ce soit en la chair, c'est contusion, & en l'os, c'est fracture: mais en la membrane, au nerf, & en la veine, cela s'appelle rupture. Les causes euidentes, ou couppent & font playe, ou picquent, ou froissent, ou blessent en diuerses façons. L'espee & tout autre ferremēt qui a le trenchant long, couppent. Le poignard, la dague, la fiesche, les dents des animaux, & toutes les choses poinctües, percent en picquant. La cheute, la course violente, le mouuement vehement, la crierie, froissent. Les espieux, les dards esmouffez, & tout ce qui frappe en froissant & faisant playe, blesse en diuerses façons. Il se trouue donc ensuitte de cela trois principales differences de solution de continuité; c'est à sçauoir; la playe, qui ne serren-

contre qu'en vne partie molle, comme sont, la peau, la chair, les veines, les arteres, les nerfs, ou les membranes: la punction, qui se fait en toutes les parties, lesquelles peuuent estre percées: & la cõtusion ou collision, laquelle arriue souuent és parties plus mollasses, qu'elle diuise interieurement, sans en entamer le dehors; & és parties qui sont plus dures, comme en l'os, lesquelles ne plient, ny ne se retirent en dedans, au rencontre d'un corps bien dur, elle cause de la fracture; comme elle fait de la rupture en celles qui sont tenduës, comme és nerfs, és membranes, és tendons, és veines, & és arteres.

Voila les genres simples de solution de continuité, du meſlange desquels il en resulte d'autres composez. Et chacun de ces genres se diuise derechef en plusieurs especes. Car la playe est ou simple, ou caue; nous appellons caue celle où il y a quelque portion de la propre substance emportée: La simple est derechef ou superficielle, qui n'entame que la peau; ou profonde, quand elle passe iusques dans la chair, & aux parties qui sont dessous: plus longue ou courte, grande ou petite, & faut icy considerer non seulement la longueur, mais aussi la profondeur & la largeur: droicte ou oblique, esgale ou inegale, comme celle qui d'un costé est superficielle ou estroite, & de l'autre profonde ou large.

On discerne ordinairement chacune de ces differences tant par les sens, principalement par la veüe & par le toucher, que par la consideration de l'instrument qui a fait la playe, & n'est pas besoin d'autres indices, parce qu'estans externes, elles sont assez manifestes. Il faut neantmoins prendre garde à la matiere, à la figure, à la grandeur, & aux

forces de l'instrument qui a fait la playe. La matiere est, ou bois, ou canne, ou fer, ou cuivre, ou estain, ou plomb ou corne, ou verre. La figure est, ou aiguë, ou mouffe, droiëte, courbée, anguleuse, rayée, ou barbelée. Quant à la grandeur de l'instrument, elle est fort diuerse, & sous ce nom de grandeur est comprise la vehemence du coup; à ce que par la consideration de l'une & de l'autre, on connoisse mieux la grandeur de la playe. Pour le regard de la vertu de la matiere qui est esclancée, quelquesfois il ne s'y en retrouue point de particuliere; & quelquesfois elle est nuisible par vne qualité ou simple, ou veneneuse; simple, comme celle d'un cautere, ou de quelque medicament putrefactif; veneneuse, comme celle des armes empoisonnées; des morsures de chien enragé, de serpent, ou de musaraigne; des piqueures de scorpion, de vipere ou de phalange: mais ces sortes de playes ne sont plus simples & solitaires, non plus que celles qui sont accompagnées ou d'intemperie, ou de douleur vehemente, ou de phlegmon, ou de demangeaison. Or on les peut reconnoistre, en ce que les symptomes qu'elles produisent sont beaucoup plus fascheux que ne requiert la condition d'une simple playe, & principalement si elles ont esté faites par quelques armes empoisonnées, ou par des bestes veneneuses, dont cy-apres nous traicterons plus amplement.

Venons maintenant aux marques qui seruent à reconnoistre quelle partie est la plus offensée en chaque playe. Quand il y a vne veine coupée, le sang sort en abondance, & ce d'autant plus qu'elle est grosse & remplie: & coule continüement, & esgalement, sans sauteler, estant aucunemēt espais & fort rouge; au lieu que ce qui sort de l'artere est subtil, iaunaistre & chaud, & ne coule pas esgalement, mais

selon le mouuement du pouls & par reprises, car quand l'artere s'abaisse il sort en plus grande abondance. Lors que le nerf est blessé de pointe ou de tranchant, le mouuement se perd, & quelquesfois mesme le sentiment, ou du moins offensez; les parties qui se rencontrent au dessous de la playe deuiennent endormies; on sent vne douleur fort cruelle; il se met en la partie vne inflammation qui la fait quelquesfois tomber en Gangrene, la fièvre s'allume, & est suiuite bien souuent du delire par la communication du cerueau: il survient pareillement quelque conuulsion, & ce plustost quand le nerf est piqué, ou en partie coupé, que quand il est entierement trenché. La playe ayant atteint les tendens ou les membranes qui couurent tant le crane que le reste des os, les mesmes signes se rencontrent, mais ils sont neantmoins plus obscurs: & beaucoup plus encore lors que les ligamens des articles sont coupez. Quand l'os blessé est descouvert, on le sent rude & raboteux en y mettant la sonde, sans qu'il fasse aucune douleur, si ce n'est peut-estre lors que l'on touche trop rudement la membrane qui le couvre.

Il faut maintenant voir par quels signes on peut sçauoir iusques où pénétre la playe, & ce qu'elle interesse au dedans. Si les meninges sont blessées par quelque coup receu en la teste, il survient vne douleur tres cruelle, laquelle s'augmète en mâgeant & serrant les maschoires, & en respirant fortement: apres suit aussi-tost le vomissement qui redouble de fois à autre: le sang respâdu par le dedas sort quelquesfois ou par le nez, ou par les oreilles, ou par les yeux: quelquesfois les sens demeurerēt estourdis, cōme si on estoit frappé d'apoplexie, & les nerfs se retirent: & peu apres vient la fièvre, qui est

incontinent suiuite de delire, principalement quand il y a de l'inflammation. Si la substance du cerueau est pareillement interessée, comme il arriue facilement, lors que le cerueau se gonfle, & remplit toute la capacité du test, vers le temps de la pleine Lune; l'on perd le iugement, tous les symptomes se rengregent, & bien souuent il tombe vne portion du cerueau, avec grand peril de la vie. Mais si la playe passe plus auant, iusques dans les ventricules du cerueau, ou si elle perce les yeux tout outre, l'on meurt aussi-tost, comme quand le cœur est frappé, d'autant que de là sort à coup & se perd l'esprit animal, & d'icy tant les esprits que le sang. Quand la playe de la poictrine traaverse iusques dans le creux d'icelle, le vent sort par là en aspirant, & si l'on met dans la playe de l'aloës, de la myrrhe, ou de l'aristoloque, on en sent incontinent l'amertume dans la bouche. Les poulmons estans blesez, outre ce que dessus, le crachat deuient escumeux & sanglant, la respiration se fait difficilement & avec bruit, puis si on n'en meurt pas à l'heure, l'on va peu à peu desseichant & se consommant de fièvre & de maigreur. Lors que le cœur est frappé, les extremittez deuiennent aussi-tost froides, & la mort s'approche, de laquelle on sera saisi tout à l'heure, si la playe penetre iusques aux ventricules d'iceluy: les arteres & plus grandes veines estans coupées en cette partie là, apres vne grande perte de sang & de forces, il sort des sueurs froides & puantes, qui sont des presages de mort. Quand le Diaphragme est transpercé, il fait retirer les entrailles, empesche grandement la respiration; cause quant & quant du delire, & de l'alienation d'esprit; excite quelquesfois de la toux, avec vn crachement de sang, & porte si-

nalement à la phtisie, & à la mort, de mesme que quand le poulmon est offensé: & principalement lors que la playe se rencontre au milieu du Diaphragme, qui est vne partie nerueuse & destituée de sang, & en continuelle agitation: Pour les playes des extremittez de cette partie là, qui sont garnies de quantité de chair, elles se consolident quelquesfois. L'œsophage estant navré, la viande & le breuvage ne peuuent plus passer dans l'estomach, on vomist aussi tost tout ce que l'on prend: puis suruiennent le hocquet, la defaillance de cœur, & quelquesfois de la conuulsion. Si la playe penetre dans la capacité du ventricule, ce que l'on boit & mange sort par là, le vomissement est pareillement frequent, comme aussi le hocquet, & la defaillance de cœur, & personne ne peut long-temps subsister en cét estat. Quand les boyaux sont percez, les matieres fecales ne descendent plus, ains tombent dans la capacité de l'abdomen, où il s'engendre vne grande corruption, & la playe rend ces matieres fecales, ou en rapporte l'odeur. La playe du foye ou de la ratte, n'estant qu'en la surface, fait retirer les entrailles vers l'espine du dos, excite des vomissemens & des deiections sanglantes, cause des poinçts au costé, & des douleurs qui s'estendent iusques à la clauiculaire vers cette mesme partie, des defaillances de cœur, de la fièvre, & des flux de ventre, par lesquels finalement le corps se fond & se consume de mesme que s'il estoit atrophie: mais si la playe passe bien auant, la mort suit de bien pres par de frequentes defaillances de cœur, & par des sueurs froides. La playe du rein fait pisser le sang, mais en petite quantité, la douleur descend iusques aux aines & aux testicules, & l'vrine amassée sous l'ab-

domen le fait paroistre comme hydropique. Il s'ensuit presque la mesme chose quand la vessie est offensée, à quoy suruiennent outre cela, le vomissement, le hocquet le delire, l'escoulement de l'urine par la playe, & en suite la mort. Lors que la moëlle de l'espine est coupée tout à trauers, les parties qui sont au dessous se resoluent, & perdent le mouuement, le sentiment & toute leur fonction, de sorte mesme qu'on laisse aller, quoy qu'on ne le vueille pas, tantost les matieres fecales, tantost l'urine, tantost la semence. Or il arriue bien rarement qu'il se rencontre en aucun endroit vne playe qui soit simple, mais elle interesse d'ordinaire plusieurs parties, desquelles s'ensuiuent plusieurs signes meslez diuersement.

CHAPITRE IX.

Des Vlcères.

L'Vlcere est vne solution de continuité vilaine & sale, dont la vilenie & saleté ne vient pas de sang, cōme fait celle de la playe, mais ou par le vice de quelque humeur, ou à cause de la sanie, ou du pus, ou de quelque autre corruption qui s'y engendre, & qui ne procede d'ailleurs que de la partie mesme qui est entamée. La playe ne se fait qu'en suite de quelque coup receu par le dehors: l'vlcere prouient aussi quelquesfois du dehors, comme par l'application d'vn caustere sur le corps, ou de quelque medicament putrefactif: mais le plus souuēt il se fait de soy mesme par le vice du dedans. De façon que la cause efficiente de la playe

est toujours externe, & l'ulcere a souvent sa production de quelque cause interne, sçauoir est, de toute sorte d'humeur amassée outre l'ordre de la nature. Car cette humeur, ou fait ulcere par corrosion, ou suruiuent és playes qui sont desia faites, soit parce qu'elles sont inueterées, soit à raison de quelque autre accident. Or cette cause interne de l'ulcere est de deux sortes, l'une antecedente, l'autre coniointe. L'antecedente est l'impureté & cacochymie du corps, acquise ou par vn mauuais regime de viure, ou par vne mauuaise disposition des visceres. La coniointe est l'humeur peccante, & toute sorte de corruption qui se rencontre & s'attache à la partie affectée. La playe existe donc toute seule, sans estre assistée de sa cause, & l'ulcere est toujours accompagné de la cause qui la produit, laquelle continue de fomentier la production.

Les principales differéces des ulceres, se prennent & des choses qui en sortent, & de la diuersité des causes qui les font. L'ulcere aussi bien que la playe peut estre appellée grand ou petit, superficiel ou profond, droit ou oblique, esgal ou inegal, recent ou inueteré, mais ce ne sont pas là ses differéces propres. Or par la difference des choses qui s'engendrent és ulceres, & qui en sortent, sont constituées les especes d'ulcere sanieux, virulent, sordide, purulent & vermineux. La sanie est la plus subtile de toutes les matieres qui sortent des ulceres, nullement visqueuse, de couleur blanchastre ou aucunement rouge. Celle qui se rencontre plus espaisse que la sanie, si outre cela elle est visqueuse, soit que ce fust l'Ichor des Grecs, soit ce qu'ils nomment aussi Melicerie, est appellée Virus par les Latins. Le pus est beaucoup plus espais & plus blanc, que n'est l'une & l'autre des matieres

iusdites, neantmoins il n'est pas visqueux ou lié. Le pus coule de l'ulcere qui desia commence à vieillir; & la sanie, de celuy qui est encore recent & crud; & le virus, de celuy qui est malin. Or chacune de ces matieres est tenue pour vicieuse, si elle est abondante, subtile, claire, liuide, ou noire, de mauuaise odeur & acre; & n'est pas si pernicieuse, si elle est tout au contraire. L'ordure qui rend l'ulcere fardide, est plus espaisse & plus gluante que tout ce que dessus, elle ne coule point, ains demeure comme prise & attachée à l'ulcere. Les vers s'engendrent de l'ordure, & de la pourriture, & se trouuent ordinairement dans les ulceres qui ne sont pas penses. Quant aux differences qui se prennent de la cause cōiointe, elles sont l'ulcere, ou phlegmoneux, ou erysipelateux, ou œdema-teux, ou chancreux: & de plus corrosif, ca-coëthe, ou putride. Car quelquesfois l'ulcere se fait par l'ouuerture d'une certaine tumeur, quelquesfois aussi sans tumeur par corruption de l'humour, ou de la partie. De tumeurs, prouiennent le phlegmoneux, ou l'erysipelateux, ou l'œdema-teux, ou le chancreux, qui s'appelle autrement chancre ulceré. Sans tumeur, se font le corrosif, ainsi nommé, parce qu'il va continuellement cauant & minant la partie en laquelle il se rencontre: puis le deuorant, que les Grecs appellent Nomodes, lequel creuse non seulement la partie affectée, mais aussi mange & deuore celles qui luy sont voisines. Le phagedaine est pareillement une espece de ce genre, car c'est un ulcere volage & ambulatorif, qui ronge & consomme seulement la peau, sans toucher à la chair qui est dessous. La cause de tous ces ulceres est une humeur bilieuse, acre & mordicante, tantost grossiere, tantost sub-

tile, qui s'est à coup iettée sur la partie. Ils viennent en suite d'une dartre, ou d'un erysipele, & quelquesfois mesme d'une playe qui a esté irritée par quelque médicament trop acré. Apres ceux-cy sont les vlcères cacoëthes, c'est à dire malins & difficiles à guerir; & parce qu'il est malaisé de les faire venir à cicatrice, les Grecs les appellent Dysepulotes. De cette qualité sont pareillement ceux qu'on nomme Telephiens, puis les Chiro-niens qui sont encore pires. Ces vlcères sont d'ordinaire assez grands, non toutesfois putrides, ny de mauuaise odeur, ny corrosifs, ny beaucoup douloureux: mais ils ont les bords enfléz, fort durs & calleux, & parce ils ne guerissent pas facilement: ils se couurent quelquesfois d'une legere cicatrice, laquelle estant bien-tost defaite, l'ulcere se renouuelle incontinent: ils paroissent presque semblables au cancer vlcéré, excepté qu'ils ne sont point esleuez à l'entour. Outre le vice ordinaire de l'humeur, il en faut attribuer la cause à une certaine malignité cachée, qui ne se peut que fort difficilement oster & destruire: Tels vlcères sont ordinairement des restes de peste. L'ulcere putride approche de ceux-cy, auquel non seulement ce qui coule est corrompu, mais la chair mesme de l'ulcere se pourrist, laquelle estant desia deuenue molle, glutineuse & cadauereuse, exhale une odeur infecte & maligne: & si cet ulcere n'est arresté il conduit bien souuent à la mortification. Il s'engendre quelquesfois de la seule malignité de l'humeur; neantmoins le plus souuent il prouient de ce que la chaleur naturelle de la partie est esteinte, ou par l'obstruction des artères, ou par quelque autre cause que ce soit, & ne peut plus conseruer la substance de la partie en son intégrité. Il

faut donc discerner l'espece de chaque vlcere, & la matiere coniointe, tant par ce que dessus, que par la substance & la couleur des choses qui en sortent, & par la dureté, ou tumeur, ou couleur de leurs bords. Il est de plus à propos, pour en establir plus parfaitement la methode curatoire, de bien considerer & prendre garde attentiuement à la cause antecedente de l'vlcere, & à tout ce qui se rencontre à l'entour. Car l'vlcere est bien souuent accompagné de plusieurs choses, sans la connoissance desquelles on ne peut bien venir à bout de le guerir comme il faut; telles sont, l'intemperie qui n'est pas naturelle, vn phlegmon, & toute autre tumeur: vne varice, vne contusion, ou quelque autre corruption de chair. L'intemperie se remarque par la couleur de la partie, par l'attouchement, par le sentiment du malade, & par l'application des remedes. La tumeur contre nature, paroissant au doigt & à l'œil, se manifeste d'elle-mesme. Or elle fournit de matiere & de nourriture à l'vlcere, de sorte qu'il ne peut bien guerir, si auparauant la tumeur n'est ostée. La varice pareillement, ou la veine dilatée en quelque façon que ce soit, ne permet pas que l'vlcere se consolide, si elle y desgorge quelque matiere. Quant à la contusion, & toute corruption ou vice de la chair qui est dessous, empesche que l'vlcere ne guerisse aussi bien que l'intemperie: car il ne se peut bien remplir ny consolider, ny cicatrifer, s'il n'est en la disposition qui est conforme à sa nature. Il est aussi besoin de prendre garde à la constitution des visceres, & particulierement du foye & de la ratte, & finalement à l'habitude de tout le corps, d'autant que quand le corps est bien habitué, la cure de l'vlcere en est plus facile, & plus difficile quand l'habitu-

de en est mauuaise : & c'est pour cette raison que les vlceres des Hydriques & des Ictériques sont fort malaisez à guerir.

CHAPITRE X.

Des os rompus, disloquez, ou gastez en quelque autre façon.

LEs os ont semblablement des vices particuliers, qui ne sont pas fort esloignez de ceux qui se rencontrent en l'ulcere: car il s'y fait & de la solution de continuité, & de la dislocation. La solution de continuité se fait quand l'os est ou gaste, ou froissé, ou percé, ou fendu, ou rompu. Il se gaste ou quand il deuiant noir, pour auoir esté brulé d'un fer chaud, ou corrompu par quelque ulcere malin, par vne fistule, ou par vn cancer qui le rencontre pres de là; ou bien quand il deuiant gras & mol, ou mesme carié. Ces accidens peruertissent non seulement la couleur, mais aussi la solidité de l'os; ce qui paroist assez lors qu'il est descouuert, & quand il ne l'est pas, on le remarque en mettant la sonde dans l'ulcere iusques à l'os, car on le sent mol & rude. L'os est froissé, lors qu'il n'y a quelquesfois que le dessus vn peu effleuré du coup, sans qu'il y ait rien d'esclaté: quelquesfois quand il demeure courbé sans se rompre, comme font les costes & les cartilages: mais on le peut plus proprement dire froissé, lors qu'il est forcé & repoussé en dedans; par laquelle contusion il y demeure vn certain creux, tel qu'il s'en fait es vaisseaux d'airain, quand ils se bossellent en heurtant contre quelque chose: ce qui arrive aux

enfans, & à ceux qui ont encore les os tendres, & particulièrement le crane. Et lors la chair qui le couure est contuse, au dessous de laquelle on sent en y touchant que l'os est enfoncé & caue. L'os est percé, quand on y passe la pointe de la sonde, & que le specille qu'on y met rencontre de la solidité tout autour. Il se fend enlong, & s'esclatte cōme du bois : Il se rompt, ou de trauers, ou de biais, & les extremittez en sont tātost mouffes, tātost pointuës, & ces pointes blessent souuent la chair ou le nerf : quelquesfois mesme il s'en separe de petites esquilles qui piquent & font de la douleur. On connoist facilement quand l'os est esclaté ou rompu, si les fragmens d'iceluy se meuuent de leurs places : car l'un s'aduance sur l'autre, & partant lors qu'on y touche on en sent la rudesse & l'inesgalité, & quelquesfois cela change la figure de la partie. Mais il arriue aucunesfois que tous les fragmens ne bougent de leur place, & lors le mal est plus caché, car rien ne picque, rien ne se releue en haut, mais tout est esgal au toucher, & la partie garde sa mesme figure. On en peut neantmoins tirer quelque coniecture, de ce que la partie fait de la douleur quand on la touche, & ne peut exercer sa fonction : elle deuient toute enflée, & souuent elle s'enflamme, & les causes euidentes du coup ont précédé. Mais tous ces accidens sont communs à tous les os : parlons maintenant de ceux qui sont propres à chacun en particulier.

Quand le crane est entierement rompu, ou mesmes fendu, c'est chose tres-perilleuse, & toutesfois tres-difficile à connoistre. Lors que la teste a esté rudement frappée de quelque chose dure, rude & grosse, que le sang est sorty par les oreilles, ou par les narines, que le vomissement de bile & le

vertige sont venus en suite, que la personne est tombée comme toute estourdie, sans parole, sans sentiment, il y a grande occasion de soupçonner que le test est rompu : mais à dire le vray, cela peut aussi quelques fois arriuer par la seule secousse du cerueau trop rudement esbranlé, sans aucune fracture de l'os. Nous en auons veu pareillement quelques-vns qui auoient le test cassé, sans qu'il leur fust suruenü aucun de ces accidens, faire durant huiët iours leurs fonctions accoustumées, de mesme que s'ils n'eussent point esté blesez, lesquels neantmoins furent depuis abbatus par vne grande multitude de symptomes. C'est pourquoy quand l'on a quelque opinion que l'os est rompu, il n'y a point de signe qui le fasse mieux connoistre, que de mettre la sonde dans la playe pour le decouurir. Car si on rencontre quelque chose de rude hors des futures, l'os est rompu, mais il ne l'est pas si tout est esgal & vny. L'on pense aussi quelques fois que le test soit rompu, par l'indiciõ des mauuais symptomes qui suruiennent, & neantmoins l'os n'est pas offensé à l'endroit que la peau est entamée, mais à l'opposite; & pour lors il faut bien prendre garde quelle partie est la plus molle, ou enflée, ou douloureuse, parce que c'est là qu'est la fracture. Or si finalement, outre les mauuais accidens que ie viens de remarquer, il interuient dès le commencement de l'alienation d'esprit, ou de l'assoupissement, ou vne resolution ou distension de nerfs, le test est non seulement rompu, mais aussi enfoncé, & presse les meninges & le cerueau. Mais si cela ne suruient que fort long-temps apres, il en faut rapporter la cause, ou à quelque phlegmon, ou à l'impureté des humeurs. S'il y a

quelque chose de rompu sur le deuant du nez, soit en l'os, soit au cartilage, le nez paroist enfoncé, les narines restreßies, & à peine peut on prendre son haleine par là : mais s'il est rompu de costé, ou le lieu se montre creux, ou le nez se tourne à l'opposite. La maschoire estant rompuë, comme aussi la clauicule, on ne le reconnoist que par les indices communs : mais quand il y a vne coste entierement rompuë, elle cause outre ces accidens, vn crachement de sang, vne douleur tres-cruelle, de la difficulté de respirer, de l'inflammation, de la fièvre, de la suppuration, & met en danger de perdre la vie. S'il n'y a que contusion, & enfoncement, elle produit les mesmes accidens, mais beaucoup moindres. Lors qu'il se rencontre quelque fracture en l'espine du dos, elle picque, parce qu'elle est pointuë; le lieu deuient creux, & le corps se courbe sur le deuant. Les fractures des espauls & des hanches, n'ont point d'autres signes que les communs; non plus que celles des bras & des iambes, combien qu'il importe de prendre garde, s'il n'y a qu'un des os rompus, ou s'ils le sont tous deux. Voila pour ce qui est des os rompus, venons maintenant à ceux qui sont desboitez.

Nous disons que l'os est desboité, ou quand il tombe, ou quand il se desmet de sa place en quelque sorte que ce soit. Si cela se fait entierement, & que la ioincture soit tout à fait desnoüée, & que la teste de l'os sorte de sa boëtte, les Grecs appellent cela Exarthrome : & quand les os sont seulement vn peu escartez l'un de l'autre, & la ioincture deferrée & entr'ouuerte, c'est Pararthrome. L'un & l'autre se fait d'ordinaire en quatre manieres : car

L'os se iette ou en deuant, ou en derriere, ou en dedans ou en dehors. Or toute dislocation procuient aucunes fois de causes externes, comme de coup, de cheute, & d'autres choses qui font par leur violence sortir l'os de sa place, ou en rompent ou relaschent les ligamens, ce qui aduient plus souuent aux enfans, & aux perionnes foibles, qu'à ceux qui sont robustes. Quelques fois elle procede aussi de quelque cause interne, qui relasche & affoibliff les ligamens & les articles; comme quand il s'y iette vne tumeur pituiteuse, glaireuse & coulante, laquelle r'amolliff les ligamens par sa trop grande quantité, ou rend les os glissans par sa viscosité. Or pour connoistre quand quelque article est desnoüé, le signe general est, quel article paroist esleué du costé que l'os se iette, & laisse vn creux du costé d'où il est sorty: la figure du membre demeure peruertie, & n'est plus droicte; on a beaucoup de peine à le fléchir du costé que l'os s'est aduancé, au lieu qu'il se plie fort facilement de l'autre part. Voila les marques generales qui sont communes à tous les os desboitez; il faut en suite deduire en particulier ce que chacun a de propre.

La maschoire disloquée s'aduance ou en deuant, ou vers l'un des costez. Quand elle se iette en deuant, le menton aduance en dehors, & les dents de dessous outrepassent de beaucoup le rang de celles de dessus: & lors qu'elle se iette de costé, le menton se tourne vers la partie opposée, & les dents inferieures ne se rapportent pas iustement sous celles d'enhaut qui leur sont pareilles. Si les vertebres du col sont disloquées en dedans, on a de la peine à respirer, & à aualler, ce que l'on

prend par la bouche, il se fait aussi là vn creux: si en dehors, outre ce que dessus, le menton se joint à la poictrine, & se fait vne tumeur au col. Lors que les vertebres de l'espine du dos se desnoient, bien qu'elles ne sortent point entierement de leurs places, elles font presque de mesme façon ou vn creux, ou vne bosse par dehors, ou courbent l'espine de costé ou d'autre, de sorte qu'elle n'a plus sa figure droicte. Mais quand elles sont entierement desmises, les membranes & les nerfs sont pressez, ou mesmes deschirez, en suite dequoy il arriue, outre ce que ie viens de dire, que, si ce sont des vertebres placées plus haut que le Diaphragme, les bras & les costez perdent leur mouuement, ou tombent en conuulsion; il suruient vn vomissement, & vne difficulté de respirer: & si les vertebres disloquées sont au dessous du Diaphragme, la resolution ou conuulsion se fait aux cuisses, d'où s'ensuit tantost vne suppression, tantost vn escoulement non volontaire des matières fecales, ou de l'vrine. L'espaule se desmet le plus souuent vers l'aisselle, rarement en deuant, & iamaïs en haut. Si c'est vers l'aisselle, le bras s'esloigne du costé, vers lequel on ne le peut plus ramener: si en deuant, le bras se remue facilement en arriere, & difficilement en auant. L'os du coude se desboite d'auec celuy de l'espaule de toutes parts: quand c'est en derriere le bras demeure courbé sans se pouuoir estendre, & deuiet plus court que l'autre; si en deuant, il demeure droict sans se pouuoir plier. La dislocation de la main se fait tout de mesme.

La hanche estant disloquée en dedans, ce qui adient souuent, toute la cuisse se reiette en de

hors, ne se peut que fort difficilement r'approcher de l'autre, & est plus longue; si c'est en dehors, cōme il arrive quelquesfois, la cuisse se porte toute en dedans, & est plus courte que l'autre: cēt os se desmet fort rarement en deuant ou en derriere. La dislocation du genoüil se peut faire de tous costez, excepté en deuant: & se manifeste par les communes marques, comme aussi en ce que les nerfs se roidissent ordinairement, de mesme qu'en la dislocation de la hanche. Les os de la paume de la main, & de la plante de pied se deiettent tantost en deuant, tantost en derriere, & où l'os s'aduançe il paroist vne tumeur, & vn creux de l'autre costé. Les doigts tant de la main que du pied, se desmettent en tous sens, dont les marques sont communes, parce qu'ils n'ont plus leur figure naturelle, & qu'ils ne se peuuent plier du costé où l'os se forjet.

Finissons par là, & concluons ce discours *Pathologique* des accidens qui destruisent la santé, de leurs causes, & de leurs signes, & finalement de tout ce qui peut affecter le corps humain contre l'ordre de la nature. Et combien que ces choses semblent recueillies en abrégé, si on prend toutesfois la peine de les examiner particulièrement avec vne diligence curieuse, & vne studieuse application d'esprit, on reconnoistra finalement, que rien n'y est obmis de ce qui concerne l'entiere & parfaite connoissance des maladies, & des choses qui s'y doiuent rapporter, & qui peuuent seruir pour en entreprendre & pour suiure la cure. Je pense auoir suffisamment deduit les choses plus importantes, passant celles

580. *Pathologie de Fernel.*

seulement que i'ay creuës peu ou point considerable, & que chacun, pour peu sçauant qu'il soit, peut de soy-mesme connoistre & comprendre sans aucun estude.

*Fin du septiesme Liure de la Pathologie,
touchant les maladies externes
du corps.*



EXTRACT DV PRIVILEGE

du Roy.

P Ar grace & Priuilege du Roy, en datte du vingt-neufiesme Auriil mil six trente-huict, signé par le Roy en son Conseil du Moley, il est permis à la Veuue de Iean le Bouc, Marchand Libraire à Paris, d'imprimer ou faire imprimer, vendre ou débiter vn Liure intitulé, *Les Oeuures de Iean Fernel*, toutes ou partie, mises en François par A.D.M. & ce durant le temps & espace de neuf ans entiers & accõplis, à compter du iour que ledit Liure aura esté acheué d'imprimer. Et deffenses sont faictes à tous autres, sous peine de trois mille liures d'amende, d'en imprimer, vendre ny debiter, ainsi qu'il est plus amplement porté par les lettres du Priuilege: lesquelles en vertu du presert Extraict, seront tenuës pour bien & deuëment signi-

fiées ; & à cet Extraict sera adiousté
foy comme à l'original , à ce qu'aucun
n'en pretende cause d'ignorance.

*Acheué d'imprimer le vingt-troisiesme
Auril mil six quarante-six.*